

**МУРОД МАНСУР**

# **ЖУДОЛИК ДИЁРИ**

*Roman*

Иккинчи китоб

## **НАЖОТ ФАРИШТАСИ**

«ШАРҚ» НАШРИЁТ-МАТБАА  
АКЦИЯДОРЛИК КОМПАНИЯСИ  
БОШ ТАҲРИРИЯТИ  
ТОШКЕНТ — 2003

Мусаввир *Хурийд Зиёхонов*

Муҳаррир *Toҳир Малиқ*

«Жудолик диёри романининг мазкур иккинчи китобида сиз, азизлар, биринчи китобда ўқиб, меҳр қўйганингиз қаҳрамонлар — Султонмурод, Марғубаларнинг тақдирлари, Маҳфуз, Ёдгормурод, Ҳозик тўра, Эшон почча ва диёридан адашган турналардек ҳали-хануз тўзиб юрган қавм ҳаёти-кечинмалари билан танишасиз. Адиб бу асарда саргузашт унсурларидан маҳорат билан фойдаланганки, бу сизни бефарқ қолдирмайди, деб ўйлаймиз.

## АРМОНЛАР ДИЁРИ

Жудолик диёри...

Армонлар диёри...

Софинчлар диёри...

Ватандаги ватансизларнинг унсиз фарёдлари.

Ардокли адибимиз Мурод Мансурнинг янги асарларини шундай сифатласак ҳам бўлар. Мазкур асарнинг биринчи китоби билан адибиёт муҳиблари танишлар. Адибнинг қўп йиллик меҳнатлари самара бериб, иккинчи китоб ҳам ёзилди. Халқимизнинг яқин ўтмишдаги армонлари, унсиз фарёдлари ёзувчининг қалбини ларзага солиб, сўнг қоғозга кўчди. Умид шулки, бу унсиз фарёдлар сиз — муҳтарам китобхонни ҳам бефарқ қолдирмас. Ёзувчининг юрагини титратган воқеалар катта авлод хотираларини уйғотиши табий. Ёш авлодга эса тарихимизнинг бу саҳифалари эртак каби туюлса ажаб эмас. Халқ бошига шунчалар ташвишлар тушиши мумкинлигини улар ҳали ҳис этолмасалар керак.

... Олий ўқув юрти талабалари билан бўлган учрашувдан сўнг бир қиз яқинлашиб, савол берди: «Сиз истиқлолнинг буюк неъматлигини айтдингиз, лекин айрим катталар «аввалги замон яхши эди», дейишади. Кимнинг гапи тўғри? Қайси гапларга ишонишимиз керак?» Толиба ва унинг тенгдошлари биз — катта авлодга шундай савол беришга ҳақли. Чунки ўтмишни қўмсаб қоладиган қорин бандаларининг бундай гапларини баъзи-баъзида биз ҳам эшишиб қоламиз. Ажабланамиз: «Кечаги куннинг нимаси яхши бўлган экан? Тўғри, ўша ўтмиш — бизники. Уни қоралаш, лой чапиш онгсизлик белгиси. Лекин аввалги жамиятнинг қора кунларидан кўз юммоқлик ҳамadolатдан эмас. Бегуноҳ отилганларнинг, совуқ сибириянинг ўрмонларида жасадлари қолиб кетган аждодларнинг, Ватан соғинчида кўз ёшлари эмас, қон ёшлари тўкиб, армон-ла вафот топганларнинг руҳлари олдида нима деб жавоб берамиз? Кечаги ўтмишни «тўқлик замони» деб хисобловчилар очарчилик йилларида бир бурда нонга зор равища кўчаларда ўлиб қолганларнинг руҳи олдида нима деб жавоб берар эканлар?..»

Учрашувларда кўп қатори бизга ана шундай турли саволлар беришади. Дам жиддий, дам ҳазил оҳангига жавоб қайтарамиз ва бу саволларнинг аксари ёдан кўтарилади. Лекин бу қизнинг саволи эса унутиладиган хилидан эмасди. Бироқ, Муроджон аканинг асарларини ўқиш жараёнида ҳам бу савол бот-бот қулоғим остида жаранглади ва ўша талабчан синглимизга шу китоб орқали хаёлан жавоб бергандай бўлавердим.

Фасллардан бирига «олтин куз» деб таъриф берамиз. 1991 йилнинг кузи ватанимиз тарихидаги олтин даврни бошлаб берди, десак янглишмаймиз. Мен ўша ойлари ота юрт тупроғини ўпишни энг улуғ саодат деб билиб, Худога шукрлар қилган ватандошларимиз кўзларида ёшни унута олмайман. Шулардан бири айтган эди: «Дадам жон берар вактларида дедиларки: «Болам, мен сенга бойлик мерос қолдирмаяпман, мен сенга Ватан соғинчини, ҳижронни мерос қолдиряпман. Юрт озод бўлган дақиқадаёқ қанот чиқариб уч, агар узокда эсанг-да, икки уммонни сузуб ўтсанг-да, бор-да, мен учун ҳам Ватан туфроғини ўп, мен учун ҳам бу мұқаддас туфроқни кўзларингга сурт...»

«Арининг заҳрини чекмаган болнинг қадрини на билсин», деганларича бор...

Истиқлол берган неъматлардан яна бири — ана ўша армонлар китобларга кўчди. «Жудолик диёри» ўша армонларнинг бир қисми, лаҳзаси халос. Ёзувчи 1966 йилги Тошкент зилзиласи баҳонасида бузилган уйларни, хароб қилинган боғларни, лойқаланган анҳорни бежиз тасвирламайди. Одамларни серфайз боғлардан кўчирилиши баёнида рамзий маъно бор. Совет мағкураси бу ҳолатни «Ленинча халқлар дўстлиги тантанаси», деб таърифлагани билан аслида бу ҳам йигирманчи-ўттизинчи йиллардаги зулмнинг бошқа либосда қўриниши, мантиқий давоми эди. Ёзувчининг кечинмалари факат ўзига хос эмас, бу — халқнинг тилга кўчмаган изтиробларидир. Султонмурод ва Маҳфузанинг тақдири — айрилиқларнинг сиёҳ билан эмас,

кўз ёшлари билан битилган баёни. Ёдгор — уларнинг фарзандлари — келажакка бўлган умид. Илҳом сутчи — бу дунё ҳою ҳавасларидан юз ўғирган одам. У қурашчи эмас, у умид ҳам эмас, лекин ундаги покликка ҳавас қилмоқ мумкин. Ҳозик тўра — ёруғ келажак умидига ишонч. Парпи бебаҳт — гуноҳлар учун ажрнинг нақдлиги. Унинг тузалиши зулмнинг абадий эмаслигига ишора.

Асардаги бу каби рамзий маънолар ўқувчини фикрлашга даъват этади. Китобхонлар ёзувчилар билан учрашганларида «асарингиздаги фалон қаҳрамон ҳаётда бўлганми?» деб сўрашади. «Жудолик диёри»ни ўқиганларда ҳам, шубҳасиз, шу савол уйғонар. Мактабдаги адабиёт дарсларида «прототип» деган тушунча ҳақида кўп гапирилгани учун ҳам бундай саволлар туғилади. Аслида ёзувчи ҳеч бир қаҳрамонини ҳаётдан тўлалигача қўчириб олмайди. Адабиётда «прототип» билан бирга «умумлаштириш» деган тушунча ҳам бор. Айтайлик, мазкур асардаги Парпи бебаҳтнинг қароқчилиги бир одамдан олинса, унинг тўғри йўлга ўтиши бошқа бир одамнинг фазилатидан олинган бўлади. Ҳозик тўра ҳам кечаги тарихимиизда ўтган улуғлардан бирини эслатар, лекин у ҳам ҳаётда ўтган биргина одамнинг тўла тасвири эмас. Бир неча яхшиларнинг фазилатлари ёзувчи таҳлилидан ўтиб, хаёлоти чашмасидан баҳраманд бўлгач, юзага келган қаҳрамонлардан бири. Айрим олимларимиз буларни «тўқима образ» ҳам дейишади. Бу атамани «Жудолик диёри»га тўла тадбиқ эта олмаймиз. Шундай десак, асарнинг ишонтириш қувватига путур етказган бўламиз. Ро-ман — ҳаётий воқеаларнинг умумлаштирилган баёнидир, дейилса ҳақиқатга мувофиқдир.

Мазкур асар гарчи, кечаги кунимиз ҳақида бўлса-да, у бугунги кунимиз учун хизмат қилади. Ўтмиш замонни қўмсаганлар бу китобни ўқисалар, фикрларини ўзгартираслар. Менга савол берган синглишимиз эса жавобни шу китобдан олсалар ажаб эмас.

**Тоҳир МАЛИК**

## ИЗН ИСТАБ...

Аввало: Бисмиллаҳир роҳманир роҳийм

Сўнгра: Жудолик диёрида кечган бу тарихнинг давоми ва уни Аллоҳ қодир этганича ёзганимиз хусусида. Умидим бор, шояд Аллоҳ чиройли этса.

«Қиссаларнинг гўзали Куръон қиссаларидир», то абад тилдан тушмагай. Қолганлари уннутилиб, алал-оқибат йўқолишга, ўчишга маҳкум. Улар қусурли банданинг қусурли сўзи, битиги, холос. Фақат шулар орасида Аллоҳ таборак ва таоло Ўзи изн бериб, жиндек юқтирганлари, Ўзи хуш кўриб, ихлос тўнини ёпган ва қабул безаклари ила безаб, кам-кўстини тўлдирганлари ҳам борки, ана ўшалар яшаб қолуви, ўқиганларга ҳар гал чиройли кўринуви ва то қиёматга қадар мўминларнинг қўлидан тушмаслиги мумкин.

Демак, Аллоҳ азза ва жаллага хуш келадурган бир нималар битмак мумкин?..

Ахир, меҳр-мурувват, силаи раҳм, етимларнинг бошини силамоқ сингари чиройли амаллар, шаҳидлик шаробини тотмоғу хидоят топмоққа ўхшаш гўзал ажрлар ҳали тугаб битмаган. Бу ҳақида қанча гўзал ривояту қиссаю тарихлар мавжуд. Нафас ютмай эшитганмиз уларни. Қолаверса, энг мушкул дамларда динию иймонини кафтида лахча чўғдай тутиб, тоғ-тошларга чиқиб кетган, ўз диёrlаридан ҳижрат этганларнинг Аллоҳ субҳонаху ва таолога ҳам хуш келгувчи жудолик тарихлари-чи?!

Билмам, нотавон кўнглимга қачон, қайдан илашди бу ҳавас, жудолик диёри тарихининг ilk китобини ёзиб тугатиб ҳам таскин топмадим. Битганларим айрилиқ қўшигининг дебочаси, холос эди гўё. Ҳали олдинда зўр имтиҳонлар, сарагу пучакка ажралишлар тургандек эди. Кимга жаҳон аҳли аёллари ҳавас этса арзигулик сабри жамииил, кимга шаҳидлик мартабаси ато этилуви мумкиндек, кеча жаҳолат ва разолат дунё-сида зўр саналиб юрганлар эса ниҳояти бир қокилув илиаadolat тарафга юз беруви, хидоят топмоғи мумкиндек эди, валлоҳи аълам.

Шундан бери ўзимни бу юмушга чоғлар эдим. Тунги дуолариму тонгги илтижоларимда сўрардим. Ҳафталаб, ойлаб «тирноқ»лаб бир нималар топган-жамлагандек бўлардиму... ўшал қайғули қисса тасаввуримда мунглиғ эртакдек жонланиб келиб, уни бирордан қизғонгандек, худди уч-кетини йўқотиб қўядигандек шошиб-энтикиб ёза кетардим. Аммо надоматлар бўлсинким, бу ҳол бир ой ва ё ундан ортиққа чўзилмай яна аро йўлга кириб, қаён борарини билмаган мусофирдек туриб қолардим. Ич-ичимдан сезиб турибман, нимадир монелик қилияти. Нима қилсам, тизгинни қўлга оламан? Яна ўша самимият, ўша ёниқ ҳислар, ширин бир титрок қайта меҳмон бўлиб келади — билмасдим, билолмасдим.

Ахийри топдим! Ёлғиз ўзидан сўрамоқ лозим экан. Мурод дорам — умидим бор, деб илтижо этсанг, албатта, барояд, ё раб — илоё, етгин, жавоби берилгуси экан!

Биласиз, «Жудолик диёри»нинг биринчи китобида чин қўкламни соғинган боғлар мисоли алдамчи насимларга учиб қолган қавмим жудоликларидан ҳикоя этган эдим, энди эса, унинг нажоти учун бош тикиб чиқсан бир ҳовуч кишилар — ботир акаларимизнинг аламли қиссаларини давом эттироққа йўл излаб, изн истардим.

Акаларимизни жиндек бўлса-да, танийсиз. Эшитгансиз улар ҳақда. Улар ўз юртларига сифмаб эдилар. Улар иймонларини қутқармоқ-чун энг аямли нарсалари — моли, ҳоли, жигарларидан айрилиб, ватанларидан жудо бўлиб, бўлак диёrlарга бош олиб кетмиш эдилар.

Ана ўшал ҳижрат юрти — Тангритоғ томонларда Дориламон бир диёр куриб, уни маскан тутмоқ-чун курашган ўша ботурлар қиссаси мана, неча йилдирки, оғиздан-оғизга, наслдан наслга эртакдай қўчиб келмоқда. Забт этилмаган иймон қалъасию ҳаловат диёри мисол, ҳижрон қўшиғи каби!..

Ё, қодир Аллоҳ! Ўзинг изн бер, шул қўшиқнинг давомини ёзмоғимга, Ижозат эт, Ватанию динини деб тоғларга чиқиб кетган, иймонини асраб қололган биродарларим қиссасини бу ёқда қолганларга етказмагимга. Самимиятлар ато этиб, илҳому күшойишлар бер, аввало Ўзингга,

қолаверса, жумла мўминга манзур бўларли бир нима битмагимга. Уни Ўзинг мумтоз эт. Суюкли қил. То қиёмат қадар яшаб қолгувчи асарлар жумласига қўш.

Ҳасбияллоҳу ва неъмал вакил — Ўзингга таваккул айлаб, раҳмат ойи — Моҳи рамазон ичи бошладим ва бу тарихни ўқиган наслларга сенинг ҳидоятингни соғиниб, китобнинг бу қисмини «Нажот фариштаси» деб атаб, ёзилажак учинчи китобини «Рушди ҳидоят» деб белгиладим. Илоҳо, ниҳоясига адашмай осон етмагимга Ўзинг мушаррафлар айлагайсан. Омин йа Роббил оламийн.

**МУАЛЛИФ**

Рамазони шарифнинг бешинчи кунлари.  
Тошкент, фазилатли «Қозигузар» маҳалласи

**ЖИНДЕК ИЗОҲ:**

Асарнинг аввалини ўқиб, давомини қутмоқда бўлган азиз ўқувчиларимга маълум бўлсинким, Султонмурод ва Маҳфуза тарихининг жудолик юртига тегишли қисмини аввалгидек Мақсад ҳикоя қилиб, ўртадаги воқеаларни Аллоҳ изн берганича ўзим тўлдириб бормоқни ихтиёр этдим.

Аллоҳ ўзи бу муробитларни ҳаммамизга суюкли этиб, ўқиганлар қалбига рушди ҳидоятини солсин. Уни битмагимга илҳом берган ва шоштирган нарсани ҳам айтиб қўя қолай.

Бу Алихонтўрам Соғуний жанобларининг бир оғиз қаломлари — «Эй бор Худоё, агар менга жаннатингдан насиб этган бўлсанг, ботурларимсиз киргизмагил», деган дуолари бўлди.

Фаришталар омин деган бўлсин. Омин йа Роббил оламийн.

**Мурод МАНСУР,**  
1 март, 1999 йил

## Б и р и н ч и б ў л и м

### ЎША БИРАВНИНГ МАҲФУЗАСИ

#### 1. КИМНИНГ ЭРКАСИСИЗ, ЁДГОРМУРОД?

Мезбонқоғоз жимитдеккина-ю, жуда бежирим эди.

Ёзувлари ҳам бир бошқача, ишқилиб менинг тишим ўтмайдурган бир имлода эди. Мен бунақасини умрим бино бўлиб, энди кўриб туардим.

Тавба, Чаман ака шунақа зўр одам бўлиб кетган эканми — хорижларга чиқадурган, чет элликлар билан борди-кељдилар қиладурган?! Узоқ-узоқ йўқ бўлиб кетиши... шунданмикан?

Аммо ташриф қоғозини ўнгариб, қувониб кетдим. Бу ёғи — ўзбекона эди: Жаноб Чаман Убайдуллоҳ ўғли. Манзил-мавоземиз: Тошканди азим, Қумлоқ мавзе, 17-Зарқайнар кўча (Калковуз ёқалаб ўтгайсиз), 58. Телефунумиз... ва ҳоказо.

Ол-а! Кўзимни боғлаб қўйсалар, топиб борарман! Талабалик йилларим қаерда турибман?! Кечалари дарс қилиб ўтириб, уйку босиб келганида Калковузга шўнғиб-шўнғиб олишларимиз ёдимга тушиб кетган эди. Ўша ерда туриб, Чаман акани учратмаган эканманми?

Эртасига ишга ўтибоқ сим қоқишига тушдим. Аммо мен кўзга тўтиё этиб, тераётган рақамларим ҳеч уланмасди. Ахийри ишга уннаб, чалғиб кетибман. Индинига бир қисталанг топшириқ билан Андижонга жўнатиб юборишиди шу билан ёддан кўтарилибди. Чаман ака шу ҳафтанинг ичи қидириб топсин, деб тайинлагани ҳам бир бўпти, менинг алаҳсиганим ҳам...

Шанба куни ҳамма юмушларни йигиштириб, излашга тушдим. Бу сафар қўнғирогим улана қолиб, телефонни ширинтойгина болакай кўтарди;

— Алуё, Сиз ким бўлутсиз? — дерди у ширин бир тилда жовурлаб.

— Сен танимайсан, — дедим.

У болаларча ижикилади:

— Нега танумасканман?

— Чунки кўрмагансан-да, — дедим. У гаплашган саринг гаплашгинг келадиган — ёқимтой эди.

— Ҳич келмаганмусиз? — деди у эркаланиб.

— Йўқ, оковси, бормаганман.

— Унда қаердан билутсиз телуфунимизну?

— Биламан-да...

— Ҳа-а, алдоқчи, биларкансиз-ку...

— Унда нима дейиш керак?

— Ундуму?.. Хассалому алайкум, — деди у қарз саломини эслаб.

— Валлайкум ассалом! Кат-то йигит бўлинг, — дедим мен эриб. — Отингиз нима эди, той бола?

— Маниму? — деди у teng кўриб гаплашаётганимдан тантиқланиб. — Ману отум...

— Хўш?

— Отум о-от, — деди кутилмаганда тегажоғланиб.

— Йилингиз тойчоқ! — дедим мен ҳам.

У қиқирлаб кулди ва гаплашгични тушириб юбориб, бир нималар тарақлаб кетди. Бола уни ола, «фуф-фуф»лади:

— Алуё, кечирас, тушуб кетту. Эшитопсизму?

— Синмадими, ишқилиб?

— Йўқ, синмапту.

— Хайрият. Эҳтиёт бўлинг-да, той бола.

— Хўп бўладу, — деди у одоб билан. Нимагадир у баъзан-баъзан «бўладу-келаду»лаб қолар эди<sup>1</sup>.

Мен сўрашимни қўймасдим:

— Отингизни айтмадингиз-ку, той бола?

— Манму?

— Ҳа-да.

— Ману отум, — деди у дона-дона қилиб, — Ёд-гор-муро-од. (У эркаланиб, бошини бир чиройли буриб қўйганини... яққол тасавур этдим.)

— Ў-хў, зўр-ку, Чиройлийкан! — дедим беш кетиб.

— Сизнуки-чи? — деди у қизиқиб.

— Меники Мақсуд.

— Сизнукиям чиройлуйкан, — деди ҳаваси келиб. — Сиз бизнукига ҳичам келмаганмусиз?

Борганман, дея қолсаму... ана, келганакансиз-келганакансиз, деб сакраб-қувнай кетса! Бўлади-ку, шунаقا болалар: бирпасда элакишиб, сирачдек ёпишиб оладиган...

— Йўқ, оғайни. Худо хоҳласа, энди бораман, — дедим уни севинтиргим келиб. — Боравурайми?

— Келунг-келунг-келунг! — деб ўйноқлади у.

— Ким бор? Ёлғиз ўзинг зерики-иб ўтирибсанми?

— Бувижон борлар, опокум борлар. Ҷақирайму опокумларни? — у шошиб қолганидан гаплашгични ташлаб, ташқарига чопди. — Опоқу! Асал опоқу! Амақум чақироптула.

Ана, холос! Ҳалитдан амаки ҳам бўлиб қолдим! Мен мийифимда кулиб, уни ўйлардим: ким экан, бу ширинтой? Чаман аканинг ўғли десам, «опоқу»лаб турипти? Ё нумерда адашдиммикан?

Бу орада кимдир келиб, гаплашгични кўтарди:

— Лаб-бай?! — деди аёл киши чарс овозда, гўё бошимдан қайноқ сув қўйгандек қилиб. Унинг бир оғиз сўзи шундай заҳар-заққум аралаш эдики, ҳушим учиб, калаванинг учини йўқотиб ҳам қўйдим.

— Гапиринг! — деди у боягидан ҳам терсроқ қилиб.

Адашиб тушибман шекилли, деб ўйлаб:

— Чаман аканинг уйлари...масми? — деёлдим зўрга.

— Уйлари!.. — деди аёл «Нимайди?!» деган каби. Тавба, аёл киши ҳам шунаقا чарс бўларканми! Иложи борича юмшоқ сўрашга унналдим:

— Кечирасиз, опой. — Мен уни бошқа миллатдан деб ўйлаб, қовун туширибман.

— «Опой»изга бало борми?! Гапиравуринг гапиззи?! — деб жеркиб берди у.

— Кечирас, — Дамим ичимга тушиб кетган, тезроқ кимлигимни айтмасам, гаплашмай қўяқолиши ҳам мумкин эди. — Чаман ака тунов куни сўраб борганаканлар. Мен Мақсудман, оғайниларининг укаси, — дедим.

Аммо аёл юмшаш тугул,вой, шунақами, деб қўймасди. Бунга сари юрагим пўкиллаб, дедим:

— Эшитяпсизми, мен...

— Эшитяпман, — деди у «кар эмасман!», деган каби. — Топиб келаласизми?

— Бороламан. Аммо ўзлари, қатталар?

Аёл гапни қалта қилди:

— Келсангиз — биласиз.

Во-оҳ, ана сизга опоқу!.. У гаплашгични илди-қўйди. Фақат болакайнинг «Ким, опоқу? Адамлани ўртоқлариму?», дегани чала-ярим эшитилиб қолди.

Бечора, ҳар битта қўнғироққа чопиб бораётгани, «алуё, кимсуз»лаб ижикилаётгани...

<sup>1</sup> Бу кимдан юққанини, ниманинг касри-аломати эканини қаҳрамоним қайдан ҳам билсин. (*Муаллиф*)

шунданми экан? Адажонисини ичикиб кутаётган у тойчоқ — кимнинг эркаси экан?..

Калковуз ёқасидаги қатор толлар қийғос сочпопук чиқариб юборган эдилар. Шамол бу ерда ҳам улар устида қувлашмачоқ ўйнаб чарчамас, ҳали новдаларига осилиб ҳалинчак учар, ҳали аллақаёқларга изгиб кетар эди. Жаладан кейингидек бўтана сув қирғоқларгаю толларнинг йўғон қора илдизларига бош уриб ҳалопларди. Шаҳарнинг ичидаги, яна жинкўчалару томи-томига тулашиб кетган маҳаллалар оралаб шундай катта сув оқиб ётганига ақлим бовар қилмай анхор ёқалаб, айтилган жойни излаб борардим. Ёнгинамдан тандирдан янги узилган нон ҳидини анқитиб, велосипедли болакай ўтиб кетди. Олдида нон савати — бозорлигию кўзи томда, варрак соғаётган болакайларда. Ўзи эса шувиллаб боряпти. Қойил! Осмони-ҳафтимдан дардараклари дариллаб варрак овози келади, аммо ўзини илғаб бўпсиз!

Болакайлар оламни унутиб, қийқиришарди:

*Шамо-ол, бағринг камо-ол,*

*Варрагимни осмонингга о-ол.*

Яшавор! Булар ипни бўшатгани сари осмон варракни ютиб боряпти...

Кўча охирлаб, Калковуз аллақандай ташландиқ боғ-майдонга кириб борадиган жойда эса... астъфируллоҳ, уни қаранг! Чакмоқ урибми, ёнибми, батамом ку-йиб тушган, баҳайбат ёлғиз дарахт кўринар, у ёнғоқ десам ёнғоққа, қайрағоч десам, қайрағочга ўхшамасди. Шунақа аборки, куйиб кўмир бўлқопти.

Мен қаерга келганимни билолмай гарангсиб турарканман, якка тавақали эшик ортидан аёл кишининг ўқдай овози янграб қолди:

— Акбар-ув, балогинага йўлиққур-ув?!

— Кетвотман. — Тол тагида кўринган бола чelагини кўтаролмай инқиллаб, икки эгилиб келарди.

— Ху, қирилибгина кеткур! Ман нимага юборувдим, отгинанг ўчгур? — Аёлнинг ўзи кўринмаса ҳам қарғиши қия очиқ эшикдан ўқдай чиқар эди.

— Мана, опкевотман.

— Ху, опкемай кет. Самовар эриб битди-ку.

Бола сув тўла пақирни у қўлидан бу қўлига олган сари ўша томонга обкашдек эгилар, ҳар қадамида пақир тўпифига урилиб, сув чайқалар, чайқалгани майли, иштонининг ёни шалаббо бўлиб борарди. Қадамимни тезлатдим:

— Қани, менга беринг-чи, саритой.

Юзларига сепкил тошиб, шу сепкили ўзига ярашиб тушган болакай қаддини ростлаб, афтиимга тикилди. Кемшик тиши уни яна ҳам беғубор қилиб кўрсатарди.

— Бизаникига кевотсизми? — деди қизиқсиниб.

— Шунақага ўхшайдими? — дедим жилмайиб.

— Ростиэзи айтинг. — Кемшиктой энди бу томонимдан айланиб ўтди.

Мен чelакни олиб, унга эргашавердим:

— Яхиси, ўзингдан сўраб қўяқолай: сен Чаман амакини танийсанми?

— Нега амаки бўларканлар?!.. Тоғамла-ку!.. Ҳе-ҳеј, Сизни қаранг-у! — У олдимга тушиб ўйноқлади.

— Тоғанг? — Мен хайратланиб қарадим унга. Боланинг сап-сариқ юзида қилча ҳам ўхшашлик... кўринмасди. — Ростингни айт?

У боягидек ирғишлади:

— Бизаникига кевотганакансиз-ку... — Сўнг ҳалиги якка тавақали эшикка қараб чопди. — Ойи, бизаникига келишвотти, бизаникига...

Бу орада мен остонасига катта харсангтош ётқизилган эшикка етиб қолган эдим. Қия очиқ эшик ортида эса, бир қўли тиззасида, бир қўли билан ҳовли супураётган қора нимчали, рангпар жувон кўринарди. У ҳам кўзи менга тушиб, чимирилиб қаддини ростлади ю супургини йўлга

ташлаб, бурилиб кета бошлади. Юпқа лаблари хунук қимтилиб кетдими-ей. «Кўзим учиб турувди ўзимам» дегандек. Мен тўхтаб қолган жойимда... ноилож болага эргашдим.

Эшик алмисоқдан қолган, офтобда ўнгиб-оқаридан кетгани билан ҳовли жуда катта, юқоридаги болохонали узун уйга боргунча ишком тагилаб аллақанча юриш керак эди. Ҳали токи очилмаган ишкомлар неча қатор бўлиб, бир ёни ҳалиги ташландиқ майдонга туташиб кетган. Тепада гир атрофини қари қора толлар ўраган овлоқ ҳовуз ҳам кўриняпти. Тагида қораشاқшақлар учиб-қўниб, ора-чира бир чиройли шақиллаб-сайраб кўядилар.

— Энди бера қолинг, — деди болакай останадан ўтишимиз ила пақирнинг бандидан тутиб.

— Сен шошма, — дедим мен уни аяб.

Биз поядан кўтарилиган сўри таги билан пастак ошхона томон юрдик. У ерда иккита ғишт устида қўнқайган самовар бурқсиб, ўтхонаси жизиллар эди. Кемшикточ чопиб бориб, самовар карнайини олиб ташлади-ю, қопқоғини оча туриб, қўли куйиб «отиб» юборди.

— Ҳазир бўл. — Мен сувни солиб, қопқоғини ёпиб бердим.

Шунгача ҳам бояги чимирилган аёл кўрина қолмасди. У тепадаги уйга кириб кетганча... кетиб борарди. Элакишиб бўлган бола қўлимдан тортқилаб, қистай бошлади:

— Сиз юравуринг, у ёқда опоқбувимла борла. Кирмасайиз хафа бўладила.

— Ким дединг?

— Ойтўра бувимла...

— Шунақами? — дедим ичим ёришиб келиб. — Шошма, сенинг отинг... Акбармиди?

У ажабланиб тикилди:

— Қаёқдан биласиз?

— Ёдгормурод-чи, у қаерда? — дедим баттар ҳайратга солиб.

— Хе, сизни — алдоқчи, бизаникига кевотганакансиз-ку, ҳаммовзани биларканси-ку, — деб у беғубор илжайди, сўнг яна қисташга тушди. — У ўшатта, опоқбувимлага қараб ўтирибди.

— Оббо, той болалар-ей, катта йигит бўлиб, қараб ўтирибди дегин? — Мен уларни алқаб қўйиб, ўсмоқчиладим: — У сени укачангми ё?.. — Ўзим эса бу аёлга қолган болаларнинг шўри курсин, деб ўйлардим. Танимаган одамга шунча димоғ-фироқ, буларни нима қилмаскан? Чайённинг ўзи-ку?

Ҳовлининг ўртасига бориб қолганимизда катта уйнинг эшиги очилиб, ҳалиги жувон кўринди. У ковшандозда калишини кияркан, елкасидан қора илондек сирғалаб тушаверган сочини зарда ила орқасига отиб, менга қараб юрди. Кўлида бир парча қофоз.

Мен беизн кириб келаётганимдан хижолатга тушиб, тўхтаб қолдим: тўхтамасам, чақиб олиши ҳам тайниндек эди. Аммо у чимирилиб келиб, қаршимда тўхтади-ю, томдан тараша тушгандек қилиб:

— Мана, шунга келганимисиз? — деди кўлидагини узатиб.

Мен тахта бўлиб қолгандим. Қофозни қандай олганимни ҳам билмайман.

— У ёғини ўзингиз биларканси! — Жувон месимагандай бурнини бир жийириб қўйиб, боя супургисини ташлаб келган жойга қараб юраверди.

Ол-а, хўп одамига учрабман-ку! На салом бор, на алик, на мулозамат... Мен хатчани ўқишимни ҳам, кетишимни ҳам билмай анг-шанг қолган эдим. Кўз олдимдан эса, бояги қоп-кора дараҳт кетмасди, тавба.

Бир маҳал қарасам, Кемшикточ тирсагимдан тортқилаб, қулоғимга шивирляяпти:

— Сиз юравуринг, опоқбувимланинг олдилариға киравуринг. — У кўз қисиб, нимадир демоқчи бў-ларди.

Ноилож эргашдим. Шундаям ҳалиги аёлдан хавфсираб турибман. Назаримда, ҳозир ундан эшитадиганимни эшитиб оладигандекман. Ниҳоят, болохонага чиқиладиган ёғоч зинанинг ёнгинасидаги каталакдай бир уйга бурилдик. Унинг ковшандози ҳам ичкарисида эди.

Мен холамгиларнида туриб, ўқиб юрган кезларим шу атрофдаги кўп уйларга киргандман.

Бош сүқ-ганингизданоқ гуп этиб, минг йиллик зах тупроқ ҳиди димогингизга урилаверади. Неча қайта тезлаб ҳам ундан қутулиша олмайди. Ковшандоз четига қирраси билан териб чиқилган мусулмон ғиштлар ҳам бу уй қадимдан қолганидан дарак бериб турар, аммо ундан таниш зах ҳидига қўшилиб, яна аллақандай мушк-анбар ҳидлари ҳам уфурарди.

Мен мўъжаз хонага кирибоқ унинг тўридаги хонлар замонидан қолган қуббали рух каравотда оппоқ чойшаблар ўртасида ўтирган ҳалимдеккина кампиршога ҳайратланиб тикилиб қолибман. У қиблага қараб тасбех ўгириб ўтираси эди. Кўлим ўз-ўзидан кўксимга қараб кетиб:

— Ассалому алайкум, холамойи, — дедим.

Мен ўзимни яқин олганимча бор эди: ажинлариям бир ажабтовур нур билан тўлган кампиршо чиндан ҳам холаларимгами, кимгадир ўхшаб кетар эди. У киши тасбех ўгиришдан тўхтаб, бош силкидилар:

— Ваалайкум, келинг, болам. Ўта қолинг.

Деразага яқин ердаги сандалнинг кўрпаю говра-пўшлари ҳали йифилмаган, ўртадаги бўйрадеккина намат устида бир болакай даханини муштласига тираб ётволганча, расмли китоб варақлаб, оёқчаларини ўйнатиб қўяр эди.

У бизни кўра сакраб турдио менга осмондан тушган одамга тикилгандай тикилди-қолди. У юз-кўзлари жудаям таниш, ҳатто шу индамай туришидаям аллақандай ёқимтой эди.

— Вой, келдизму? — деди у чапак чалиб.

Танидим, у мен билан симда гаплашган болакайнинг ўзгинаси эди. Овозиям, ўзиям — ширин болалар бўлади-ку, ўшанақа эди.

У жилмайиб, қўлчасини узатди.

— Ман Ёдгорман. Сиз.... Сиз телефонда чақируб эдиза? Топдимму? — деди у сакраб-қувнаб.

— Топдинг, — дедим унинг қўлчасини кафтларим орасига олиб, кейин ўзини бағримга тортдим-да, пешонасидан ўпиб қўйдим. — Чиндан асалтой экансан.

— Йўқ, мен Ёдгортойман. Аям қўйганлар, — деди у мақтаниб.

— Аянг чиройли от топган эканлар, — дедим мен.

— Нега той бўларкансан? Ёдгормуродсан, — деди мени бошлаб кирган кемшиктой.

— Ҳа-ҳа, у Саритой. Мен эсам, Ёдгормуродман! — тан олиб қучоғимда ўйноқлади бола.

— Яна ҳам яхши,— деб бошию елкаларини силадим.

— Чиқиб ўтилинг. Чақирмайсанми, бўтам, — деди кампир тасбеҳини йиғишириб, ёнига қўяркан. Лекин ўзи оқ чойшаб ичидағи оёқларини (йиғолмасми) ўша-ўша узатиб ўтираси, аллақандай ўнгарилолмас эди. Каравотнинг бош томонида улуғ китоб солинган жилд билан йўл-йўл матодан тикилган найсимон бир нарса осиглик. Униси тушунарли, лекин ёнидагиси нима экан, билолмай, танча ёнига чўккаладим. Буви ўша ўтирган кўйи момиқдай оппоқ қўлларини дуога очдилар:

— Илоҳо омин, сийлаб кепсиз, сизни Оллоҳимнинг ўзи сийласин. Фанимат дунёда оқибатлилар қаторида қилсин, Оллоҳу акбар.

Кампир оппоғойимларни эсга солиб, кўнглим ийиб келди. Беихтиёр буларнинг дуоларини олиб қолиш катта давлат эканини ўйлаб, у кишининг юзларига тикилдим. Тикилардиму ўйлардим.

Юзларидан таралаётган бу тароватли нур қаердан чиқиб, ҳеч адo бўлмаяпти? Бу жойларнинг қадим зах ҳидларини ҳам унуттириб, уни мушк-анбар бўйларига тўлатиб ўтирган ҳам балки шу оқ-оппоқ кампиршонинг ўзидир?

— Яхши келдизми, ўғлим? Уй ичилариз билан яхшимисизлар? Ойиз, келиним омонмилар?

— Кампир худди қариндошлардек яқин олиб, тавозе ила ҳол-аҳвол сўрар эди. Мен эсам ҳамон ийиб бораётиман бу мулозамат, бу сўрашишлардан. Бир лаззат олаётиманки, қўяверасиз.

— Рахмат, ўзиз бардам-бакувватгинамисиз?

— Ўзига минг қатла шукр. Кўрсатганига шукр. Туролмасам ҳам, мана, ўтирибман-ку:

эплаганча ибодатларимни адо этиб... намозларимни ўқиб... Ҳар одамлар бор-бошини бир кўтаришга зор, қўлини қимирилатишга, ўнгарилишга интиқ. Ўшандан асрасин. Ҳеч бандани ибодатдан қўймасин. Сўнгги нафасигача чиройли амалларга ҳамроҳ этсин, илоҳим.

— Нима, оёғизми?.. — деда олдим мен.

— Буми, бир ёғи қаричилик, қолаверса, кўргилик экан: кўп бўлди ўтириб қолганимга. Савил, иккаласи ҳам кетган, жонсиз, — деди буви чойшаб устидан ўша жонсиз нарсани сийпаб қўйиб. — Шунисигаям шукр. Кўл-оёғимни бирдан олганида нима қилардим? Буям бўлса, Худойимнинг марҳамати. Манави жужуқларнинг баҳтигами, бошқагами — мени тирик ушлаб турибди. Бўлмаса, булар кимнинг қўлида қолардию ким буларнинг бошини силарди! Билмадим, мендан кейин буларнинг ҳоли нима кечади? Чаманнинг юриши ундаи, Асалнинг феъли бундай... Онаси бояқишининг-ку, пешонаси шўрдан-шўр экан. Менга суюниб қолиши булар. Ўзим эса ёлғиз Оллоҳга суюнгулиман. — Буви овози ўзгариб, кўзларида ёш айланди. Сўнг шишин-қираган бармоқларини ўпиб, учайдан қўзларига суртаркан, Ойтўра буви ҳамд айтиб шивирлади: — Ал-ҳамдулиллоҳ, алҳамдулиллоҳ: ишқилиб, яхшиликка бўл-син.

Мен эсам дардим бошқа ёқда: Чаман акамни сўрай олмай доғдаман. Қачон қайтадилар дегим бор-у, кампирнинг дардини янгилаб қўйишдан истиҳола этиб турибман. Ниҳоят, у киши қайрилиб сўрадилар:

— Асал опчикиб бердими Чаманимнинг омонатини? Ё гаплашгиси ҳам келмай...

— Бердилар, — дедим бояги қофоз ёдимга тушиб.

— Нима дебди, кўрдингизми?

— Йўқ, ҳали, — мен чўнтағимни кавлаштиридим.

— Ўқунг-ўқунг, — деб қистаб, ўтирган еримда елкаларимга суйкалди Ёдгормурод, — Опоқбувимам эшитсунла.

— Сен тинч ўтири, Ёдгор. Уят бўлади: меҳмонга шундай ёпишадиларми? — деди танбех бериб у киши.

— Ҳечқиси йўқ, укачамдай гап, — дедим мен.

Лекин Ёдгормурод бир оғиз сўздан:

— Хўп, опоқбувижон, хўп, — деб ёнимга қўндоқдек бўлиб ўтириб олган эди.

Мен хатчани топиб, қатини ёздим. У икки энликкина эди-ю, ичи тўла жумбок эди. Худди Чаман аканинг ўзидек:

«*Мақсад, кутдим-кутдим, келмадинг, — деб ёзган эди у. — Бир рижойим: ойимларга учрамай кетма! Худонинг хоҳлаши шундай экан, кўришиолмадик. Ноумид бўлма, гафлатдаям қолма. Кеннойингни сенга, сени Худога топширдим. Қолган гапларни айтишиади. Чаман аканг».*

«Қанақа кеннойим? Кимни айтяпти?...» Нима гаплигига ақлим етмай бошимни кўтарсан, буви ярим қайрилганча юзимга тикилиб турибдилар:

— Сиз Султонмурод ошнасининг кими бўласиз? — Афтидан, акамга ўхшатолмай турар эдилар.

— Холаваччамиз... — дедим тўғрисига кўчиб.

— Ҳа-а... — деб бош силкидилар-да, Ёдгормуродга юзландилар: — Айтмоқчи, анув кунги хатни нима қилдинг? Эҳтиётлаб қўйганмисан?

— Қайсу? Анув берганизму? Турибду мимит чойнукда, — деди бола пилдираб ковшандозга тушаркан.

— Оптушақол, болам. Шошма, — деб тўхтадилар-да, менга қарадилар. — Ўзингиз бирга чиқа қолинг. Болага иш буюр, кетидан ўзинг югур бўлмасин.

— Яхши, — мен туриб Ёдгорга эргашдим-у, аммо ўзимнинг ичим қуриб боряпти. Чаман ака ҳам қизиқ: айтадиганини мана шу хатда айтиб қўя қолмайдими! Кимдан яширади? Анув чирсиллаган закқумойданми?

Бу орада биз ташқари чиқиб, алмисоқдан қолган ёғоч зина билан кўтарила бошладик.

Опоқбувининг ширин невараси — Ёдгормурод зинани тўпиллатиб чиқиб бораётиб, дам-бадам орқасига қайрилиб, мени қистайди:

— Юравулинг, фақат эҳтиёт бўлунг, бошиззи урвалас...

Мен унинг ширинлигидан ҳам бурун ақлига беш кетиб бораётибман: мана, кимни пакана пари деса бўлади! Қолаверса, юзи бунча иссиқ, бунча таниш? Ўғил бола ҳам шунчалик кўхлик бўларканми? Ҳар гапига бир тегишгим келарди.

— Урволсам-чи? — дедим атай.

— Ғурра бўладу, — деди у қайрилиб, сўнг ўша ғуррани тасаввур этиб, қиқирлаб кулди.

— Ғурра ҳам кўрк, — дедим ҳазиллашиб.

— Бўлмаса, урвала қолунг, — яна қиқир-қиқир кулганча зинани тўпиллатиб чиқиб кета бошлади. Ростдан бошимни уриб оладигандек энгашарканман, сўрадим:

— Сизлар шу болохонада турасизларми?

Ёдгор қайрилиб тўхтади:

— Сиз билмайсиз-де. Зўр бу ер!

— Йўғ-е...

— Кўрмагансиз-де, Калковузнинг оқишину... боғларимизну... Бу ёқдан кўрсангизму!..

— Томга чиқволиб, дегин?

— Ҳа-де. Сиз чиқунг аввал, — у эшикни очиб, калишчасини чечиб қолдирди, — келунг-келавулинг.

Мен пастак эшикдан энгалиб ўтиб, мўъжазгина хонага оёқ қўйдиму ҳовлига қараган дераза пастида у айтганидан ҳам фараҳли бир манзарага кўзим тушиб, «воҳ», деб юбордим: чиндан зўр-ку!..

Ростдан болохонамисан, болохона эди. Бу ердан ҳовли бир ажойиб кўринарди! Зеболаниб десамми, кафтда тургандек десамми, ишқилиб, таърифласа, таърифлагудек эди. Ҳали токлари кўтарилимаган яланғоч ишкомлару бояги кўчадаги сочопук чиқариб юбориб энди барг ёзиб келаётган қатор толлару унинг тагида сариф илондек тўлғониб оқкан Калковузгача — бари-бари ажойиб, бир жонли сувратга ўхшар эди. Уларнинг барига соатлаб тикилиб ўтироқ мумкин эди. Бу ердан ҳатто анув куйган дараҳт ҳам бор бўйи-ла кўриниб турса-да, лекин ажабки, боягидек ёмон таассурот қолдирмас эди. Нега, тушуна олмадим.

— Жойни хўб топган экансизлар-ку!

— Ёқдиму сизга?

— Ёқканда-чи! — Шундай деб ўгирилдиму ногаҳон кўзим уйнинг тўридаги деворга тушиб, қотиб қолдим. У ерда ҳозир кўрганларимдан юз чандон чиройлироқ нарса осиғлиқ турар эди.

— Ия, Марғу кеннойим-ку!.. — деб юборибман.

Мен йўқотиб қўйган кишисини учратган одамдек гангиб қолган эдим.

— Ким дейсуз?

— У киши-ку! Кеннойимлар-ку! Бу сувратни... қаердан олгансизлар? — дедим ҳеч нарсага тушунолмай. Ўша ой деса, ой дегудек, сулув деса сулувлардан ўтгудек, ким малак деб атаган, ким парилар мамлакатидан деб таърифлаб эси кетган... хусну жамол эгаси... Каттабоғ гўзали, менинг азиз кеннойимнинг суврати бу ерда нима қилиб турибди? Қандай келиб қолибди буларникига? Ҳеч ақлим бовар қилмасди.

— Ману аямлар-ку бу... — деди Ёдгор илжайиб.

— Сенинг аянг? — Менинг эсим жойига кела бошлагандек эди.

— Бўлмаса, ким эканлар, менинг аям бўлмай?

— Чинингни айт? — дедим дарвоҷе дейиш ўрнига.

— Сиз яхшилаб қаранг... — деди у. Сўнг болаларча қиқирлаб кула бошлади. Унинг қулгуси шундай беғубор эдики, тавба, мен тан берсамоқ у сакраб-кувнаб кетадигандек эди. Ё Оллоҳ, яна адашганимни қаранг. Мен сувратга қайта қараб, ичим жизиллаб кетди. Чинданам унинг қулоқ

юмшоғи остида тирноқ юзидек, нозикдан-нозик нори бор эди:

— Дарвоке, бу кеннойимиз-ку! — деб юбордим. Қаранг-а, у бизницида бирозгина туриб, кейин изсиз йўқолган Маҳфуз кеннойимнинг катта қилиб олдирилган суврати эди! Ойим ҳали-ҳали қуйинадилар: қаерларга сиғди экан, ё ватанига қайтиб кетдимикан, деб. У бўлса... Мен худди шундай жажжи юзни яна қаердадир кўрганимни эслаб, ялт этиб болага қарадиму ҳамма нарса оп-ойдин бўла қолди! Мен оми нега бу боланинг ҳусни бунчалар ўткир, деб ўтирибман! Гап бу ёқда экан-ку!

— Сен... сен ҳали? — дедим дилимдагини тилимга чиқара олмай ва аста бориб чўккалаганимча икки тирсагидан тутиб, бағримга тортдим.

— Сиз ростданам... танийсизму аяжонимларну? — деди у шодланиб.

— Хў-хў, таниганда қандоқ! — дедим унинг елкасига қоқиб ҳам эркалаб. Ва девордаги ўша аяжонисига қараб, баттар тонг қолдим. Ё тавба! Тушимми-ўнгимми? Бояги суврат ўрнида энди... тамомила бўлак сиймо юз очган эди. Сувратдан...

Ажаб ҳол! Ҳатто кўзларимни ишқаб қўйдим. Йўқ, ўша-ўша: девордаги ойнаванд гардиш ичидан («ё субҳоноллоҳ, қандай мўъжиза бу?») мен соғиниб, ичикиш даражасига борган одам — Султонмурод акам (!) қараб турарди. Нима бу, саробми, жоду? Эсим оғиб, болага қарадим.

У иссиқ жилмайди:

— Сиз ҳайрон қолманг, бу ўзу шунақа! Шунақа ишлунган!..

— Қанақа... иш-ланган? — Мен ҳеч нарса тушунмаётган эдим, ҳатто бошимни тўлғаб-тўлғаб кўяр эдим.

— Шунақа-шунақа, — деди у сакраб-қувнаб, мен тушунолмаётганимдан қиқирлаб кулиб, — бир қарасангиз аям, бир қарасангиз у кишу, яна бир қарасангиз амакум кўринадулар.

— Қайси амакинг?

— Вой, Сизну қаранг-ув. Туринг-туриңг. Бу ёқдан қаранг,— деб у қисташга, тирсагимдан тортқилаб, уйнинг бу чеккасига бошлишга тушди. — Сиз ўзиз кўрунг.

Мен у айтган томонга ўтиб (ё қудратингдан!) сувратда тамомила бошқа одам — Чаман акани кўриб, баттар ҳайратда қолдим: бир сувратгардиш ичидан уч киши уч ҳолатда кўринар эдилар! Тағин ҳеч беками-кўст! Бир-бирига қуралашиб ҳам кетмаган! Халақит ҳам этмайди! Дафъатан, ажиналарнинг иши эмасми, деган хаёлларга бориб қоласан киши. Аммо бу «ўзи шунақа ишланган»миш! Тавба, ким ишлатади? Чаман аками ё Маҳфуз кеннойимнинг ўзи? Унда... унда бунинг оти нега Ёдормурод? Кимдан ёдгор? Наҳот ўша... ивир-сивир гаплар ҳаммаси рост?

— Аянг?.. — дедим-у, у ёғини сўрашга ҳолим ҳам, мажолим ҳам келмай, аммо ич-ичимдан бир титроқми, нимадир туриб, боланинг кўзларига тикилдим. Аянг қаердалар дейишга қани тилим айлана қолса! Айланмасди. Аммо у тушунди. Тушуниб, кўзларини олдию, мунғайиб билагини силай бошлади.

— Ётуб қолдула, — деди овози ўзгариб, — Ману... Ману юборишмаяпту.

— Қаерда, шу Тошкентдамилар, ахир?

У кўнгли тўлиб, четга қаради:

— Ҳм...

— Вой сению, боядан бери айтмайсанми?!— Секин қархисига чўккалаб боягидек елкаю тирсакларини силадим. — Қаерда эканликларини биласанми ўзинг?

Ёдормурод бош тўлғаб тисарилди ва қўлимдан бир алпозда сирғалиб чиқди-да, тўғри токча томон бориб боя ўзи айтган олма гулли жимит чойнак ичини тимирскилашга тушди. Ундан икки буклоғлиқ бир қоғоз олди.

— Мана, кўрунг.

— Ҳаммаси шунда айтилганми?

— Билмасам...

— Ҳа, дарвоқе, бу бувинг айтган омонатлари-я?.. — дедим ўзимга келиб. Сўнг шошиб қозкатини ёздим.

«Мақсуд, менинг сендан бўлак ишонганим йўқ, — деб битилган эди хатда. — Акангнинг дарагини эшишиб, жсўнаб кетяпман. Ўзинг тушунасан-ку, унинг менга кимлигини! Сен бизнинг бошимизга тушган кўргулукларни билмай эшикдан қайтиб кетмагин, деб (Асал опамга қолса, шундай қилишидан ҳам тоймайди!), ойимларга учрагин, деб тайинлаб эдим.

Махфуздан кўнглим тинч эмас. У оғир дардга чалиниб қолди. Зўрга стационарга жойладим. Лекин у ёққа бормасам ҳам бўлмайди. Тўгриси, ҳозир бормасам, бир умр армонда қолишим мумкин. Акангнинг дараги чиқиб қолди. Аммо сен унга зинҳор билдира кўрма! Юраги чиқиб, кўтара олмай қолмасин. Асал опамга-ку, исини ҳам сездирма. Сезса, ишини бузади у жодугар.

Сендан ўтиниб-ўтиниб-ўтиниб сўрайман! Махфуз кеннойингни ёлгиз қўйма. Ёнидан жилма. Ва буни, (кеннойинг бизницида эканини ҳам) ҳеч кимга айтига кўрма! Мен қайтгунимча поччадан ҳам, ойинглардан ҳам яшириб тур.

Шундай қилиши керак! Қайтгач ҳаммасини ўзим тушунтириб бераман. Акангнинг унга (Махфузга) аталган мактублари бор, кўрсатаман. Ўшандан сенга ҳамма нарса аён бўлгай.

Ёлгиз ўзингга ишондим. Мендан бемаслаҳат ёхуд берухсат бирон ишга қўл ура кўрма. Ёдгор онасини согиниб, жуда-жуда ичиккан. Хархаша қилса, яна кўрсатгани олиб бориб юрма. Ундан кўра, ўзингларницига — далага олиб кет. Шу яхшироқ: ҳам овунади, ҳам бехавотир. (Ойимларга тайинлаганман, биладилар.) Ишқилиб, уларни сенга, сени Худога топиштирдим. Менинг ўйқлигимни билинтирма. Иложи борича тез қайтишига ҳаракат этаман. Чаманг аканг».

Ана, холос! Ёлғиз ўзимга шунча омонат! Фақат бир нарсага ҳеч ақлим етмасди. Бу суксурдай болакайни нимага аясининг олдига олиб бормаслик керак? Ахволи оғирлиги учунми ё бошқа сабабданми? Агар кеннойимнинг ўзи сўраб қўймаса-чи? Ўшандаямми? Ҳаммасидан «ўтиниб-ўтиниб-ўтиниб сўраши» қизиқ эди. Нега бунчалик қаттиқ тайинляяпти? Ниманинг ошкор бўлиб қолишидан чўчийди? Боланими ё Махфуз кеннойимни? Ҳеч тушунуксиз. Худди сир ошкор бўлиб қолса, фалокат устига фалокат ёғиладигандек, улардан ажраб қоладигандек... ёзибди хатни.

Секин кўз қиrimни ташласам, болакай интиқиб тикилиб турибди. Бир оғиз сўзимдан сакраб-ўйноқ-лабам кетиши, йиғлабам юбориши мумкиндек. Чин-данам аяжонисини ичикар даражада соғинибди. Бир оғиз сўзимга муштоқ. Юр десам, чопиб кетгудек! Аммо Чаман акадан берухсат нима ҳам қила олардим??!

— Нима дептулар, амақум?

— Сени далага, бизницига олиб кетарканман.

— Ур-ре, талага кетарканмуз! Ўйнагани борарканмуз! — Ёдгормурод бир ажиб қувнаб, қўзичоқдай сакраб ўйноқлай кетди. Шодлиги шунчалик: гир айланиб чопадими-ей, икки ёнига шатта уриб, шаталоқлар отадими-ей. — Ҳе-ҳей, талаларга чиқарканмуз, чучмўмалар терарканмуз...

Кейин тиззамни қучиб, қўлларимдан тортқилаб, бир нималарни ижикилашга тушиб кетдик...

— Сиз талада турасизму? Сизларда ҳам варраклар борму?

— Бизда учиринсин-да! Ка-атта-кон қуроқлар кечасиминан дариллаб чиқсин-да!

— Ву-уй, кечасуман денг? — Унинг киприклари узун-узун, кўзлари жавдираб ёнарди.

— Кечасиминан.

— Ипиниям узмайдиму?

— Узмайди.

— Бирор тегмайдиямму?

— Тегмайдиям.

— Қандай яхшу, — деди у чапак уриб.

— Бир учиришганча уч кунлаб учиб ётади, — дедим мен.

У ақлига сиғдира олмай афтимга термулди:

— Уч кунлаб?.. Ву-уй...

— Ҳа-да, у шунчаки варрак эмас-да, — мен қулочимни ёйдим. — Мана бундай келар-ов. Уни тушириб олиш ўзимас. — У афтимга термулганча қолган эди. — Ипини узган куроқларни хўв қаёклардан топиб келишади.

— Қаердан топиб келишаду? — қайтариб сўради у.

— Қайсинасины сойнинг нариги ёғидан, қайсинасины ёнғоқзордан. Нималарга илиниб-урилиб, дабдаласи чиқиб кетган бўлади. Қайтадан ясашади.

— Зўр экан, — деди у беш кетиб, ҳам чиройли бош силкиб. Кейин яна боягидай тирсагимга тармашиб, шоширди. — Отлар-чи, отларам борму?

— Бор, — деди мен унинг кўнглига қараб.

— Минишадиму болалар?

— Минишади. Истасанг сени ҳам миндиришади. Бедапояларга опчиқишиади. Сойларга оптушишиади.

— Яна нималар бор, айтинг, айта қолинг, — деб қистарди у.

— Ариқ бўйларидан ялпизлар, бинафшалар терадилар. Тепалардан эса қўзиқоринлар.

— Қўзиқорун? Нима у?

— Ҳў, уни ўтга тоблаб емабсан, бу дунёга келмабсан. Борсанг, кўрасан.

— Борганум бўлсун, борганум бўлсун, — деб ўйноқлади у. Сўнг пастга ошиқа туриб, қайрилди: — Ҳозур-ла кетамузму?

— Кетамуз, — дедим мен унинг ширин тилига менг-заб, — фақат опоқбувинглардан сўрайлук.

— Сўраймуз, сўраймуз, — деди у ошиқиб.

Мен эсам, бу сирли гўша — болохонадан тушиш лозимлигини, бу хонадоннинг дуогўйи бўлиб ўтирган анаву оқ-оппоқ кампиршодан ижозату дуолар олиб кетишимиз лозимлигини билиб турсам-да, қўзғола олмас, тўғрироғи, девордаги бояги антиқа сувратдан кўз узолмас эдим.

Сувратдан эса ўн тўрт кунлик ойдай балқиб, Худо ҳуснидан қисмай баҳтдан қисган кичик кеннойим қараб турар, негадир кўзлари ёшланиб-ёшланиб келаётгандек туюлаверар эди менга.

— Журинг, сўраймуз, — Ёдгормурод қайтиб, қўлларимдан тортқиламоққа тушди-ю, мен унга эргашарканман, кеннойимнинг рухсори лип этиб кўз ўнгимдан ғойиб бўлиб, шу заҳоти унинг ўрнида бошқа азиз қиёфа — мен қачонлардан бери йўқотиб қўйган Султонмурод акам сувратда юз очиб, жилолмайин ҳам қолдим: яна бир қадам боссам, у ҳам йўқолиб, Чаман акам чиқиши тайин эди.

Мен эсам, бу ажиб сувратда фақат акаму Махфуз кеннойим кўринишларини истардим.

Аммо шу тоб бояги кирган жойимиздан аёл кишининг қаттиқ-қаттиқ овозлари келиб, тўхтаб қола қолдик. Асал опа уйни бошига кўтариб, шанғиллар эди:

— Итниям, битниям қўяверинг. Нима, бу карvonсаройми сизга?! Ана, биттаси шунча туриб, нима каромат кўрсатди? Етимиши ташлаб кетади ҳали! Итдан бўлган қурвонлиққа ярамас...

— Ҳай, секинроқ, уялгин, ахир, — ўтинарди кампир.

— Нимадан уяламан? Нега уяламан? Ўз уйимда ҳам уялайми?!

— Ҳой, Худодан қўрқмаган, ҳой, одам иси ёқмаган! Чаман эшитса, нима дейди?! Жилла курса, мендан уял. Ўз онангдан уял.

— Нима, Чаманиз? Бировнинг хотинини ўз уйига обкеб ўтирган у киши покдомон-у, мен қора бўлдимми? Мен ёмон бўлдимми?

— Ўчир, — деди она, — ҳаммани ўлдириб, сил қилиб, бездириб, ўзинг сўппайиб қолмоқчимисан бу уйларда? Худодан қўрқ! Шу феълинг билан-ку, ҳеч ерга сиғмадинг.

Тирноққа зор ўтиб боряпсан. Яна одам исини ёқтирмай қаерга сиғмоқчисан? Қачон одам бўласан?

— Бўлмайман! — деди Асал, остона хатлаб улгурмаган асрандисининг кетига тарсаки тушириб.

— Бўлмасанг, бўлмай ўт!

Титраб кетдим. Ва беихтиёр болакайни бағримга тортдим. Шунчалик бўлиб кетган эканми у жодугар? Ўшандай хокисор онанинг юзига тик қараган инсон... буларнинг бошига нима кунларни солмаяпти экан? Қандай сиғдилар экан бояқишилар бу уйга? Опкетганим бўлсин бу дўзахдан! Кутқарганим бўлсин бу азоб «фариштаси»дан! Ва ўзим ёқа ушладим: Бу қандай гўшаки, манзил-мавозеки, бир ёнда оқ-оппок бўлиб, юзларидан нур, сўзларидан дуо ёғилиб, раҳмат фариштасидай оқ кампир ўтиrsa-ю, бир ёқда ҳар сўзидан чак-чак заҳар томиб, чирсиллаб анави «фаришта» ҳукмини ўтказиб юрса! Яхшиям, кампир бор, ширин сўзи, дуолари бор! Ундан кейин нима бўлади бу хонадон? Булар топган манави бошпана? Тўзиб битадими? Бекорга касалхонага тушмаган экан Маҳфуз кенно-йим! Бечора, қандай чидади экан бу эговга, Худонинг бу бошли-кўзли балосига? Унинг заҳар-закқум сўзларига? Чаёндек чақишиларига? Ўзининг ёзуқлари, бошига тушган мусибатлар кам эканми?

Кўзим ёшланиб келиб, ҳамма нарса чаплашиб кетди. Бола ҳам, пастга кетган зина ҳам, оёқларим ости ҳам... Фақат кўз олдимда бўйи баравар куйиб кетган анув қора дараҳт турар эди!..

Биз не алпозда, ҳатто миқ этмайин зинадан бир-бир тушиб бордик. Минг истиҳолаю андишага ботиб ўтирган кампир бизни кўра жонланиб, шошиб қолдилар:

— Вой, тушдингизларми, болам. Тополдингизми омонатини? Сизниам ташвишга қўйдик, — дердилар иккала кафтларини ўша жонсиз тиззаларидан узмай.

— Ташвиши борми, мана, оптушдик. Энди жавоб берсангиз... — деб ямландим мен.

— Киринг, ўтиринг, бир пиёлагина чой олиб келсин. Шундайин кетасизми, болам, — деб Ёдгорга юзландилар у киши. — Сен нима қилиб жим турибсан, опкир акангни...

Бола ҳам бирдан жонланди:

— Опоқбуви-чи, опоқбуви! Биласизму, биз қаерга кетяпмуз! — деб ўзини бувининг тиззаларига отиб бижирлай кетди. — Талага кетмоқчимуз. Ростакам варраклар учиришадуган ерларга. Биласизму, ким айтуб кетибду?

— Биламан, болагинам, биламан, — деди буви унинг куракларини силаб-эркалаб. — Амакинг тайинлаган. Сен зерикиб қолмагин деган-да.

— Нега айтмадуз? Яшуруб экансуз, — аразлашга, сакраб каравотни лопиллатишга тушди болакай. — Алдаб экансуз!..

Буви унинг курагига қоқиб, пешонасидан ўпди.

— Ҳар нарсанинг мавруди бор, болам. Вақти билан чиқасизлар ҳам. — Болакай мунғайиб қолган, нажот кутиб, афтиимга термуларди. — Аввал аянгдан хабар олсинлар. Кейин опкетгани келадилар. Тузукми, тойҷофим?

Бу гапдан мен ҳам, Ёдормурод ҳам индай олмай қолгандик. Ҳатто мен жиндек мулзам тортиб:

— Тўғри айтадилар. Сен отланиб тур. Эртага ўтиб, индинга опкетгани келаман, — дедим юпатиб. — Бўп-тими?

Ёдормурод мўмин экан, аразини ташлаб, очила қолди:

— Индинигаму?

— Индинга, — деб мен ҳам қайтиш тараддудига туша бошладим.

Буни қўриб, буви ўтирган жойларида жонсарак алангладилар:

— Борадурган бўлсангиз... бирон нима бериб юборсам бўларди? Шошманг, — у киши ўгирилиб, ёнларидаги токчадан эски чийдухоба жилдни олдилар-да, унинг ёнчиғини

кавлаштириб, бир нима излай бошладилар. — Мана, жилла қурса, шуни ола кетинг, вақти-вақти билан ҳидлаб турса ҳам руҳи енгил тортади.

Нима экан, десам, у кишининг оппок кафтларида бир ажойиб бўй таратиб қалампирмунчоқ шодаси турабди. Уни оларканман, бўйидан ўзим ҳам ғалати бўлиб кетдим. Мен гўё болалик даврларимга қайтиб, қалампирмунчоқ бўйининг сирли оламига тушиб қолгандек эдим. Шундай енгил эдимки, курагимдан қанот ўсиб чиқаётгандек эди...

Кейин Ойтўра кампир билан қандай хайрлашдим, яланғоч ишкому сўрилар тагидан ўтиб, хайҳотдек ҳовлидан қандай чиқиб бордим, якка тавақали эшиқдан қандай ўтиб, Калковуз бўйидаги кўчага тушдим — билмайман. Хаёлим жойида эмасди гўё. Фақат оқ кампирнинг истихола билан «Келиб туринг, болам, йўқ бўлиб кетманг, Ёдгормуродимни ўкситиб», дегани айланиб-айланиб келишини айтмасам, бошқа ҳеч нимани эслай олмасдим.

Анча нари бориб, ўгирилиб қарасам, мени болохонага бошлаб чиққан ўша ширин, ўксик болакай якка тавақали эшик остонасида оёғини саланглатиб ўтирас, тўхтаб қайрилишимни кутар, жиндак имо қилсамоқ, учиб келадигандек, мен билан кетворадигандек эди. Шамол ҳам энди толлар устидан тушиб, уни олиб кет, олиб кет, деган каби нуқул ҳувиллаб юзларимга уриларди, юргани қўймасди. Менинг эса ич-ичимдан бир йиғи босиб келяпти. Нима бало, эр етиб, бўй тортиб ҳам бундан кутулолмасам?! Етимларнинг кўнгли ўзи шунаقا ўксик бўладими, ўша булоқнинг кўзлари сал нарсага очилаверадими, ўзимни тутолмасдим. Қаерданам Чаман акани бу хонадонга излаб келдим? Ёдгормуродни, Ойтўра бувини кўрдим? Болохонага чиқдим? Маҳфузा кеннойим — (ўша Каттабоғдаги ҳовлимизда ярим йилгина туриб, кейин дом-дараксиз кетган, биз изини ҳам тополмаган ўша тангритоғлик келин) сўнгги пайтда паноҳ топган жойга кира қолдим? Машъум тақдирдан хабар топдим? Девордаги у ажиб сувратга кўзим тушди? У нима эди? Нега уч ёндан уч киши қўриниб турарди?.. У рўёмиди ё Маҳфуз кеннойимнинг ўзи ишлатганмиди атай? Ҳеч ақлим етмасди. Чин десам чинга, рўё десам рўёга ўхшамасди бу тарих, бу тақдир. Яқинроқ келинг, мен бу фироқ қиссасини, тақдир аталмиш буюк имтиҳон тоғидан тоймай, тий-гончиқ йўлларига кирмай ўтиб борайтурган акаларим, кеннойиларим тарихини Сизга илиндим. Оллоҳ уларни не мушқул-мушқулотларга солди ва олтиндай тоблантириб чиқарди — ўзингиз бир қўринг. Шояд ибрат олсак, ўшалардек яшай билсак...

## 2. АЙРИЛИҚ КУНЛАРИДАН ЁДГОР БИТИКЛАР ёхуд «ВОЙ, СИЗМУ, ҚАЙНУЖОНУМ?»

Майндан-майнин — укпар шамоллар уфуриб келиб, юзларимни ўпиб қочар эдилар...

«Мошааллоҳ! Кўклам ҳам кепқопти-я!», деб эдилар кеча ойим...

Далаларнинг эрка еллари бугун шаҳаргача етиб келиб, жин кўчаларни-да, тавоф этиб, ифор сочиб юрар эдилар...

Ё менинг кайфим чоғ, ё бугунги муждалардан бошим осмонда! (Ҳазилми, ахир! Мен кимнинг дарагини топдим! Азиз кеннойижонимнинг қаердаликларини билиб турибман-ку!) Атроф-жавонибдаги зифирдек ўзгариш, йилт этган нур ҳам манави эспинлардек хуш ёқиб турибди менга. Ифордек ҳидлагим, булоқ сувларидек симиргим келади барча-барчасини! Омонлиқ-сомонлиқка ўхшайди бу кўклам насимлари ҳам!...

Ўзи ҳам ажиб бодроқ исларини таратиб ўтаётир. Ич-ичимдан бир баҳорий ҳислар тошиб келмоқдаки... Ва мен сизга айтсан, миямнинг энг олис, энг овлоқ қопқаларигача «жинг-жинг» очилгандан очилиб, ичим ёришгандан ёришиб, Хости Имомдан Эски Жўвага тушиб келмоқдаман.

Оламда мендан хушнуд кимса йўқ. Ҳамма нарса, ҳатто йўлка бўйлаб (олдимга тушволиб), пилдираб борайтурган анув ликилдоқ қушча-читтак ҳам бирам зебо, бирам ёқимтойки, яқин

орада бундай хушхол бўлмаганман.

Ҳаммаси ўша болохонага чиқишимиздан, олмагулли жажжи чойнакдаги омонатни олишимиздан, девордаги анув сувратни кўришимдан бошланмадими?! Ўшандан бери уларни ёдга туширувчи ҳар битта нарса мени ларзага соляпти, ютоқиб ёпишяпман. Худди неча йил бурун йўқотган азизларимни топиб олгандекман. Ҳа-ҳа, эртак китобини ёхуд жажжи қаламтарошини топиб олган болакай ҳам менчалик ҳолга тушмас.

Чиндан ҳам акамни сўнгги марта кўрган, у ҳақда бир олам ғаройиб нарсаларни айтиб бера олгувчи кишини қайта топиб олганимдан, уни кўргани кетаётганимдан ўзимда йўқман.

Ҳазилми, ахир! Султон акам қиблагоҳим ўрнида қиблагоҳ эди. Ёлғиз унгагина суянардим! Унингдек бўлишни, эр етишни ўйлаб, кечалари тўлғониб чиқардим. Кейин ҳам унингдек мард, танти инсонни учратмадим! Учратсам ҳам унга ўхшата олмасдим! Энди қавмимизни ҳимоя эта оладиган киши қолмагандек эди. Ҳатто Кўлдош тоғамнинг ҳам энди илгаригидек шахдлари йўқ. Почча-ку, қариб, хассага суюниб қолдилар. Уларнинг ўрнини босадиган ким бор? Шунинг учун ҳам зилзила баҳона жаннатдек жойларимизни тортиб олишди! (Миқ этолмадик!)... Боғларимизни пайҳон этиб, биз кўз очиб кўрган у маъводан ҳеч вақо қолдирмай бузуб ётишибди! (Дамимиз ичимизда!)... Ўзимизни эса кўчириб юборишибди (Ҳеч ким ғинг дея олмади. Кўрсатган жойларига қараб кетавердик). Акам, акажоним бўл-ганида қараб турармиди! Бузгани қўярмиди! Ана шундай. (Эл учун бошини тикадиган, қайғурадиган одамлар тугаб битган экан, хижрат этиб бўлган экан ундайлар!) Қайғурадиган бир жон, бир мард қолмаса-я!

Ана шу Тангритоғ томонларга бош олиб кетганлар ичидан акажонимни сўнгги бор кўрган (бир бўлса Чаман ака), бир бўлса, Махфуз кеннойим эди. Уни ҳам йўқотиб қўйиб, қалбим бир ғалати ҳувиллаб қолган эди. Мана энди устма-уст муждалар чиқиб, шошиб қолгандекман. Зораки, уни топиб, бор ҳақиқатни билолсам: нега хеш-акраболари ёлғиздан-ёлғиз ёш бир келинчакни кимгадир қўшиб, ота юртга жўнатиб юбордилар-у, ўzlари хабар олмадилар? Қайлиғи — акам-чи?! Нега ўтиб келолмади?! Бошига қандай мушкул ишлар тушиб, ўша ёқларда қолиб кетди? Ўзи омонмикан ишқилиб?..

Мен бу тарихнинг бир чеккасинигина чала-ярим эшитганим бор. Оғир яраланиб, жанг майдонида йиқилиб қолган акамни биродарларидан кимдир шу яқин орадаги бир қўрғонга ортмоқлаб олиб борганмиш. Кўрғон эгалари эса ола-ғовур йиллари ўша ёққа қочиб, Тангритоғ томонлардан паноҳ топган кишилар экан. Улар ертўлаларига яшириб, қарай бошлишибди. Аммо... ўша акамни ортмоқлаб борган биродарининг ўзи жуда кўп қон йўқотган экан, хушига келиб-келмай қазо қилибдимиш. Унга аза очиб, дағн этибдилару элда Султон Ботур шаҳид бўпти, деган хабар тарқаб кетишибди. Кўрғон эгалари балки бу яхшиликкадир, деб дамлари ичидан, дим-дим қолаверишибди. Лекин қўзимизнинг оқу қораси — кенжада қизимиз бетоб, деб кунора табиб чақиришар, ўша табиб ҳар борганида бостирма га тушиб, бир йўла мусофири ҳам кўриб кўяр экан-у, бирорвга миқ этишиб экан.

Кунлар ўтиб қиз «соғайиб»ди. Табибнига ўзи қатнайдиган бўлишибди. Шу боришида у табибдан мусофирига ҳам малҳам олиб келар, унинг яраларига боғлашар экан. Шундай қилиб, «ўлди»га чиқарилган Ботур қирқ кун деганда бостирма остонасидан оёқ босиб чиқишибди. Уларнинг ўрталарида нима ўтган, қандай яқинлик пайдо бўлган — мен билмайман. Лекин кўрғон эгалари Ботур кимнинг зурёди эканини эшитиб, унинг устида айланиб-ўргилиб қолишибди. Тоза соғаймагунча қўрғондан жилдирмай, ўртоқларига ҳам дарагини билдирмай олиб ўлтиришибди. Кейин нима бўлган, ичкуёв қилишганми, жой қилиб беришганми, билмайман. Тангритоғда инқилоб енгилиб, суриштир-суриштир, қоч-қоч бошлангач эса, кеннойимни ишончли одамга қўшиб, бу ёққа жўнатишибди. Акам чегарадан ўзим ўтиб бораман, деган экан. Нимага келолмади ё бир оғизгина хабар бердирмади, ҳеч тушунуксиз. Ишқилиб, тинчлик бўлсин.

Махфуз кеннойимдан чала-чулпа эшитганимиз шулар. Ойим ҳам кеннойимга таскин

берганлари-берган эди: «Қараб туинг, бир кун эмас, бир кун ўзи кириб келади. У бўлади-ю, сизни бу ёққа ташлаб қўядими?! Ҳар қандоқ бўлганда ҳам бир бош суқиб кетади», дердилар. Худди айтганларидек, қишининг охирлари, кўкламнинг бошларида, айни ой кечикиб чиқиб, тонгга яқин бўзариб-қизариб ботадиган кезлари Каттабоғда гап тарқади: нима дейсан, Султонмуродлар қайтиб кептимиш, налогчилару ўғри-каззобларнинг адабчасини бераётган эмиш. Бағримизга шамол тегадиган бўпти, уруш тугабам тинчимовдик, Худойимнинг ўзи ғамхўр, уни етказибди, дейишарди одамлар. Бир гал ўзимам шунаقا воқеанинг устидан чиқиб қолдим! Шарифа кеннойининг эшигига тумонат одам. Эшак аравада эса, сўйиб қўйилган, лекин калла-почага ажратиб улгурилмаган тарғил сигир ётар, чаккаси мўматалоқ ўғрибашара бир одам Худонинг зорини қилиб, мол эгаларидан узр сўрарди. Кейин билсак: «Эгасини рози қилсанг-қилдинг, бўлмаса, ўн бош тўлайсан! Бўйин товлаб кўр — молинг талонда, ўзинг бадарға!..» деб шарт қўйишибди.

Шартнинг қаттиқлигидан акамнинг иси келарди. Ўпкамни қўлтиқлаб уйга чопдим. Қаёқда!.. Келмабдиям, кирмабдиям. Ойим эшитиб:

— Йўқ, умас, болам. Султонмурод келади-ю, кирмайдими? Шундан шу ёққа келган одам ўз уйига бош суқмайдими! Яна билмадим, кеннойингдан сўраб кўр,— дедилар.

Кеннойим ичкарида экан. Супадан ўтиб, қия очиқ деразадан кўрсам, дахлиздаги танча четида қатим тортиб, дўппи тепчиб ўтирибди. Аммо хаёли аллақаёқларга қочган, кўзлари ҳам бир ғалати филтиллайди, шу ҳолига нимани кўриб, қандай тепчияпти — тушунолмайсиз. Акам келса, шундай ўтирадими?! Ачинганимдан оғиз ҳам оча олмадим. Бекор айтмаган эканман. Айтсам, умидини узмай ўтира туармиди...

Бу орада далада ишлар қизиб, уни чопиқقا чакириб кетишиди. Тегирмон тепасидаги ерда лавлаги чопиқда юрган одам кутилмаганда бир ҳафта-ўн кун уйда ўтириб қолди-ю, кейин кунлардан бирида:

— Мен шаҳарга, опогойумларникуга тушиб чиқай, бир йўла дўппуларни ташлаб, янги иш опкеламан, — деб кетганча... бизни доғда қолдириб кетди.

Ойпошша холамларникига суриштириб бориб ҳам на изини, на дарагини топдик. Борганида холам йўқ эканлар, дўппиу тепчиқ<sup>2</sup>ларни Мұҳаббат кеннойида қолдириб:

— Дўппу бозорга тушуб чиқай,— дебдию шу кетганча қайтиб кирмабди.

Ойим икки кеча холамларникида туриб қолдилар.

— Одам игна эмаски, юриб туриб йўқолиб қолса! Суриштириб кўринг, почча. Султонмуроддан уятга қолмайлук, — дердилар ойим.

Почча — таникли, айтувли одам, ёнларига мени олиб, бормаган-кирмаган жойлари қолмади. Бозорга тушиб, шанғиллаган бозор қоровуларию супуруқчилар олдигача бориб келдилар. Ҳар эҳтимолга қарши уйғур маҳаллага ҳам ўтдилар. Каллахонадан суриштирилар. На дўппидўз, на ипакфурушлар биларди. Ахийри, милисаҳонага кирмоқчи бўлдилар-у, ўша Зокир бадбахтга учрагилари келмадими:

— Сен анг-шанглаб сўра-чи, Тангритоғдан ўтгансан деб ушлаб, қамаб қўймадимикан, бадбахтлар? — деб бир танишларини киритдилар. — Балки уларни ушлаш ҳақда қўрсатма-пўрсатма бордир...

Ҳалиги одам ярим соатларда чиқди. Биз эса бўларимиз бўлиб, турибмиз: кетиб кетолмаймиз, умидимизни узиб узолмаймиз. Йўқ, унақа кўрсатмаям йўқмиш, бу кеча ҳеч кимни ушлабам қолишмабди.

Почча «ҳайтовур-ҳайтовур»лаб орқага қайтдилар.

— Милисаға тушмабди, жин урмайди. Ҳали-замон эшикдан ўзи кириб келиб қолади. Бозор шунаقا жой. Тоғ-тоғ билан учрашмайди, одам одам билан топишади. Биронта қариндоши

<sup>2</sup> Хом дўппи, кизак демоқчи.

учраган. Иншааллоҳ, дараги ҳам чиқиб қолгай, — деб бизларни тинчитмоқчи бўлдилар.

Лекин на ўша куни, на эртасига эшиқдан бирор кириб келди. Ноилож, ойимлар билан Каттабоққа қайтиб кетдик. Биз бирор ташлаб кетган омонатни олдириб қўйиб, эгасига нима деб жавоб қиласини билмаган одамларга ўхшаб қолгандик. Эгаси эса, кошки бегона бўлса! Жондан азиз акажоним эди...

Мана, шунча йил ўтиб қаерда экан! Акамнинг жонажон ошнасиникидан дараги чиқиб турибди! Бу орада шириндан-ширин фарзандли бўпти, оғир дардга чалиниб, касалхонага тушибди. Лекин миқ этмагани, бурнимизнинг теккинасида, холамларникидан қўл узатса етгудек жойда яшаб туриб, бир оғиз билдириб қўймагани ғалати эди. Нимадан уялди, истиҳола этди экан? Турмуш қуриб (курганмикан ўзи?), фарзанд кўрганиданми? Кўрган бўлса, нега унга Ёдгормурод деб от қўйди-ю, у жужуғи Чаман акамни «амаку» деяпти? (Бу ерда бир сир бор-у, мен ҳеч тагига етолмасдим. Ўзидан сўрамагунча етолмасам ҳам керак!)

Ўзига ўзи шунча ташвиш сотиб олган эканми? Қолаверса, ўзини шунчалар гуноҳкор санайдими?

Мен унинг олдига куруқдан-қуруқ, ўпкамни қўлтиқлаб бора олмасдим. Эски Жўванинг иликузилдида ҳам сархил мевалар аримайдиган (Оллоҳ барака ёғдирган) бозорига тушиб, кеннойим хуш кўрадиган тансик нарсалардан: озгина қовунқоқи, бир кисмгина шўрданак, жиндек Мадина хурмоси харид қилдим. Бир ширинзабон кампиршо турган сари сарғайиб, асал бойлаб кетган Тошканни тошнокидан яrim халтacha опчиқсан экан. Шундан тўрт донагина олдим. Алқаб-алқаб халтамга солиб берди:

— Ўлук еса, тирилтиради, жон болам. Жаннатни меваси-я, бу, — дея бошимни кўкка етказди.

Жону жаҳоним ёришиб кетди. Чиндан жаннатнинг иси келадирган бундай нарсалар кимни хушҳол этмабди! Зора шу нарсалар, менинг йўқлаб боришим сабаб бўлиб, оёққа туриб кетса, мусофиригина. Худодан бўлиб — Худойим мени сабабчи этиб, шифои комиллар берсаю яхши бир кунда уни ўша шифохонадан етаклаб олиб чиқсаму, «Ойи, мана, қочқоқ келинийиз», деб уйимизга бошлаб борсам...

Ўлай агар, ниятим холис эди. Акамдан ажраганимиз ажраган, кеннойимнинг бедарак йўқолиши бизга бир армон бўлиб қолиб эди. Бир кунмас бир кун акам эшигимиздан кириб келсаю, кани у Тангритоғлик келинийиз, деб қолса, нима деймиз? (Султонмурод акам бўладиу кириб келмайдими! Тегирмонга тушса бутун чиқадиган одам-а! Қайтиб келишига ишонамиз биз!) Нима деган одам бўламиз ўшандা?

Кун қайтиб қолганига ҳам қарамай, жаҳд қилиб қидириб келаётганим шундан эди. Яхшиям жаҳд қилганим, шом тушмасидан (кун ҳали уфқда янги тушган тандирдек қизариб туради) шифохонага этиб бордим. У Қибрай томонда — баҳаво жойларга яқин ерда экан. Илгари қайси бир каттанинг боғи бўлган шекилли, ҳозир ҳам шинам, ёф тушса ялагудек эди. Балки хукуматга қарашлидир ҳали ҳам.

Ўйлаганимча бор экан, киравериш — қоровулхонадаги муомаладаноқ билинди:

— Келинг, оповси. Кимни сўраб келувдиз? — деб кўк халатли хуршўйгина аёл пешвоз чиқди олдимга. Мен номларини айтдим:

— Шу ерга тушиб қолган эканлар, келинойимиз...

У ойна тагидаги рўйхатни икки сидра қараб чиқибам мен айтган исмни тополмай бошини кўтарди.

— Балки фамилияларини биларсиз? — деди умидвор этиб.

— Фамилиялари... — Акамнинг фамилиясини эслаб айтдим, — Абдураҳимова бўлса керак.

Лекин рўйхатда бундай фамилияли одам ҳам йўқ эди.

Бирдан Чаман аканинг омонат хати ёдимга тушиб, киссамдан уни излаб қолдим.

— Шошманг-чи, мана бу ерда ёзган бўлишлари керак.

Хат-қоғозни олиб, ўзим ҳайратда қолдим. Чаман ака унинг бир чеккасига, тўғрироғи, хатнинг ортига (Ёдгормурод олиб берган кезда нимага кўрмадим экан?) ёзган эди: «Дарвоқе, уни Марғуба Убайдуллоҳ қизи деб сўраб боргил. Бўлмаса, топиб беролмагайлар!»

«Марғуба? Нима бу? Шунчаки тасодифми ё ўша биринчи кеннойимга менгзаб, ўшандай баҳтини топсин деб... қўйганми, Чаман акам? Унда нега Убайдуллоҳ қизи? Ўзининг фамилиясига олибдими?! Қандай олади бироннинг хасмини?! Яна жонажон ошнасининг қайлигини?! Эси жойидами?! Махфуз кеннойим-чи?! Акам учун ҳамма абу балоларга, жабру жағоларга рози бўлиб, бу ёқларда тентираб юрган кеннойим-чи? Қандай рози бўла қолибди бу ишга, бироннинг номига ўтказишларига?! (Балки никоҳига ўтказиб ҳам олгандир?!?) Хаёлимга урилган ана шу ўйдан ўзимга келолмай турарканман, дарбон аёл (ҳолимга ачинибми?) атрофимда гиргиттон бўлиб қолган эди:

— Ўтилинг, вой, оповси. Бирпас нафасиззи ростланг. Ҳеч қиси йўқ, шундан шу ёқка келганингизда — хижолат бўлманг, топилади, топилмайдиган нарса борми? Манави чойдан бир хўпланг, зора эслаб қолсангиз...

— Йўқ, топдим, — дедим ўзимни тутиб олиб. — Мана, Марғуба Убайдуллоҳ қизи экан. Қарамаган эканман.

— Ие, анув тили бир ширин, кўхлик аёл бўлмасин тағин. Сўзлари сал кетиб-кетиб қолаятувди. Оғача келинми? — Ҳалиям юзининг жоноқи олмадек қизиллиги қолмаган аёл рўйхат устига энгашаркан, юрагим орзиқиб тушди.

— Шундай бўлиши керак, Тангритоғ томонлардан тушишган, — дедим.

— Келин бўлиб-а? — деди аёл бир қиё қараб қўйиб.

Мен (юрагим увушиб!) нима деяримни қандай тушунтиаримни билмай... (Кошки бу тарихни очиб бўлса ҳаммага!) ноилож, бош иргадим.

— Бизам шундайми, деб ўйловдик бояқишигинани,— деб туриб, кувониб кетди. — Ҳа, мана — айтган одамиз, Убайдуллоҳ қизи. Ҳаммага қанчалаб одамлар келганда бу аёлни ҳеч ким йўқламасди. Савоб ҳам керак деб йўқлаб чиқардук. Яхши кепсиз, оповси. — Аёл бир нозик гапи бор одамдек ичкаридан айланиб, чиқиб келди. — Кечирасиз, сўраганнинг айби йўқ, кимлари бўласиз?

— Қайнилари, — дедим у ўзини яқин олиб бир нарса демоқчилигини англағандек бўлиб. — Нима эди?

— Ундан бўлса, сизга холис бир гап-да, — дея азза-базза қўлтиғимдан олиб, бир четга бошлади, — боякиш мусофиригина экан, қолаверса, қиз боладек нарса: жарроҳлар қўлига ташлаб қўйманглар бундай. Рухсат берманглар.

— Нимага рухсат, қандай рухсат? — дедим нима гаплигини англа-англамай.

Аёл кўзларимга илтижоли бокди:

— Тушунинг сиз, жарроҳларга нима! Кесадилар — қутуладилар-да. Лекин жабр-жабр кимга бўлади — унга бўлади. Аёл нарсага. Розилик берманг. «Жойиданам» бўлади баъзан бунақа нарсалар... Иримини қилса, сан кўр-ман кўр бўлиб, оёққа туриб кетар-миди...

Мен юрагим ҳаприқди:

— Оёқларига нима бўлган?..

— Айтмоқчи, ҳали Сиз билмайсиз-а. Боякиш таҳорат янгилайман деб ваннахонага кирган экан: тийғониб тиззасини уриб олиди. Ўша — дўнгалақдек шишиб кетиб, юролмай ҳам, туролмай ҳам қолса дeng. Бўлмаса, намозини ўқиб, бир чиройли юрувди. Ранглари ҳам яхши бўп қолувди.

Мен қайтариб сўрадим:

— «Бир чиройли юрувди?» — Назаримда, бошқа бирор билан чалгитаётгандек эди.

— Ҳа, оповси, ташқарига ҳам секин-аста чиқаётган эди. Факат манави фалокат — оёғи остидан чиқиб, ёмон бўлди. Шунинг учунам касали «жойи»данмикан, дейман. Эскичадан

хабари бор Ҳозиқ табибга кўрсатиш керакмиди. У киши хориждан келганлар, шу шахримиздалар. Бирор бирорга сабабчи бўлади-да, оповси.

Бошда хушрўйгинаю ийманчоққина кўринган қишлоқ аёлининг бирпасда шунча гапни гапириб ташлаганингами ё кеннойим ҳақида ҳеч нарса билмай юриб, бирдан шунча нарсадан хабар топганингами, бошим айланиблар кетган эди:

— Маслаҳатингиз-чун раҳмат. Кўриб чиқай-чи, аввал, — деб мен қўзғолиб, ичкари ўтишга чоғландим. — Қайси хонадан... сўрайман?

— Илой, Худойим Сизни ўзи етказган бўлсин, — эшикбон опа олдимга тушиб, гиргиттон бўлиб йўл кўрсата бошлади. — Мана, шу тераклар таги билан бориб, хув, анави олди пешайвонли бинога ўтасиз. Деразаси шу ёққа қараган кунжакдаги хона. Ҳамширалардан сўраб, кириб боравурасиз.

— Раҳмат.

— Фақат бояги гапни унутманг-а?

— Яхши, опажон, — мен ташаккур айтиб, ёғ тушса ялагудек йўлкадан азamat тераклар таги билан юра кетдим. Улар ҳали қув яланғоч бўлсалар-да, бир гўзал саф тортган эдилар. Кечки офтобда учлари ёниб кетгудек зарҳалланиб турар, аммо менинг бутун фикри-зикрим шу йўлка адодидаги пешайвонли бинода эди. Кўзларимни унинг шу ёққа қараган энг чекка деразасидан узолмасдим. Нимага ичим қуриб, ҳаприқаётир, десам, кеннойим бу аҳволда ётган эканлар-да. Бизни бир кўришга илҳақ бўлиб? Шу кунларга тушиб? Чаман акам бежиз тайинламаган экан. Оёғини қачон уриб олибди, у кетгунчами ё ундан кейин? Бечора кенно-йим, шу кўргиликлари ҳам бор эканми мусофирилиги устига?

Хузурига кириб боряпману ичим ёниб, бўғзимга золдирдек қайноқ бир нарса тиқилиб келяпти. Юрагимни бир нима тимдалайди. Ундан нимталаб ташлагани маъқул эди. Енгил тортармидим... Қайни бўлиб, биздан нима кўрди? Шу ҳолга тушгунчаям қидириб топмабмиз! Ҳолидан хабар олмабмиз! Акамнинг, ақажонимнинг хурмати шуми эди?!

Қалбимнинг энг чукур, энг ингичка ерларида тушунуксиз, (ўз-ўзимдан шекилли!) бир норозилик ул-ғайиб, бир ҳайқириқ қайнаб келаётир. Уят! Қандай уятли ҳол!... Кўксим худди мижмарга, ҳа-ҳа, ўт туташган кўксга ўхшаб куймоқда гўё, дуди ичимга сиғмай кетаётир.

Димофимга бир ғалати ҳид ва дудлар урилади. Гўё бирор шу яқин атрофда мижмар аталмиш идишда мушк-анбар тутатаётган каби. У шу атрофдан гупуриб келяптими, ич-ичимданми — ўзим билмайман: Мана, сизга оқибат! Тағин биз жигармишмиз! Жигаримизнинг жигарига жигар бўлолмабмиз-ку! Акам келганда олдига қайси юз билан «Вой жигарим»лаб борамиз? Бағрига ўзимизни ташлаймиз?

Уят, хижолатпазлик, шунча вақтдан бери ҳолидан хабар ололмаганимиз — барча-барчаси қўшилиб, бир тарафдан ичимни тирнаб бораётган бўлса, бошқа тарафдан ниҳоят дарагини топиб, энг мушқул кунда олдига етиб келаётганимдан, мана ҳозир мени кўриб қай алпозга тушувидан яна бир ҳаяжондаман. Хуши учиб, эси оғиб қолмаса кошки эди! Балки аввал хабар бериб, кейин кириб боришим лозиммиди?

Қибрайнинг оқ юз, тим қора кўзли қишлоқ қизлари ҳамшира бўлиб ишлашар экан.

— Келинг, кимга келиб эдийиз? — деб хаёлигина ийманиб, ўрниларидан қўзғолишиди.

Мен айтдим-у, шу ондаёқ юзларида ғалати жиддийлик кўриб, қўрқиб кетдим:

— Ўзлари... яхшимилар ишқилиб?

Ҳамширалардан бири худди «Сиз сўрагандан бери!» демоқчидек юз буриб, ишга чалғиди. Ва шу асно шеригига буюрди:

— Ўзинг бошлаб кира қол, Ди!

Унинг бу муомаласи менга айил ботди: «Садқаи қариндош кетинг», деб юзимга солгандек эди. Кўксимда бир нима симиллаб, тилиб ўтди. Шу асно иккинчи шериги ўсма қўйгандек қора қоши бир чимирилиб, олдимга тушди:

— Юринг.

Жавоби ҳам зардаликина эди унинг. Юрагим шув этди: чиндан оғирлашиб қоптиларми, кеннойим?

Қадамимни тезлатиб, ҳамширага етиб олишга шошилдим. (Унинг икки ўрим сочи узунлигидан тақимини ўпай-ўпай дер, ўзи оқ халат устида қўш илондек тўлғонар эди, тавба.)

— Ҳой, синглим, — дедим юрак ютиб, ҳам шивирлаб, — нима бўлган у кишига? Биз энди хабар топиб келяпбиз, — мен ўзимни оқлашга уринармидим ё ахволини билишга ошиқармидим, ажратча олмасдим. Ҳарқа-лай иккиси ҳам бўлса керак.

У ўгирилиб, танбеҳнамо боқди:

— Шовқинласангиз, киритмайин қўяқолишади, — деди секин, — билмайсизми, бизда қандай нозув касаллар ётишини?

— Биламан, биламан, — дедим шивирлаб, ҳам нафасим ичимга тушиб. Ахир шундан шу ёққа топиб келганимда киритмай қўйсалар, кимга зарар! — Ўша чеккадаги хонадаларми? — дедим ялинганинамо.

— Ўша, факат қўп қолиб, толиқтириб қўймайсиз. Куни билан мижжа қоқмадалар, — деди у кеннойимга ачиниб. — Кўлингиздан келса, яхши сўзлар билан кўнгилларини кўтаринг. Балки Сизнинг қадамингиз шарофати билан... оператсиага розилик бериб қоларлар.

Хайрият! Ҳали розилик бермаган эканлар-ку! Юрагим гурс-гурс уриб, бўғзимга бир нималар тикилади. Гўё кўксим тўла капитарлар потир-потур учиб ётибдилар. Ўзим эса нуқул титраб-қақшайман. Ҳатто эшикни қоқишига... ҳолим йўқ. Нихоят... зўрға, секин қоқдим. Ўзимга овоз битганига ўзим ҳайронман:

— Мумкинми?

Каравотнинг таг сими инграпи-ғижирлади, аммо ичкаридан ҳеч овоз чиқмасди. Ҳамон юрагим потирлаб, ҳалқумимга тиқилиб келяпти. Наҳот топдим деганда, кечикдим? Балки кўзи илиниб, эшитмаган чиқар? Эшикни қия очсан, тўрдаги каравотда бир бурдадек бўлиб, юзи бўздек оқарган бирор кўзлари жавдираб ётибди. Ҳайхот, бу кўзлар жуда таниш, факат уни мунг аралаш ёлқинидангина таниб олмоқ мумкин эди!

— Ие, кеннойижон! Нима бўлди? — Мен отилиб кириб бориб, ёнларига чўқмоққа чоғландим.

— Ким? — у жавдираб туриб, овозимданми, нимадан таниб қолди. — Вой, Мақсудхон, сизмусиз? — дея тирсакларига тиралиб бош кўтарган жойида... қай бир еридаги оғриқнинг зўридан лабларини қимтиб жим қолдию... — кечирасиз, — дея бенажот бошини қайта ёстиқка ташлади.

— Уринманг, қимираманг сиз, кеннойижон. Менман, Мақсудман. Мана, топиб келдим. Энди ҳаммаси яхши бўлиб кетади, кўрмагандай бўлиб кетасиз.

Ўзим унга таскин беряпман-у, киприклари остидан сизиб чиқаётган, нозик-адо ажинларини ювиб туша бошлаган кўзёшларини нима қиласримни билмай... (артиб қўярга эса журъатим етмай) пиқирлаб қоляпман. Бўғзимга нимадир тиқилиб келиб, шўртанг бир нималар лабларим четидан сизиб кираётгандай. Кўз олдим туманланиб, ҳеч нарса илғай олмаётиман. Кўролмаяпман-у, кеннойимнинг пинқиллаган овозидан ҳўнграб юборгудекман. Лекин ўзимни босмасам бўладими, босдим:

— Мен Сизга зўр хабарлар олиб келганман, кеннойижон. Зўр табиблар, хориждан келган табибларни топиб қўйганман, — деб тасаллилар бера кетдим. — Ҳали отдай бўлиб кетасиз... кўрмагандай бўлиб кетасиз. Мен Сизни бу ерларда ётқизиб қўймайман, ўз оёғиз билан юргизиб олиб чиқиб кетаман, — дердим, ваъдалар берардим. Остонада бирор тургандек туюлиб, ўтирилиб қарасам, бояги ҳамшира: лаблари учеб-учиб турган экан, эшикни секин ёпди. Мен уялганимдан ўзимни тутиб, туриб ўтиридим-да, гўё ҳеч гап ўтмагандек, яна янгиликларга тушдим:

— Сизга Ойтўра буви салом айтдилар. Ёдгормуродиз сўраб-сўраб қолди: «Аяжонумни соғундум, ҳар иккала кўзларим ила соғундум», дейди.

Во ажаб! Оғриқнинг зўридан инграб ётган одам кўзлари ярақлаб очилиб кетса бўладими! Юзларига ичдан бир ажойиб оқ-қирмизи (бошқача ўхшата олмадим!) ранг югурди.

— Ёдгортойум-а? Мену муродум-а? — деди тўлиқкан бир товушда. — Ўзу қандай? Ичикиб қолмабдиму? Қийун бўлду болам бояқишига. Қийун бўлгандан ўшанга бўлду.

— Йўқ, ундин деманг. Бир ақлли, бир мўминтой бола бўлибди Ёдгормуродингиз. У мени Сизлар турган болохоналарга опчиқди. Олмагулли жимит чойнаклариз ичдан амақусининг омонатларини олиб берди, — дедим кеннойижонимнинг чиройини очай, ўзини хурсанд этай, деб.

— Шунақаму? Катта йигит бўлиб-а?

— Бўлганда-чи! Ҳали қараб турасиз! Анвар мир-зодай бир йигит бўлсинки, келинликка Раъно қизларни излаб юринг! — деб юборибман. Ўзимнинг гапимдан ўзимни оловим чиқиб кетди. Аммо бу гап кенно-йимга ёқкан, маҳзун жилмайганча қўлини дуога очган эди.

— Ўша кунларга етказсун, илоҳум, — деди юзига қўл учларини суртиб. Сўнг менинг олдимда чўзилиб ётишга ўнғайсизланибми, бошини кўтариб, жилла курса, туриб ўтиришга унналди. Аммо ўша оёғими, нимадир қаддини кўтаришига қўймас, у лабини тишлаганча қолган эди. Мен шошиб:

— Қимирламанг, уринманг Сиз, — деб елкасидан босиб, ёстиқларини тўғрилаган бўлдим.

Кеннойим шу йиллар ичida ўзини анча олдирган, юз-кўзларидаги ўша маъсумликни демаса, оғир дардга чалинган бошқа бирорга ўхшатиб, танимаслик ҳам мумкин эди дафъатан. Лекин товши, сўзлари, уни кўксидан чиқариб, Тантритоф томонлиларга ўхшаб, бир чиройли талаффуз этиши ўша-ўша эди, боқишилари ўша-ўша мулоим, ўзгармаган эди. Фақат кўз қарашларида маҳзунликми, муnis синиқликми кўпайгандек. Балки манави дард ҳам, ёлғизлик ҳам енгиб кўйгандир, қийнаб, бенажот қолдиргандир. Ахир мусофирилик осонми, ёлғиз аёл бошига?.

— Бахай, кеннойижон, бу ерларга тушиб қолибсиз? Нима бўлди? Нима лозим? Айтинг, табиб дессангиз табибларга олиб борай. Дўхтир дессангиз дўхтириларга. Фақат бундай йиғламанг. Эсингиздами, сиз мени нақд ўлимдан олиб қолган эдингиз. Шундай кунда энди мен ярамасам, қачон ярайман! — деб ер тиззалаб олган, гўё пойларига бош уриб турар эдим.

У эса кўзларида ёш, бир оғиз бир нарса дея олмай, йигисини қулт-қулт ютганча ётиби. Фақат кўзларини узмайди, ора-сира кафтлари ила мижжаларини артиб, ўша қўллари-ла бошимни силайди, соchlаримни тўғрилаган бўлади. Кўзларидан олам-жаҳон миннатдорчилик, раҳматлар ўқийман. Шугина менга таскин бериб туриби. Бўлмаса, ўзимни тутолмаслигим аниқ. Ахир мен кеннойижонимни шу алпозда топаман, деб ўйлабми эдим?! Қани у гўзал хилқат? Оллоҳ акам учун яратиб, пардаи исматида асрраган фариштаси? Марғубанинг ўрнига берган маҳбубаси? Шундай имтиҳонларига рўбарў этибдими бу суйган бандасини?..

— Раҳмат, қайнужонум. Мана, кепсиз, шунинг ўзи етади менга, — деди у тўлиқиб. — Бошим осмонга етди. Шу кеча тушларимга Ҳизрдек оппоқ бир қария, нурлудан нурлу бир мўйсафид кириб юрибди. Китоб-ларда кўрганумиз, шеърларини ёд олганумиз ўша ҳазрат Навоийгами, кимга ўхшаб кетаду, тавба. «Қизим, қўпам қайғурманг, дардингизнинг давоси бор, иншааллоҳ, Сизни йўқлаб келишгай. Мени қидириб топсинлар», дейду. Эрталабдан бери ҳайрон эдум нима экан деб. Мана, нажот фариштасудек ўзиз кириб келдунгиз. Энди қўрқмайман. Сизни Худойимнинг ўзи етказду, — деб қўлларимни тавоғ этиб, бармоқларимнинг учини ўпиб қўяр, ҳов бир вақтдагидек маъсум-маъсум жилмаяр эди.

Унинг бу ишидан жону жаҳоним ёришиб, ўрнимдан туриб олгим, бозорликларимни очиб, ўша илинглан нарсаларимдан жилла курса, икки донагина нокнию Ойтўра буви бериб юборган қалампирмунчоқни қўлларига тутқазгим келарди. Ахийри олиб:

— Мана, мен Сизга нималар олиб келдим, қаранг,— дедим.

— Вой, ҳалим нокму? — кеннойим азза-базза бошини күтариб, тирсагига тиради. — Ҳидину қаранг, асал тортуб кетипти-ку!..

Дарҳақиқат, ундан асал ҳиди гуркираб, ўзи сариқ ипакдек жилваланар эди.

— Бир кампиршодан олдим бу жаннатнинг мевасини. Дуо қилиб еяр экансиз.

— Раҳмат, — деди у чиройли киприк қоқиб. (Афтидан мутаассирланиб, оғриқларию қайғуларини бир зумгина унуган эди.) — Бунису қалампирмунчоқ-ку. Раҳмат. Шундан шу ёққа илинуб... кўтаруб юрубсиз,— деди у.

— Уни буви бериб юбордилар. Ҳидлаб туаркансиз, губорингизни оларкан.

— Вой, шундайму? Барака топсунлар. Менга яхшилик соғинганларну Аллоҳ қўлласун, ўзи азиз қилсан, — деди у яна ҳам таъсиrlаниб. Кўзлари чақнаб, ёшми — нима йилтиллади. — Қани эду, тушларум ўнгудан кела қолса.

— Иншааллоҳ, ўшал кўринган одамни-да, топгаймиз. Бекорга белги бермаган,— дедим эшикбон аёлнинг гаплари рост келаётганидан ўзим ҳам ҳайратланиб.

— Валлоҳ, фаришталар омин деб турган бўлсун. — У мижжаларига қалқиб чиқсан ёшларни артиб, боягидек миннатдор тикилди. — Ўша-ўшасуз-а, қайнужонум, кичикойумларнинг, каттабоғликларнинг ҳидину туйдум, раҳмат.

— Шошмай туриңг, яна ўшоқларга опчиқиб кетаман. Ахир Сиз қанғлиликсиз,— дедим мен.

— Қанийду, Каттабоғну қайтуб бир кўрсан, Сизларнукуга чиқсан. Анув Олмазоримизну бир айлан-сан — армоним йўқ эду. Падарибузрукворимизну, волидаи мукаррама онамизну кўргандек бўлар эдум. Улар етишолмаган жойга мен етар эдум,— деди тўлиқиб ва яна кўзлари қайта намланиб кела бошлади.

— Улгурамиз-улгурамиз. Ҳали ҳаммасини бузиб, қўпориб битиришганича йўқ. Олмазор шундай турибди, эгасиз боғдай,— дедим.

— Қандай? Ҳали у томонларну ҳам бузишяптиму? Шаҳарга қўшиб юборишяптиму? — деди у ташвишланиб.

— Қўшиб бўлишди ҳисоб. Ҳеч вақо қолмади Каттабоғимиздан.

— Сизларнукуни ҳамму? Ўшал қўрғон, ўшал уйларну-я? Бир нишон қолдурмайин-а? — деди у саросимага тушиб. Ўзи азза-базза туришга унналди-ю, аммо туролмади. Мен унинг устида гиргиттон бўлиб, тасалли беришга уринардим:

— Йўқ-йўқ, боғимиз турибди. Фақат томни очиб, кўчиб кетдик, холос. Суриб юборишганича йўқ ҳали.

У кўзларини юмиб, бир муддат жим қолди, сўнг «Ўзингга шукр, Аллоҳум, шармисор этмабсан», дея шивирлади...

Нихоят, хасрат тўла кўзларини очиб:

— Ишқилуб... ўшал биз турган пахсалу уй... омонму? — деди аллақандай термулиб.

Шу топда бир оғиз bemavrid сўз билан унинг кўнглини чил-чил қилиб қўйишим мумкин эди: тилим зўрға айланди:

— Омонлиги шуки, томи очуқ, ёлғиз деворлари қолган...

Кеннойим енгил тин олди:

— Шунисигаям шукр. Суриб ташлашса нима қиласардум?! — деди у. Кейин менга термулиб, ўтина кетди: — Яхшиям келубсиз. Энди сиздан илтимос, қайнужонум. Тез боргайсиз, суриб юбормасларидан боргайсиз. Ўшал уйда — биласиз-ку, мен турган уйни — ўша катта уйда бир нарса қолдуриб эдум. Акангизга аталган нарсалар... Тушуняпсизму, омонат эду. Қачондан бери ич-этимну еяр эдум. Ўшану олмок лозум.

У нима ўзи, қандай омонат? Турибдими, йўқми ҳали? Қаерида эди? Сўрагим келиб кетяпти-ю, қани тилим айланса! Айланмаяпти, танглайимга ёпишиб қолган. Ўзидан кўз узолмай ютоқаман нуқул: нима у, айта қолса-чи?!

— Ўртадаги токчану биласиз-а?.. Ўша ерда эду.

— Токчадами? — дедим ҳеч нимага ақлим етмай: токчада нарса қоптими? Шип-шийдонини чиқариб күчгандын миз-ку?..

— Йўқ, тушунмадуз: тагину уриб кўринг, пўкиллайду. Ўша еруда. Очсангуз оласиз у битикларну.

— Битиклар? — дедим ҳайратга тушиб. Аммо дафтарми, нима, деб сўролмасдим. Ичим тошиб бормоқдайди.

— Ҳа, қайнужонум, — деди у. — Одамлар нима деб ўйласалар-ўйласунлар, лекин мен Аллоҳ шоҳид, акангиз олдуларида покман. Уятлу эмасман ҳеч. Жилла қурса, мана шу битиклар — бизнинг қиссамиз гувоҳ бўлсун! Жон қайнум, мумкин бўлса, олиб қўйинг. Шу қофоз, шу дафтарларну! У кишини қайтуб кўриш... насиб этмаса... — У ичи тўлиб келиб, азза-базза юзини буриб олди,— берарсиз бир кун.— Аммо кўриб турибман: кўзларидан дувиллаб оққан ёшлар... юзларини ювишдан уялган каби пастга чопқиллаб ёстиққа ошиқар ва унга сингиб йўқолар эдилар.

У қанча, неча дафтар — сўрагим-билгим бор-у, сўрай олмасдим. Дарвоқе, уларнинг айрилиқ қиссалари қанчалар узун — нимадан бошланиб, нима билан тугайди, мен қаердан ҳам билардим...

### 3. КИМЛАР КИРАР МУШФИҚАНИНГ ТУШИГА?..

Ниҳоят, мен турар бўлдим. Оқшом чўкиб, қайтар маҳалим яқинлашгани сайин ичим турмишлаб бормоқда эди: Нима қилсан экан? Аввал қаёққа ўтсам? Эски ҳовлимизгами ё анави «Оповси» опа айтган жойга? Қай бирига улгурман? Опа айтган, Маҳфуз кеннойимнинг тушларига кириб, белги бераётган табибни десам, эски уйимиз қоляпти, уни десам буниси. Бири-биридан зарур — муҳим. Айниқса, анави битикларга ичим тушиб боряпти. (Ҳозир ўтсам, ҳозир топиб оладигандекман, у «маҳфуз» хатларни! Аммо кейинга қолдирсам... бир умрга йўқотиб, ажраб қолсам-чи? Ахир хароба жойни ким тутиб турарди?! Бугун бор, эртага суриб ташламасликларига ким кафолат бера олади?! Кейин қайси тупроқ остидан излайсан?!)

Мен эски уйимизга ўтиб, мактубни излаб юрсам-у, бу ёқда жарроҳлар кеннойимнинг оёғини кесишга қарор қилиб қўйсалар-чи? Йўқ, шунча ётган қоғозлар ёта туради, табиб зарурроқ! «Тушларимга Ҳизрдек оппоқ бир қария, нурлудан нурлу бир мўйсафид кириб юрибду» дейди. Бежизмас шекилли. Нимадан белги бераётиди экан у?..

Кун кетиб борар, аммо ўзим қай бирига улгураримни билмасдим. Ахийри қўзғолдим.

— Хўп кеннойижон, мен энди борақолай, — дедим рухсат сўраб. Аммо ўзим ҳеч кетгим йўқ. Ҳатто туришга кўнглим бўлмай... имиллагандан имилляяпман. — Ўша белги бераётган табибни... суриштириб кўрайин-чи?

Бечора кеннойигинам!.. Мен унинг кўнглига қараб тепасидан жилолмаётганимдан бир мутаассирланса (кўриб турибман: қора олудек кўзлари ёшланиб-ёшланиб келмоқда, лекин мижжаларидан оқиб тушишига ҳаёсими — нимасидир қўймаяпти), тушларига киргучи табибдан оғиз очиб мени ташвишга қўйганидан минг хижолатда...

— Ўзингизга қаранг, тушга нималар кирмайду, ахир...

— Анави Опа ҳам айтаяптилар: «жой»дан бўлса, армон бўлиб қолмасин деб. У киши қаерда туришини биладиканлар. Бораверай, зора нафи тегса.

Кеннойим ич-ичидан рози-ю, ўзи ўша табибга умид тутиб ётиби-ку... сездиргиси, мени ташвишга қўйгиси келмасди. Чалғитибми, ҳадеб бўлак нарсалардан оғиз очарди:

— Дарвоқе, у ёқда кичигойум қалайлар? Келинпошша-чи? Дуоларини олуб ўтирибдуларму? Салом айтуб, сўраб қўясиз. Биз уятлуларни... кечиролсалар кечирсунлар, кичигойим. Худойумнинг хоҳлашу экан, шунақа ишлар бўлуб кетту.

Мен ўзим туриб олганман-у, яна таскин-тасалли бераман:

— Ҳечқиси йўқ. Мана, дараклариз чиқиб, ўзизни топдик-ку. Ҳали эшитиб, бир ерга етадилар. Балки қистаб қўймасалар, олиб ҳам келарман.

Кеннойим ётган ерида бир ғалати — илтижоли тикилди.

— Унда... унда айтмай тура қолунг, жон Максудхўжам... Мену бу аҳволда кўруб, қўймасунлар. Сал ўзумга келуб олай, хўп?

— Майли-майли, — дедим ич-ичимдан босиб келаётган хўрликларни ютиб. Унга бирон нарса деяй дейман-у, бўғзимдан ҳеч сўз чиқмаётир. Аммо ўзим тепасига келиб, ёнгинасига тиз чўкиб олганман. Мижжаларининг четидан дувиллаб оқиб бораётган, нори устидан чопқиллаб ўтиб, қулоқ юмшоғи тагига, ундан ёстиққа сингиб кетаётган ёшларни кафтим ила сидириб тўхтатиб қолмоқчи, артмоқчи бўламан-у, қани эплай олсам, журъат этолсам. Йифламанг, кеннойижон, у кишига айтиш қочмайди, аввал тузалиб олинг демоқчиман-у, айтотмаяпман. Бўғзимдаги ўша нарса, ўша хўрликлар бир бўлиб, қўймаяпти. Бояқиш, кеннойигинам. Акамни деб келиб, шунча ташвишларга қолган эканми?

Аламми — нима, шунча хўрликларни қулт этиб ютиб юборишга қўймас, имкон бермас эди, ниҳоят бир ютуниб — енгил тортдиму:

— Хўп, кеннойижон, хўп, — дедим. — Сиз айтганча бўлсин. Аммо ишонинг, сизни бу аҳволда ташлаб қўймаймиз. Албатта, тузатиб олиб чиқиб кетамиз. Қараб туринг, ўз оёқлариз билан юриб чиқиб кетасиз. Опчиқиб, янги жойларимизга олиб бораман. Яна ўзимиз билан турасиз. Худди илгариги вактлардагидек. Бу ёқдан Ёдгортойни опчиқамиз. Одамлар кўриб қўйишишин, буларнинг қандай жужуғи боракан деб...

Воҳ!.. Шу ерга келганда тишлиб қолдим: мен овсар, мен ҳафтафаҳм, нималар деб валдираяпман, ўзим билмай қаёқларга ўтлаб кетяпман?! Кошки бир нимани билақолсам!..

Ҳайтовур, кеннойим англамай қолди. Фаҳмлаб қолсами, билмадим, қай алпозга тушар эдим.

У бўлса, мижжаларию кўз ёшларини артиб, жилмайишга уринар, мутаассир бир ҳолатда:

— Иншааллоҳ денг, Максудхўжа, фаришталар ҳам омин десунлар... — деб шивирлару ўзига келолмасди.

— Иншааллоҳ, иншааллоҳ, — дердим мен қайта ва қайта, — йўқ ердан дарагингизни чиқарган Оллоҳим бу ёғини ҳам ўнглайди. Қўллайди. Сиз маҳкам бўлаверинг фақат, — деб далдалар берардим.

Сўнг хайрлаша бошладик. Қайтиш тараддудига тушганимни кўриб, у бирдан ўзгариб қолди. Кўзлари жавдираб, бир нималар демоқчи бўлади-ю, айтотмайди. Истиҳолага тушиб, дардини ичига ютапти. Қайтдим. Келиб, журъат этиб-этмайгина ёстиқларини тўғрилашга тутиндим. Аммо ўзимнинг ич-ичимдан ҳам бир турлик хўрликми — нима босиб келяптики, қўлларим, бармоқларим титраб боряптилар.

— Яна бирон гапингиз бўлса, тортинманг, — дедим зўрға, — эртага келишимда...

Унинг мижжаларига икки томчи ёш қалқиб чиқди.

— Эртага мену... мену тополмай қоласизму деб... қўрқамен.

Мен шошиб қолдим. Ичимдан ўт чиқиб кетди!

— Нега унақа деяпсиз, кеннойижон? Ахир, келишдик-ку, мен табиб топиб келадиган бўлдим-ку. — Мен яна унинг ёнига чўкиб олган эдим: — Унақа хаёлларни... бошингиздан чиқариб ташланг...

Кеннойим соchlаримни силаб, маҳзун ютинди:

— Сарсон бўлиб қолманг деб... айтаётиран.

— Сарсониз нимаси?

— Гап шундаки... Эртага кўчиришмоқчу... бошқа бир ёқقا.

— Нега, бу ер-чи?

У боягидек тўлиқиб ютинди:

— Кесмасалар бўлмас эмуш... Бирон бошқа касалхонада.

— Сиз... Сиз розилик бердингизми? — дедим титраб. — Ахир тушингизга кирган, кириб юрган одам-чи? Бекорга белги бераётирими?

Кеннойим мунглигина мунғайди:

— Розилик бермаганумда... у кишину топишну айтинг. Ким сўроқлайди-ю, ким топиб келаду?

— Мана, мен-чи? — дедим сидқидилдан, — сизни топиб келганда, уни тополмайманми?

Унинг кўзлари ёниб, юзлари ёришиб келди:

— Сиз... Сиз нимага ишонуб, бундай деяпсиз?

Мен дарвозадаги хушрўй аёл — «Оповси» опани эслатдим.

— Ўша аёл ҳам касалингизни «жой»идан деяпти. Сиз бир-икки кун розилик бермай туринг.

— Вой, у киши айтдуларми? Танийман-танийман, — деди кеннойим жонланиб. — Кун ора кириб, сўраб-суриштируб, тансуқ-тансуқ нарсалар кўтариб келуб, одамни бир хижолатларга қўядулар.

— Хўп десангиз, ўша опа айтаётган табибни излаб кўрамиз. Ё ойимларга айтайми?

— Қайдам... яна Сизни ташвишга қўйиб-а? Тушга нималар кирмайду, ахир.

Энди мен унамадим:

— Бу ёғини менга қўйиб беринг. Топиб келаман дедимми, топаман!

Назаримда мен изласамоқ, бас эди, Худойим ўзи қўллайдигандек, ўша табибни йўлиқтирадигандек эди. Нимадан бу — ўзим билмайман. Балки келинайимга азбаройи бир яхшилик қилгим келиб кетаётганидандир, у ёғини ўзим билмасдим.

— Хўп, мен қайтдим, — дедим ахийри эшик томон юриб, — Сиз дуо қилиб ётинг.

— Майлу, яхшу боринг. Яхшу дараклар ила қайтунг, илоҳум, — деди у.

Кеннойим мен кетаётганимни қўриб, жилла қур-са, тирсагига тиралиб турмоққа, туриб хайрлашмоқ-қа чоғланди-ю... шу чоғ нимадир бўлиб, дафъатан инграб юборди. Ва «их» деганча лабларини тишлаб қолди.

Югуриб бордим:

— Сизга нима бўлди, нима қилди, кеннойижон? Айтақолинг, — деб ўтинардим. Қўрқиб кетганим шунчалик!

У сал узаниб ингранди, ўшал алпозда тиззасини силашгами, уқалашга тутинди. Мен нима қиласаримни, устини очиб ташлаб, оёқларига қарашни ҳам, ёрдамлашиб юборишни ҳам билмасдим. Ўзлариданми, кимдан изн кутиб жавдиардим. Кеннойим эса, ранги қум ўчиб, мижжаларининг тагидан тирқираб ёш чиққанча қолган эди. Ниҳоят, қимтилган лабларига жон битиб:

— Айтинг, қараб юборишсин... — деди.

Шундагина ҳамшира чақириш хаёлимга кепти. Ўпкамни қўлтиқлаб, йўлакка чопдим:

— Ҳой, қизлар, қаердасиз?..

Менинг шовқинимга ўртадаги хонадан оқ халатли қизлар югуриб чиқишиди:

— Нима гап, нима бўлди?

— Қарай қолинглар, илтимос. — Улар киришдиям, мен ўзимга келолмасдим, ҳатто кириб боролмасдим: Бечора, шундай дард чекиб ётган эканми ҳали? Бошига тушган шунча кўргиликлар кам эканми?

Қизлардан бири қайтиб чиқиб, жонсараклик ила жому бинт кўтариб ҳатто кириб кетди. Нимага экан, ҳеч ақлим етмасди. Ўзим остонаядан ўтолмай турибман. Кириб боришга юзим чидамаяпти. Устиларини очиб қўйишишган бўлса, нима деб ҳам кирдим? Қолаверса, вужудим кулоққа айланган. Ичкарида тиқ этган товушга илҳақ турибман. Фақат кеннойижоним сал енгил тортсалар, бас, ўзларига келганларини билсан, бас.

Ҳамшира қизлар қанака эпакасиз эканлар, ҳамон каловланиб бир-бирларини шоширишар, «бўл, опке, кўтар»дан нари ўтишолмасди. Ахийри бир нима жўмракдан оққандек жомга

шовуллаб туша бошладио кеннойим инграб юборди.

Ҳамширалар эса устида айланиб-ўргилиб, таскин берардилар:

— Ҳозир, опажон, оқиб битадио ором оласиз, қутиласиз. Ҳаммаси шу патосники, шунинг оғриғи...

Мен эсам ҳеч вақога ақлим етмай, бир ярадан шунча патос чиқарканми деб, тасаввур эта олмай ичим сидирилиб боряпти: жўмракдан оққандек патос — қандай зардоб эканки, бир яра тагига шунчаликни йиғилақолса? Дўхтирлар уни кесамиз деб ваҳима қилишганча бор шекилли?.. Бу орада сочини иккита қилиб ўриб, орқасига ташлаб олган бояги ҳамшира юргургилаб чиқиб, менга урилиб кетай деди. Норозиланиб қарадио яна аяди:

— Илтимос, четроқ туринг.

Мен узр айтиб, ортидан эргашдим.

— Ўзлари яхшимилар, яхши бўп қоладиларми?..

У ойнаванд жавонни очиб бинту малҳам изларкан, тавба, қанақа ҳафтафаҳм одамсиз, дегандек қарадио, ўз ишидан қолмасди. Мени баттар ваҳм босиб:

— Ҳар куни шу ахволми? Қайтмаяптими? У кишига нима бўлган? Айта қолинг, жон синглим, — деб ялинишга тушган эдим.

У энди афтимга қарамайин ҳам ошиғич қайта бошлади. Мен унга боғланиб қолгандай эргашиб борардим. Палатага етмасдан яна ўтиндим:

— Жон синглим...

У ичкарига кириб бораётган жойида — оstonада тўхтадио инсоф қилиб қайтди. Келиб қулоғимга шивирлади:

— Жарроҳлар кесишлоқчи, ўша оёқларини, билдиз?! — У менгами, кеннойимгами ачинган каби афтимга тикилиб туриб, бурилиб палатага кириб кетди.

Оёқларини кесишади? Ғалати-ку! Мен аҳмоқ, мен пандаваки яраларини кесишади, очиб тозалашади, деб ўтирибман! Булар ана нима қарорга келиб қўйишибди! Йўқ-йўқ! Ҳечам розилик бериб бўлмайди! Бошқа иложини топсинлар! Зўр бўлсалар кесмай тузатсинлар! Нега кесарканлар? Ахир шунча сарсон-саргардонликлари етмай, оёғидан ҳам ажрайдими? Бирор яқинидан ризолик олмай туриб, қандай кесишади? Бунга ким розилик бераркан? Ҳатто Чаман аканинг ҳам ҳаққи йўқдир. Ёки у акамнинг ризолигини олгани... қидириб кетганми? Ё алҳазар, ёнгинамиизда шунча воқеалар кечиб, биз бехабар қолсак. Кеннойим бу ахволда ётиб, акам у ахволда — бу диёрларга қадам босолмай юрсаю, биз ёрдам қўлимиизни чўзолмасак. Қай кунларга қолганмиз? Ё дунё ўзи шундай қурилганми? Сарсонлик-саргардонликларнинг нихояси, чеки йўқ этиб тузилганми?..

— Сизга рухсат экан, эрта билан вақтлироқ келаркансиз.

Ўзимга келиб қарасам — бояги ҳамшира. Гўё у нажот фариштасидек:

— Илтимос, айтиб қўйсангиз: кесишга розилик бермай турсинлар! — дедим титраб-қақшаб.

— Яхши, — деди у ҳам менга хайриҳоҳлик билан. Сўнг бурилиб кета туриб яна тўхтади. — Айтмоқчи, табибни ахтариб кўраркансиз. Тушундизми?..

Ичимдан бир қуёш чиққандек бўлиб кетдим: ҳайрият, умид тутаётган жойлари бор экан-ку! Ошиғич ташқарига қараб юрдим. Бу хабардан ичим ёришиб, қушдек енгил тортган, ҳовли сутдек ойдин бўлса-да, кўз олдимдан кеннойимнинг бўздек оқарган юзи, ҳамшираларнинг чопиб юришлари кетмас, қароқларим остида қайноқ ёш айланар эди.

Ажаб дунё: одамлар йўқотган азиз кишиларини топганда қандоқ қувонадилар! Мен эсам, ёш боладек бўзлаб қайтар эдим.

#### 4. «ҲАСБИЙАЛЛОҲУ ВА НЕЪМАЛ ВАКИЛ»

Эски Жўвада шунча туриб, Тахтапул томонларга ўтиб қўймаган эканман, эсиз.  
Опа жон куйдириб тушунтирас эдилар:

— Тахтапулнинг сувидан шундоқ ўтасизу тушасиз! Тушасиз-да, пастга қараб боравурасиз-боравурасиз. Ярим чақирим юрмасиздан кичкина жин кўча келади. Бурилибоқ Тангритоғлик табибни сўрайсиз, вассалом.

Мен эсам, қани тасаввур қила олсан, ўша жойларни. Биттасиниям кўз олдимга келтиролмаяпман. Буни кўриб, Опа (ўша «оповси» опа-да, қоровулхона бе-каси):

— Унда Севзордан чиқиб келақолинг. Севзорни биласизми? — деб қолдилар.

— Билганда қандоқ! — Мен ичим ёришиб сакраб кетаёздим. — Боядан бери шундоқ демайсизми!

Дарвоқе, ҳоламгиларникида туриб ўқиган кезларим ораси икки қадам Севзордан (биз тошкентликлар суйиб шундай атаймиз, асли Себзор) бери келмасдим. Жангобда танишган дўстларим билан қўшилиб ҳали Лабзакка, ҳали Бешоғоч кўлидаги шахматхонага тентираганимиз-тентираган эди. Ютиб қайтган кунларимиз ўша танти-чапани дўстларим қўярда-қўймай (борасан-да ўша холангларнига деб!) уйларига олиб кетишгани-кетишган эди...

Айтган жойлари — Севзорнинг шундоқ биқинида экан. Тангритоғдан келган табиб ўша ерга қўнганмиш. Тўғрироғи, хукумат унга ўша ердаги Боқчада туришга рухсат этибди. Азбаройи сийлаганидан. Мен шундай деб тушундим. Аммо бу гап ғалати ҳам сирлироқ эди. Шу хукумат бўлади-ю, бир табибга шунчалик иззат-икром кўрсатадими? Яна келгинди-муҳожир бўлса? Тушуниш қийин. Аммо «Оповси» опа у тоғлиқ мусофири бир ерга етиб таърифлар эдилар:

— Вой, у кишини кўрмабсиз, сухбатларига етмабсиз — сўзларидан бол томиб, юзларидан нур ёғилади! Бунақа ҳалим одамни учратмагансиз. Нафаслари бир ўткир, шунақа ўқиб, дам соладиларки... кеннойингизни кўрсатсангиз биласиз. Албатта, боринг, шу боғни айтсангиз — йўқ демайдилар. Туз-насиба экан, қанча вақт турганлар бу ерда.

«Оповси» опа азбаройи кеннойим учун қайишиб мени қисташини қўймасди:

— Борасиз-а, албатта, ўтасиз-а?..

... Мана, кетяпман, ўша (оналаримиз кўпам ихлос қўйиб, бир ерга етишадиган) азайимхон табибни излаб...

Сўраб-сўраб Маккани топганлариdek, мен ҳам учраган қорадан ўша табибни сўроқлаб борар эдим.

Ахийри қайрилишдаги дўкон қоровули — юзи кепчикдай, бужур одам (у қоровулхонасидан дарча очиб, қурут, писта сотиб ўтирас эди) қозоқнинг тўққиз пулидек қилиб, тушунтириб берди:

— Хўв анов жин кўчага буриласиз. Кириб боравурасиз-боравурасиз, бир оқ бинога етасиз. Ўша — Боқча. Ўшаттан сўрайсиз, табиб тўрамни. Ҳа, айтмоқчи, бугун эҳсон ҳам бор, чамамда. Одамлар чиқишаётуб эди, тўп-тўп бўлиб... тортинмай боравуринг.

Қадамим енгил тортиб, жадалладим: ишқилиб, унасин-да қўриб қўйишига.

Айтилган кўчага бурилиб ҳам эдимки, олдинда пўрим кийинган бир одам қўринди. У қўлтиғидаги бозорчиқни авайлагандан авайлаб, у қўлидан бунисига олиб-эринмас эди. Негадир унга етиб олгим келиб, (назаримда у ҳам ўша табибни йўқлаб бораётгандек), яна жадалладим.

Борсам, Султонмурод акамлар тенги бир йигит, лекин дўкондорлардек охорли кийинган. Бошида Тошканни кўк дўпписи. (Кўрибоқ сездим: ё пулдор, ё савдогар, иккисидан бири, ахир, ҳамма ҳам чин-мочинда тикилган бунақангি кора костюм-шимга етишавурибдими!) Аммо ўзи очиқина экан, саломимга такаллуф-ла алик олди:

— Ваалайқум ассалом, оковси, келинг.

Манзирати ҳам бир самимий эди. Ийиб кетиб, юкини кўтаришиб олгим келди:

— Менга бера қолинг.

— Йўғ-е, оғирмас, оковси, одамни ҳижолатга қўйманг.  
— Бераверинг, — дедим яқин олиб.  
— Ундей бўлса, майлин. — У яп-янги, шиқирлаб турган қоғоз қопчиқни авайлаб узатди. —  
Фақат эҳтиёт бўласиз, нозувроқ нарса эди.  
— Нозувроқ жойгами? — дедим тусмоллаб.  
— Топдиз, айтувли бир одамнинг зиёратига. Кўпдан отланардим-у, мавридини топиб  
келолмасдим. Бугун бозор тушсам денг, отликқа ҳам топилмайдиган бир нок турибди! Шу... бу  
дунёникимас-да! Жонивор олтиндай сарғайиб, бол тортиб кетибди. Ҳидини айтмайсизми!  
Гуркирайди! Шуни илина қолувдим тўрамга.

Битта-битта юриб гаплашиб бораётиб эдик, кечаги бозоримни эслаб, ялт этиб юзига  
қарадим:

— Шу ўзимизнинг Эски Жўвадан-а?  
— Ҳа-да. Бор-йўғи тўрт килогина экан. Насиб-да, насиб, — деди у оғзининг таноби қочиб.  
Мен бош силкидим: тахминим тўғри чиқмоқда эди.  
— Демак, ҳар куни бир халта-бир халта оптушади. Рўзгорга ярагулик қилиб...  
— Ким? — деб ҳайратланди ҳамроҳим.  
— Ким бўларди, ўша кампиршо-да, — дедим жилмайиб.  
— Ҳа-а, — у тушуниб қолиб, хандон ташлаб кул-ди, — демак, сиз ҳам нокига харидор  
бўлгансиз-да, шундайми?  
— Мен беш кетиб, касал қўргани олиб эдим, — дедим ростига кўчиб.  
— Чакки эмас, дидингиз, — деди у бошдан-оёғимга разм солиб.  
— Сизникиям... — дедим мен ҳам бунақа нокнинг қадрига ҳамма ҳам етавурибдими деган  
каби.  
— Ўзиям жаннатнинг иси кеп турибди-да, — деди у тушуниб. — Ҳидлаб боқинг-а. Менинг  
кафтларимдан гуркираб келяпгандай ҳалигача, — деб қўлини исқаб қўйди.

Мен унинг кўнгли учунгина эмас, аллақандай соғиниб, бозорчиқни димогимга  
яқинлаштиридим. Ё қудратингдан! Қопчиқ ичидан бол ҳидидан ҳам ўткирроқ бир хид гуркираб  
келар эди. Фақат эртаги ҳандалаклар шундай бўй таратиши мумкин. Лекин бу қиши билан  
димлаб қўйилган Тошкентнинг тош ноки эди! Кимга опкелаётган экан? Мен эсам, қуруқдан  
куруқ келаверибман-да?..

Хижолат чекиб қолганимни сезиб, у жилмайди:  
— Айбга буюрмайсиз, дидимиз бир десам, йўлимиз ҳам битта шекилли? Кимниги  
бораётибсиз?

Бу гапдан ичим ёришиб, менам лутф қилгим келди:  
— Ким табиб тақсирниги, ким — тўрам тақсирниги шекилли?  
У ўзига ярашадиган тарзда хандон ташлаб кулди:  
— Ким илм истаб, ким шифо истаб деяқолинг!  
— Ким назри билан, ким беназир, — дедим мен. — Қабул ҳам шунга яраша бўлмасайди!  
У ҳазилим ёқиб, елкамга қоқди:  
— Ғам еманг, назир энди ўртада бўла қолди. Кўтаришиб кетяпсиз-ку, ахир.  
— Шуни айтинг.  
— Қолаверса, тўрам қўлга қарамасканлар. Бўлади-ку: назари тўқ одамлар — ўша тоифадан  
эмишлар, — деди у қош учирив.

Ҳар қандайи ҳам аввалига шундай бўлиб, кейин қилиқ чиқаради, демокчи эдим, тилим  
бормади. Куруқ тухмат қилиб қўйишдан қўрқдим. Балки чиндан мақташганича бор,  
художўйдир.

Бу орада гап билан бўлиб анча жойга бориб қолибмиз. Ҳов олдинда бужур қоровул  
айтгандек, оқ бино — Боқча кўзга ташланар эди. Унга ёпишиб тушган дарвоза олдида эса, уч-

тўрт одам кўриняпти. Уларнинг ҳам қулоғи ичкарида.

— Бемаҳал кепмиз шекилли, жигар? — деди шеригим ҳам кўзи уларга тушиб. У шу бойваччалигига менга ўхшаб тортинчоқ экан, бориши-бормасликни ўйлаб, тараддулланди.

Бужур қоровулдан эшитганим ёдимга тушиб, уни қистадим. (Қолавурса, мен табиби кўрмай қайтиб кетолмайман!):

— Насибамиз улуғ экан, эҳсонга илинамиз шекилли, юраверинг.

— Тўрамники табаррук деб-а?

— Ҳа-да.

Шу тоб дарвоза олдидағилардан биттасининг кўзи тушиб, бизни кечиккан меҳмонлар фаҳмлади шекилли, пешвоз чиқиб, мулозиматла эгилди: марҳамат, келавурсинлар, қадамларига ҳасанот... Иложсиз юрдик.

Лекин яқин бориб, ичкарига кўзим тушдию аллақандай енгил тортиб, қушдай бўлиб қолдим: Бу нимадан, ўзим англаб ета олмас эдим. Ҳовлида меҳмонлар учун тузалган жойлар аллақачон бўшаб қолган, энди дастурхон йиғиштириб олинмоқда эди. Фақат каттакон тут тагидаги ёғоч каравотда беш-тўрт қария «сухбати чор — анда маза бор», қабилида оҳиста гурунглашиб ўтиришибди. Заб пайтида келибмиз!

Қўлимиздаги бозорчиқни айвон четига қўйиб ҳам эдикки, оёқлари калта, аммо ниҳоятда серҳаракат бир киши (у ажойиб тарзда елка ташлаб юрар эди) бизни каравотга яқин жойга бошлади:

— Келунг, мемонлар. Насиба еталаб кепту. Эҳсонимизнинг савобига шерук бўлувсизлар.

Чой чақириб, ўзи бир чинни лаганда ош келтирди. Биз енгил таъзим ила каравотдаги қарияларга салом бериб ултурган бўлсак-да, уларнинг ширин сухбатларига ҳалал бермадикми, деб хижолатда эдик. Аммо улар ҳали-вери турадиганмас, гаплари гапларига қовушиб бир ширин сухбат қуришяпти. эди. Афтидан бу дунёни ҳам унутиб, ўша тўрдаги одамнинг нуроний юзидан (ё қудратингдан, ўқиши китобларимизда расмини кўравериб, сингишиб кетган ўша одам — сал бодомқовоқ, мулойим қулча юзли ҳазрат тирилиб келиб, қаршимизда ўтиргандай эдилар) кўз узмасдилар. У зот ҳам ўшандай оқ саллада, сариқ йўл-йўл — зар-ғалдоқ тўнда ўтирибдилар. Оқ оралаган мош-биринч соқоллари худди ўшандай кузалган, кўзлари ҳам жиндек бодомқовоқ эди. Тавба, одам одамга шунчалар ўхшар эканми? Табиб бува шу кишиими канлар ё бош-қа бирорлари?

Мен ошга қўл узата туриб, секин зингил ташлаётганимни кўриб, ҳамроҳим қулоғимга шипшиди:

— Сиз тингланг. Тўрам тақсир шу одам.

Мен қайтариб сўрадим:

— Табиб тўрамми ё Тўрам тақсирмилар?..

У бош силкиди:

— Ҳар иккиси ҳам.

Мен енгил тин олдим: ҳайрият, ўзлари экан!

Сўнг уларга қулоқ осдим. Тўрам тақсир билан жиндек чой ичиб, сухбатларини олишга қолган мўйсафидлар бир нарсани қистар эдилар:

— Ўша воқеани айтинг, тақсир, ўша воқеани. Рост-дан рўбарў келганмисиз? Ўша томонларда ҳалиям бор эканми?

Мен қўлим ошдаю қулоғим динг эди. Аксига олиб тескарироқ ўтириб қопман. Ўгирилиб қарашга бўлмаяпти.

Алоҳал тақсир қимтиниб тин олдилар:

— Ҳа, энди бир йўлиққан-да, — дедилар негадир у воқеани эслагилари келмай.

Қариялар ҳар чеккадан яна қисташди:

— Ўзиздан эшитган бошқа-да, тақсир.

— Аллоҳ қандай асраганини айтинг, жилла қурса.

Ўгирилиб, тўрам деб аташаётган табибга қарадим: қизиқ эди айтиси келинкирамаётгани.

У киши тиззаларини силаб, бу гапга жилмайиб қўйдилар: афтидан, унга қўшилмаган эдилар.

— Бежиз-бехикмат рўбарў этмагандир денг, — дедилар секин.

Қариялар ҳайратланиб бир-бирларига қарашди:

— Субҳаналлоҳ! — деди рўбарўларидағи киши.

— Йўғ-е! — деди бошқаси.— Ўзи рўбарў этиб, Ўзи асрайдиму?

— Ҳамма гап шунда-да, — дедилар у киши.

— Мошааллоҳ! Шунақаси ҳам бўлади эканми?

— Бўладикан, — дедилар тўрам.

Улар бир муддат жим қолиб, яна қистамоққа бошладилар.

— Шунинг учун ҳам... ўзингиздан эшитайлук, тақсирим.

Ҳатто биз ҳам оғзимиздагини чайнашдан тўхтаган эдик, ўша нарса бизни-да соме этиб, қизиқтириб қўйган эди. Ахийри у киши минг истиҳола ила бошладилар (балки менга шундай туолгандир.)

— Тангриотқа йўл бошловчисиз — ёлғиз боришим эди. Довонга қўтарилгунча бир-бирига ўхшаган сўқмоқлару дараларга кириб-чиқавериб, адашиб кетдимми, билмайман, валлоҳи аълам. Шарқироқ сой бўйига чиққанимда бирдан шом туша бошлаганини пайқаб қолдим. Отни ҳар қанча қистаганимда ҳам кўриниб турган довонга ета олмасдим. Бир ёқда шом қазо бўляпти, бир ёқда қўзлаган манзилимга етолмайдиганман. Алоҳал отдан тушиб, таҳорат тадоригини кўра бошладим. Сўнг от тизгинини бир бутага илиб, харсанг тошлар орасидан жойнамоз сифгудек бир жой топиб, намозга берилдим. — Табиб ҳикоясиининг шу ерига келганда тин олиб, жим қолди. У барча-барчасини айтишга ҳамон истиҳола этармиди ё эслаб кетганмиди, билиб бўлмасди. Ўгирилиб қарашга эса ботина олмасдим. Кимдир йўталиб, кимдир бетоқатлик ила қўзголиб қўйди. Табиб энди аллақандай ўқинчли овозда:

— Яхшиям тўхтаганим, — деди. — Шомнинг фарзинию суннатини ўқигунимча дарага қоронғулик чўкиб бўпти. Беш қадам нарини илғаб бўлмасди. Нега шундай кечди, ярим йўлда қолиб кетдим, мендан қандай хатолик ўтдики, деб жойнамоздан турмаёқ «Астъфируллоҳ, аллази-маллази, ла илаҳа илла ҳувал ҳайюл қайому ва атувби илайҳи», деб ўзига истиғфор айтиб, саждага бош қўйдиму тавалло эта кетдим: «Йа Роб-бим — Аллоҳ, ҳаммасидан ўзинг воқифсан, Ўзинг кўриб-билиб турибсан: зиммамга қандай юмушлар юкланиши. Розилик бериб тўғри қилдими, адашдимми, ҳикматини билгувчи ёлғиз Ўзингсан. Агар яхшиликка йўйсанг — йўлимни оч, мушқулумни осон эт. Агар нафсимнинг сўзларига кириб адашган бўлсам, бандаман, Ўзинг кечир. Кечир-да, бало-қазолардан, ёмонликлардан Ўзинг асра. Ҳидоятингни дариг тутма, ожиз бандангман. Не қилай қайтар йўлларим беркилган. Ўзинг нажот бер», деб йиғлаб-таваллолар қилаётсам... бирдан орқадаги от хуркиб кетганча кишнаб юбордию тизгинни узуб қочмоққами, нимага тушди. Этиму вужудим вижирлаблар кетди.

Саждадан бош қўтарсан, қай кўз ила қўрайки, қаршимда гунгурсдек бўлиб, бир маҳлук турибди. Олов қўзларини узмай. Бўйнида ёлими — нима хурпайган: айиқ бўлиб айиқмас, ит бўлиб ит. Аммо аввалига танимай турган эканман, таниб қолиб, этларим тикка бўлиб кетди. Бутун жоним оёғимдан ерга ўтиб кетгандек эди. Беихтиёр пайғамбаримиз саллаллоҳу алайҳи вассаламни, куёвлари у кишини ҳақорат этганда: «Йа Аллоҳим, бунга итларингни юбор, ўша бас келсин», деб дуо қилганларини эслабман. (Кейин уни Шомда арслон еб кетган эди.) Яхшиям, қўзғолмаганим, қўзғолганида тилка-пора қилиб ташлармиди. Яхшиям, Аллоҳга тавбалар қилиб, истиғфорлар айтиб турган пайтим экан. Яхшиям, намозда эканман.

Орқаю олдимиздан ҳимоялаб турадирган фаришталар туфайлиданми, у тўхтаб қолганди, даф эта олмай турарди.

Шу хаёлдан ўзимга келибоқ Тангри таолога ёлвора кетдим:

— Уни тўхтатган ҳам, омонсиз хужумидан асраб турган ҳам бир бўлса, Ўзингсан, йа Аллоҳ, уни даф этгувчи ҳам, йўлимни очиб бергувчи ҳам Ўзингсан. Ўзингга сифинаман, Ўзингдан сўрайман. Кутқар бу итингдан. Умрим бўйи айтганингдан чиқмайин, — дердим. — Ла илаҳа иллаллоҳ, ҳасбияллоҳу ва неъмал вакил — Ўзингни вакил қилдим, — дердим.

Сизларга ёлғон, менга чин. Шу дуони ўқишим-ла маҳлук бир нарсадан ҳайиккан каби ириллаб тиса-рилавердию сўнг ўтирилиб, думини қисганча пастга тушиб кета бошлади. Пастда эса сой шарқирагандан шарқираб ётар, ора-чира намхуш эпкини ўйноқлаб келиб қолар эди, холос...

Ўша воқеанинг таъсиридами, ҳаммалари бир муддат жимиб қолдилар. Ахийри бир қария шу жимликни бузишга журъат этиб:

— Ҳикмати не эди, тақсир? Энди айта оларсиз? — деди.

Табиб ҳов боягиндек, истиҳолали жилмайди: савол ноўринлигини шундан-да пайқаш мумкин эди. Аммо табиб қарияни хижолатда қолдиргиси келмади:

— Аллоҳ билгучироқ, қори ака, биз ниманиям билардик, — деди юмшоқ табассум ила.

Бу гапга ҳамма қўшилган эди. Шу тариқа гап ўзани поёнига етиб, улар дастурхонга фотиха ўқиб, ўрниларидан тура бошладилар.

Биз шунча шошганимиз билан қўл артиб, лаганни бериб улгурдик, холос. Қариялар ҳовли саҳнига тушиб ҳам узоқ хўшлаша бошладилар. Уларнинг бу хайр-хўшлари ҳам ўзларига ярашиқли эди. Айниқса, бир-бирларига мулозамату манзиратлари, эртага кўришмай қоладиган одамдек (дунё ахир омонат, билиб бўладими, бугун бор одам эртага йўқ) омонлик тилашлари, қучоқлашиб хайрлашувлари — ҳам ғалати, ҳам таъсири эди. Бир сўз билан улар бир-бирларидан ажрашолмай хайрлашар, шу баҳона ҳам бир-бирларига бирон ширин сўз айтиб қолишга, бағриларига тортиб, бўйларига тўйиб олишга тиришар эканлар, шу сўрашиб-исташувларини ҳам ғанимат билиб, кетишга шошилмас эдилар. Қолаверса, бу ҳеч кимга эриш туюлмас, қайтага биз бир чеккада қўл қовуштириб, ҳавасла кузатиб турар эдик. Фақат мен бир нарсадан таажжубдаман: бу хориждан келган фириштадай одам асли ким? Табибми ё авлиё? Қачон шунча ёр-биродар, мурид орттириб улгурибди? Мусоғир одам шунча тез сингишиб кетуви мумкин эканми?

Бу орада мўйсафидлар дарвозахонадан хўшлашиб чиқиб улгуришди. Биз кузатишиб чиқишимизни ҳам, жойимизда тураверишимизни ҳам билмас эдик. Аммо шу пайт бояги оқсоқ танишимиз қаёқдандир пайдо бўлиб:

— Қану мемонлар, марҳамат қилусизлар, — деб ичкари қистаб қолди.

Шундагина мен хайрлашувчилар билан бўлиб, табибни қўздан қочирганимизни англадим. У таҳорат янгилагани ўтганми, ҳеч ерда кўринмас эди. Бизни ёлғиз деразали чоғроқ бир уйга бошлаб киришди. У ҳужра бўлиб ҳужра эмас, ярмичасини ковшандоз эгаллаган, тепада эса сандал ҳам бор эди. Танчага вақт-бемаҳал олов солиб турилса керакки, устига ялангқават бир нарса ташлаб қўйилибди. Эшикбон мулозим биз киргунча қизил йўл-йўл дастурхон ёзиб, каттакон гирдим патнис қўйди. Кўрпаҷалар йиғиб улгурилмаган экан, чўкиб фотиха қилдик. Деворнинг бир ёғини тўқ жигарранг гилам эгаллаган, бир ёғидаги сомон сувоқли токчаларда қалин муқовали, жилдли китблару сопол кўзачалар ва ҳам оғзи танобли жажжи халтачалар, зарқоғозга ўралган бир нарсалар кўринарди. Чой кириб:

— Ичишуп ўтирувсизлар-да, мемонлар, — дея оқсоқ танишимиз чиқди.

Менинг ичим қуришиб боряпти. Яна ўзимга таскин бераман: «Мен игнани устида ўтирганимни булар қаёқдан билсин!» Ҳамроҳим буни сезибми, жилмайди:

— Сиқилманг, келдикми, кутамиз. Тўрамнинг шунаقا одатлари бор: таҳорат янгиламай бемор кўрмайдилар.

— Шунақами?

— Қолавурса, Сиз билан мен нима мақсадда келганимизни кирганимиздаёқ билганлар,

шунақа одам, — деди у камига.

— Йўғ-е?!

— Хўп деяверинг. Ҳар соққанда бир пақирдан сут берадиган сигиримиз бўларди. Бир кун адам уни етаклаб чиқиб кетиб, шуларга ташлаб кептилар. Улар мусофири, соғиб ичиб туришса, савоб бўлади, дедилар. Кейин, — у боягидек беғубор жилмайди, — кейин бир кун ажабтовур гап топиб келдилар. «Ҳой, Тўхтабой, бизга қанақа сигир бердингиз? Сутини эплаб бўлмаяпти. Ҳар соққанда икки челяқдан сут беряпти», дермишлар. Ана, тақсириминг кароматлари, — деб туриб, тирсагимга туртиб қўйди.— Бу ёғини эшитинг. Бир кун борсалар, тўрам «Ҳой, Тўхтабой, сиз синчи одам, бизга бир сигир обермасангиз бўлмайди, сутга ўрганиб қолган эканмиз», дермишлар. У сигир-чи, дебдилар адам. «Эй, уни Усмон девона опкетиб қолди: ёқтириб қопти. Майли, жўжабирдай жон. Бизга бошқасиям бўлавуради», дермишлар. Адам ҳай, деб бо-зорга тушиб кетиптилар. Борсалар бир шопмўйлов одам гижинглаган отда йўлларини тўсиб турганмиш. «Ҳов, бойвачча, шу отни қанчага оласиз?» дер эмиш нуқул сағрисига шаппалаб. «Йўқ, мен сигирга тушган одамман, отни нима қиласман», десалар, «Ҳай, унда баҳосини чиқаринг» дер эмиш. Кейин даллол чақириб баҳолатибида, ўша ердаёқ бирорга сотиб, қўлларига отнинг пулини тутқазибди. «Манг, бойвачча, бу пул сигирингизнинг сутидан ҳам ҳалол» дер эмиш. Адам ўша пулга бозорнинг олди сигирини олиб чиқибдилар. Унинг битта айби уч эмчакли экан. Кейин тўрам тақсиринига борсалар, «Ҳой, Тўхтабой, бизга қандай хосиятли сигир олиб чиқкансиз? Соғсак нуқул қаймок беряпти... Олинг, татиб кўринг-а», дермишлар.

— Йўғ-е, — дедим мен ҳайратланиб.

Ва шу маҳал остоңада оёқ товши эшитилиб, зарғалдоқ тўннинг бари<sup>3</sup> кўриндию биз шоша-пиша у кишининг истиқболларига туриб, қўл қовуштиридик.

— Ўтирингиз-ўтирингиз, ўғлонларим. Сизни ҳам кутдирию қўйдик, узр. Бугун шунақа кун экан: узок-яқиндан биродарлар йиғилишиб, кулбамизни кўп мунаvvар этишди, — деб маъзурландилар.

Биз четланиб, йўл бўшатдик. Аммо ўртадан паст бўйли, салобатлари ўзларига етарли киши тўғри тўрга ўтиб кета қолмай (ажаб, тўнлариданми, ўзлариданми, бир ажиб мушк-анбар хидлар тараляпти) қаршимизда тўхтадилар-да, ҳамроҳимга очиқ юзла юзланиб, майин жилмайдилар:

— Мен Сизни қаерда кўрган эканман: юзингиз бунча иссик? — дедилар.

— Балким-балким, — ҳамроҳим қизаринқираб ўзини танитди, — мен Тўхтабойвачча аканинг ўртанчалари.

— Эй-й, Синчибойни-я?! — деб қўлини қўйиб, яна ҳам яқин келдилар-да, икки бетидан кафтлари ила тутиб, пешонасидан ўпид қўйдилар. — У киши олиб берган сигирларни, бизларга қилган яхшиликларни унутиб бўладиканми?! Ўзлари омонмилар, уй ичилари билан?.. Билмасаканман, Аллоҳ шундай келишган-келишган фарзандлар ила сийлаб-қувватлантириб қўйган экан Синчибой ошнамизни... Бугун кўринмадиларми, баҳай?

— Сайрамга кетишиб эди икки-уч ошналари билан, — деб жавоб қилди ҳамроҳим.

— Унда узрли, узрли. Синчибой ошнам айтилмай қолибдиларми, деб болаларни тергаб бир ерга етиб туриб эдим: яхши, насиба қўшган экан, мана, Худо сизни етказибди. Эсон қайтишсин, — деб бир қадам ташлаб, менинг кафтидан тутдилар. Кафтлари бир юмшоқ, бир майин эди, тавба. — Сиз бўтам, хуш кепсиз даргоҳимизга, қийналмай топиб келдингизму?

Ичимдан бир олов чиқиб, пешонамга довур жимирилаб кетди: «Қаёқдан била қолди, бу одам?» дея ҳайрат-ла боқдим.

У киши бизга ўтиришга изн бериб, ўзлари дераза тагига — тўрга чўккаладилар-да, фотиҳага қўл очдилар:

<sup>3</sup> Бекасам тўннинг бир тури. (*Муаллиф*)

— Илоҳо омин, дардмандларга ўзинг даво бериб, илм толибларига ўзинг илму раббонийингдан етказгил...

Мен-ку, мен, ҳамроҳимга қарасам, ҳайратдан тахта бўлиб ўтирибди. Табибининг тасбех тутган қўлларидан кўз узолмайди.

— Хўш, бойвачча, ёки адангиз бирон юмуш буюрибми эдилар, бизга тегишли? — дедилар ниҳоят зангори духоба ёстикка суялибгина ва маъноли жилмайиб.

Бойвачча жавобга ошиқиб, одобли муллаваччалардек чўккалади:

— Йўқ-йўқ, тўра почча, буюрмаб эдилар. Мен ўзим... Сизни бир зиёрат этгим келиб... — дея ямланиб ерга қарадио беҳожат тиззаларини силашга тутинди.

Тўра почча (бойвачча каловлаб қолгани билан топиб айтган эди: бу ном у кишига ярашиб тушганди) мийигларининг тагида жилмайиб, тутамга келиб-келмайдиган, бир чиройли кузалган мош-биринчдан оқроқ соқолларини (у қулоқларининг юмшоги тагига қадар чўзилиб борганди) енгил тутамлаб-силаб қўйдилар. Бу жилмайишдан юzlари яна ҳам нурланиб кетган эди.

— Зиёрат талабиндами ва ё илм талабинда? Тортинмай айтаверинг, бойвачча?

Ҳамроҳим бу гапдан чўчиб тушиб, дув қизарган эди. Хижолатга ботиб, деди:

— Тўғриси, кўпдан хузурингизга келмоқни ихтиёр этардим. Бугун юрак ютиб...

— Юрак ютганингиз яхши бўпти, бойвачча. Биз ҳам Сизни кўпдан орзилаб кутардик.

Бойвачча у кишига ялт этиб қаради:

— Кутардингиз?

— Аллоҳ шоҳид, — дедилар тўра почча бош силкиб, — ташна қалблар ўзи аён бергай.

— Демак, хужрангиз эшиги...

— Очиқ. Келгувси ҳафтадан келаверишингиз мумкин.

— Раҳмат, тўра почча, — Бойвачча юкунгудек бўлиб энгашди ва у зотнинг тўнлари этагини ошиғич юzlарига суртди.

Аммо тўра поччанинг юzlарига бир нима соя ташлаб, юкингувчининг елкаларига оҳиста қўл юбордилар:

— Туринг, бўтам, шусиз ҳам олгайман Сизни. Қолаверса, банда бандага эмас, Аллоҳга юкунгай. Шу ярашади бизга...

— Узр, азбаройи мен мутаассирланиб... — бойвачча қаддини кўтариб, қўлларини кўксига босди. У хижолатдан кичкина тортиб, ерга сингиб кетишга ҳам тайёр эди. Мен эсам...

Мен эса, бир чеккаси ҳайрат бармоғимни тишлаб, бир чеккаси қаерга келиб қолдим деб ҳайрону лол ўтирибман. Табиб дейишган эди, ким бўлиб чиқяпти?

Бу орада у киши менинг ҳолатимни сезган каби бир кур назар ташлаб, ташқарига овоз бердилар:

— Рўзиохун?..

— Лаббай, тақсирим, — оstonада елкасига чорси ташлаган бояги оқсоқ одам кўринди.

— Эртаминанг... тайнлу жойдами?

— Таюнлу жойда, тақсур. Олайнму?

— Олинг.

Рўзиохун ковшандозга ечиниб, махсичан икки ёнга елка ташлаганча токчага яқинлашиб, унинг ўрта қаватига узанди-да, қийналибгина кўза ичидан бир нима ола бошлади. Унга ёрдамлашгани турган жойимда у зар қофозга ўралган бир нимани олиб улгуриб, ўтирилди.

— Раҳмат, жиян, безовта эттум сизнуям...

Тўра почча уни гирдим патнис устига қўйиб, охунга жавоб бердилар. Мен жойимга чўқдим. Шундан кейингина у киши Рўзиохунни узоқлатиб, менга очиқ, юз-ла қарадилар:

— Сиз адашмасам, узоқдан келяпсиз?

— Ха, узоқдан, Қанғли тарафдан, — дедим мен гапнинг бу тарз кўчишига ҳайрон қолиб: ҳали, мухбирсиз, газетда ишлайсиз деб қолмасайди.

— Шу ўзимизнинг Катта Қанғлиданми? Чўлпон отадан ўтиб, Аччига кетавуришдаги? — кутилмаганда у киши ҳайратланаб, қўзғолиб қўйди. — Кўп қадим мавзе, тарихи узун жойларку...

— Сиз у томонларни биласизми? — деб юборибман.

— Нега билмай? Ота юртларнинг исини ёдга туширдиз. Атай орзилаб борганман. Қанғли Боласоғун, Тарозилардан қадим бўлмаса ҳам ўшаларга яқинлашиб боради, бўтам. Тарихда ўтган Қанғли давлатидан бир хотира бўлиб, яшаб қопти. Шунга-да, шукр.

— Тўғриси, мен бунданам узоқдан, ўша Сизнинг диёrlардан келиб қолиб, оғир дардга йўлиқкан бир муштипар-мусофири деб... келиб ўтирибман. Сиздан нажот истаб келганмиз, — дедим.

— Кимингиз бўладир у киши? — дедилар яна ҳам синчковлик ила.

— Кеннойи бўладилар бизга.

— Ҳозир қаерда у мушфиқа? — У киши яна ҳам мутаассирлана бошлаган эдилар.

— Ўша ўзингиз билган боғдаги шифохонада, — дедим мен томоғимга бир нарсалар тиқилиб кела бошлаб, — тезроқ бир иложини қиласангиз, оёқларини кесишмоқчи экан.

Тўра почча (ажаб, бу гапдан енгил тин олиб) духоба ёстиққа суюлдилар:

— Хайрият, — дея пичирлагандай туюлдилар менга. Нега, ҳеч ақлим ета қолмасди. Ахийри ўша суянган қўйи, кўзлари юмуқ ҳолда:

— Ўша, ундан бўлак эмас, — деб шивирлар эканлар, мен ёка ушладим: қаердан танимоқдалар? Кўрмай-билмай туриб, танимоқ мумкинми экан?

Мен ўзимга келгунча у киши қаддиларини ростладилар:

— Кеча ховфимда аён бериб эди, тиззасига сув йигилган аёл. Ўшами?

Мен тахта бўлиб қолган эдим: бу қандай синоат, бир вақтнинг ўзида ҳам кеннойимнинг ховфида, ҳам бу кишининг ховфида белги бериб турса?

Мен жавоб беришга мажолим кела қолмас, келсаёқ «топдингиз, ўша!» — деб юборишига тайёр бир ҳолга тушган эдим. У киши бўлса, бояги гирдим ус-тидаги зарқоғозга ўроғлиқ нарсани олиб узатганча, бир нималар деб тайинлаяптилар-у, қани қулоғимга кирса, ўлсин агар эшитсан! Шунақа меровланиб қопман.

Бир маҳал қулоғим шангиллаб келиб, очилдио унинг сўzlари оқиб кира бошлади:

— ... Шуни қайнатиб, ҳар тўрт соатда бир пиёладан ичсинлар, уч кунда тақа-тақ тўхтайдир ва оёқ босиб кетадирлар. Кесишга зинҳор-базинҳор рухсат этмангиз... Бу қандай кароматгўй экан, деманг, Худо хоҳласа, биз бир сабабчимиз, холос. У ёғига «Ҳас-бияллоҳу ва неъмал вакил» — Аллоҳни вакил қиласангиз! Ўзи ўнглагай, иншааллоҳ.

Мен хурсандликданми, ё ҳозирги кўрган-кечирганларимданми ўзимга келолмасдим. Ваҳолангки, кенно-йимнинг олдига қанот чиқариб учсан кам эди.

## 5. СИРЛИ ТАШРИФ ёхуд хикоячиға қоронғу, бизга маълум ташриф ва тарихлар

Рўзиохун ҳали барг ёзиб улгурмаган балх тут тагидаги ёғоч каравот зинасида кўкламги офтоб хуш ёқиб мудрар, қўшни боқча ҳовлисидан келаётган бола-бакраларнинг овозлари ҳам гўё тушдагидек аллалаб борарди. Шу ўтиришида қай бир ёқдандир бодроқ исини олиб келаётган ғир-ғир эпкинлар ипак рўмолда-йин юзини сийпаб ўтиб, ўзи туғилиб ўсан томонларнинг тинмағур шаббодаларига ўхшаб кетар эди. Бу яқин-атрофда ҳам ўшанақа тоғ ёхуд сой бормикан деб, эсламоққа тиришар-у, ҳеч эслай олмасди. Аммо тепадаги тутда бир гала чмчуқлар учиб-кўниб, тоза бозор қилишяпти. Ҳали тут энди кўкзирак тақди, меваси оқ марвариддай оқармай туриб шунчалик, тут пишиғида Худо тўзим берсин экан бу

чирқилдоқлардан.

Шу маҳал чумчуклар гурра құтарилишиб эшик тақилладио ҳаммаёқ сув қуйгандек жимиди-қолди. Ҳатто болалар боқчасидан миқ этган товуш чиқмас-ди.

Сал ўтиб, дарвоза зулфини ошиғич шиқирлади:

— Ҳой, ким вар? Ҳозық тўрам шатта турувмилар?

— Турувлар-турувлар.

«Буларнинг келуви кўп экан, сўрови кўп экан, жилла курса, шу бугун тинчирман десам»... — У оқ чорасисини излай-излай каравот панжарасидан топди-да, елкасига ташлаб, тўнғиллай-сўнғиллай дарвоза томон жилди. Елкаси паст-баланд тушиб, гўё икки томонга салом бериб бораркан, бу хизмат унга осонмаслиги шундок ҳам аён бўлиб, чақирган одам ҳам хижолатда қолар эди. Аммо бу гал тамом бошқача чиқди.

Занжир шиқирлаб тушиб, дарвозанинг болача эшиги ланг очилдио шундок унинг қаршисида қўлларию оёклари узун-узун, ўзи найновдан найнов, сап-сариқ (ҳатто қош-киприклариға довур оқ-сариқ, бурнию пешонаси, икки юзи қонталаш-қизил) айикдек одам пайдо бўлиб, лапанглаб, қучоқ очиб кириб кела бошлади:

— Иби, ахун, ҳай-ҳай, тапушган жайумиззи кўрунг. Ҳазиқ тўрамнинг астанасини қўриқдаб ятиюр экансиз-да?..

Рўзиохун бу тасқарани (чиндан ҳам дарвеш бўлиб дарвеш эмас, гадо бўлиб гадонинг бир гаройиб кийиниб, бу тарз келиши қай аклга сифади? Эси бор одам шу кўкламдан пешонасини танғиб, оқ яктак устидан илган жун шинелини белига бар уриб оладими?! Яна оёғида қизил этик!) дафъатан танимади. Қаерда бир кўргандек-ку, ҳеч эслай олмаяпти. Аммо ош-қатиқ бўлмагани аниқ. Қўлидан бир пиёла чой ичганда ҳам... эслармиди.

Бир кўнгли пешвоз юравериб, йўлини тўсмоқчи бўлди-ю (ҳар битта қаланғи-қасанғини ичкари қўяверса, табибнинг табиблиги, ичкарининг ичкарилиги қоладими!), аммо улгурмади. Қайси даштдан тушган экан бу Давонгир дев дарвоза болачасини энлаб, бесўнақай оёғини ичкари ташлаб улгурган эди. Дарвоза эса лопиллаб бориб-келяпти.

— Ҳай-ҳай-ҳай, мунча қамалуп олмасангуз, ахун? Баракалда-баракалда!

Рўзиохун ноилож четланиб, қўл қовуштириди: келинг демаса, қаёққа борарди?!

Девнинг рапидадай кафтлари орасида унинг қўллари йўқ бўлиб кетди. (Яхшиям қучоғига олмагани, эзиб-нетиб қўюви ҳам мумкин эди, бу бесўнақай. Исириқчи чолларга ўхшаб, эгнидан исириқ ҳиди бир гуркирайдики, тавба).

— Танимутсиз-а, ахун? Аммо ман бир кўрувдаяқ тануп-билдум. Тўрам тақсурнинг хос хизматчиларини ашундай тасвирлашуп эду.

Рўзиохун сергакланди: ғирт бегона экан-ку, яна ялтоқланишига ўласанми! Манзиратидан кўрккулик...

— Келинг, Сизга табуб керакму? — деди, ха десаёқ қайтаришга оғиз жуфтлаб.

— Тўрам тақсур тангрутоқликларнинг қипласудай гап. Ҳама қочган-қувган қаерга борсун, шу кишига баш уруп келур-да, — деди у ниятини айтиб қўя қолмай.

— Қипласу деп ким айтту? — деди Рўзихун қаёқдаги гапни айтасиз маъносида. — Тақсур бир табуб, халас. Адамлар шуфо излап келаду.

Сариқ девнинг тилига тушов тушиб, бир дам тек қотди. Ўқ мўлжалга теккан эди. У сўз танобини йўқотиб, зўраки илжайди:

— Пирни пир, авлияни авлия деймиз-да, ўтағаси,— деди ихлоси жўш урган каби, — қолавурса, у кишим ўшақнинг имом Шомилидай адам.

Рўзиохун бу ялтоқи шангини ичкари опкирмаса, опкириб миясини жойига тушириб қўймаса (ҳар нарсану валдирайверадиму одам!) бўлмаслигини англаб, тут тагига қараб юраверди. Каравотга опчиқмаган тақдирда ҳам ўшатдаги курсига ўтқазиб, ўшатдан нари жўнатади. Жўнатганда ҳам иккинчи келмайдиган қилиб, жўнатади.

Лекин бу дев ғалати эди: анқов десанг анқов эмас, ичдан пишган — қув десанг, қув эмас. Ўзини гўлликка солиб, нукул бир нарсаларни анг-шанглайди.

Рўзиохун уни ўзи мўлжаллаган жойга омонатгина ўтқазиб, қалпоқ остидаги чойнакдан чой кўйди. Гапни калта қилиш мақсадида бояги мулозиматидан нари ўтмади:

— Эшитунг, мемон? Агар тақсуримга кеган бўсангиз, у кишим бу ҳафта бўлмайлар, сафар кетганлар,— деди атай, ичида эса, ёлғон сўзи учун истиғфор айтар эди.

Мехмон ишонқирамай элт этиб қаради, сўнг илжайиб (балки ялтоқланиб деса тўғри бўлар), бунинг кўзларига тикилди:

— Балким, Сиз билан-да, ишумиз путаверар? Ахур, келди-кетду, жавап-муомалалар Сизсиз путмас? — у ҳовлига аланглаб олиб, овозини пастрлатди, — қолавурса, у кишимга юкинуп келгувчиларну ким ҳам сизча билсун?!

— Хўш? — деди Рўзиохун унинг ниятини фаҳмлаб. Бунга сари ичида бир ғашлик уйғониб бўлган эди: «Айтувдим-а, нега бунинг турқи хунук деп?.. Ишқилуп осон қутулай»!..

Мехмон қўлидаги чойни бир хўплашдаёқ тугатиб, юзини кафти-ла ишқалади. Пиёла тагила тиззасини эзғилаб, унга тикилди.

— Биз бир адамнинг ажизасун излаюрмиз...

— Тушунмадум, — деди Рўзиохун, бунинг бизга қандай дахли бор, деган каби елка учириб. Чиндан ҳам қизиқ-ку бунинг гапи!

— Биласизму, ахун, ўша қач-қач, чап-чап-да...

— Қайсу қач-қач?.. — деб анқовсиради у балодай тушуниб турган бўлса-да...

— Қайси бўлурду, инқилап тўс-тўси-чу? Ҳама баш алип қаёққа қачипту! Батурнинг ажизасуни айтватурман.

— Қайсу батур? Қандай батурни айтасуз?

— Тақсирум биларканлар. Янларига чақиртируп ҳам алмақчи эканлар-ку, ахур.

— Мен билмасам... — Рўзиохун бош чайқади, — Худа шаҳид, биз кичкина адам, бу хил гаплардан бехабармиз.

Шу гапи наша қилиб, сариқ дев қўлларини ёзиб, ўзи «ҳув-ҳув»лаб кулди.

— Олинг-а! У тарихларну ким вилмаскан! У Батурларну ким танумагай! Қайси вўлурду. Шу яқлардан-ўтуп варганчи...

— Хўш? — деди Рўзиохун ноилож.

— Ўшанинг ахлу аёлуни излаюрлар. — Кейин азза-базза қулоғи ортига энгashiб, шивирлади. — Тапганга чўнг мукопат вар, ҳа!

Рўзиохуннинг кўнгли ағдарилди. Сариқ дев умрида оғзини чаймаган, бетаҳорат одаммиди — нафасидан думоғи ёрилай деди.

— Батурнинг кўзи қаяқда экан? Ахир қанча йил кечту! — деди ўзини нари тортиб.

— Кечту-кечту, лекин... у ягини ким вилсун, энди излап қолишипту, — деб елка қисди.

— Ким? Батурми ё?. — Рўзиохун атай «дўйстларими?» демади, шунга урғу берид. Аммо сирли ташриф билан келган меҳмоннинг юз-кўзларида қилча довдираш ёки ваҳмни кўрмай ҳайрон қолди.

— Излашопту-да ишқилуп. Балки аёлнинг хешларидур, — деди у. — Лекин суюнчису... ўзингиз тугул икки пуштунгизга етгули, ахун, — дедио отдек пиш-қириб, аксириб берди. Орқасидан «ҳаққас раст» деб қўйди. Кўриниб турибди, мусулмончиликдан чиқиб, нафсининг орқасига тушиб кетган бир одам; на ал-ҳамдулиллоҳи бор, на шукри. Шундай ҳам бўлуви мумкин. Лекин уни-ўзини меровликка солиб, ўсмоқчилаб юрган тингчилармас, деб ким айта олади? Қариндошлари изласа, шунчаки сўроқлатиб қўя қолмасмиди, орага аллақандай мукофотлар тиқмай? Бунда бир сир бор.

— Улар шу қадар сийму зарга бай эканларму?

— Вилмасам-вилмасам, — деб бош чайқади Сариқ дев узундан-узун қўлларини ёйиб. —

Лекин суюнчису тайун — ишанчлув, ахун.

— Яхши, хаварлашиб турувмиз, — деди Рўзиохун елкасига ташлаган чорсуни олиб, чир айлантирганча белига боғлашга тутиниб.

Шу билан у меҳмонга қайтишга ижозат берган каби бир ҳаракатга тушган эди.

Сариқ дев ҳам гап тугаганини англаб, ҳалигача кафтидан қўймаган пиёлани каравот панжарасидан ошириб, самовар пантисга қўйишга чоғланаркан, шу баҳона ховли саҳнига, ундан тепа томондаги уйларга разм солди. Буни кўриб, охуннинг ичи шиф этди: «Нима бала, шу ерда панаҳ тапган деб ўйлайду шекилли бу тасқара? Яхшиям тўрам вар пайтлари келмаду». Ва шу баробар тезроқ даб бўла қолсин деб, беодоблик бўлса-да, юзига фотиҳа тортди. Дев ҳам мажбур қўзғолди.

Улар мулозамат-ла хўшлашиб чиқишаркан, дарвозага етганда Давонгир дев мишиллаб бесўнақай қайрилди-да, Рўзиохуннинг тирсагидан тутганча киссасига бир нима тиқишига уринди:

— Энди, ахун, ўзунгиздан қалур гап йўқ, хаварлашуп турувмиз. Мени Каллаханадан сўриорсиз, гўшт вазардан. Дал саруқ десангиз алам танийду.

Дол сариқлигини билгани яхши бўлди, аммо бу тиқишириётгани нимаси экан? Рўзиохун киссасига қўл солуб эди, бармоғига зиракми-тақинчоқقا ўхшаш бир имиқ нарса илиниб, ғалати бўлиб кетди.

У силлиқ нарса бармоқларига бир муддат хуш ёқиб туриб, эси оғиб бораётганини ўзи ҳам сезди-ю, чўчиб сергак тортди: «нима бала, ҳалутдан авраб сатуп алуттиму?!».

Шу баробар киссасидаги ҳалиги силлиқ нарса — думи гажак бир нимарсага айлана бориб, жон ҳолатда уни чангллаб олдию эгасининг рапидадай кафтларига тиқиширишга уринди.

— Вирадар, иттимос, шусиз гаплашайлук, — деди титраб-қақшаб.

Дол Сариқ бир оёғи ташқарида, бир оёғи ичкариди экан, унга тушуниксиз тикилди:

— Вуниси фийсабиллаҳ, ҳамур учудан патур, ахун.

Аммо Рўзиохун (қандай banda экан!) бош тўлғаганча уни елкаларидан итариб, чиқишига қистар, бирров юз-кўзига қараб қўймас эди.

## 6. ДУВАННИНГ ҚИЛГАН ИШИ ёхуд йўқолган сиғинди

Ҳалигина бошим осмонда, мендан хурсанд, мендан оммадли одам йўқ эди оламда. Агар ўша тобда кўк юзини тутиб, мағрибдан машриққа кўчиб юрган девдек-девдек булутлар айқашиб-уйқашиб, тоғ дараларидек гулдираб, чақинлар чақиб, олатасир жала қуиб берсалар, парвойимга илмасдим, қочиб қўймасдим. Игнадек қуруқ жойим қолмаса-да, худди янги бўлган жиннидек, ялангоёқ-ялангбош кўча ўртасидан сув кечиб, димоғимда бир ажойиб куйлар куйлаб келаверишим мумкин эди.

Аммо кўкламнинг хувиллаб-изғиган шамоллари ўша девдек-девдек қора булутларни ҳам Тангритоғ томонларгами — қайга қувиб, ташлаб келдилар. На қалдираб-гулдиради, на айқашиб-уйқашиб, кўзёш тўқди: қайтага шишадек бир тиник, ложувард осмон юз очди. Қуёш чараклаб, заррин нурларини сочиб, янги ниш урган майсалардан куртакларга қадар — барчасидан ўпич ола кетди. Зарҳал ўпичлар... бу ўпичлардан ҳар биттаси яйраб-яшнар, қувват оларди. Ҳатто қушлар ҳам шахар мошиналарининг ғув-ғувларию одамларнинг кезинишиларига парво қилмай, чаҳ-чаҳлар, ўз тилларида бижирлаб-чулдирашдан чарчамасдилар. Шахар кўчалари демай (балки далага яқинлигидандир...) йўлкаларда Сулаймон пайғамбар элчилари — худхуд қушлар кўринар, осмони фалақдами — жуда тепада тўргайқуш худди қирлардагидек тиним билмай чулдирап, кўклам қуёшидан mast, унинг нурларида аргамчи учарди.

Баъзан қувалашиб думи эшкак олақанотлар, қар-қуноклар учиб ўтиб қолишади. Уларни кўриб, Каттабоғни соғиниб кетдим. Ўтмаганимга қанча бўлди, ҳаммасини суриб битиришмагандир, топталиб кетмагандир-ку ҳаммаси? У ерга ҳам қушлар тавофга келишгандир? Турналар бўзлаб-бўзлаб, гир айланиб учишмоқдадир? Таний олмай у сойларни, овлоқларни?..

Ҳаммасидан бурун мен эски ҳовлимизга ўтишим, уйларимизни суриб ташламасларидан анув нарсани топиб қўйишим керак. «Насиб этса, бир кун қайтарарсиз, этмаса...» деб кўзлари филтиллаб, илтижо қилишидан... акамдан умидини узмаган. Ахир бир кун топиб келишига ё олдириб кетишига ишонади. Аммо мен бир нарсага ҳайронман: шунчалик экан, нега бизнидан бош олиб кетди? Акамни кутмади? Ахир, бир чиройли ўтирувди-ку? Нима рўй бера қолди? Нима уни мажбур этди бу сарсон-саргардонликларга? Номусми ё оп? Ёзгандир-ку, ахир. Қолаверса, томлари очиб ташланган у вайронадаги хатлар ўзи турибдимикан? Ҳалигача тасаввур эта олмаяпман: ўрта токча таккинасидаги у пахса девор ичига қачон ари ин қўйиб улгурган экан? Қиши билан қор-ёмғирларда нима бўлдикан? Ивиб-битмадимикан? Ёлғиз нажот Оллоҳдан! Кўнгли яримта бир мусофирилар оху зори битилган хатларни у асрамаса, ким асрайди? Умид ўзидан. Қолаверса, бугун омадим чопиб, ҳамма ишларим ўнгидан келиб турибди: Севзор томонга ўтиб, Оповси опа айтган тангритоғлик табибни (кеннойимнинг тушларига кириб юрган ўша Ҳизр назар қилган қарияни) топдим. Берган дорусини етказиб бориб, бир чойнакка дамлаб, ичириб ҳам келдим.

Кеннойимдан бурун Оповси опанинг алқаб бир ерга етганини кўрсангиз. «Барака топинг. Савобга қолдиз. Оллоҳим, яхшилик қилсанг, бир мазлумга қил, бир мусофирига қил, бир бемор-мушфика қил, деган. Сиз бир йўла ҳаммасининг савобини олдингиз», дер эди. Мен эсам, хижолатларга ботиб кетяпман. Қилсам, кимга қилибман? Жондан азиз кеннойижоним-ку.

Оповси опа шунаقا тинмагур гиргиттон аёл экан. Бўлмаса, кеннойим ким унга? Устида шундай ўлиб-кутиляптики...

— Вой, мен нима девдим, Махфузахон? Мана шу Худоимнинг ёрлақаши! Намозларни кўймай ўқиганингиз шарофати! Худо хоҳласа, ҳали ҳеч нарса кўрмагандай бўлиб кетасиз. Жужуғингизнинг тўйларини кўрасиз. Келинлар туширасиз. Қайнона бўли-иб ўтирасиз. Хўб денг...

Унинг нияти, тилаклари ўзига ўхшаб бир ажойиб эди: ёришмаган кўнгилни ҳам ёриштириб юборар эди.

— Айтганлариз кела қолсун, илоҳум, — деб шивирларди кеннойим, яна камига жилмайиб, қиши билмас миҷжаларини кафти или артиб қўярди.

Сўнг менга жавоб беришди:

— Энди борақолунг, қайнужонум. Ману деб, шунча қолуб кетдингиз, Кичикойум хавотир қилуб ўтиргандурлар, — деди у.

— Ойим ўрганиб қолганлар, ишим шунаقا-ку... — дедим.

— Шундай бўлса ҳам... — деди у кўп хурсанд бўлиб. — Мана, опа борлар, дорунгиз бор. Иншааллоҳ, ичуб турсам, оёққа туруб кетгайман. Дорумас, малҳам ичкандай бўлдум. Ёқду, ишонинг...

— Эм бўлсин, — дедим.

— Агар малол олмасангуз, бу ёққа бир кириб ўтсангуз. Икки кундурки, уйдан тинч эмасман. Ёдгорим кўз олдумдан кетмайду, — деди Оповси опа чиққанидан фойдаланиб.

— Ўтаман. Ўтмай қаёққа бораман! Қолаверса, унга ваъдам бор.

— Ваъдангиз?..

— Ҳа-да. Мен уни даламизга опкетмоқчи, варраклар ясад бериб, ўйнатиб келмоқчи эдим.

— Вой, шунақаму? — деб у тирсагига тирагиб туриб ўтиаркан, оғриқларини ҳам унуптиб, бир ғалати тикилган эди. — Ҳалу... ака-ука тутинуб олдук, денг?

— Бўлмаса-чи!

— Унда майлу... Суриб ташламасларудан олиб чиқинг, кўриб қўйсун, билуб қўйсун у ёқларну! Кўриб олсун буваларину юртину. Олмазорларну... Султонмурод акангизнинг тилларидан тушмас ўша Яккабоғу Муржумонларну, қароқларига жойлаб олсун.

Ажаб, бу хабарни эшитиб, у кувониб кетади, десам... товши ҳам, ўзи ҳам бир ғалати ўзгариб бормоқда эди: қалтирайди нуқул. Кўзларида эса, жиққа ёш айланга бошлаган. Айланга бошлагану, сездиргиси йўқ. Аммо киприклари қилт этсаёқ, сўлғин шафтотли гулидай юзларидан дувиллаб чопқиллай кетадигандек эди.

— Истасангиз... ҳозироқ ўтиб ола кетаман! Бувининг розиликларини ҳам олиб қўйганман, — дедим бир қадам яқин бориб. — Шуни истайсизми?..

— Анув уламасоч тўқолдан ҳар нарсану кутгулук... — кеннойим бировнинг ғийбатига тили айланганидан хижолатларга ботиб қаради.

Асал уни сиғдирмай қандоқ куткилаганларини тасаввур этиб, ичим ачиdi.

— Кўрдим-кўрдим, ўша... қоқшоқни, — дедим шошиб. — Аммо хотиржам бўлинг, Ёдгормуродни унга ташлаб қўймаймиз.

— Худо хайрингизну берсун. Ёдгорумни Сизга, Сизни Худога топшурдум, — деб алқади у.

— Хайр, яхши қолинг, — дедим ҳеч кетгим келмай.

— Яхши боринг, — деди у ширин им қоқиб...

Мен шифохонадан ана шундай енгил тортиб чиқкан, энди уларнинг Калковуз бўйидаги ўша паноҳ топган жойларига ошиқиб борар эдим. Кун пешиндан оғиб қолибди. Ҳали бу ердан Ёдгорни олиб, Каттабоғга ўтиб боришим, эски ҳовлимизга киришим керак. Қолаверса, токча тагидаги анув омонатни топишимиз, сўнг Ёдортойга Каттабоғнию Олмазорларни — буваларининг юртини кўрсатишим керак. Кеннойим шуни орзулаган эканлар — бемор одамнинг рижосини ерга ташлаб бўладими?

Остонасининг тагига харсангтош ётқизилган ўша якка тавақали эшикни мўлжаллаб бораётсам, воажаб, кўча адогидаги анув дараҳт бир ғалати сўппайиб турибди. Қандай десам экан: қайтага қўклай бошлаган бошқа дараҳтлар олдида аллақандай айрилиб, мохов тортиб қолгандек эди. Худди бошқа оламдан келиб ўтқазиб кетишишган-у, бир қора воқеаларнинг шоҳиди — аломатидек бўлиб турибди, тавба. Уни кўргандаёқ ичим хунук шув этди. Ўзим эса тўхтаб қолаёздим. Нега, ҳеч тушуна олмасдим. нима рўй бера қолиб-дики?..

Ичимга оралаб улгурган ғулғулани зўр билан босиб, эшикка қараб юравердим. Тош зинага кўтарилиб, итарсам... хамиша очиқ турадиган эшик берк. Юрагим баттар тошди: нега беркитиб олишибди экан?!

Энди чақиришни айтинг! Қандай эшитишадио ким чиқади?! Яна ўша Заққумой — чимирилган қоқшоқ очадими?!...

Мен уни кўриш тугул, рўбарў келишни истамасдим. Юрагим аллақандай безилларди, тавба. Нима қиласримни билмай аланглаб турсам, эшикнинг тепа белдамчасига қистириғлик бир нарса турибди. Бирор кўриб-кўрмайдиган жойда. Олсам, эски ботинка ипига боғлоғлик чўп. Демак, зулфин яқинида киши билмас тирқишчаси ҳам бўлиши керак.

Ақлимдан айланай! Зулфнинг михи қайрилган жойда чўп сиғадиган худди шундай тешик бор эди. Кувониб кетганимдан шошиб қолибман. Тиққан заҳотим занжир шалдираб тушиб, эшик очилиб берса, бир қадам тисарилиб кетибман. Мен бировнинг эшгини сўроқсиз-истоқсиз очиб қўйган одамга ўхшаб қолган эдим. Энди остона ҳатлаш тугул чақиришга мажолим етмас эди. Бахтимга шу тоб тепа ҳовлида Ёдгорни, ким кўриндию менга кўзи тушиб, бир зум тош қотди. Сўнг тўғри менга қараб болаларча парпарон чопиб кела бошлади. Мен уни аввалига Кемшиктойга ўхшатиб эдим. Ишкомнинг ярмига етганида кўрсам — Ёдгор экан, бир қарич бўлиб, калишчаси оёғидан учиб кетганига-да қарамай... бир ғаллати чопиб келмоқда эди. Унинг келувини кўриб, кўнглим бузилиб кетди. (Шунчалар соғинибдими, а?!) Бояги хижолатда

туришларим қаёққа кетди, ўзим билмайман. Беихтиёр остона ҳатлаб болакайга қучоғимни очдиму ўша ернинг ўзига чўка қолдим.

— Қани, қани, той бола, — деганимни биламан, у ўша югуриб келишида ўзини қучоғимга отиб, бўйнимдан қучиб олдию шу чирмашганча қолди.

У юзчасини юзимга босганча қолган, қилт этмас, фақат юракчаси қўлга тушган қўзичок юрагидек дукурлаб тинмас эди.

Нима бўпти, ўзимдан айириб, кўзларига қарай олмасдим.

— Ҳа, тойчиқ, мана, ваъдамга кўра келдим-ку, — дедим ахийри.

У бунга жавобан бўйнимга қаттиқроқ чирмашиб, аллақандай ҳиқиллади. Мен унинг нима деганини англаб-англамай шошиб қолган эдим. Юрагимда бир қўркув туриб улгурган, нимадир содир бўлгани тайин эди.

— Нима бўлди, ким ҳафа қилди сизларни? — дедим унинг куракларини силаб.

Аммо мен юпатганим сари у маҳкамроқ чирмашиб, қаттиқроқ ҳиқиллар, азбаройи нима деяётганию нима демоқчилигини илғаб бўлмас эди.

— Ким ўзи, айтавер. Мен уни бир кўрай, — дедим ростдан ҳам жаҳлим чиқа бошлаб.

У мени қўйиб юбориб, бош тўлғади. (Аммо қани очик-ёруғ бир нима айтольса, ўксиф босгани шунчалик!)

— Ё анув... Захар опоқиму? — дедим яниб. Негадир ҳамон ўша фикрдан қайтолмасдим.

У боягидек бош тўлғади. Аммо кўзлари жиққа ёш, ўзи тўлиб турарди.

— Билмадиз, — деди ҳиқиллаб. — Акбар акамну... йўқотуб қўйдук.

— Йўқотиб?! Қандай? — Менинг ичим сидирилиб тушган, эсим эса оғиб бормоқда эди. Акбар экан-ку, нимани ижикилаб ётибман! — Қачон, қаерда? — дедим ахийри ўзимга келиб ва уни росмана кўтариб олиб.

— Йўқ, лўлулар ўғирлаб кетишду, — деди у кўзини кўзларимдан узмай.

— Лўлилар? Қанака лўлилар? — Мен бу хабардан донг қотган эдим.

— Бир дувона алдаб опкетуб...

— Девона?

Ёдгормурод энди қўлимдан тушишга интилди, сўнг тушиб, азза-базза қўлларини ёйиб тушунтиришга уринди:

— Кўчамузга мана мундай гадой келуб эду.

— Гадойми, девонами?

— «Ҳақ дўст, ё Оллоҳ»ни айтиб келду. Тиланчу десак, одамлар дувона дейишопту. Томдай келаду, — у энди анча ўзига келиб қолган, ўксуғлари ҳам анча ариган эди.

— Бўйими? — дедим тушунолмай.

— Ҳа-да. Опоқбувим айтуб берадуган девларудай... узу-ун, сап-саруқ... Балки болаларну тутиб ер...

— Тутиб ер?... Қаердан олдинг бу гапни? — Мен унинг гапидан кулиб-кулолмас, йиғлаб-йиғлолмас эдим.

— Опоқум топмай қайтдулар-ку... Биз қўрқуб, эшикларну занжурлаб ўтурупмиз, — деди у бўйинини ичига тортиб, жимитдек бўлиб.

— Ия, ёмон бўпти-ку, — дедим ич-ичимдан зил кетиб. — Энди бувинг жавоб ҳам бермаслар?

— Нега? — деди у ҳайрон қолиб.

— Аканг йўқ бўлса, сени опкетсан... ким билан қолишади?...

— Э, йўқ,— деб сақраб-ўйноқлади у.— Амақунг кела қолмаду, сену опкетақолмаду, деб ўтирибдилар-ку. Юринг — киринг,— деб қисташга, қўлларимдан тортқилашга тушди. Кетгиси келгани, кутгани шунчалик!

Унга эргашиб ичкари юрдим. Ишком тагидаги йўл билан тепа ҳовлига чиқиб бордик.

Ойтўра буви ўша-ўша оқ-оппоқ бўлиб, муштдек бўлиб, каравотларида қиблага қараб тасбех ўтириб ўтирас эдилар. Шу ўтирган кўйлари намоз ўқияптиларми, деб... останада тараддуланиб тўхтаган эдим, у киши тасбехларини шилдиратиб, юзларига фотиха тортилар-да:

— Келинг, кираверинг, ўғлим, — деб изн бердилар.

Мен салом бериб, ичкари кириб бордим. Ёдгор энди ёнимдан бир қадам ҳам жилмасди.

— Ваалайкум, мирзо ўғлим. Келдингизми, ўтинг, ўта қолинг, — деб манзиратлар қилган, дуолар ўқиган бўлдилар. Сўнг кенойимни сўрай кетдилар. — Тойчоғимнинг аяжониси қалай? Худойим шифогина бера қолибдими?

— Иншааллоҳ-иншааллоҳ, — дедим тинчлантириб.— Табиб топиб, доруларини элтиб бериб келяпман. Сизларга дуои саломлар айтдилар.

— Оллоҳ саломат қилсин. Яхшиям Худо Сизни етказди. Чаманим келгунча кўнглимиз ҳалак эди. Бир хонадонга бир эркак лозимлиги шу-да. Оллоҳим ҳам ўшанинг шарофатидан бало-қазолардан асрайди. Аёл кишининг қўли қаергача ҳам етарди. Менинг ўтиришим манавиндай бўлса...

Ёдгорнинг гапи ёдимда эди, ҳол-аҳвол сўраш нав-бати менга етиб, секин сўрадим:

— Ёдгор бир нималар деб чуғурлайди, тинчликми?— Мен устига енгил якандоз ташланган сандал четига чўка қолдим.

— Анув дуванану айтутман, опоқбуви... Ақамну опкетуб қолган тиланчу-чи? — деб чуғурлаб Ёдгор каравотга ёпишиб борди. У бувининг оёқларига осилиб, бир нарсаларни тушунтиришга уринарди.

— Дувана дема, болам, гуноҳ бўлади. Тиланчи аканг-ни нима қилади. Кўй, қаёқдаги гапни гапирма. Гумон имонни кетказади, — деб Ойтўра буви унинг бошини силаб, менга ўтирилдилар. — Болаларга эргашиб кетган экан, ҳалигача дараги йўқ. Боши оғиб Эски Жўванинг бозорида адашганми, Жангобда қолганми, Асал икки қидириб келди...

— Болалар билишар, ахир? — дедим ичим ҳаприқиб.

— Биронтаси тайнли гап айтса, қани! Юрак-бағримиз эзилиб битди, — дедилар энди ҳақростига кўчиб. — Зора шунинг қадами қутлуғ келиб, Оллоҳим бунга ҳам тирноқ бера қолса, турмуши тинчиб кетса, деб асраб олувдик, — деб тушунтиридилар. — Қаёқда?! Асалимни биласиз, туриш-турмуши шу, заҳар. Ҳозиралар уйига кириб қамалиб ётибди. Қидириб оёғида оёқ қолмаганмиш. Қаёқда! Хости Имомдан нари ўтмаган. Бо Худо, ўша сифиндини деган. Қайдан ёпишди бу бало — бола иси ёқмаслик унга? Ақлим етмайди ҳеч. На ота уруғида бор, на она уруғида. Шу асрандиси билан андармон бўла қолса, бемалол оёқ-қўлимни узатиб кетармидим... — Ойтўра буви овозлари ўзгариб, мижжаларига енгларини босдилар. — Худойимдан айланай, шундай синаркан-да бандасини... Ишқилиб, кўрсатадиганини шу дунёдаёқ кўрсатсан-у, у дунёга қолдирмасин... қийнофу жазоларини...

Тавба, нима бўляпти? Ташвиш устига ташвиш. Биридан қутулмай, бошқаси оёқ остидан чиқиб келяпти. Энди йўқолган болакай топилмай туриб мен буни қандай олиб кетарканман?! Қолаверса, қандай оғиз очиб бўлади? Тўғри далага сурвормайманми боя, бу ёкка бурилиб юрмай. Энди омонат нима бўлди-ю, бунга берган ваъдам нима бўлди?

Бир ёқда йўқолган сепкилтойга (ўша келганимда бирпасда элакишиб кета қолувди) ачиниб турибман. Балки анув заҳар-закқумнинг тергашлари, туртқилашларидан тўйиб шундай қилдимикан? Аммо етим боши билан қаёққа ҳам борарди?

— Жангобга тушиб, суриштириб чиқайми? Милисаҳоналарга кир, десангиз, кириб боқай, — дедим астойдил отланиб.

Мен юзлари ёришиб, алқай кетадилар, ўзлари бир ерларга етадилар, деб ўйлаб эдим. Қайтага Ойтўра буви ўтинч ила боқдилар:

— Ундан кўра, мана бу жужугимизни ола кетинг. Неча кундан бери ичикиб, бир ерга етди. Борса борсин: бирон ҳафта туриб келар. Унгача Чаманим ҳам қайтиб қолса, зора.

— Дарвоқе, аяси ҳам айтиб эди.

— Нимани?

— Буваларининг юртини кўриб қўйсин, деб...

Буни эшитган Ёдгормуродни кўрсангиз! У наматнинг чангини чиқариб, сакраб ўйноқлар, уй ичида гир айланаб чопарди!

— Бўлду-бўлду, борамуз. Опкетасуз энду, опкетасуз. Аям розулар, опоқбуум розулар. — Гир айланаб келиб, ёпишади, устиларимга тармашади: — Борамуз, талаларга борамуз. Кўзиқоринлар терамуз.

— Ана, кўрдиз, — дедилар у киши ҳам.

— Майли, олакет, десангиз — олиб кетавераман.

Шу тоб у қувончини ичига сиғдиролмай ўзини шартта устимга отдию бўйнимдан қучиб ола қолди. У ҳали-бери қўйиб юборадиган эмас эди ва мен ҳам бағримдан қўймай бувига дедим:

— Бўлмаса, дуо қилинг.

Ойтўра буви ҳалим тортиб дуо қиляптилар, у кишининг овозлари, овозларидан ҳам бурун дуолари менга мойдек ёқяпти, аммо қўнглимнинг бир чеккаси хижилга ўхшаб, ҳеч ёришмайди, ғаш. Акбарга ачиняпман. У қайда қолди экан? Ростданам ўзи тиланчига эргашиб кетдимикан ё лўлилар ўғирлаб, бировларга ошириб юбориши? Олам тўла етим бўлса-ю, у кимга керак бўлиб қолибди? Ҳеч тушуна олмаяпман, ақлим бовар қилмайди: ҳали ҳам бола ўғрилари бор эканми?.. Ёдимга эса, болалигимизда катталардан эшитганларим — опқочиб кетилган болакайларнинг аянчли тақдирлари тушиб-тушиб кетяпти. Улар бизни қўрқитишгани-қўрқитишган эди:

— Авраса лаққа тушма. Шаҳарга оббораман, шаҳар ундей, шаҳар бундай, кинолар бор, катайса-конкилари бор, «чайнамайшим»лари бор деса, ишонма,— деб тергашгани-тергашган эди. — Опкетиб олдими, ертўласига қамаб қўяди-да, бир кун кечаси супра ёзиб, сани устига қўйиб юборади. Ўзлари қўлларида бигиз, гир айлана қуриб, ўтириб олишади. Ойимга кетаман, деб йиглаб, қайси томонга юрсанг, ўша томондан этинг-га бигиз санчишади. Сен қочиб, ўзингни бошқа томонга урасан. У ёқдан улар бигиз санчадилар. Шунаққиб сени ҳам, супрадаги унни ҳам қора қонингга белаб, кейин нон ёпиб ейдилар. Улар шунақа қавм — уларга рўпара бўла кўрма, — деб қўрқитардилар.

Шу-шу хуржун кўтарган тиланчию девонани кўрдик, дегунча оёқни қўлга олиб қочаверардик. Акбарга айтиб қўйишишмаган эканми, ертўласи бор — бола ўғриларини?

Ҳали у тушларимга кириб чиқиши аниқ. Яна неchanчидир марта ертўлама-ертўла қиличимни кўтариб, изғисам керак. Ҳар гал бола ўғриларининг адабларини бериб, йўқолган болакайларни кутқармоқчи бўламан-у, ертўлага бостириб кирган жойимда уйғониб кетаман. Нега шундай — ҳеч тушуна олмайман.

Бу гал-чи, Акбарни кутқара олармиканман?

## 7. ХАРОБАДА ТУШИБ ҚОЛГАН ОҲАНРАБО

Бизнинг томонларга Бешоғочдан ёлғиз биттагина автобус қатнар эди. Илинган илинарди, илинмаган пиёда — яёв кетарди. Омадимизни қаранг, тиқилишиб бўлса-да, ўша кичкинагина «хаптобус»га чиқиб олдик. Кетяпмиз, кетяпмиз, қани бирон жон тушиб, сал енгиллашсак. Менку, чидаяпман, лекин Ёдгормуродни эзиб қўйишишмаса эди, деб жоним ҳалак. Ахийри уни дераза томонда ўтирган сутчи опоқининг тиззасига жойлаштириб тинчидим. Аммо ўзим тиқилинчдан ҳеч нарсани қўролаётганим йўқ. Қаерга етганимизни тахминлабам билиб бўлмаётир. Алоҳал, Чўлпонотанинг гузарига қайрилишда ярим одам тушиб, сал енгиллашдик. Бу ёғига автобус Богоғоднинг пасти билан Бўзсув ёқалаб, айланма йўлга тушиб олдию юзга таниш Бўзсув насимлари урилиб, энтикиб кетдим. Ҳавонинг тозалигини айтинг! Бу томонларда ҳалихозиргина ёмғир шивалаб ўтган-у, ана энди бодроқ ҳиди анқиб ётар эди. Кейин унга қўшилиб

денг, шу тепаю жарлар оралаб оқиб ётган Бўзсувнинг нимтатир ҳиди, ёввойи ялпизу ботқоғу булоқ сувларининг бўйлари қўшилиб омухта бўлиб кетган бир ажойиб ҳид келяптики, иска-искаланиб тўймайсан, киши. Яна аллақаерда (балки шу кўча ёқасидаги полковниклар боғидадир) шафтолилар қийғос гуллаб юборган-у, ўша насимлар шафтоли гули бўйларини «ўғирлаб» олиб келаётгандек!.. Полковникларнинг ҳам билгани-билган! Бўзсув ёқасидан йигирма сотихлаб жой олиб, боғ қилиб, остидан сувлар оқадиган жаннатдек соя-салқин жойларда яшашяпти. Оллоҳ уларга бу дунёсини берган. Ҳаммаёқ итирқини чиқиб, бузилиб бўлди, лекин уларнинг битта чивифига ҳам тегишгани йўқ. Ҳамма қочган булбуллар шу ерда чаҳ-чаҳлаб ётипти!

Бу орада биз Боғободдан ўтиб, Қайнамага чиқиб бордигу хўв олдинда Бўзсув Қўшилишдан ўтиб, Аччи қирларига қараб оқиб кетадиган томонда (нақ Аччи қирлари устида) ялт-ялт нур сочиб, ўша ёқни нур селига кўмиб ташлаган офтоб кўриндию юрагим қинидан чиққудек ҳаприқиб кетди. Ёпрай! Ҳеч ўзгармабди-ку! Ўша-ўша-ку! Бир вақтлар шийпонда — Каттабоғнинг устида туриб кўрганимдан аъло-ку!

Мен энгашиб Ёдгорнинг қулоғига секин шипшидим:

— Тушдик, той бола. Етиб кепмиз.

Ёдормурод гангиб, каловланиб қолган, ҳали атрофга, ҳали афтиимга аланглаб бокар эди:

— Нима, шу ерму? Келдукму?

— Келдук, келдук, — дея олдинга интилдим. — Хўв, биродар, бизни шўтта ташлаб кетинг. Қайнамада қолдиринг.

— Қаёққа борасиз ўзи? Бу ерда бирон тирик жон қолмаган-ку, — деди кимдир орқадан. — Кўрмаяпсизми, ҳаммаёқнинг итирқинини чиқарib ётишибди.

Мен парвоимга илмай, укачамни етаклаб, олдинга ўтавердим:

— Биз шу ерда тушамиз, шунақаси пиёда кетамиз.

Шоғёр кепчикдай юзида мошдек-мошдек чечак излари қолган яғриндор одам экан.

— Ўзингиз биласиз, — деб машинасини четроққа бурди.

— Чакки қилдиз-да, оповси, — дерди ҳалитдан қу-йиниб сутчи аёл, — бола билан уриниб қоласиз-ку.

— Уриниш нимаси, ўзимизнинг жойлар, ўйнаб кетамиз, — дедим тушаётган жойимда. — Кўриб қолсин-да, буям... бу ёқларни...

— Вой, шунақами? Бугун бор, эртага йўқ табаррук жойларимизни-я? — деди у орқамдан. Овози ҳам аллақандай яйраб-тovланиб чиққан, у ичимнинг чукур бир ингичка ерларига тегиб, этларим жимирилашиб кетган эдилар.

Мен жавоб берарга ҳам ҳолим келмай Ёдгорни қўлтиқлаб олдиму пастга туша бошладим. Яхшиям у бор экан, унга алаҳсидим. Ҳеч қанча ўтмай машина жилиб, биз кўча ёқасида ёлғиз қолган эдик. Укачам бирпасгина бегонасираб, атрофга аланглаб турди-ю, кейин болалигига бориб, бирдан олдинга чопа кетди. Нима кўра қолибди, десам, қайнама дўнгига чиқиб бориб, қўрқа-писа ичига мўраламоққа бошлади.

— Қоч, ажинанинг инидан! — деб бақириб эдим, қайнаманинг ичидан бир нима отилиб чиқадигандек у ортига ўгирила қочди.

— Нима у, амаку? Ростан иниму? — деди кела солиб оёғимга ёпишиб.

— Йўқ, қайнама, — дедим уни қўрқитиб юборганимдан ўзим уялиб.

— Нима қайнамайду? — деди кўзларимга жавдираб у.

— Қайнамайдумас, қайнайду, — дедим кулиб.

— Хўп, нима қайнайду? — деди у ҳеч тасаввур эта олмай. Мен унинг бошини силадим:

— Оддий сув, кўрмадингми?

У бош чайқади:

— И-им... Ҳеч нима қайнамопти-ку.

Мен яна унинг бошини силаб, кўчанинг нариги бетидаги дўнгга ишора қилдим:

— Хув авави ҳовузчани кўряпсанми?

— Қанақа ховучча? Дўнг-ку, — деди у.

— Ана ўша дўнгни ичида ҳовузчаси бор. Сув ўша ердан тушиб, бу ёқдан қайнаб чиқади, билдинг.

У кўзларимга қадалиб туриб, чапак чалиб юборди:

— Зўр-ку! Ўша ердан шўнгуб... бу ердан чиқадиму?

— Ҳа, баракалла, топдинг! Шуни қайнама дейдилар.

— Ҳар ёқларга тошибам ётмайду? — деди у таъсирланиб.

— Ётмайду, — дедим мен ҳам суйиб.

— Сизибам кетмайду!.. — деди у.

— Кетмайду, — дедим мен.

— Қандай яхши! — Ёдгор боягидай бир ўйноқлаб қўйиб, билагимга ёпишди. — Зўр экан сизну томонлар...

— Сен мана бу ёқни кўр, офтобнинг ётоғини кўр,— дедим Бўзсув тепалари оша Аччи қирларини кўрсатиб. У офтобнинг минг-миллиард қияма нурлари селига ботиб атласланиб ётарди. Ёдгормурод қарадио кўзлари қамашиб кетиб, пинжимга юзини яширди. Сўнг оёқларимни паналаб ҳавасланиб тикилди.

— Ву-уй, мунча чиройлу?!

— Шунақа: офтоб ботолмай-ботолмай ботади бизни томонларда, — дедим ўзим ҳам ўша ёқлардан кўз узолмай. — Сен уни бу ёқдан чиқаётганда қўрсангму, ох, — дедим камига.

— Кўрсатасизму? Опкеласизму? — деди у ўйноқлаб, қўлларимдан тортқилаб.

— Опкел, десанг опкелавураман.

— Богларизну-чи, қачон кўрсатасуз?...

— Кўрсатинг десанг, ҳозирам кўрсатавураман, — дедим-у, ичимда эса ишқилиб суриб ташлашмаган бўлсин-да, деб турибман. У бўлса, сакраб-қувнайди, ўйноқлаб тинмайди:

— Кўрамуз-кўрамуз. Варрак учурадугон томларизнуям кўрамузму?

— Йўқ, — дедим овозим ўзгариб келиб. (Мен уни қандай алдай оламан!) — Томларимизни бузиб кетганмиз. Аллақачон.

— Уйларизну-я? — деб ҳайратланиб тикилди у.

— Ҳа-ҳа, — дедим зўрға ютиниб. Томофимга бир нарсалар тиқилиб келмоқда, у ғиппа бўғилиб, гапиролмай қоладигандек эдим.

— Унда... унда биз қаёқка боратurmуз? — деди жавдираб. Кўзлари толиқиб кетмагани унинг. Пастдан тикилавериб, жавдирайвериб! Киприклари худди қиз боланикдай узун-узун, бир чиройли эди, ҳеч қилт этмасди, тавба.

— Бизникига, — дедим қулт ютиниб, — томлари очиқ, эшик-деразалари — валонгор, ўзи қор-ёмғирларда ивиб тушган... бўлсаям боравурасан... кўравурасанми? — дедим негадир.

— Боравурامуз-боравурамуз, — деб тортқиларди у, қистарди у.

Ишқилиб омон турган бўлсин-да: тахмонларимизу токчаларимиз. Ўша мадфун хатлар... Мен уларни бунга, манави жужуқтойга — кеннойимнинг тойчоққинасига қандай айтай? Қандай тушунтирай? Аслида нима учун, не ниятда келаётганимизни қани, айтиб бўлса! Оғиз очиб бўлса!

Мен уни қўлчасидан етаклаб олганман. У чим босиб кетган ташлама ариқка тушиб кетай-кетай деб, қуриб-қовжираб, қор-ёмғирларда қолиб ҳам адo бўлмаган ўтларга, ёввойи ялпизларга туртуниб-суртуниб келяпти-ю, атрофга аланглаб чарчамайди. Баъзан у ер-бу ерда омон қолган азим ёнгоқлару ўрикларга ҳайратланиб тўхтаб қолади. Улар ҳали қип-яланғоч: ҳалигина шивалаб ўтган ёмғирданми, ўрик шохлари ивиб-қорайиб қолган бўлса, ёнгоқ танаси тамоми шохларигача кумушдай ялтирайди. Лекин кундаков қилиб ултурилмаган боғлар, ишкомлар бир

ғалати мунғайиб кўринадилар. Даланинг ҳам далалиги қолмапти. Ҳаммаёқ кавлаб ташланган, ҳар ёқда чала иморатлар: бир ерда энди пойдевор қўйила бошлаган бўлса, бошқасининг ҳавозалари кўтарилиб, ғишт теришга тушилган. Ундан наридагисида осмони-ҳафтимга бўй чўзган (худди бир оёқда турган улкан турнадай) ёлғиз кран қаққайиб туради. Қилт этган жон кўринмайди. Яхшиям бугун дам, бўлмаса, анув турган жойида қолган сургич трактору мошинларнинг (кучаниб-чиранган) овозлари, қурувчиларнинг турфа тилда сўкиниб, бақириб-чақиришларидан қулоқлар қоматга келар-миди?

Ҳаммадан бурун манави Ёдгор қаерга келиб қолдик, деб ўтакаси ёрилган бўларди. Ҳозир ҳам анави баҳайбат темир турналардан чўчиб, миқ этмай келяпти. Гоҳ-гоҳ устимизга ағанаб тушмаяптими, дегандек, қўрқа-пуса тепага қараб-қараб қўяди. Қараб қўяпти-ю, боя Аччи қирларига кўзи тушиб, вуйлаб юборган болакай энди жимиб қолган, дами ичига тушиб кетган каби эди. Кўлчаси ила икки бармоғимни (бошмалдоғимга қўшиб) маҳкам ушлаб олган-у, ўзи етиб юролмай, галдираб қоляпти.

— Чарчадингми, тойчоқ? — дедим қайрилиб-тўх-таб. — Кўтариб ола қолай?

— И-им! — У ширин бош тўлғаб, одатдагидек димоғида жавоб қилди-ю, кутилмаганда олдимга тушиб чопқиллаб кетди. — Етуб олингчу! Етолмуйсиз!

Иймаганни ҳам ийдириб олади, деганлари шу бўлса керак! Унинг овози кимсасиз даламиизда қўнғироқдек жаранглар, ўзи эса ташлама ариқ ёқалаб, орқасига аланглай-аланглай қиқирлаб чопиб бораради.

Беихтиёр, менинг ҳам болалигим тутиб, қувалашиб-ҳазиллашгим келиб кетди.

— Шошма-чи, сен — тойчоқ, — деб орқасидан чопдим. У эса тутқич бермай қочиб бораракан, ҳозир мен тутиб оладигандек, қиқир-қиқир кулар, яна камига елкаси оша хавотирланиб қараб-қараб қўярди. Кўлларимни ёйиб алпонг-талпонг қадам ташлашимдан, етай деганда «мункиб кетишимдан» бир яйрардики... Аммо ўзи қочиб-кулавериб галдираб қопти, чимгами, нимага қоқилиб умбалоқ ошиб кетай, ийқилиб тушай деяпти. Чопиб бориб икки кўлтиғидан даст кўтариб олдиму қийқиратиб... елкамга миндириб қўйдим.

— Ҳа-а, тутқазмас экансан-а! Хўш, қалайсан энди?

Ҳозиргина ҳансираб-қиқирлаб турган болакай... юракчаси қўлга тушган қушчанинг юрагидай потирлаб ётипти-ю, ўзи миқ этмайди. Қошим оша қарасам, Усмон тоғамнинг ташлаб кетилган боғларига боққанича... қотиб қопти!

— Ҳа, тойчоқ? Нима экан, нима кўра қолдинг? — дедим секин силкиб.

— Амақу, уну қаранг! Амақу!.. Қаранг Сиз уни, — елкамга олволган укачам бирдан қўшқўллаб бошимга шаппалай кетса, капалагим учиб кетибди.

— Нима-нима? Нима экан? — Мен боққа аланглаб ётибман, аммо ўлай агар, ҳайратга арзирли бирон нарса кўрсам! Итирқини чиқиб, ишкомлари оғиб, шоҳ деворлари қулаб ётган боғда болакай нима кўра қолиб-ди — ҳеч ақлим етмас, ўша нарсага кўзим туша қолмасди.

У эса ҳамон бошимга шаппалайди:

— У ёққамас, бу ёққа қаранг Сиз!..

Шундагина илғаб, қотиб қопман:

— Ия, вой, уми?! Зўр-ку! — дедим тан бериб. У шунча нарса ичидан ўшани кўрган эди! Гап шундаки, тоғамнинг боғлари пастига туша бошлаган катта иморатнинг ҳов бир чеккасида... бетондан қўнқайиб чиқсан улкан чакич-арматуралар ортида ёлғиз туп шафтоли... напармон гуллаб юборган, у кечки офтоб нурларида зарҳалга беланиб ярқирав, гулбаргларнинг тозалиги, нозик адо пушти гулларининг кўплигидан юрак ҳаприқиб кетар эди!

— Қойил! Кўзинг ўтқур экан-ку, сенинг, — деб юбордим.

— Чиройлу-а? — деди у ҳам.

— Чиройлик ҳам гапми! Гўзал! Сендан зўр рассом чиқади, — дедим мақтаб-эркалаб. У эса парво ҳам қилмай атрофга ютақиб аланглар, юринг, юраверинг, шундай зўр экан, томоша

қилишлу экан, деб қистар эди. Мен жилдим. Аммо ҳеч қанча ўтмай у яна боягидек бошимга шаппалашга тушди:

- Қаранг, уни қаранг! — дерди нималаргадир ачиниб.
- Яна нима? Нима топа қолдинг? — дедим тўхтаб. У бўлса:
- Шундай нарсану... шундай нарсану... — дейди-ю, у ёғини айтмолмайди.
- Нима бўлиби, нима қилишибди?
- Синдиришибду қаранг...
- Қани, нимани?
- Ўша зардолуни-да...

Шундагина кўзим тушибди: бояги шафтолини.. кранми, нима босиб-янчиб ўтгану... бир шохи танасидан айрилиб тушиб, лойга қоришиб ётар ва ўша ётишида ҳам чаман бўлиб гуллаб берган эди! Ажаб ҳол: шафтолининг бир шохи шамолларга бағрини очиб, гўё кўклам офтобига шода-шода гул тутар, ял-ял пушти нур сочар эди. Ердагиси эса унинг сувдаги аксига ўхшаб у ҳам кўзни ўйнатарди. Валлоҳ, шунақаси ҳам бўларканми?.. Кўриб қўнглим бузилиб кетган, ўзимга келоммасдим. Наҳот бир тирик жон топилмабди уни қўтариб қўйишга? Шеригига мatab, боғлаб қўйишга?.. Шундай барқ уриб гуллаган нарса... наҳот эртага яна оёқ остида қолиб кетавуради?

— Зардолумас у — шафтолу, — дедим елкамдаги тойчоқقا. Билмадим, ўзимни оғир, мунгли хаёллардан chalғitarмидим ё болакайними? Ишқилиб, ҳеч ўзимга келоммасдим. Аммо Ёдгор бошқа нарсага chalғиб улгурган экан, бирдан жонланиб, қаерда ўтирганини ҳам унутиб, ликонглай кетди:

- Ву-уй, амақу, анувларни ҳам кўрунг...
- Яна нималарни кўра қолдинг?
- Кўплигину... вуй!..
- Шафтолиларми яна?
- Ҳа-да, кўчуб кетишгануминан, ташлаб кетишгануминан... гуллайверибду, гуллайверибду...

— Вақти келгач, шу-да, гуллайди-да, тойчоқ. Ҳеч ким тўхтата олмайди буни,— дедим у кўрсатган томон-га қайрилиб. Ва шу баробар чалdevорлар орқасидан, харобаю вайроналар ичидан келинчакдай мўралаб турган гўзал хилқатларга кўзим тушиб, тўхтаб қопман!..

Во дариг, бу қанақаси? Мен бунақасини ҳов, илгариям, ўсмирилик чоғларим — Султонмурод акам биз томонларга келмасдан бурун ҳам қўрганман-ку! Уларнинг ташлаб кетилган хароба қўрғонлари чеккасида ҳар баҳор бир туп шафтоли ана шундай қийғос гуллаб чиқмасмиди? Биз уни бошига заррўмол ташлаган келинчакками — нимага ўхшатмасмидик?!

Ҳа-ҳа, биз уни ҳожасини кутган келинчакка ўхшатганимиз-ўхшатган эди. Энди-чи, энди? Мана булар-чи, қаердан пайдо бўлиб, ташлаб кетилган қўрғонлару боғлар этагидан юз очмоқда? Қаёққа қарасам, ўша ёқдан кўриняпти? Нима бу, саробми ё ҳақиқат?. Шунаққиб биз қўрғонларимизни битта-битта бой бера-ётирилизми? Шунаққиб Яккабоғдан, сўнг Каттабоғдан айрилиб қолдикми? Шунаққиб Иззаю Олмазорларимизни тортиб олишаётирми?

Қачон қайтарканмиз бу қўрғон, бу боғларга, анави «келинчак»лар олдига? Умуман, саломларига алик олгувчилар, қайтгувчилар топилармикан? Султонмурод акамга ўхшаб уларнинг ҳимоясига чиқа олармикан?

Шунақа, қўнглимнинг кўчасига нималар келмасди!

Ниҳоят, ташлама ариқ (ҳа-ҳа, ўша чим босган, Бўзсувга қадар тушиб боргувчи ташлама ариқ) Усмон тогамнинг шоҳ-деворлари ёни билан чиқиб, тутзор тагидаги йўлга туташди. Бу ёғи осон: дала ўртасидан тушиб келаётган катта йўлдан ўтсагоқ етамиз. (У йўл опамнинг уйлари тагига келиб тўхтаган, уни бузишсаёқ, гал бизниги эди.) Уйимизнинг орқа деворию қатор жийдаларимизга (улар бўртиб қолганга ўхшар-у, кув яланғоч эди) кўзим тушиб қувониб кетдим.

Ичимга бир илиқлиқ, умид югурди.

Хайрият. Худо асрабди. Тегиб улгуришмабди. Зора, кеннойижоним айтган, тайнинлаган нарсалар ҳам жо-йида бўлса! Турган бўлса! Мен ўша жойни топсамок, бас...

Юрагим... қинидан чиқиб кетгудек, кўксимни ёрворгудек дукирлаб, бўғзимга бир нималар тиқилиб-тиқилиб келадир. Ва, ниҳоят, биладиган бўлдим! Акам билан ўрталаридағи тарихни!.. Қандай топишиб, қандай айрилганлариниу нима бўлиб, жудоликда қолганларини! Нимага шунча туриб, шунча кутиб, бизникидан чиқиб кетди, бош олиб кетди экан? Ёзгандир ахир? Узру илтижоларини? Таваллою надоматларини?

— Амақу, амақужон, нега юрмутмиз? — дерди укачам қистаб, қулоқларимдан тортқилаб. — Ё келдуки?..

— Келдук, келдук, — дея қўлтиқларига қўл юбориб, бошимдан даст кўтариб олдим. — Энди ўзинг юр. Бизнинг боғу уйларни кўр, — дедим ерга кўйиб.

— Шу жойлар... шу уйларму? — деди у қўзлари пирпираб.

— Бизлар ташлаб кетганда... бузилиб ётганда қўряпсан-да, сен, — дедим мен. — Ҳў-ў, аянг турганларида қўрсангми эди!.. Жаннат эди!

— Вой, аям шатну айтармудилар? — деди у сакраб-қувнаб.

— Шатну, — дедим мен ҳам унга менгзаб ва бошини силаб, — яна нималар дердилар?

— Яна йиғлардулар, — деди у бирдан маъюс тортиб.

Мен титраб кетдим. Қаршисига чўк тушиб, тирсакларидан тутиб олдим:

— Менга қара, нима деб йиғлардилар? Нега йиғлардилар? Айтармидилар ҳеч?

У бош силкиди:

— Ҳм... Тузалуб кетсам, олиб бораман, ётуб келамуз, дердулар.

— Яна-чи?..

— Яна, буванглар юртину кўрасан. Олмазорларга ўтамуз, дердулар. Опкелолмадулар, — деди ўқсиб.

— Мана, келяпмиз-ку, — деб уни қучиб, митти юзларини юзимга суйкадим, — ҳали у ёқларга ҳам ўтамиш. Иззаларни, Фозилтепаларни кўрсатаман.

— Шунақаму? Бу ердан кейин-а? — Унинг қўзлари чақнаб кетишига ҳам, ёшланиб маъюс тортиб қолишига ҳам тараф йўқ эди. Ҳозир эса, бўйнимга осилиб олган эди.

— Йўлимиз-ку, ахир, нега кўрсатмайин, — дея қистадим. — Юрақол энди. Кирамизу кетамиш.

Етаклашиб, опамларнинг ҳовлиларидан ўтиб бордик. Ҳовлики, ўралган деворини айтмаса, ҳовли сиёғи йўқ. Кузда моллар, қишида қарғаю зағчалар хўб итириғинини чиқаришган. Томи очиқ — валонгор уйлар одамнинг хўрлигини қўзготади. Неча уй бузиб, кўчиб кўрган одам — мен ҳам эски жойларимизни кўрганда, ўзимни тутолмаяпман. Ҳар қарич, ҳар қадами азиз бўлиб кетган жойларни қайтиб кўриш, бу аҳволда кўриш... шунчалар оғир эканми?

Лекин Ёдгор мендан ҳам синчков экан. У олдимга тушиб чопқиллаб кетдию жийдамиз тагидаги йўлкадан ўтибоқ таққа тўхтаб қолди. Мен нима бўпти экан, деб икки ҳатлашда етиб борсам... ирғишлиб — сакрай кетди:

— Вой, амаку, қаранг буну! Танудум, танудум!..

— Нимани танидинг? — Мен азбаройи ҳайрон қолган эдим.

— Ҳовлуну танудум...

Ё тавба!.. У нима дейдир? Қандай танийдир?... Мен гарангсиб қолаёзган эдим.

— Қанақасига... танийсан? Энди келишинг-ку?

У қайрилиб тиззаларимни қучиб олди:

— Кўзумну юмуб айтуб берайму? Худду аям айтганларудай экан. Танудум.

— Шунақами? — дедим суйиб-эркалаб. Мен энди ўзимга кела бошлаган эдим. — Қани, бир бошдан эсла-чи. Нималар бор, деб эдилар?

— Узу-ун уйлар... — У кўзларини чирт юмиб, камига кафтлари ила беркитган эди.

— Тўғри. Узу-ун кўчага қараган, кунгай уйлар, — дедим мен. — Яна-чи?

— Яна, ка-аттакон тол тагуда супасу...

— Бор-бор. Ундан кейин-чи?.. — Мен уни яна ҳам суйиб, яхши кўриб кета бошлаган эдим.

У эса ўша ҳовлига орқа ўтириб турганча, бунинг устига кўзини чирт юмиб, кафтлари билан беркитиб олганча... тошга ўйилгандек ёдида қолган эртак ҳовлини — бизнинг ҳовлимизни бирма-бир тасвирлаб берар эди.

— Ундан кеюн зина бор, дахлуз бор, — деди энтикиб.

— Даҳлизда-чи? — дедим мен у кўриб тургандай айтиётганидан, топаётганидан баттар ҳаяжонланиб.

— Даҳлиздаму?.. Тахмон бор, баланд токча, токча оруқасида ўшоқقا очуладурган даруча...

Ич-ичимдан бир тўлқин қўзголиб, саросимага тушиб қолдим. Ёпирај, нималар деяпти бу?

Чиндан топ-япти-ку?! Беихтиёр, уни яна ҳам суйиб, қучоқлаб олдим.

— Яна нимани эслайсан? Нималарни айтиб берганлар?

— Эсладум, эсладум, — деб қўлини кўзларидан олиб ўйноқлади у. — Яна танучангуз бор, танучча! Топдимму?

— Бор, бор, — деб юбордим ўзим сезмай. — Ўттан-чи, ўттан қаёққа ўтилади?

— Ўттан, — Ёдгор бирпас жим қолиб, бир қўлчаси ила чаккасини қашлаб ҳам олди. — Эсладум, эсладум, катта уйга ўтиладу, аямну уйларига.

— Баракалла! Зўр эслаб қолган экансан, — деб қистай кетдим, — Айт, жоним, битталаб айт! Ҳеч бирини қолдирмай айт! — деб ўтинмоққа тушдим. — Эшигимизда, кўчамизда-чи? Нимани эслайман, — дердим мен болакайни қийнаб қўяётганимни ҳам унутиб.

— У ердаму? — деди у эслашга тиришиб, ҳам лабларини бир чиройли қимтаб. — Кўча бор, қўчанинг у ёғида...

— Анҳор-чи? Нокзор-чи? — дедим қувончимни ичимга сифдиролмай.

— Бор-бор, анҳорам бор, нокзорлар, бедапояларам...

Мен уни боягидан ҳам маҳкамроқ қучиб олган ва ўзимни унутиб такрорлар эдим:

— Топдинг, тойчоқ. Барчасини биларкансан. Эслаб қолганакансан. Кечир, ишонмай ўтирибман. Умрида кўрмаган, деб ўтирибман. Сен эса...

Кейин ўзимга келиб, ич-ичимдан босиб келаётган ҳаяжонми, ўксукми — нималаримни ютиб, унинг елкасидан тутганча юзларига бир алпоз термулдим:

— Ростингни айт, шуларнинг барини аянг айтиб берганмилар? Узун кечаларда?

— Ҳм, — деди у енгил бош иргаб.

— Кейин тушларингда?..

— Йўқ, — деди у бош чайқаб. — Ўнгимда кўргандайман худду.

Болага ишонмаслик мумкин эмас эди. Лекин қандай кўрди, эслаб қолди экан кўрмаган жойларини? Шунисига ақлим бовар қилмас эди. Бошим гир айланиб, ўрнимдан турдим-да, отхона бурчагидаги шафтолига суюнганча қолдим. Болага эса:

— Яна ўзинг қараб боқ-чи, сен танийдурган нима қопти экан, — дедим секин.

У «яхшу!» дея юқорига чопиб кетдию мен эсам бу мўъжизага — умрида бу ёқларга қадам босмаган болакайнинг ҳар битта нарсани — аниқ-тиник айтиб бераётганига ҳайрону лол қолиб, қотиб турадим. Болада бир сир бор, дердим-у, нималигига ақлим етақолмасди ҳеч! Бу нима бўлса экан? Ё у ҳам шу уйнинг фарзандими? Билмасдим.

Бир вақт нимага келганимиз ёдимга тушиб, шошиб қолдим. Дарвоҷе, кун ботмаган, унинг қизғиши шуъласи қолган-қутган дараҳтларнинг қир учларию янги тушган иморатларнинг теппаларида ўйнар, вақт ўтаётиб эди, шошмоқ лозим эди. Кеннойим айтган омонатга хаёлим қочиб, ичкари юрдим.

Бу маҳал унинг Ёдгоргинаси, шириндан-шакар болакай ўйинга берилиб, ўзи билан ўзи

бўлиб кетган, мени-да унутиб, ҳовлимизда у ёқдан-бу ёққа чопиб, юргилаб юарди. Ҳали ишкомларимиз ичига кириб кетар, ҳали супамиз томон, ҳали зинамиз томон чопарди. Ҳали отхонамизга мўралаб, ҳали даҳлизимизга югуриб чиқади. Остоналарни от қилиб миниб, дераза токчалари устига, тахмонларга чиқиб, сакрагани сакраган. Баъзан шифтсиз деворларга, осмонга анқайиб қолади-да, яна ўйинга берилиб кетади.

Мен эсам, ичкари уйда ўзим билан ўзим овораман. Зўр бериб ўрта токчанинг (пахса устидан терилган) хом ғиштларини кўчириб ётибман. (Эсимда бор, тогам товчаси паст бўпқопти, деб икки-уч қатор ғишт тердирган, кейин суваб юборилган эди.) Ари қаерига ин кўя қолган экан? Орқасидан кириб келиб, жой топгандир-да?

Кўчирган жойимданми, хом ғиштларданми, ачимсиқ сомон ҳиди аралаш тупроқ бўйи анқирди. Ниҳоят ғишт тугаб, пахса кўринди. Ўраша тупроқларни сидириб тушириб ташладим. Лекин на ари ини, на ғовак кўринарди. Қаерда экан? Ё мен бошқа токчани кўчириб ётибманми? Юрагим ғурмишлаб, ичим қизиб кетяпти. Каллам қотиб, қовоққа айланиб қолгандек... Жўяли бир фикр кела қолмайди: қаерда бўлиши мумкин? Бу ёқда кун кетяпти. Ҳали-замон қуёш ботвориши мумкин.

Ахийри унинг бир гапини эсладим: «Токчанинг ёнину уриб кўрсангиз, биласиз». Дарвоқе, пўкиллайди-ку. Ўрта бармоғим орқаси-ла аста-аста уриб кўр-сам — бир жойлари пўкиллаб, қолгани такирляяпти. Шошиб қолиб, тиззалаб опман. Ўша ерни секин эзсам, сувоғи эзилаётir, ҳовлиқиб қаттиқроқ босиб эдим, қўлим билагимга қадар кириб кетди.

Ўтакам ёрилиб тортиб опман. Билиб бўладими, нима кириб олган. Сувоқларини кўчириб, секин қарасам... ари ини қуруқшаб муштдек бўпқопти. Балки бу бир бўлагидир. Қолганини кеннойим ўша вақтдаёқ тозалаб ташлагандир. Кейин битикларини яшириб, суваб ташлаган бўлса ҳам эҳтимол. Лекин унда битиклар нимага кўринмайди? Қаерда қолиши мумкин? Аста қўлимни тикиб, пайпаслаб кўрсам... бир нима — қуруқшаган нарса шилдирайдир. Чанглаб тортвола қолдим. Қарасам, чанг босган сариқ дафтарнинг муқоваси... Гижимланиб чиқибди! Демак, бир нарсалар бор, қолгани ҳам бор. Ютоқиб, сувоқни кўчиришга, тешикни катталаштиришга тушиб кетдим.

Ари инига ёруғ тушиб, катақ дафтарнинг қолгани ҳам кўринди.

Олсам, тагида яна биттаси. Очиб ҳайрону лол қолдим. Хат бир ажаб имлода... жимжимадор араб ёзувида эди.

Бўшашиб, ўтириб қопман! Кошки унинг зер-забарларига тишим ўтса, ҳижжалаб-да ўқий олсам. Ўзимни шундай ночор-нотавон ҳис этдимки... Яна мен ўз даврининг зиёлиси, институтларни битирган, энг катта газеталарда ишлайдирган, ҳар куни қулоч-қулоч мақолалари чиқиб турган мухбир эмишман! Ниҳояти отин ойида (ўша ҳам ўзининг ойиси экан) ўқиган бир аёлчалик бўлмасам. Ўшалар билган нарсани мен билмасам! Роса бошқа томонга ўтлаб кетган эканмизми?..

Кеннойимнинг акамга аталган мактубларига етишганимда унга тишим ўтмай ўтиришимни кўринг! Ана сизга натижа! Ҳатто уни бировга кўрсатишга, кўрсатиш тугул айтишга ҳаққим йўқ. Бу сирдан кимни ҳам воқиғ эта олардим?! Изн берилмаган: кеннойим изн бермасалар, мен уни кимга ҳам ўқита олардим?

Бир маҳал қарасам, топган бўйрачўларидан кемами, аравачами ясад, даҳлизда ўтирган болакай, менинг меҳмоним — Ёдгормурод шу томонга тикилиб қопти. Кўз кўзга тушиб, у ширин жилмайди ва шу жилмайшида юз-кўзларига бир тиник нур югуриб, кимгадир жуда жуда ўхшаб кетди; Эсладим, у ўша болохонада кўрганим — сувратдаги қўхлик аёлга ўхшаб, ним жилмайиб турар, узун-узун киприклари қора кўзларига бир ярашган, танимаган одам уни ўғил бола демасди. Пешонасидами, ёноғидами, ўша Юсуф гўзаллигидан бир чимдимгина бор эди. Бир чимдим бўлса ҳам оламга татигули эди, тавба.

У менинг хаёлим ёришганини кўриб боягидек ширин жилмайди:

— Нима излаёпсуз, амаку?

— Топдим, — дедим ноилож.

— Қаний, қаний?! — у тура чопқиллаб келди-ю, елкамга осилди, — битта күрсатунг.

— Мана, эски хатлар экан. Кўрганинг билан се-ниям, мениям тишимиз ўтмайди, — дедим юзига тутиб.

— Ҳа-я, — деди у бош силкиб. — аям бўлсалар ўқий олардилар. Иннайкейин опоқбувим ҳам ўқий оладулар, — деди у мақтангиси келиб.

— Қандай яхши, — деяпман-у, ичим эзилиб бор-япти: кошки опоқбувига айтиб, бирорвларга кўрсатиб бўлса бу нарсани? Уни кимга ҳам ўқита олардим?... Яна поччага олиб бораманми? Вой, хой, Савобар, бу ёққа қара, келинимизнинг дараги чиқибди, деб қолсалар нима бўлади?.. Бу ёқда Чаман акам, у ёқда ўзи тайинлашган: айтмай тур, деб...

Мен ўз ёғимга ўзим қоврулиб ётибман-ку, Ёдгор ҳали тиззамга, ҳали елкамга шаппалаб, бир нарсалар дейди.

— Амаку, қаранг, қарай қолунг?

— Нима дейсан?

Қарасам, қўлида носранг бир халтача. Боғичидан тутиб опти. Кўк духобаданми-ей, латтаданми-ей, чанг босиб, таниб бўлмай кетипти.

— Нима у? И-и, ташла! — дедим бирон нарса илашган бўлса, чақиб олмасин, деб.

— Вуй!..

У жонҳолатда итқитиб юбориб эди, тахмонга шиқирлаб бориб тушди ва чанги тўзиб кетди.

— Ий! — деб юбордим мен ҳам.— Қаттан топдинг?

— Мана, шўттан...

Ҳайрон қолдим. Ҳозир манави дафтарларни олганимда ҳеч нарса йўқ эди-ку. Қай бурчагида ётган экан?

— Ичиданми?

— Ҳа-да. Қаранг, яна бир нарсалар кўринадур, — деди ҳаммадан олдин ўзи ари инига мўралагудек бўлиб.

— Қаний...

Қарасам, эски ари ини бўлаклари. Азбаройи чанг босганидан кулранг нарса пахса рангига кириб кетипти. Арзирли бир нарса топмай ўрнимдан турдим. Болакайнинг хат беркитилган жойдан халтача топиши ғалати эди. Ундан ҳам бурун унинг тахмонга шиқирлаб бориб тушуви гаройиб эди. Ичидаги нима бўлса экан?

Бориб қўлимга олсам, росмана духоба халтача. Нозик қилиб, оғзи сириб, бўғиладиган қилиб тикилган. Бир вақтдаги тилла халтачаларга менгзаб кетади.

Юрагим гурс-гурс уриб кетяпти: ичидаги нарса қуриб, ғози ҳам қолмаган кўринар эди.

Бармоғимни тиқиб оча бошлаб эдим, Ёдгормурод юргургилаб келди:

— Нимукан, амаку?..

Ёруққа солиб қарасам, бир ниманинг уруғи. Гурунч бўлиб гурунч эмас, буғдой бўлиб буғдой... Кўқон жўхоридан ҳам майдароқ бир нарса. Ҳидлаб боқсам, бир ажойиб муаттар ҳид, элас-элас келяпти. Худди халтача бир вақт мушк халта бўлгану... унга уриб қолгандек. Ҳайратга тушмай иложингиз йўқ. Бунга сари Ёдгормурод «нимукан»лаб этагимга осиляпти.

— Шошма, ҳозир... — деб кафтимга ағдарсам... бир кафт (нима денг!!) оҳанрабо! Ўша гурунчи терганда ичидан чиқадиган оҳанрабо дони! Биз уни топганда ёруққа солиб атай томоша қилар ва ҳайратга тушар эдик. Негаки, унга яхшилаб разм солсангиз, одамнинг афти — қошу кўзлари кўриниб кетаверади. Шундай аниқ-таниқки, ҳайрон қоласиз. Эсладим! Кеннойим бизницида турганларида гурунчи патнисимизга ёйиб, оҳанрабосини териб ўтирад әдилар. Топсалар:

— Мақсадхўжа, буну қаранг, — деб бир ерга етар, тополмасалар бир ҳазин ўйларга берилиб

кетар эдилар. Ўшаларни йиғиб юрган эканларми?

— Нимукан?

Мен уни суйиб, құлтиғимга тортдим:

— Зёр нарса топибсан. Буни оҳанрабо дейдилар. Иқболи бор одам топаду буну.

— Берунг-берунг. Күрай?

— Ма, фақат йўқотма. Аянгни кўргани борганимизда олиб борамиз. Хўп?

— Бўпту-бўпту!.. — деб иргишлади у. Шу тоб ташқарига кўзим тушиб, бояги дараҳт учларию битмаган иморатлар тепасида ёлқин кўрмай шошиб қолдим. Осмон ҳам шом олдидан ферузадек бир тиниқ тортиб борар эди.

— Жур энди, қайтдик. Бўлмаса кеч қоламиз.

— Аям айтган жойларига ўтамизму энду? Олмазорга ўтамизму? — деб атрофимда гир айланарди у.

— Ўтамиз-ўтамиз. ўшанқаси кетамиз, — дедим-у, ичимдан қириндига ўтяпти, туролмаяпман: буваларининг юрти-қўрғонидан, Олмазорларидан нима қолдикан? Бу ерда ҳалитдан шунчалик, у ёқларни таниб бўлармикан? Аяси нимага қистади? Кўриб қолсин дебми ё — армон қилиб юрмасин дебми?.. Мақсади нима? Бир нияти бордег-у, бекорга илтимос қилмагандег-у, ҳеч англай олмаётиман. Калламда эса, анув гапи — «бувасининг Олмазорларину, Султонмурод акангизнинг Яккабоғларину кўриб қўйсун» — деганлари. Буваси — тушунарли, аммо акамга нима дахли бор бу шириентойнинг?

— Энди нима қиласа, кетамузми? — дерди у бўйнимга осилиб эркаланиб.

— Кетамиз, — дедим эркалаб. — Аввал анҳор бўйига чиқамиз. Бинафшалар очилган бўлса, терасан. кейин Олмазорга ўтамиз, ўшанақаси...

— Ур-ре, бунафшалар терамуз, Олмазорга ўтамуз!.. — деб сакраб қувнаганча олдинга тушди ва ҳоли-жонимга қўймай қистай бошлади. — Журинг-да, энду...

— Ҳай, кетсак-кетдик, — дея турдим. аммо қўнглим бир тур — қўлимдаги манави битикларни, кенойимнинг хатларини ўқишига шундай суст кетяптики...

Уларни қачон, кимга ўқитаман, ўзим билмайман. Роза қизиқ бўлди-ку, бу ёғи... Уларнинг тарихига етишдим деганда...

Хат гўё қулф-калитланиб қолгандек эди. Балки бошдаёқ атай шундай афсунлаб қўйилгандир? Унинг қалитини топмоқ учун қандай дуолар ўқисам экан? Билсам эди!..

Оллоҳ изн бермаса, ҳеч нарсага эришиб бўлмаслигини эса, ҳали мен билмас эдим...

## 8. БУВАЖОНИСИНИ СОФИНГАН БОЛАКАЙ

ёхуд

кўпларга қоронғу яширин бир сафар

Ўртада олов чирсиллар эди. Унинг қирмизи тиллари гоҳ бир-бири билан ачомлашиб-ўпишиб кетар, гоҳ ҳар ён шоҳ ташлаб, раксга тушаётган лоларанг кўйлакли уйғур қизлариdek жамланиб қоларди-да, яна оловранг қилич кўтариб жиҳодга чиқсан отлиқлардек «урхо» соларди.

Гулхан шунака гуриллаб ёнмоқда, арча шохлари бир ажиб бўй таратмоқда эди. Қай бир ҳўлроқ шохнинг бир чеккаси жизиллар, ҳамма нам ўша ерга тепчиб қайнамоқда эди. Баъзан алангга жунбушга келиб, олов ичига тикиб қўйилган қора қумғонга ёпишиб, дасталаригача қучмоқчи, орасидан ўтиб, ичларига довур мўраламоқчи бўлади. Шунда қумғон сояси кичрайиб, пўстинга ўралиб ғужанак бўлиб ётган боланинг сепкил тошган юзларию дўнг пешонаси кўриниб кетади. У иккала кафтини жуфтлаб, устига юзини қўйганча пишиллаб ухлайди. Ухлайди-ю, шайтони тезроқми, тушида ҳам жим ётмай, бир ғалати жилмайиб қўяётир. Худди бирорни мазах қилгансимон... Юзлари ёйилиб, лаблари қимтилгудек шу жилмайишида бехос

қиқирлаб қулиб юборадигандек...

Унинг ёнгинасида, гулханга яқин жойда улкан ёнгок тўнкасидек бўлиб, елкасига пўстинини ташлаган бир одам, қархисида эса эски қора чопонли, найнов, устига-устак узун сапча бош кимса қўлидаги чўп ила олов титкилаб ўтирипти.

Унисининг қоп-қора сояси харобанинг ярим тош деворио шифтига довур эгаллаган бўлса, бунисидан теракнидай узун соя тушиб, деворга етганда бир, шифтда бир синиб, сўнг чўрт узилган.

Улар қўнган ер эски карвонсарой шекилли, тепа шифти гумбазсимон кўринади. Ўша ёқдан баъзан кўршапалакларнинг шарпасими — нимаси келгандай бўлади. Бошқа тиқ этган товуш йўқ. Ҳали чирилдоқлар уйғонишмаган: кириб кетган ковакларида тўнг қотиб ётишипти.

Лекин тун қароқчиси бойўғли сергак экан, гулхан ёқилгандаёқ учиб кетиб эди. Шундан бери хароба атрофида айланиб ҳалак. Ҳали у ёнидан, ҳали бу ёнидан учиб ўтиб, бир ерларга қўнадида, хунукдан-хунук, совуқдан-совуқ сайраб қўяди.

Ҳозир ҳам ўпирилиб тушган эшикка яқин жойда сайраб юбордию кираверишдаги отлар хуркиб кетиб, қай бири ўзини орқага ташлаб, қай бири пишқириб, тизгинни узгудек бўлди. Иккаласи ҳам қулоқларини динг қилиб, ем халталарини бошларига илиб, қочгудек ҳолга тушган эдилар.

— Др-р, жониворлар, ўтакангиз ёрилмасин, — деб ўрнидан турди дароз одам. — Унинг сояси ўзидан узун, шифт ўртасига етгудек эди. — Бир кечалик меҳмонмиз, денглар — тинчийди, — деб уларни тинчлан-тиришга уринди. Сал ўтмай улар емтўрваларига андармон бўлиб, яна кусур-кусур дон чайнашга тушдилар.

— Ҳа, бу бошқа гап. Бир кечага шунча айоҳанносми? — деб қайтарди у.

Бу орада қумғон шакирлаб чиқиб, ўз ашуласини бошлади. Тўкилган сув жизиллади.

— Кийик ўтингдан борми? — деди «улкан тўнка»га овоз битиб. У қумғонни бандидан ушлаб, оловдан четга сурмоқчи эди, қўли куйиб, илкис силкиди: — Ҳўв, зангар, чиппа олди-я! — деб сўқинди. Пўстини елкасидан сирғалиб тушиб, орқасидаги баҳайбат соя ҳам «кулади». Боланинг ғужанак оёқларига довур кўринди. У ҳийла бўйчангина эди, роса чарчаган шекилли, қилт этмай пишиллаб ухляяпти. Қўли куйган кимса пўстинсиз ҳам ҳайбатли, елкалари кенг-кенг, яғриндор эди.

У жон аччиғида қўлига туф-туфлаб эди:

— Ҳа, ўлманг, энди топдиз, aka почча, куйганнинг давоси туфук. Яхшилаб туфуклай беринг, — деди шериги унинг жонига ора кирмоқчи бўлиб.

— Кўп маҳмаданалик қилмай, айтганни бил! Чойни дамлаб, дастурхонни ёзсанг-чи, — деди жеркиб, aka почча деганлари. — Корин пиёзди пўсти бўп ётибди-ю, бойўғлидек сайрашингни қара.

— Хўп, дедик-ку, aka почча, бир оғиз сўзиз. — Найнов чаққон туриб, хуржундан бир нималар ола бошлади. Сўнг белбоғи билан қумғонни ушлаб, оловдан сурди. Ҳамон шакирлаши тинмаган сувга бир чимдим кийик ўти ташлаб:

— Ана, aka почча, чой ҳам гатоп. Энди очилдастурхонди ёзиб юборсак, қази-қарталарни кесиб ташласак, Сиз Худоёрхон — биз Пусулмонқул-да, — деб хуржунни титкиламоққа унналди.

— Пусулмонқулингга бало борми? Ким ўзи? — деди ҳайбатлав кимса куйган қўлини ҳали этигининг қўнжига, ҳали енгига суйкаб.

— Ия, aka почча, Сизни ким ўратепали дейди, Пусулмонқулни билмасангиз. Кимни юртидан ўтиб боратурган эканмиз? У шу қипчоқ элатидан-да. Ҳўб туллагу бир довюрак одам. Куёвининг номидан қанча вақт юрт сўраган, — деди дароз шериги ёруғ ерга дастурхон ёза бошлаб. — Қамчисидан қон томиб, қиличидан...

— Ҳар қанча қиличи қонсираган бўлсин, бир қипчоққа бериб қўядими тахтни? Фурур қани,

хон деган номи қани?! Ким экан у қўғирчоқ хон?

— Тахтни топшириб қўймагандир-у, лекин қайнота қайнота-да, ака почча.

— Хонга бошқа қиз қуриган эканми? Юрт тўла қизлар сочини тараб ўтиrsaю бу кишим аллақандай қипчоққа... — Куйган қўлнинг алами тарқамасдими, ҳеч ҳовридан тушолмасди у.

— Вой, ака почча-ей, хўб ғалати гапларни айтасиз-да... Худоёрхонни ким хон қўтариби?! Бола ёшида ўзи қўтарган-ку. Кейин қизини бериб, қайнота ҳам бўлиб олган-да, у маккор. Кейин эса ҳаддидан ошиб, адабчасини ҳам еган.

— Ана, мен нима дедим. Ебди-ку, адабчасини! — деди ҳайбатлув кимса тушиб кетган пўстинни ўтирган қўйи қайта елкасига тортиб. — Хўп, нима бўп тумшуғидан илинибди? — Бу тарихга энди у қизиқа бошлаган эди.

— Ўрис билан тил топишиб қўйган экан, хон айтганига юрмайвергач...

— Тахт ўлсин-а, ширин бўлмай. Худо урмаса, кофирга қучоқ очадими? Адаштирса шу-да. Хўш, кейин-чи?

— Кейин нима бўларди?! Хон ҳам сассик чолдан қутулолмай турган экан, тарафдорлар топиб қипчоқ-қирғиз қирғинига фатво бервorgан-да, тутганин сўйишган, — деди у бўйнига қўлинни тортиб кўрсатиб. — Оқибатда қанча бегуноҳ...

— Пусулмонқулинг-чи, қочиб юборолмабдими?

— Нега қочмаскан?! Сичқонни инини минг тангага олиб қочган-у, бўлмаган-да. Тутиб келиб темир қафасга солиб, ўрда олдига осиб қўйибдилар. Ўша ўтиришида ҳам, — деди у чойни шопириб-шопириб қайтариб, — томошага келган халқ «Ҳа, холинг қалай, чўлоқ?», деса, паст тушмай «Алҳамдулиллоҳ, ҳали ҳам сизлардан юқори бир ерда ўлтирибман», деб кулар эмиш.

— Хўб ажаб чапани экан-ку? — деди ҳайбатлув ҳайратга тушиб. — Дор тагида туриб-а? Юракданми берган экан.

— Чойга қаранг, — деди шериги чой узатиб. — Илож қанча! Омон қўймасликларини билгач, киши ботир бўлиб кетса керак-да.

От пишқирди, сўнг тезаклаб, думини силкиб-силкиб қўйди, ўша ёқдан изғирин эсиб, гулхан гуриллади ва шу баробар янги тезак ҳидини анқитиб ўтди.

— Жазоси ҳам гуноҳига яраша бўлгандир? — деди ҳайбатлув лочира нонни кусурлатиб.

— Ўша тил бириктирган оғзига қўрғошин қуйган эканлар.

— Ҳов-в, — деди ҳайбатлув кимса, — шунақа жазолариям бор эканми?

— Ўша пайтда-да, ака почча.

Бола уйқусираб тамшанди. Совуксираб, оёгини йифиб, ғужанак бўлиб олди. Елкасига пўстин ташлаган ҳайбатлув кимса унга ўғирилиб қараб қўйди.

— Ҳозирам... аямасалар керак?...

Дароз шериги илкис қараб, тек қотди: дамлаётганчойи чойда, пиёласи қўлида қолди:

— Нимани... айтасиз?

— Бу тарз юришларимизни-да.

— Қандай? Тушунмадим.

— Худо асрасин-у, кўлга тушсак дейман-да. Қанча беришаркин, Худойберди? — Ҳайбатлув киши дастурхондан яна бир бурда лочира ушатиб олиб, оғзига солди. Лочира кусирлар эди.

Чойпаз ўзига келиб-келолмай қўлидаги чойни қумғонга қайтарди.

— Нафасиззи ел олсин, ака почча. Бу ўша тарз ишлардан эканми?..

— Фарқи нима?

— Маҳоват қилдиз-да, тоза.

— Шошма сен. Бу ҳам тил бириктирувми?

— Бириктирув.

— Жиндек таъма аралашган жойлари ҳам бор-а?

Дароз шериги эътиroz билдиrmоқчи эди, ҳайбатлув уни кесди:

— Хўп, деявер!

— Ҳай, жиндек ширикомаю ваъдалар бор дейлик. Дараги топилган хешлар учун...

— Бу юришимиз-чи, ҳуфия йўллар излаб? Довону сарҳад ошамиз деб?

У елка учирди:

— Ҳа, шусиз у диёрга ўтиб бўлмаса, сўзни устидан чиқиб бўлмаса...

— Яна нима дейсан?

— Лекин ният-чи, ака почча? Ниятга қарамайсизми? Айтдим-ку: замонни зайди билан ўша кишимининг бир ишлари тушиб қопти. Тирноқларини излашаётган экан... Ётардингиз-да, ўша Жангобнинг чойхонасида чилимни қулдиратиб!

— Ётардим, гаштига нима етсин эди. Мана бундай мажхул ишларга аралашиб юрмай.

— Ишши битириб, яна ётаверасиз, — деб кулди йўлдоши. Сўнг чой қуйиб узатди.

— Фарқи нима? — тўнғиллади у.

— Фарқи... ҳар куни ош, қази-қарта, норин... Кўнгил тусаганини буюрасиз. Ўзингиз хон — кўланкангиз майдон. Яна нима керак Сизга? Қолаверса, сўзимни ерга ташламай келяпсиз.

— Ҳа, баракалла, биларкансан-ку. Сендан бўлакка ўлсам кўнмасдим.

— Қадрдонлик шу-да, ака. У дунё-бу дунё унутмайман.

— Бахайр. Ишқилиб, шу жинқарчани эсон-омон бувасига етказиб борсак бўлганими? — Ака почча чойни бир четга қўйиб, қазидан тотинди. — Аммо-лекин манавинг бу дунёниг қазиси бўлмапти! Им-м... чайнаган саринг элитади-ку, одамни!

— Тойники-да, ака почча. Олаверинг, ош бўлсин. Таги кўп, ғамлаганман жуда,— деди у мақтовдан эшилиб.

Бола кунишиб қимиirlади. Кейин гулханга ўгирилиб ётиб олди. Ака почча унга елкаси оша қараб қўйди:

— Бирон нарса... тамадди қилиб олса бўларди бунинг?..

— Сал тиникиб олсин. Очқаса, ўзи уйғонади, — деди Худойберди. — Йўл қоқкан-да.

Қай бир от оёгини кериб, вошиллатиб бўшаниб юборди. Наригиси пишқириб, бетоқатланди. Узокда ҳақку сайрамоққа бошлади. Ва яна тинчлик чўқди. Ёлғиз гулхангина беҳол ёниб, унинг тиллари ҳам мудраб-мудраб кетарди. Бола яна тамшанди.

— «Очликни ёстиқ қўтаради»мас-да. Уйғотсанг бўларди, — деди кўнгли бўлмай ҳайбатлув.

— Савол халтаси очилиб кетса, уришиб юрмайсизми? Кўрдингиз-ку, куни билан, — деди шериги тамаддига қўшилиб. — Ўлай агар, «Ўзи бир қарич, соқоли қирқ қарич»лардан қати кам?!

— Охирзамоннинг зумрашалари-да, — деб ишшайиб қўйди ака почча. — Рухи қари буларнинг.

— Йўқ, зуваласида бир нима бор. Буваси бекорга қидирмайди.

— Юзида нур кўргандай қўпирасан-а, Худойберди. Сал пастроқ туш, сепкилини кўр.

— Сепкил қўтарилиб кетадиган нарса, ака почча. Қолаверса, бунинг буваси зўр одам, унақа ҳимматли кишини сиз учратмагансиз.

— Кўрармиз ҳимматини ҳам. Чойдан қуй, бу дунёни бўлмапти.

— Қумғонда пишган-да, ака почча. Ҳар куни ичиб юрибсизми?

— Қолса, шу қолади хотира бўлиб, бу юришлар-дан.

— Гулханни, мана бу ўтиришларимиз, тоғу тош ошиб юришларимизни айтасиз-да!— деди бешикчи узун эснаб. Яна ҳақку уйғонди, шеригини чорлаб нола қилди. Сойнинг нариги бетидами, тоғдами — бошқаси садо берди. Иккаласи галма-гал «қув-қув»лай бошладилар.

Бола ётган жойида тамшаниб туриб, уйқусираганча, аниқ-таниқ гапириб юборди:

— Чаман тоғам келсинла — кўрасан!

— Ол-а! — деди бешикчи, мудраб бораётган жойи-да бир сакраб тушиб.

— Эшитдинг-а? — деб қўйди ака почча ҳам у томонга бош иргаб.

— Алаҳсираяпти-да, амакиси, — деди у пинак бузмоқчимасдек. Лекин ўзи жумбоқ ичида қолган эди: «Чаман дегани ким экан?..»

— Танийсанми? — деди ака почча ҳузурланиб чой хўплаб.

— Биринчи эшитишм, — деди бешикчи.

От бош тўлғай-тўлғай пишқирди. Ака почча ўша ёққа хаёли қочиб, деди:

— Бошидан тўрвасини чиқариб қўйсанг бўларди. Кусар этибам даъво қилаверади.

Шериги туриб отлар томон юрди. Унинг узун соя-си хароба деворига қапишиб бориб, ўша томоннинг живир-живирига қўшилиб кетди. «Тис-тис»лаб сўкингани, сўнг отнинг сағрисига шапатилаб, эркалагани эшитилди. Аллақанча вақт отлар биланми, яна нималар билан андармон бўлиб, йўқ бўлиб кетди. Қайтиб келиб, бир чеккада қўлини чайди-да, тик турганча белбоғига артина бошлади.

— Шунаққиб, эшитмаганман, дегин?

У тилини «тоқиллатиб» эди, тунги жимжитликда жангиллаб кетди. Бола бошини ўнглаб ётиб олди-ю, уйғонмади.

— Ё биз хато эшитдикми?

Бешикчи боя ўзи ўтирган тош устига чўкиб, чой қуя бошлади:

— Бола бир уйқусиради-қўйди-да... Амакиси бўл-ганда нима, бўлмагандан нима?..

— Сен айтасан-да. Мен бир маҳал ўша Жангобда эшитгандайман. Отасиням танимайдиган безорилар даврасида. Ҳеч нарсадан тоймасди улар. Кейин йўқ бўп кетди бир сира, қамалиб кетдими, отилиб кетдими — билмадим.

Бешикчи чой хўплаб туриб, қалқиб кетди. Сўнг ўзини базур босиб, кулди:

— Хўб, ваҳима қилдизми, ака почча?

Ака почча деганлари норозиланиб қаради. Гулханга чўп ташлаб, деди:

— Сен нимани биласан! Бу машру ўғриларнинг қонуни ёмон! Ҳазиллашиб бўлмайди.

— Нима, биз уларга тегишли нарсага қўл чўзибмизми, чўчиймиз? Биз савоб учун боряпмиз. Мирзаҳожи бувани деб. Болапақирни авраб опқочганлар жавобини беравурсин. Ҳақларини қурутдай санаб олишган.

Ака почча «от тиши»ларини кўрсатиб сассиз кулди:

— У томонларга қайтиб бормайдигандек гапирансан-а.

— Қаёққа-қаёққа?

— Эски Жўвага-да.

— Қайтсак нима бўпти? — англамагандай қаради бешикчи.

— Кося косяга тўғри келганда ҳам шу қўшиғингни айтармикансан?

— Нафасингизни ел олсин. Кўп совуқ нафас қилдингиз-да, бугун, — деб у қўзголиб қўйди.

Чойнинг тагини сепиб ташлаб, бунга қаради, — қўяйми ўзларига?

— Қуй, жуда ютимли бўпти. Нима бало, кўзни шамғалат қилиб қўкноридан зифирча ташлаворғанмисан?

— Қўкнор отликка йўқ-ку, ака почча, кийик ўт шунака бўлади. Ичган сари чанқатвуради.

Ҳеч ким кутмаганида бола бошини кўтариб, туриб ўтириди. Юз-қўзларини ишқаб, эснади-да, лахча чўғ бўлиб тушган оловнинг ҳолсиз-ҳолсиз аллангаланиб қўйишига эси оғиб тикилди. Сўнг бир жунжикиб, тиззаларини қучиб олди. Қўйиб берса, яна ётиб ухлайдиган.

— Калла пишдими, — деди ака почча ўгирилиб.

— Ётақол бўлмаса, Ёдгортой, — деди бешикчи меҳрибончилиги тутиб, — биратўла тиниқиб оласан.

— Қорни-чи, бунинг? Ё болани нафси йўқми? Ғалати экансан-ку, сен!.. — Уни жеркиб бериб, боланинг бошини силади ака почча деганлари. — Тура қол, тойбола. Юзингни чайиб келсанг, тамадди қилиб оласан. Очқаб кетгандирсан, ахир!

Бола жавоб ўрнига ҳам узун эснади.

— Ҳа, ана, қулдираб-чулдираётган ичакларингдан маълум. Даструрхонни қўриб, ноғора чаляпти. Тур, боланинг қўлига сув бер, — деди у чап елкасидан сирғалиб тушиб бораётган пўстинни ўнглаб.

— Сувми? Ёдортойгами? У юзини юваман дейдию биз қараб турамизми? — деди бешикчи қошдан қовоқ қайтармай.

Бола ювиниб, узун амакининг белбоғига артиниб, жойига қайтди. Унгача ака почча унинг жойини оловга яқин суриб, гулханга ўтин ташлаган бўлди. Келгач, даструрхонни яқин сурди.

— Ол, манави қазилардан. Нонга қўшиб олавер.

Униси чой қуйиб тиқишитирди:

— Ичиб боқинг-чи, той бола, совуб қолмабдими? Йўқ десангиз, қайтадан оловга кўйворамиз.

Бола ҳамон ярим уйқусираб кавшанар, ака почча унга раҳми келиб тикиларди. Нималар хаёлидан кечади, ўзига аён, лекин шеригига яниброк қараб қўярди.

— Болапақирни йўл қоқиб қўйибди. Сенга айтувдим-а, эгарга бир нима тўшатиб ол, деб.

— Девдингиз-девдингиз. Шошганда саломга алик топилмай... сурорибмиз-да.

— Қазини унутмабсан-ку? Яна «Ёдортой»лаганинг-га ўлайми!

— Узр, биздан ўтибди, ака почча. — У қўлини кўксига қўйди.

— Менданмас, бундан сўра...

— Сўрайман ҳам... — деди у ўша-ўша таъзимда, — укам кечиради.

— Кечирасанми? — деди ака почча азза-базза қуракларини силаб.

Бола кавшанишдан тўхтаб, бешикчининг бетига ижирғаниброк тикилди. Сўнг қўлини чойга узатди:

— Бу киши аввал ростуни айтсинла...

— Ниманинг ростини? Мен нимани яширибман? Вой, хуварининг боласи-ей, одамни тоза хижолатга қўйдинг-ку. — Бешикчи чиндан ўзини қўярга жой тополмай қолганди.

— Бўмаса, қаёққа опкетаётибсила? — чойни ичмай ҳам, аразлагандек қараб қўйди у. — Сотганими?

Томдан тараша тушгандек бу гапдан ҳамроҳлар бир-бировларига қараб олишди.

— Сен қаттан олдинг бу гапни? — деди бешикчи, ахийри тилига забон битиб.

— Дувана ҳам силаминан шерикми, ахир? — деди бола ҳамон аразидан тушмай.

— Қанақа дувана, Худойберди? Кимни айтопти бу? — деди «ака почча» деганлари анг-танг қолиб.

Бешикчи тушунтиришга ўнғайсизланиб, ўрнашиброк ўтиришга уринди.

— Ҳали мендан яширган гапларинг ҳам бормиди? — деди «ака почча» азза-базза хафа бўлиб. У жаҳл устида пиёла тагида қолган чойни сепиб эди, у гулхан четига юмалаган чўғга тушиб, вошиллади, ундан писта кўмир ҳиди анқиб кетди. Бешикчи хокисор термулди:

— Ўлибман-да, ака почча, намозхон одам...

— Унда бу гап қаерда чикопти? Дуванаси ким?

Бешикчи — содда-тўпори одам, боланинг олдида минг хижолатларга ботиб, (очмаса бўлмайди, очса — бола бор) ўнғайсизлана-ўнғайсизлана сирни очишга мажбур бўлди:

— Танийсиз Сиз ҳам... Анув Каллахонага танда қўйган сариқ мошак бор-ку, Давангир девона?..

— Тиланчими?.. Унинг бу ишга нима дахли бор? Фирт савдоий-ку, — деди энсаси қотиб у.

— Шунақа, бир қарасангиз савдоий, бир қарасангиз дуогўй. Тингчими, тўғри одамми — бирор билса ўлсин агар, — деди бешикчи, — биз таниганимиздан бери шу юриши.

— Биларкансан, нима қилиб ош-қатиқ бўлиб юрибсан?

— Қайдаги гапларни гапирасиз, ака почча? Мен уни кейин билдим-ку, — деди бешикчи ҳам ўз навбатида гинахонликка тушиб.

— Шерик деб турибди-ку, бу? — Ака почча ўз гинасидан қолмасди.

— Мен Туроб махсумни биламан. Бу ўша кишимни илтимослари. Сиз Мирзаҳожимдан кўп яхшилик кўрган одамсиз, Худойберди, шу хатминан манави омонатни у кишимга етказсангиз, дедилар. Мен Сизга ишондим, энди йўл биладиган одам топинг, дедилар. Мен Сизга учрадим. Бу ёқларга киши билмас қатнаганингизни эшитиб, ака почча.

— Давангир-чи? Ўртада у нима қилиб юрипти? — Ака почча деганлари ҳамон бўшашмасди.

Бешикчи елка қисди:

— У болани қайдан топган, қайдан эргаштирган, қанчага келишган — ўзи билади. Ўғирлаб-мўғирлаган бўлса, гунохи ўзига. Мен фийсабилло, азбаройи Мирзаҳожим учун, рози бўлганман. Мени биласиз-ку, ака почча, бир умр ҳаром луқмадан ҳазар қилиб юрган одам, наҳот шу ишга кўнсан? Учини сезсан, айтмасмидим.

Ака почча тагидаги эгарга ўрнашиброқ ўтириб, тиззаларини уқалади. Япасқи юзидан жаҳл сояси аригандай эди.

— Эшиттинг? — деди болага қийғоч ҳам эркалаганнамо қараб. — Биз девона билан офтобда қатиқ ялашган жойимиз йўқ. Биз пийсабилло бувангни юртига кетаётимиз. Ширинкома учун ҳаммас. Шунчаки, ман манави бешикчи тофантга қайишиб, у бувангни танигани ҳурматидан. Қолаверса, бувант замонни зайлар билан бу ёқларга кўчиб келиб қолган. Асли таги ўша ўзимиззи томондан, ха. Чўлпон отаданми, қаердан эди, Худойберди?

— Йўқ, ака почча, Қанғли деган жойдан. Яқин-яқингача ҳам у кишидан қолган Олмазор боғ дала шийпони қилиб қўйилиб эди. Жаннатнинг бир бўла-ги эди, бамисоли. Агар манави ер қимирлашдан кейин бузилиб кетмаган бўлса... — деди бешикчи ширин хотираға берилиб. — Вой, унинг ғир-ғир шабадалари...

— Шунаقا, ўғлим, сен бизни ким деб ўтирибсан. Қароқчиларга менгзамай қўяқол. Уларга рўпарайм бўлма, ишинг ҳам тушмасин. Ундан кўра, қоринни михла. Қазидан ол. Оч қориндан пуч ўйлар чиқаверади, ол.

— Бўмаса, кимсила? — деб тўнғиллади бола чойни жойига қўйиб. У оғзидағини қавшангиси ҳам келмай қолган эди.

Икки ҳамроҳ бу гапдан бараварига хаҳолаб кулиб юбордилар. Тарашадек озгин, аммо бўйдан Худо берган бешикчи унинг гапидан таъсирланиб, тиззасига шапатиларди:

— Аввалбошда нима дедим? Буванг соғинибдилар. Сенам соғиндингми, дедимми?

— Дедиз...

— Борасанми, дедимми?

— Дедиз...

— Яна нима дейсан? Қаёққа опкетяпган эканмиз? — деди кулиб.

— Бекордан-бекоргами?.. — Бола ўқрайиб қараб қўйди.

— У нима деганинг? Сен бизни хафа қиляпсан. — У кераги бўлмаса-да, олдидағи қумғонни нари сурди.— Шунаقا гапларинг боракан, жўнамасимиздан айт-майсанми? Оббориб ташлардик уйингга!

— Жа-де... — Бола ё ёмон туш кўриб турган, ё чапақай жаҳли чиққан эди, ҳеч очила қолмасди.

— Ҳа, хўп. Буванг қуруқ қўймас. Неча йил бедарак кетган қизининг дарагини эшитиб, тирноғини қўриб, эшилиб кетар, бош-оёқ сарупо-суруклар қилар, ширинкомалар берар. Бу дегани биз ўшанинг дардида ўлиб турибмиз, деганимасдир? Ўйлама, биз таъма деб юрган одамлармасмиз. Холис яхшилик учун чиққанмиз йўлга. Бунақа қиласверсанг, ҳай деймизу орқага қайтвора қоламиз. — Тик турганча мудраётган от хўрсинган каби пишқириб, бош силкиди. Лахча чўғга айланиб бўлган ғўлача синиб тушиб, чаласи тутай бошлади. Ака почча чалани ичкарироқ сурди:

— Кўнглим чопмовди-я, аввалбошда. Жангобда ошхўрлигимни қили-иб ётмийманми... —

деб қўйди уларнинг бетига қарамай.

— Йўқ, рост, ҳалим кеч эмас, — деди бешикчи болакайга. Камига хўп деса ҳозироқ қайтадигандек қилиб қараб қўйди.

— Сен энди жичча сабр эт. Шу довондан ошволсак етдик ҳисоб. Бовангнида қолишни истамасанг, қайтаверасан бизминан. Шунга ҳам ота гўри қозихонами? — деди шериги юмшаб.

— Ҳа-да, ака почча билмаган-кўрмаган, ошмаган довон йўқ. Бу ёқка ҳам Худо билсин, неча қайта келиб-кетганлар.

— Неча қайтамас, ишқилиб ўтганмиз-да, — деди у.

— Шу-да. Шунинг учун Сизни қора тортиб келяппиз-да. Билиб қўйсин бу ҳам, — деди бешикчи таскин бериб. — Билдинг-а, Ёдортой?

Ёдгор деганлари бешикчига қизаринқираф қараб қўйди:

— Ёдормас, Ёдормурод. Бўлмаса, танишмайди, — деди негадир кўзларини олиб қочиб.

— Ия, шунакамиди ҳали?! Чиройлувдан чиройлув отинг боракан-у, биз билмай юрибмиз. Вой, санию. Айтмайсанми шуни! Оббо, той бола-ей. Опке пиё-лангни, чойингни янгилаб берай. Қайноқ-қайноқ ичсанг, уйқунг қочади. Ҳадемай, тонг ҳам ёришади, сўнг жўнаймиз. Олақол, — деди бешикчи кафтини кафтига ишқаб, уни эркалаб.

— Ҳа, амакинг таҳорат олиб, намоз ўқиб бўлиши-ла жўнаймиз. Кун кўрингунча, сарҳаддан ўтиб олишимиз керак, — дея оғир кўзғолиб, «ака почча» деганлари тура бошлади.

У шунаقا давангирдай эдими ёки елкасидаги бе-сўнақай пўстин шунаقا кўрсатяптиими, ишқилиб соя-сига қўшилиб, у жуда ҳайбатлув кўринар эди.

Гулхан эса бир тогора лахча чўфга айланиб алангала нар, алана беролмаганлари бир четдан бошига кул тортиб, пинакка кетмоқда эдилар. Тун ўз ишини қилган, гулхан атрофидагиларни қора чодирига ўраб бўл-ган, ўша чодир тобора кичкина тортиб, энди унга уч кишининг ўзи ҳам сифмай қола бошлаган эди.

Ҳақку ҳам, отлар ҳам мизғир эдилар, чамаси. Тиқ этган товуш эшитилмасди, фақат гоҳ-гоҳ анув ўпирилган жойдан кирган изғирин ел шу чодирдагиларга урилиб, яна қочиб қолар эди.

## 9. ХУДОНИНГ СУЙГАН БАНДАСИ ёхуд ҳикоячимизга номаълум бир калаванинг учи

— Ҳов, тасқара, ҳов сариқ мошак! Кимни гел қилмоқчисан? Кимни сариқ илондек авраяпсан?.. — У секин туриб белидаги қайиш камарини билагига ўрай бошлаб эди, эланиб турган девдай одам... туйкус ўзини ерга отиб, оёқлари остига гуноҳкор шердай эмаклаб кела бошласа, Зокир демаганларнинг жон-пони чиқиб кетди. Жон ҳолатда тисарилиб, устолига қисилиб опти.

У эса:

— Жон болам, садағанг кетай болам, урма пақат, тепма пақат, ҳаммасини ўзим айтуб берум... — деб ўтинар, титрар эди.

Во дариф, титраяпган ким-у, ўтакаси ёрилган ким?!

— Тур-е, исқирт! Аяганга раҳматинг шуми?! — Зокирнинг пешонасидан муздек тер чиқиб, тирноқларига довур жимирлаб кетган эди.

Хайрият, «дев» чекилди.

Ўлган арслоннинг ўлигидан ҳам кўрк, деб шуни айтарканлар-да?..

Улар бугун шубҳаланиб тутиб келишган одам — девдай тиланчи чекилишга чекилди-ю, ҳеч кутилмагандек ўша заҳ ерга ўтирволиб, тиззаларини қучоқлаб, бир ғалати гувраниб, хўнг-хўнг ийғламоққа тушиб берди-ку.

Ажаб одам экан, бу Давонгир девона деганлари. Нима бало, чини билан бегуноҳми ё

ёлғондакам йифи билан буларнинг қўзини боғлаяптими? Мумкин. Бу бозор одамларидан, тиланчилардан ҳар балони кутса бўлади.

У «дев» шу ҳолига қайси аскар ёки асирдан қолган рўдапо шинелининг енгини юз-кўзларига босганча улкан жигарранг бешиктерватдек чайқалиб:

— Шул шўришлар-да, вар эканму, эй қудай? — дея бош тўлғаб-тўлғаб, мишиғ-тупугига беланиб борар эди.

«Нима бало, адашибдиларми? Бу эмасканми?»

Зокир камарини устол устига намойишкорона итқитиб, тиланчига киши билмас зингил ташлади. Унинг назарида девонанинг қулоғи динг, кўзи тўрт, бунинг алаҳсишини кутаётгандек, кутиб туриб ташланиб қоладигандек (!) эди.

Ташланса ҳам унақа-бунақа одамнинг кекирдагини узиб олса эҳтимол?.. Оч девнинг ўзи-ку! Бу ваҳима қайдан илашди, Зокирнинг калласидан ҳеч нари кетмасди. Шериги ҳам қайтса қайта қолмади. Ҳарна кора эди.

— Туринг, захда нима бор, «эшак»ка ўтиб ўтириング,— деб буюриб, муросага кўчганини билдириди-да. ўзи ҳам жойига чўка қолди.

Зора яхши гапга илон инидан чиқса. Шунақа илинж ҳам йўқ эмасди унда.

Девона унга қараб ҳам қўймай, қўлига тиралиб туришга унналди. Суяклари шикирлаб (ўзиям бир қоп суяқ экан-ей!) бир амаллаб турди-да, кетини қоқиб, индамай бориб, девор тагидаги тахтага ўтириди.

Боя икки кишилашиб уриб, ертўлага тиққанларида узилиб-учиб битганми, қўсқи шинелининг биттаям тугмаси қолмаган, сурмаранг ёлғиз белбоғи демаса, қўкси валонгор, ўзи бир алпозда эди.

— Хўш, ростига кўчамизми ё яна келган жойидан давом эттирамизми? — деди Зокир қайиш камарни нари суриб. Ўзи ургиси йўғ-у, қозоқи дўқ иш берадими, деб ўйлар эди.

— Ҳуҳ-ҳ, — деди девона ичидан дуди чиқиб: у чиқаётган дуд одам зотиники эмасди, тавба.

— Хўш, айтасизми? — деди Зокир кўксини ус-толга бериб. У Худонинг яратилганча қолган бу бандасига ачина бошлаган, ачинаётганига ўзи ҳам ҳайрон эди:

«Нимадан қўрқди? Девонанинг қарғишига учраб қолишданми? Балки».

Девона ўша-ўша, бирон ножӯя сўз айтиб қўйиб, ғазабига учраб қолишдан қўрққандек, афтига безиллаб тикилар эди.

— Нену истаб, нену қистаюрсиз — вилмасам, — деди ахийри тилига сўз битиб, — ўлумдан хаварим вар, ўғирлува — вилмасам, гуноҳларимуз етарлу...

Зокир қаддини бироз кўтариб, оёқларини чалиштириди. Бу билан у девонани яна ҳам хотиржам этиш ниятида эди.

Ўзи ҳам ҳеч кутмаганда сўроқни хотиржам бошлагиси келди.

— Биз Сизни бугун кўраётганимиз йўқ. Эсимизни танибмизки, шу Каллахонадасиз, тўғрими?

Девона унинг самимийлигига ишониб-ишонмай қаради.

— Туври, — деди кўзини олиб қочиб.

— Тилингиздан Оллоҳнинг номи тушмайди ё тушганми ҳеч?

— Йув-йув, — деди баттар ҳайратланиб девона.

— Оллоҳни ўртага қўйиб, кун қўриб юрган одамсиз.

— Шу-шу, — дея олди у.

— Энди менга ростиззи айтинг. Оллоҳдан умидингиз борми? — деди Зокир бошдаги шапкасини бир четга олиб қўйиб. — Мўминга ўхшаб гаплашайлик бир...

— Вар, балам, вар, — деди девона ўнғайсиз ғимирсиб.

— Намоз ҳам ўқирсиз?

— Ўқувмиз, балам, ўқувмиз. Ўқумай бўлами, — деди у оқ-қўнғир қошлари тагидан қараб

кўйиб, — аввал сўраладуғану шу-йу.

— Демак, мусулмонсиз, мусулмонликка даъво қиласиз?

— Алҳамдулилаҳ-чу.

— Оллоҳдан ҳам қўрқасиз, шундайми?

Девона гап нимага келиб тақалаётганини англаб қолиб, қоқсуяк тиззаларига тикилиб қолди.

— Нега индамайсиз? Кўрқмайсизми ё? — Зокир унинг жон жойидан ушлагандек, устолга кўкрагини берди. — Гапиринг.

— Кўрқмайдурган жан... варму? Ғимиirlаган жан қудай дейду, — деди у тамоман руҳи тушиб.

Зокир қаддини кўтарди:

— Қимиirlаган жон Оллоҳ деса, нечук сиз бу ишларга аралашиб юрибсиз? Охиратиз куйиб кетади-ку.

Девона рўбарўсидаги одамга анграйиб тикилди, шу боя ўзини бозордан тутиб, сургаб-нетиб келган, уриб-суреб ertўлага тиққанлардан битасими? У қизариб-нетиб кетган шилпиқ кўзларини юмиб-очди. Йўқ, ўша эди, ўшалардан биттаси эди. Қайиш камари ҳам устол устида ётарди.

Қара-я, қайиш камарни кўрган заҳоти ўнг елкаси, бояги тўқа излари ачиша бошлади. Шуми, бошқасими, ишқилиб урганлари аниқ. Урмасалар бунақа ачишмас эди. Тавба, ўша одам энди тамоми сипо тортиб, Оллоҳни, охиратни ёдига солияптими? Аммо жон жойидан ушлади. Ким Яратганинг ғазабидан қўрқмас экан?! Тонгла маҳшарда фаришталари унинг амри-ла пешона сочидан чангллаб, жаҳаннамга судраб кетишлиридан қўрқмай бўларканми? Ҳали ўзи билиб-билимай гуноҳ ишларга аралашиб қолибдими? Кўзи қаёқда экан?

— Хўш, гуноҳизга икрормисиз? — деди терговчи унинг хаёлидан кечиб боратурган нарсаларни уқиб олгандек. Нима бало, буларни шунақа ўқишиларга ўқитади эканми?

— Энди-и, ниму туври, шу туври, — деди бўшашиб, — иттимас қилишуб эду.

— Ҳа-а, ана бу бошқа гап, — деди терговчи жонланиб. У кафтларини ишқаб ўрнидан туриб олгиси келди-ю, яна ўзини босди. Байрам қилишга ҳали эрта эди. — Ким экан ўша илтимосчилар? Ўшалардан келинг, — деди девонани чўчитиб юборишдан анча ти-йилиб. — Сизни хизматиз нимадан иборат эди?

Давонгир девона милиса зотидан бундай юмшоқ муомалани кутмаган эди, жавобга иккиланиб қолди: ҳали сиз-сизлаб туриб, ҳамма гапни суғуриб олгач, қилигини кўрсатмаса эди! Ишини судга чиқариб юбориб? Ишониб бўладими буларга!

— Хўш, нимани ўйланиб қодингиз? Бизга ўша иш буюрганлар керак. Сизга ўхшаб алданганлар эмас, — деди ётиғи билан.

— Илданган? — деди девона ҳайрон қолиб.

— Ҳа-да. Сизни чоҳга юборишаётганини билмагансиз-ку, тўғрими?

— Нима, мен бикар варибманму? — деди девона.

— Тушунмадим.

Жавобдан жавобга боши тушиб, терговчининг бетига қарай олмаётган девона кўз қирини ташлаб қўй-ди:

— Несига чучунмайсуз?! Нарса ваъда қилишту, вардим. Мену ўрнумда ким вармасду!

Зокирнинг юраги ҳаприқиб, ўша нарсани билишга ўпкаси тушаёзди. Аммо энди шу девонанинг кўз ўнгига тубан кетиб бўлмасди. Ўпкасини босди:

— Маълум гап. Аввал бир нарса тикишади, кейин одам ёллашади. Шунда Сиз учрагансиз, тўғрими?

— Йув, ўзлару иттимас қилишту. Шу-шу жайдан балану иргаштируп версангуз, деп.

— Шошманг-шошманг, аникроқ қилиб айтинг. — Зокир ўрнидан туриб, яқин бориб олганини билмай қолди-ю, девонани хуркитиб юборишдан чўчиб, яна жойига қайтди.

Девона хитланиб бўлган, лекин очиб қўйган гапини айтмай иложи ҳам йўқ эди:

— Вузр, нафс ҳакалак атуп кўниппан-қўйиппан.

— От билан тuya эмасдир, ахир? — деди Зокир унга бўлишиб.

— Қайда?

— Хўш?!

— Бир ҳавуч келар-да.

— Нима? Тиллами? — деди Зокир кулокларига ишонмай.

— Ҳе, йув, марварид эду. Шадаси вилан.

— Қизиқ, — деди терговчи эси оға бошлаб, калласидан эса девона ҳам анойи эмаскан-ку, деган хаёл кечмокда эди.— Хўш, ваъданинг устидан чиқишдими?

— Чиқишту, — деди девона энди деворга хотиржам суюниб.

— Демак, Сиз болани авраб олиб келиб бергансиз, улар...

— Аврап имас, иргаштируп, — деб тўғрилади у.

— Яхши, қаергача эргаштириб келдингиз?

— Шу, Жуванинг вазаругача.

— Келишув шундай эдими?

— Шундай эду.

— Кейин-чи, нима бўлди?

— Ниму вўларду, биттаси манаву ҳамянуумга бир ниму ташлап кетту. Ушлап кўрсам бир кафт вўлуп шиғирлопту.

— Бола-чи?

— Қайтуб қараганумда сепкилтайди йув эду.

— Сепкилтойму. Ёдгортойму? — деди Зокирнинг юраги гурс-гурс ура кетиб.

Девона елка қисиб қаради:

— Сиз ўзи кимни излаюрсиз? Мен сепкилли балану билаюрман.

— Қўрқманг, — деди ўрнидан туриб юринганча Зокир, — биз ҳам ўшани суриштиromoқдамиз. Фақат, яхши эслаб айтинг-чи, отини нима деб атаб эдилар?

— Ниму деп? Айттингиз-ку, ўзингиз... — деди девона ғаши келиб.

Зокир негадир илтифотсиз қўл силкиди:

— Ҳай, майли, ўшандай ҳам бўлақолсин. Лекин болани олиб кетганларни айтарсиз? Кўрибсиз-ку, ахир?

— Қандай? — Боягидек елка қисиб, хум бошини ичига тортди девона. — Айтуп туруппан-ку, қайтуп қараганумда у йув эду.

Зокир тўхтаб, уни таний олмай тикилди:

— Бошқаси-чи? Чўнтаккинангизга нарса ташлаб кетгани-чи? Униям танимассиз? — деди кесатиб.

— Танумайман. Менданам найнов, тараша бир адам эду. Ўлай агар қайтуп кўрган вўлсам.

Зокирнинг энсаси қотиб, бир нарса дув тошган каби гардани қичишидди. Ўзи асабийлашиб:

— Марварид ёқибди-ю, ўзи эсиздан чиқибди-да? — деди. — Ваъдалашган одам-чи? Униям йўқолдига чиқаарсиз?

— Ўлуппан-да, — деди девона азза-базза ҳафа бўлиб.

— Ўшандан келинг, бўлмаса, — деб Зокир қисталанг қила бошлаб эди, девона боягидек тўрсайиб олди:

— Анойуни топубсиз жа.

— Ҳа, нима бўлди? Тўнингизни тескари кияяпсиз?

— Жавобу-чи? Шариат-чи?..

— Шариатни нима дахли бор бунга? — ҳайрон қолди терговчи.

— Бизга келганда ниму дахли варму?

- Тушунмадим.
- Нимусини чучунмайсуз? Пусулмонмусиз, ахир? — Девона иршайди.
- Алҳамдулиллоҳ, — деди терговчи ўнғайсизланиб, ҳам муддаосига тушуниб-тушумай.
- Нима эди?
- Девона ўзиникидан қолмасди:
- Қудайданам қўрқувсиз, бизга ўхшап?..
- Албатта. Ким қўрқмаскан? — деди тилидан тутила-тутила.
- Девона иккала тиззасига шаппалаб иршайди:
- Унда биз қулудан нимуну талап этувсиз? Сотуп қияматга қолувниму?
- Зокирнинг бошидан олов чиқиб кетди. Пешонасины майда тер босди. Девона уни ёмон туширган эди.
- Айттолмасайиз... айтманг, мен қистамадум, — деди ғудраниб. Давангир девона бало экан, уни ўзининг усули билан шариат арқоfiga тортаётган эди.
- Сизам биз қулуни кечуруп қўйувсиз. Сотолмаймuz ваъдасида турган биродаримузни. — Давангир девона хумдек бошини сарак-сарак қилиб, хоҳласангиз шу, дегандек елка учирди. — Ўртада сўз вар, ширинкама вар. Қудайну номину тилга олганмуз.
- Зокирнинг тилига калима келмай қолган эди, ортига қайтаётиб:
- Ҳалолидан бўлсин, нима деймиз, — деди бўшашиб, сўнг жойига ўтириб, қўшиб қўйди. — Бизга қи-йин қипсиз-да.
- Девона лаб бурди:
- Ниму қийун?
- Боланинг изини топганимизда... ўртада қасам бор деб... ишни бузиб ўтирибсиз-ку.
- Девона ногоҳ сакраб турди ва ўзидан бир нимани даф этаётгандай қўлларини силкий кетди:
- Йув-йув, овора бўлувсиз, қистамангам, сўрамангам қайтуп. Ўша гап-гап.
- Яхши, — деди терговчи хотиржам этишга уриниб, — ўша гап бўлса, ўша гап. Келишдик-ку, ахир. Фақат...
- Девона тахта-эшакка қайтиб чўкаётиб, энгашган кўйи термулди:
- Ниму пақат?
- Ўтилинг, ўтилинг, шунчаки бир гап, — деди терговчи бир шумликни ўйламаётганини билдиримоқчи бўлиб. — Билгим келди-да.
- Девона омонат чўқди, лекин хавотири тарқамаган эди, сўради:
- Нену, дейсуз?
- Шу... марваридни-да. Сиз нима қиласиз дейман-да. Уй-жойингиз, бола-чақангиз бўлмаса, — деди Зокир узоқдан айлантириб.
- Девона ер остидан қараб, ишшайди:
- Бизам шундай ўтмасмиз, балам.
- Ё кўз остига олиб қўйганиз... борми? — деди у хазилга йўйиб.
- Бўлса-чу...
- Зокир қараб туриб ҳайрон қолди. Давангирдай одам... уйлантирадирган ўспириндек қизарид бораарди.
- Демак, биронта бевани... топиб қўйибсиз. Ўшанга атадингизми?
- Девона четга қараб иршайди. Сўнг ўгирилиб:
- Аташ несу, асраб денг, — деди.
- Тушунмадим, асраб нима қиласиз?
- Никоҳ куну-чи? Махруга ниму верумиз?
- Э, ҳа-а, — деб юборди терговчи. — Ниятиз зўр-ку.
- Ҳе-ҳе, — деди девона уни мазах этиб. — Ниму деб ўйловдиз бизну.
- Зокирнинг тегажоғлиги тутди:

— Тўйга айтасизми? Куёв ошидан бехабар қолмайлик.

Девона елка учирди:

— Мелиса удайига варса вўлувму?

— Формада бормаймиз-да, ака.

— Одам қатори вўлса, айтмай ниму — айтамуз, айтамуз.

— Раҳмат-е, илтифотингиз учун. Фақат, — деб энсини қашлади у.

— Яна пақатига бала варму? — кутулдим деганда девона яна сапчиб тушди.

Зокирнинг қитмирилиги тутиб келмоқда эди, атай елка қисиб, ҳайрон қотди-да:

— Ҳа, марваридиз делога тушиб бўлди-ку уни қандай қиласиз? — деди.

Девона гарангсиди:

— Қандай тушаду, у менинг қўйнумда-ку, — деб азза-базза шинелини очиб, белини пайпаслади.

— Турибди эканми? — деди терговчи сир бермай.

— Турганда-чу. Ўғри баллар ўн кун излаганда кесолмайду.

— Кесолмагани яхши. Лекин... дело очсақ, ўз қўлиз билан гаровга ташлаб кетасиз-да.

— Қандай? Мен-а? — Девона ақли бутун экан, соғ одамдек, кўксига нуқиб сўрамоқда эди.

— Авара вўлувсиз.

У ҳам бўш келмади:

— Унда... эгасини айтасиз-да. Ё марваридни денг, ё эгасини.

Девона боягидек тиззасига шаппалади:

— Хич-да. Марваридну уруб-уруб, тартуб олувсиз, майлу. Игасига авара вўлувсиз. Уни айтадуган жинни йув. Вассалам...

Зокир, э, балли, дейишини ҳам, хой, Бадир, опчиқ буни, деб бақиришини ҳам билмасди.

## 10. ЎША БИРАВНИНГ МАҲФУЗАСИ — ТАНГРИТОҒЛИК КЕЛИН

Аччи қирларига бош қўйган кун ҳам ахийри Каттабоғ ила видолашиб, ботиб кетди. Уфқлар ўсма тортиб, шом туша бошлади. Фақат қип-яланғоч боғлардаги ёлғиз шафтолиларгина шом ивири-живирига ҳам бўй бермай яшнаб турардилар. Худди кун бўйи эмган нурлари чамандай нафармон гулларига кўчгандек, қайта аксланиб ётгандек. Бу ҳам кам. Менинг назаримда бошига шафтоли гулли узу-ун симрўмол ташлаган келинчаклар ҳар ёқдан — гоҳ у, гоҳ бу ташландик (кимсасиз) боғлардан биз қайнижонларини соғиниб чиқиб келаётгандек, чиқиб келатуриб келинсаломга ҳозирланиб тўхтагандек, қай бирлари эгилиб ҳам улгургандек.. туюлаверади. Шунақа ажаб паллада, ажаб хисларга тўлиб бормоқдаман. Бугина эмас: чор тарафимни тўлдирган «темир ялмоғиз»ларни ҳам унуганимча йўқ. Улар жой-жойларида тош қотганлар. Гўё қиёмат-қоим олдидан пайдо бўлгувчи Дуббатул-арз<sup>4</sup>лар мисоли бир хунук қорайиб кўринадилар.

Оллоҳга шукр. Шунисига-да, шукр. Улгурмасам нима қилардим? Уйимизни остин-устун қилиб, суриб ташласалар қайга борардим? Бу битикларни қай тупроқ остидан излар эдим? Чиндан-да Оллоҳ асрабди! Бу «темир ялмоғизлар»ни тўхтатиб, диёrimizning умрини бир кунгина суриб-узайтириб қўйибди! Гўё биз етиб келиб, омонатни топиб кетгунча бу сурсурларни, Каттабоғ устига тушган қиёматни тўхтатиб тургандек... Эртага эрталабдан эса кун мағрибдан қайтиб чиқиб, бу Дуббатул-арзларга жон битадигандек ва бу диёрнинг боғу сойлари, тепаю қирлари остин-устин қила кетилиб... Оллоҳнинг «биз истасак, ўрнингизга тамомила бўлак қавмни келтириб қўюрмиз» ояти каримаси рўёбга чиқажакдек...

<sup>4</sup> Қиёмат олдидан Ер юзида пайдо бўлгувчи, одамларга гуноҳларини маломат қилгувчи маҳлук. (*Саҳиҳ ҳадисдан*).

Ҳозирча... елкамда Ёдгормурод (у кўлчаси ила пешонамдан маҳкам қучиб олган), аллақанча тепаю чимзорлари суриб, булоқлари кўмиб юборилган Иззадан ўтиб, «темир ялмогиз»лар ҳали етиб улгурмаган ўша қадим Олмазор ёқалаб, Қанғлига чиқиб бормоқдамиз. Бу ёқда думи Иззага қадар чўзилиб-тушиб борган аждартепалар — Фозилтепаю унинг катта-кичик дум-тепачалари кўринади. Улар ҳали омон, тиф тегмаган, шом қоронгусида янаям маҳобатли, афсонавий кўринмоқдалар.

Кўйнимда эса, у омонат битиклар, ари инида қанча қуруқшаб ётган коғозлар — кеннайимнинг маҳфуз хатлари майнин-майнин шилдираб (хазонга ўхшайди гўё) хаёлимни ўғирлайди. Беихтиёр ойимлар билан етаклашиб, Эски Жўвага — холамгиларнинг шахар ҳовлиларига тушиб борганимиз, у ерда биринчи дафъа шу хат эгаси — Тангритоф томонлардан келган келинчакни кўрганим ёдимга тушаверади. Елкамда Ёдгормурод-у, мен ўша сафаримизни эслаб бормоқдаман.

Ўшанда далаю боғларни загчалар босиб, изғиринли кунлар бошланган, кўчадиган кўчиб, қоладиган қолиб бўлган кезлар эди. Мен шундан шу ёққа — овлоқдан овлоқ Каттабоғимиздан шаҳарнинг Дархон деган мавзесига қатнаб ўқирдим. Биринчи дарсга етиб бориш учун сахарлаб, ҳали сўфи аzon айтмай туриб йўлга тушар, бозорчилардан ҳам аввал Чўлпонота гузарига чиқиб, энг олдинги автобусда Бешоғочга етиб олар, ундан трамвайга осилиб, Дархонга кетар эдим.

Шунаққиб ўқиб юрган кезларим, бир дам олиш куни ойим:

— Отлан, Мақсадухўжа, шаҳарга — холангларникига тушиб чиқамиз, — деб қолдилар.

Шаҳар деса, жоним киради. Кичкиналигимда ойим бир марта Қоратошга оптушганлар. Шуши шаҳар десалар учеб-қўниб тураман. Ойим бекорга оптушмайдилар. Ўшанда Қоратошдаги қариндошларникига олиб борган, Ҳожиакбар aka деганларникида янги йил кутиб ўтириб, ундан Гозихон амакиникига чиқкан, кейин пастки Қоратошдаги Ҳури амманикига тушган эдик.

Ўшанда ойим: «Биз ким эканмиз?! Ҳаммамиз бир уруғмиз: Улуғхўжабой авлодлари... Замон мана бунақа бўлиб, узоқлашиб кетдик-да. Бўлмаса, бу ҳам ўз уйимиз: Улуғ бобонгдан қолган уйлар...», деган эдилар. (Қаранг-а, ойим ота-буваларимиз ўтган ерни кўрсатиб қўймоқчи эканлар-ку! Мен анқов қаерга келиб қолдик, деб юрибман.)

Бу гал-чи, бу гал? Нимани илиндилар экан?..

Йўлга чиққанимизда роса туман эди. Гўё оламнинг етти қаватини туман қоплаб, томлару дарахтларнинг учларига қадар кўринмай кетган, уч қадам нарини илғаб бўлмасди. Бунча туман қаёқдан қаёқка кўчиб боряпти, қаерга кетиб йўқолади, англаб бўлмас, одамни ваҳм босар эди. Йўловчилар ҳам дафъатан туман ичидан чиқиб қолишиса, бирдан чўчиб тушар эдик.

Йўқ, Тепамасжиддан ўтмасимииздан шунча туман бирдан кўтарилиб тарқади-кетди, қаёққа сингиб, қаёққа йўқолди, билмайин ҳам қолдик. Сўнг кун бир кулгандай бўлдию яна тунд булувлар остига кириб йўқолди. Шаҳарга боргунимизча ҳам бирон марта мўралаб кўймади. Бу ҳам камдай изғирин туриб, кун ботганиям, қош қорайганиям билинмай қолди.

Эски шаҳарда нима кўп — узундан-узун жин кўчалару боши берк — тувак кўчалар кўп экан. Биз шундай кўчалардан бирига бурилиб ҳам эдик, ичкаридан хайр-хўшлишиб чиқаётган ясан-тусанли икки аёлга дуч келдик. (Улар меҳмондан ҳам бурун «совчи хо-тин»ларга кўпроқ ўхшаб кетишарди.) Ҳарқалай, улардан бири — сувсар ёқали пальто кийгани таманноланиб кела туриб, ойимнинг паранжиларига ижирғанганнамо қараб эди... жоним халқумимга тиқилиб келди. Аммо шу пайт ҳалиги кузатиб чиққанлар орасидан бирор:

— Вой, Саломхон, ўзингмисан? — дея бизни таниб, қучоқ очиб кела бошлади-ю мен юмшадим. — Вой, қаёқдан кун чиқди десам, бояги кўринган сизларнинг офтобингиз эдими?

Қарасам, Ойпошша холам, ўша майнин-мулойим, жилмайсалароқ юzlари офтобдай ёришиб кетадиган холам...

Ойим ҳам қўлларини азот кўтариб, бошларидан паранжиларини олдилару билакларига сола,

тезлаб бориб, қучоқлаша кетдилар. Улар бир-бирларининг қуракларини силаб-сийпашиб, бағирларига сингиб кетгудек бўлишиб, ҳали у — ҳали бу елкаларига бош қўйиб, бўйларини искашиб «омон-эсон»лашишаркан, кўрсатганига шукроналар айтишар эди.

— Вой, Саломхон-ей, нечук? Уйларингни ташлабам келавурдингми, а? Вой, қара, келганинг қандай ярашиб турипти.

— Бу ёғи узун қиши кечалари, бир гаплашиб ётиб кетай дедим, опа, соғиндим сизларни... — дедилар ойим.

Холам мени суйиб, бағриларига тортганча, ширин алқай кетдилар:

— Вой, мани кичкина Маҳмудхўжам! Бизларни йўқлаб келадиган бўп қоптию... Ило-ой, етимларни ўзинг қўллагин!

Сўрашиб-исташиб, чор тарафи тупроқ томли уйлар билан ўралган ҳовлига кириб бордик. Ҳовли узун кетган, бу бошида бир туп тути нариги бошида бир туп нок қорайиб кўринар эди. Чор тарафда бир-бирига туташиб кетган уйлар, деразасини санабам адашиб кетиш мумкин эди. Айниқса, айвоннинг қизғиши устуну тўсинлари, тоқилари вақт ўтиши билан қорамтири тусга кириб кетган эдилар. Тепадаги токчали уйга киришимиз-ла ковшандознинг ёниданоқ танча очилган, тепада дор қўринар, дорда шода-шода беҳио ноклар осиғлиқ эди. Келганимизни эшишиб, қайси бир хужрадан почча чиқиб келдилар.

— Эй Саломхон, қайси шамолар учирди? Заб кебсизлар-да, заб кебсизлар. Маҳмудхўжанинг чирогини хўп обкебсиз-да, хўб обкебсиз, — деб елкамга қоқиб, суйиб кўришдилар. Нусрат почча ҳйила қариб, ҳассага ўтиб қоптилар. Лекин ширинсуҳанликлари — ўша-ўша, ҳалимликлари, юзларидан нур ёғилиши ўша-ўша. У киши жигарранг тусдаги силлиқ асоларини ковшандоз четига қўйиб, ўzlари танчанинг тўрига ўтдилар.

— Қани, Саломхон, сиз бу ёққа чиқинг. Мақсадхўжам менинг ёнимга келади, — дедилар у киши.

Биз меҳмонга солиниб, ҳали йиғиширилмаган кўрпачаларга ўтириб улгурмасимиздан эшик очилиб, қўлида оқ дастурхон кўтариб, ё астальфируллоҳ (биз аллавақтдан бери йўқотиб қўйган!) Марғуба кеннойим кириб кела бошлади. Мен туриб кетай депман. Аммо у менга эътибор ҳам қилмай, ойимлар билан кўришгани елка тутиб бора бошлади. Ойим ҳам дабдурустдан шошиб қолдилар:

— Ия, Марғубахон?!. Вой, опоғойиз ўргилсин. Эсонмисиз-омонмисиз? — Ойим ўтирган ерларидан кўтарилишга унналиб, қўлларини чўздилар. — Ҳали Сиз.. шу ёқлардамидиз?..

Кеннойим ғалати хижолат ичида... дув қизарди-ю, ерга боқиб, бош эгди.

Холам юзлари ёришиб, кўзлари қисилиб, кулиндилар:

— Хой, Саломхон, манам эдим санингдек, санам бўлдинг манингдек: қарибмиз-қарибмиз...

— Йўғ-е, опа, нега ундей дейсиз? — дедилар ойим аланглаб.

— Ҳа, танимадинг-ку, келинингни, — дедилар холам ўша-ўша қулиб.

— Нега танимай? Марғубахон ким экан — ўша ўзимизнинг ой деса ой, кун деса кун дегудек келинимиз-да! — дедилар ойим дастурхон ёза бошлаган кеннойимга қараб.

Ойимнинг бу гапларидан ҳаммалари қулишди. Нусрат почча соқолларини тутамлаб-силаб, таъсирланиб бош тўлғадилар:

— Шунақа-де, шунақа! Шундан кейин ҳам Ху-дойимнинг қудратига таҳсин айтмаймизми?!

Холам сирни тушунтиришга чоғландилар:

— Тўғри, Саломхон, буям ўзимизнинг келин. Лекин буниси бошқа,

— Бошқа?! — Ойим ҳам, мен ҳам гангид қолдик.— Қанақасига бошқа бўлсин?! Ўша-ку?.. — Бир дастурхон тузаетган кеннойимга қараймиз, бир атрофдагиларга аланглаймиз. Аммо ҳеч нарса англай олмаётимиз.

Ўшал кеннойим эса ўнғайсизланиб, юзлари лоладек қизариб боряпти: қизарган сайин қизил гулдек кўхлик тортяпти. Балки ўша никоҳ кечаси йўқолиб қолганидан уялиб... бир нарса дея

олмаётгандир?

У ана шу хижолатдан кутулиш учун чойнак кўтариб чиқа бошларкан, ковшандозга тушган жойида... юрагимни ўйнатиб, менга бир қараб қўйди-ю, бат-тар қимтиниб, бурилиб чиқа бошлади. Ё тавба, бош-қа пайтда «вой, эшон бола, бормисиз»лаб, устимда ўлиб-кутуладиган одам... энди мени танимаётгани ғалати эди.

Холам уни узоклатиб, жавобга оғиз жуфтладилар:

— Бу келинимизнинг оти — Махфуз. Таниб олгин, Саломхон. Адашма.

— Қанақасига... Махфуз бўлсин? — дедилар ойим.

— Оллоҳнинг қудрати илоҳиясига салламно, Саломхон, салламно! — дедилар Нусрат почча бош тебратиб, таҳсин айтиб. — Эй-й, биз гумроҳлар, ниманиям биламиз — ниманиям? Султонмурод қаёқка гум бўб кетди, деб юрибмиз-да.

— Ҳа-я, бирорни хасмини опқочиб кетди деб юрибмиз, — дедилар Мухаббат кеннойим, — у ёқда Марғубага ўхшаган бир бошқасини пардаи исматида асраб қўйган экан-ку, Ўзи.

— Тушунмадим, Султонмурод қайтдими? Буни ўша ёқдан ола келибдими? — дедилар ойим рўмолларини тузатиб ўрашга тушиб.

— Қаёқда! У тинчимагандан ҳалигача дарак йўқ, — дедилар холам бунинг тарихи узун, кошки бир оғиз сўз билан тушунтириб бўлса, деган каби.

Мен ҳаммадан бурун ҳалиги тарихни оча қолишса-чи, дейман. Марғуба кеннойим қаёқка йўқолган экан? Султонмурод акам-чи? Нега ўзи келмабди? Шуларни билгим келадики, у ёғи йўқ...

Бу орада (айтишга ҳам ғалати) янги кеннойим (тавба, одам одамга шунчалар ўхшарканми!) кўли кўксида, чой кўтариб кирди ва:

— Хуш келупсизлар, — дея ширин такаллум ила (чиндан тили бир ёқлиларникига ўхшар эди!) ўзи паст томондаги ялангқават кўрпача устига тиз буқди. Ойим ўзларига келиб-келмай «Хушвакт бўлинг», деб қўйдилар-да, узатилган чойни олиб:

— Келинпошшам, Сизни қайси томонлардан сўрийвуза? Бизани йўқотиб қўйган жиянувзачи, омонми? У ёқда аянгиз, адангиз яхши юришибдими? — деб сўраша кетдилар.

Янги кеннойим лов қизариб, ер сузди. Қизарганда яна ҳам кўхлик тортиб кетаркан. Айниқса, кулоғи юмшоғининг таккинаси анордайин ёнарди.

— Юришибду-юришибду... Ўшу Тангротоғ томонларда... — деди узун-узун, оппоқ бармоқларини эзид-эзғилаб. У ич-ичидан турган бир қалтироқни шундай босармиди ё ўзими — билиб бўлмасди. Лекин овози ҳазиндан-ҳазин бўлиб, аллақандай тўлиқиб чиқар эди.

— Султонмуроддинг ўзи билла келавурмабди-да, — дедилар ойим.

— Келубла қолурлар... — у баттар қисиниб, қизариб кетган эди. Ўзини қўярга жой тополмас, бу тарз саволлардан қочиб, турагами, чиқаргами маврид излар эди. Алоҳал чойларни узатиб бўлиб, ковшандоздаги оёқ кийимларни саришталар экан, холамларга маъноли қаради:

— Ошнунг гуручину... нима қилай, солавурайму, опоғойу?..

— Майли, болам. Фақат сал ивитиб солинг. Сув кўтарадиган экан бу гурунчимиз. Тирик бўп қолмасин, — дедилар поччага қараб қўйиб.

— Ҳа, баракалла, шавладан тирикроқ, ошдан юмшоқроқ... Унинг отини нима дейдилар — «мўйсафид палов», — деб кулдилар почча.

Ҳаммамиз у кишига қўшилиб, жовур-жувур қилишиб, бирпасда ўртадан бояги ўнғайсизликлар ҳам кўтарила қолди. «Олинг-олинг» билан дастурхонга қарадик. Бир ёқдан танчанинг иссиғи, бир ёқдан чой қўшилиб, ичга иссиқ кира бошладио бир фароғат туйиб, атрофга алангладим. Самоварнинг беозор жигиллаган ашуласими ёки танчанинг атрофида ўтирган қариндошларимизнинг бир ширин мулоzиматларими, «олинг, Саломхон, дастурхонга қараб ўтиринг», деб қисташларими, «Ҳой, Санобар, қаламтарошингиз бор, нокни арчиб қўйинг», деб холамнинг поччага иш буюришларими — нимадир менга хуш ёқиб, эриб

ўтирибман. Унданам бурун Марғу кенойимга ўхшаш бир ширин, бир қўҳлик янги кеннойилик бўлиб қолганим, акам ҳақда ажиб бир муждалар эшитишим мумкинлиги мени маст қилиб бормоқда. Ичим қизиб-қизиб келяпти. Нега ойим жим қолдилар? Чойни ича қолсалару шундан сўз оча қолсалар: акам бу кенойимни юборишга юбориб, ўзи нега келмабди? Ҳозир қаерларда экан? Қачон келар экан? Билгим келяптики, у ёғи йўқ...

Ойим ҳамон ўша ҳолатларидан, уни Иқбор отиннинг кизи хисоблаб, ғафлатда қолганларидан таъсирланиб ўтирган эканлар:

— Оллоҳ-Оллоҳ. Иқбор отин кўрмасин. Нак ўшанинг қизи-я! Одам одамга шунчалик ўхшар эканми, тавба? — дердилар туриб-туриб.

— Хў-ўй, буям бўлса, Худойимнинг марҳамати, Лавҳул Маҳфузга битилган тақдири азали, — дедилар почча одатдагидек бир тебраниб-таъсирланиб олиб. — Қолавурса, яна қандай ҳикматлари бор — ниманиям билардик биз? Барчаси ўзига маълум, ўзига аён.

— Ишқилиб, етимларни ўзи ёрлақасин, — деб қўйдилар холам. — Ҳеч бандани қийнамасин жудоликка солиб...

— Унда.. унда бояқиши Марғугина келинимиз қаёқда қолибди? Султонмурод опкетмаган бўлса? — дедилар ойим ҳамон унупотлмай. — Қаерларда экан, қизгина?

— Худойимнинг даргоҳи кенг, дарагиям чиқиб қолар бир кун, — дедилар холам поччага қиё қараб, худди у киши бир нарса биладигандек.

Аммо почча ўз хаёллари билан банд, қўлларида бир донагина узум, ўшанинг ҳам пўсти устида кўз ёшидай йилтираб турган томчидан нигоҳларини узмай қолгандилар. Бармоқлари орасига олиб бир силасалароқ у томчи, у «ёш» адо бўладиган, лекин унда нима кўриб турибдилар экан, силамайдиларам, артмайдиларам. Шунақа ўйга толиб кетибдилар.

— Қийин-қийин, бояқишигинанинг онасига қийин бўлди, — дедилар ойим аллақандай чукур тин олиб. — Ҳаммани ўқиб, дам солиб юрган хотин, ўзи ётдиқолди...

— Куйиб кетган экан-де? — дедилар холам.

— Секин айтасизми?! Бир ўғлининг номини атаб чақиравмиш, бир қизининг...

— Ўғлига хабар қилишмабдими ҳалиям? — дедилар почча сесканиб, ўзларига келиб.

— Ким бош қўшади, дейсиз, бунақа пайтда, — дедилар ойим.

— Шуни айтинг, Саломхон, аскардан чақирволиш осон эканми? — дедилар холам ачиниб.

— Унда мушт-дек қизчаси билан қоб кетибди-да, мусофиргина?

— Яхшиям ўша қизи, қўшнилар бор экан, иссиқ-совуғига...

Мен бу гаплардан хабарим йўқ эди, титраб кетдим. Кўз олдимдан ўша қизил тарам олмали ҳовли, ўша супа, ўша райҳонзору Марғу кенойим билан боғлиқ воқеалар кечиб, аллақандай бетоқатландим! Кичкина Саидадан ҳам жаҳлим чиқди, ҳам ачиндим. Бир оғиз айтмабди-я..

Почча пишиллаб хўрсиндилар:

— Катталарнинг олдига чиқиб борадиган, ўғлини чақиртириб берадиган бир мард топилмабдими?! — дедилар жаҳллари чиқиб.

— Топилмабди-да, ўша... — дедилар ойим маъюс тортиб.

— Эсиз... — дедилар холам ачиниб.

Ўртага ҳеч гап сифмайдиган жимлик чўқди. Менинг эса ичим ачишиб боряпти, қаеримдир куйиб кетяпти. Ҳаёт шунчалар бешафқат эканми?

— Ким ўйлабди, келинимиз — унинг қизгинаси бедарак кетиб, бу эшигимизни сўроқлаб келади, деб.

— Ҳаммаси Худойимнинг хоҳлаши, синови Ўзининг-ку, лекин... — ойим чой ичатуриб, бирдан қал-қиб кетдилар.

— Ҳаллоқ де, Ҳаллоқ де, Саломхон, — дея холам у кишининг қуракларига қоқдилар.

Ойим ўша бир оғиз сўзни айтишлари билан тинчий қолдилар. Сўнг кўзларидан тирқираб чиқкан ёшни артиб, поччага қарадилар:

— Йўқ, мени бошқа нарса қалқитди: ростдан... ўзи сўроқлаб келдими?

— Ха, шундай бўлди, Оллоҳнинг қудрати билан шундай бўлди, — дедилар почча, — ўзинг айт, Санобар...

— Уч ҳафта бўлдимикан, даладан энди кўчиб тушган эдик, — дедилар холам ёруққа орқа ўтириб, ойимга қараб. Кечалари ҳадеб дўппи тепчийвергандаридан холам ёруққа қарай олмас эдилар. Шунинг учун хозир кўзларини ёруғдан қочириб сўзлар эдилар. — Охунгузарлими, қаерли бир одам поччангни сўраб келди. Энди аср намозига такбир тушираяпган эдилар. Эшик орқасида туриб айтсам, унда манам қазо қилмай ўқиб ола қолай, кеннойи, деди. Кира қолинг, тепадаги уйдалар, деб четга ўтиб турдим. Шошиб бориб, қаватларига кириб намоз ўтади. Сўнг салом бериб туришгач, ўзини танитиби.

— Ҳа-ҳа, барака топкур, кўп иймонли одам экан,— деб тасдиқладилар почча. — Ўша ёқдан кўшворишганча қизим, деб чегарадан ўтказиб кепти, айтилган одамларни тоза излаб, сўроқлапти. Тополмагач, дарақлаб бизниги келган жойи экан. Уят бўлсаям, келдим, маъзур тутасиз, дейди.

— Ким қўшиб юборибди? Султонмуродми ё буни оталари? — дедилар ойим сабрлари етмай.

— Йўқ, муниқидагилар, — дедилар холам, — тўс-тўсда шу ёқки қочира қолишибди. Ҳарна қилса, Тошкан тинч, деб.

— Қанақа тўс-тўс? Урушми? — дедилар ойим.

— Уруш ҳам гапми, қирғин, Саломхон, қирғин, — дедилар почча қўл тўлғаб. — Уларнинг бошига тушганини Худойим ҳеч кимга қўрсатмасин. — Почча учли гилам дўппиларини олиб, устарада қирдиришга кеп-қолган соchlарини силашга тушдилар-да, яна бош тўлғаб қўйдилар. — Биз-ку, бир кунимизни кўриб, Худо-обло деб ўтирибмиз. Аммо у томонларда ёмон бўбди, ёмон! Аввалига рўшнолик бериб, кейинига қонга ботиришибди.

— Йўғ-е, у ёқда ҳам инқилоп бўлган эканми? — дедилар ойим ҳайратга тушиб.

— Шунга яқинроқ, шунга яқинроқ, — дедилар почча, у ёғига гапни чўзгилари келмай ёхуд бизни чалғитиб. — Ҳай, Мұҳаббатхон, анув мани ҳужрамдан бир дамламгина қораҷ опчиқинг. Бу чоймас, турган-битгани ҳашак экан-ку, — дедилар.

Лекин ойим ҳам, холам ҳам чалғимадилар, қайтанга бир-бирларига маъноли қараб олишди:

— Бу ёқлардан бош олиб... ўша талатўпга кетганаканми, Султонмурод? — дедилар холам ачиниб.

— Ман бошқачароқ эшитувдим шекилли, — дедилар ойим, — мўминларнинг боши қовушганмиш, давлат тузишганмиш, деб ким ҳам айтиб эди, Рустамхўжамиди, Иноғомхўжамиди?..

— Унисиям тўғри, бунисиям... — почча каттакон кафтларини курси четига босдилар. — Ким нима ниятда борган бўлса — боргандир, кўтарилиган бўлса — кўтарилигандир. Аммо охири яхши чиқмабди. Ҳозир ини бузилган чумолидай тўзиб, ҳар ким ўз бошини асраш билан оворамиш. Ким бизни юртга, ким қозоклар паноҳига ўтиб, ким Ҳиндистон тарафларга қочиб кутилаётганмиш.

— Султонмурод жигаримиз-чи? Нима қилибди экан? Қайси ўр, қайси қирга урибди экан ўзини? Бояқиши шу насиба қувиб борган эканми у ёқларга? — дедилар ойим. — Қайтиб ўтолмай саранг, десангиз-чи, ҳали?

— Ҳов-в, дариф, — дедилар энди почча тўлиқиб. Шундай катта, басавлат одам куйинганда ҳатто ҳаво етмай «ҳов дариф»лаб қолар эдилар. — Худойим шу боланинг кўнглига қанақа ўтлар солган экан, қанақа уруғлар сочган экан, шу ёшга кирибам ўзини ўйламаса, тинчиб — туп кўйиб, палак ёйишни хаёлига келтирмаса! Кимлар ҳақида қўйғуриб, кимлар учундир бошини тикиб юраверса?! Кошки ўша эл билса! Вақти келиб, қаватига кирса. Кирмайди! Булар дорга тортилиб кетаверарам, улар томошабин бўлиб тураве-рарам. Машойихлар айтмишлар: «Жонни

бергин — жонни жонга суққанга, жонни тиккин — жонни жонга қоққанга», деб. Бу-чи, адолатпешалик билан ҳеч ерга сиғмайди. Сиғса, ўтирмасмиди ти-инч бағримизда?

Мен поччанинг оғизларига тикилиб қопман. Тўғри, у киши азбаройи куйиниб кетгандаридан, акамга ачинганларидан гапиряптилар. Ўша жанггоҳларда бирон дайди ўққа учиб, беному иншон қолиб кетмасин, деб койиняптилар. У йўллардан қайтариб қололмаганларидан юрак-бағрилари эзилиб кетяпти. Мен буни сезиб турибман. Аммо шу билан бирга ҳов бир оқшом — акам Бўзсув бўйларини қароргоҳ тутиб юрган кезлари почча билан супамизда кўришиб, тортишиб қолганлари, ахийри ўzlари бир нима дея олмаганлари ёдимга тушиб-тушиб кетяпти, айланиб-айланиб келяпти. Акам ўзини ноҳақ деб билса, ўшандаёқ қайтмасмиди? Бошини шунча ғавғоларга қўйиб юргунча? Неча ўлиб, неча тирилгунча? Бир нарсани биладики, нафрати беададки...

Фақат бир нарсага ҳеч ақлим етмаяпти! Акам, ўша жондан азиз ақажоним, Оллоҳнинг марҳамати билан шундай суксурдай бир парига йўлиқкан экан, унга уйланган экан, нега энди келавермай... ёлғиз ўзини жўнатиб юборибди? Ўзи қаёқларда қолди экан? Худди Марғу кеннойимдан ўша машваратларини, қароргоҳларини аъло кўргани каби! Каттабоғнинг тинчлигини деб, кимларни ундан қувиб чиқариб юргани каби! У-ку, майли, Каттабоғ эди. Ўз юрти эди. У ёқда-чи, Тангритоғ томонлардан нима излаб, нима топмоқчи? Шон-шавкатми ё бу ердан тополмаган адолатними? Ё қайтиш йўлини тополмай... ночору ноилож қолдими? Балки кўлга тушиб...

Бошимга ўралашиб келаётган бу каби хаёллардан ич-этим музлаб, ўзим худди чуқур жарга қулаб бораётгандек бир ҳолга тушдиму секин ўрнимдан туриб, ташқарига йўл ола қолдим. Қулоғимга ҳеч нарса кирмас, бутун ўй-хаёлим ташқарида, ўша янги кеннойимда эди. Унга кўрина қолсаму секин ижикилаб бўлса-да, бир нарсаларни сўраб-суриштирсан. Акам қаерда, нимага бирга-бирга қайтмади — била қолсам...

Ниятим ошхона олдидан ўтиб, янги кеннойимга бир кўриниш бериш. Кўриниш берсам, сўрашар-ку...

Кунботардаги булутлар ҳийла сийраклашиб, офтоб ўшаларнинг ортидан мана ҳозир юз кўрсатиб қоладиганга ўхшар-у, кўрсата олмас, лекин бу оқлик оламни сал бўлса-да, очворгандай эди.

Чиқсан, кунгай йўлкада (шундай биз ўтирган уй деразасининг тагида) ёлғиз сўфитўрғай турган экан, у мени кўриб пилдираб нари борди, тождор бошини эгиб, мунчоқ кўзларини бир ажаб тикиб, ажабсиниб қараб қўйди-да, яна ўз юмушига андармон бўла кетди. У йўлка бўйлаб ушоқми, нимадир излаб борар, ҳар замон алланималарни чўқилаб, яна пилдираб кета бошлар эди. Мен унинг орқасидан юрдим, у ҳам менга қарай-қарай пилдираб бораверди. Мен уни учирворгим йўқ, шу билан бирга янги кеннойимни ҳам кўр-гим кептурибди. Кеннойим эса, ўша ёқда — ошҳо-нада. Назаримда, мана ҳозир чиқиб, тор йўлкада рўпара келиб қолса, кўзларим тиниб кетадигандек, кўзларига қарай олмай, ҳеч нарса сўролмай қоладигандекман.

Қадамимни тезлатиб эдим, сўфитўрғай ҳам пилдирашини жадаллатди. Лекин ҳамон йўлкадан нарса териб, чўқилашини қўймасди. Бир кўзи мендаю бир кўзи ерда. Ризқини териб боряпти. Раҳмим келиб, тўхтаб эдим, у ҳам тўхтаб, ҳатто орқасига қайтиб, қолиб кетган бир нимани чўқилади-да, яна ошхона томон пилдираб кета бошлади. Етиб, ўша ерда айланди ва ичкаридаги бираvdan чўчиб-ҳадиксираб, қадамини тезлатди. Ва шу вакт очиқ эшиқдан икки юзи анордай қизариб, бир ҳокандоз олов кўтариб, ўша бираv — янги кеннойим чиқиб келди. Олов лахча чўғ бўлиб ёнар, унинг тафтию шуъласида бунинг юзи бўртиб, янаям гўзал бўлиб кетган эди.

Шунда қўрдим, у қуйиб қўйгандек Марғу кенно-йимга ўхшар, фақат ўнг юзининг бир чеккаси — қулоқ юмшогининг ёнгинасида тангадай бир нарса лахча чўғдек қизариб турар, гажаги сурилиб, очилиб қолган эди. Шу қўш нори билан у кеннойимдан ажралмаса — ажратиб

бўлмас эди ҳеч.

Бу орада унинг кўзи менга тушиб, бир дақиқа саросималанди-ю, йўл бера бошлаганимни кўриб, ширин жилмайди.

— Узоқуб кетманг, ошну ёпдум, — деди аллақандай яқин олиб. Мен унинг қўлидаги оловданам бурун ана шу яқин олганидан, лов қизариб, қолаверса, нимага чиққанимни сезиб қолганидан уялиб, ерга қарадим ва шошиб қолиб:

— Йўқ, узоқмийман, шўттаман, — дея олдим. Ва «қовун туширганим»дан қулоқларимнинг тагигача ёниб кетди. Назаримда, унинг қўлидаги ҳокандоздан уриб турган тафт ўн чандон ортиб кетгандай эди.

— Шундайму? — деди у бир ширин қилиб. Худди. «Вой, ману зериктируб қўймайин деган қайнужонумдан», деган каби эди. У йўлидан қолмай юра бошлаб эди, қўлидагини олишим кераклигини эслаб:

— Менга бера қолинг. Мен турганда Сиз... опкирасизми? — деб эргашдим.

— Йўғ-ий... қўлиз куяду, — деди у тараддувланиб.

— Бераверинг сиз... — дедим қистаб.

— Шунақаму? — у бир қадам чекилди-да, — шошуманг-шошуманг, — деб ҳокандозни ғишт-йўлкага қўйиб, тисланди. Йўлка яхлаган экан, ҳокандоз таги вишиллаб-жизиллади.

Мен уни илкис кўтарибоқ ойимгилар ўтирган уйга юрдим. Почча оловни кўриб:

— Ҳай, баракалла-баракалла, жиян нимага чиқди десам, оловга чиқкан экан-ку, танчамизни бозиллатиб, дуо олмоқчи экан-ку, ҳай, баракалла, — деб алқай кетдилар, сўнг: — Ҳой, Санобар, танчани очвора қол, жиянни қўли қўймасин, — деб холамни шоширдилар.

Холам ўзлари ўтирган томонни очиб, сандалнинг оёқ қўядиганини кўтардилар. Мен оловни танчанинг чўғхонасига тўқдиму у ланғиллаб, кулхонани ҳам чўғхонага айлантирди-кўйди.

— Ҳай-ҳай, сандал ёниб кетмасин, озгина кул торт устига, кул торт, — дедилар холам.

Аммо почча унамадилар:

— Қўй-қўй, олов соганимиз нима-ю, кул тортганинг нимаси?! Қишининг зийнати-ку, бу. Қўй, бирпас танларимиз яйрасин. Бу оловни ёқиб чўғ туширганларнинг, опкелган мана бу жиянимизнинг дуои жонини қилиб ўтирайлик бирпас. Оғача кеннойингни чақир, ўзиям исиниб олсин, — дедилар.

Кеннойим турп арчаётган экан, ҳокандозни қўйибоқ, айтдим:

— Ўзингизам киаркансиз, кутулиб қолган бўлсангиз.

У қараб, чиройли бош силкиди:

— Сал дам есун, хўп?

— Хўп, — дедим-у, нима деяримни, нима қиласимни билмай йўлкага чиқдим. Тавба, ўзим нега чиқдим-у, энди бир нарса дея олмаяпман? Ахир, акамни сўраб-нетишга бундан қулай, бундан зўр маврид бўлиши мумкинми?! Юрагим гуп-гуп урганча ошхона олдида боряпман-келяпман, аммо қани забон битса, журъат тополсам. Бари бир сўрай олмадим, журъатим етмади. Афтидан, мен янги кеннойижонимни аярдим, уялтиргим келмасди... Уйга кирсам: ойимгилар у ҳақда гапириб, кулогини қиздиришаётган экан, секин жо-йимга чўка қолдим. Аммо танча бир роҳатижон бўпти-бир роҳатижон бўпти (оёқдан борган иссиқ одамни домига тортиб, элитяпти!) Катталарнинг бу ёқдаги сухбати ундан-да ажойиб эди.

— Чегарадан ўраб- chirmab, бир амаллаб олиб ўтибди-ю, бу ёққа келгач, боши роса қотибдида, бечоранинг,— дердилар почча нимагадир тушунтириш бериб. Билдимки, гап кеннойим ҳақида кетаяпти. — Қора тортиб келган одамлари аллақачон қўчиб кетган, қаёқ-қа — ҳеч зоғ билмаскан. Нима қиласимизни билмай сарсон бўлиб қолдик, дейди бечора.

— Барака топсин, омонат нималигини билган одам экан, — дедилар ойим ўзларича алқаб.

— Қаёқдаги амакиваччаларига ишониб жўнатворишганини қаранг-а, — дедилар Муҳаббат кеннойи.— Бу ёғи катта шаҳар бўлса...

— Энди уларам бу ёқни тинчроқ деб ўйлаган-да. Билишмайдики, — дедилар почча танча кўрпани тиззалиридан пастроқ тушириб ҳам оёқларини махсиларининг устидан силаб. — Билишмайдики, бу ёқда балиқ бошидан ириб ётипти. Дориламон замон қайда экан!

Мен бу гапга тушунмай анграйиб қолганимни... ўзим сезиб, олдимдаги чойга алаҳсидим. Аммо қулоғим динг: ойим нима деркинлар, деб оғизларига қараб-қараб кўяр эдим.

— Ишқилиб, суриштир-суриштилардан тинчмисизлар? Бирор билиб, бирор билмай турса — яхши-я,— дедилар ойим.

— Қаёқда? — дея холам кўл силтадилар, — қаердан ис олган, анаву ордона, айланади-келади, айланишади-келади, курибгина кетгур.

— Ким, Зокир бадбаҳтми? — дедилар почча. — Нима дейди?

— Нима дерди, анг-шанглайди нуқул, сизларникида пропискасиз бирор боракан, деб, кўрсатасиз, деб.

— Кўрдими? — дедилар ойим оғизларидаги оғизларида, бўғизларидаги бўғизларида қолиб.

— Қаёқда?! Кўрсатиб бўладими у исковучга. Худонинг нақ бошли-кўзли балоси-ку,— дедилар Санобар опам. — Эшик тақиллаганинг ўзидаёқ ўрага яшириб қўювдим. Уч гал келган бўлса, учаласида ҳам тополмай кетди.

— Шундан бери дарвозани занжирлаб ўтирибмиз,— дедилар холам.

— Ким чақибдикин-а, кичикойи? Кўча юзини кўргани йўғу, бояқиш? — дедилар Мұҳаббат кеннойи.

— Қўни-қўшнидан бўлак ким сотади? Худодан қўрқмаган бандасидан ҳар нарсани кутса бўлади. Тўғрими, Саломхон? — дедилар холам.

— Эрта кунда чўғ сўраб чиқадиганлар-чи? — дедилар Санобар опа нимагадир шаъма қилиб.

Почча пишиллаб, орқаларидаги ёстиқни тортиб олдилару тиззалирига босиб, унга бағирларини берганча жим қолдилар. Сўнг бош чайқаб:

— Гумон яхшимас, — дедилар қўшилмай. — Гумон бор ердан иймон қочади. Бунака хуснинг довруғи тинганмас. Агар етти қават сандиқда сақлаганингда ҳам ахир бир кун чиқади. Ҳамма замонлардаям бўлган шунақаси. Шайх Санъонни динидан кечтирган, Маъдалихонни калласидан жудо қилдирган нима экан? Шу хусн-да. Темур замонида Шодимулк деган бир шунақаси чиқиб, бутун салтанатнинг инқирозига сабаб бўлган. Султонмуродинг ҳам чаккимас. Мана, унга ҳам шунақа биттаси — пошшоларнинг ҳам кўзини тиндирадигани учрабди. Билмадим, бу шўрими, баҳтими боланинг?..

— Нафасиззи ел олсин, ҳой, Санобар. Бу нима деганиз? — деб холам товушларини пастлатдилар. — Ҳалитдан Сиз шунақа деб турсайиз...

Почча соқолларини тутамлаб-силаб, қиқирлаб кулишга, холамни кулиб енгишга тушдилар:

— Хўп-хўп. Хўп, ана, илоҳим қўша қарисин. Ўзи келиб, бизни бу ташвишлардан қутқарсин! Энди кутулдимми?

— Демай ҳам кўринг-чи, асрамай ҳам кўринг-чи.

Ҳаммалари холамнинг пўписаларидан кулишиб туришган эди, бир талинкада қирилган туруп, бир косада суви билан кертилганини кўтариб кеннойим кириб келди. Мен шундагина ялт этиб юзига қараб, бамисоли осмондан узилиб тушган ой сузуб кириб келаётгандек кўзларим тиниб кетди. Унинг хусни почча айтганларича бор, ўзи ўша Марғу кеннойимга ўхшар-у, лекин ундан ўн чандон гўзалроқ эди. Худди ўша Марғу кеннойим бир илоҳий кавсар сувдан ичиб кўйгану жаннатнинг хур қизларига ўхшаб қолгандай эди.

У қўлидагиларни дастурхон устига қўйиб, холамларга жавдираб қаради:

— Битта чиннуга... сузуб келавераюнму, опоғойув?..

— Майли, пошша келин, қўлингиз дард кўрмасин, илоҳим, — деб алқаб изн бердилар холам.

У дастурхондаги ортиқча талинкаларни олиб, ош сузгали чиқдиям, ойим холамга қарадилар ҳам:

— Ҳалиги... биз келганда чиқиб кетаётгандарам шуни дарагини эшишиб келишбидими? Ё Миноварга эдими?

— Қаёқда! — дедилар холам ичаётган чойларидан қалқиб. — Минаварга бўлса жон дердимда. Ўзини кўрибам ўсмоқчиласади нукул: бошқа қизизам борми, деб?..

— Зумрад билан Қиммат бўпти-да, опа? — деб кулдилар ойим.

— Ҳа, шуни айтгин...

Кейин ош келди, ҳов бирдагидек — холам билан почча бизникига боришгандагидек зўр палов бўлган экан, бармоқлар орасидан ёғини оқизиб, мақтаб-мақтаб ея бошладик. Янги кеннойим жудаям тортинчоқ экан. Ўнта қистаганларида битта қўл чўзар, шунда ҳам тўртта гуруч олиб-олмасди. Лекин кўзи ойимгиларнинг пиёласида, бўшади дегунча чой қуйиб турибди. Узатгандаям ҳар гал ўрнидан туриб, тавозе-ла, чимилидиқдан энди чиқсан келинлардек пиёлани уч бармоғи устига қўндириб, узатиб турибди. Бунга сари почча:

— Ҳой, ойим, ҳой келинпошша, тўлдириб-тўлдириб, қуяверинг, энди ўзимизникисиз, — деб қўядилар.

— Бунақа қилсангиз, бугундан чой қўйдирмаймиз. Ана, Минаварнинг ўзи қуяверади. Ошгаям қаранг, — деб қистайдилар холам.

Тангритоғлик кеннойим:

— Хўп, опоғойў, олуппан-олуппан, — дейди-ю, яна бўшаган пиёлаларга алаҳсиб, буларни ҷалғитади.

Мен эсам, тергаш навбати ўзимга кепқолмасидан ҳайиқиб, ора-чира лаганга қўл узатиб турибман. Аммо-лекин мана бундай танча атрофида жам бўлиб ўтиришимиз, айниқса, ой деса ой, кун деса кундек гўзал кеннойимнинг чой қуйиб бериб, бедарак кетган акамдан бир ёруғ мужда бўлиб қаршимизда ўтириши менга шунақа ёқянти эдики... Мен ундан жуда кўп нарсаларни сўрагим, билгим, акамнинг дарагини эшифтим келар-у, журъат ҳам, маврид ҳам топа олмасдим. Қачон бир мавриди келади экан, буни ҳам билолмасдим.

Ниҳоят, ошга фотиха ўқилиб, лаган олинди. Ким қозон ювгани, ким идиш-товорқларни бир ёқли қилгани чиқди. Мұҳаббат кеннойим ўз уйларидан хабар олгани, Санобар опа поччага жой солгани турдилар. Танча атрофида холаму ойиму почча қолдилар. Ошдан кейинги чой хуш ёқиб, самоварнинг ора-чира «тирилиб қолиб» жигиллашига қулоқ бериб-бермай у ёқ-бу ёқлардан гаплашиб ўтиришаркан, кутилмагандан почча жонланиб:

— Ҳой, Саломхон, айтмоқчи, қутлуғ бўлсин! Бу жиян катта йигит бўлиб, довон ошганмиш, инистуларга кирганмиш! Кечагида Гулчехра айтса, «Салом опоқини ўғиллари биза билан ўқивотти», деса бир қувонибман-бир қувонибман. Зўр иш бўпти-ку, — деб қолдилар.

— Ўзи кириб келди, почча, бирор орқасидан борибам юргани йўқ, — дедилар ойим ичичларидан фахр-ланиб, — кўзувуз тиригига ўқиб қолсин.

— Кўп яхши бўпти-да, — дедилар у киши. — Беш йил нима — кўз очиб юмгунча ўтади-кетади. Ана, Асатулланики ҳам яримлаб қолди.

— Ило-ой, ёлғизларни ўзи қўллаб, ойинг роҳатинг-ни кўри-иб юрсин, — деб холам куракларимни силаб қўйдилар. — Озгина қийинчиликни ўзингга олсанг... — битириб оласан. Балки... даладан қатнашга қийналаётгандирсан?

— Етиб келяпман, — дедим мен ийманибгина. — Ойим бомдодга турганларида уйготиб қўядилар.

— Олди сутчилар билан кетади, — дедилар ойим.

— Жуда эрта экан-е, эрта. Устига-устак ҳар куни қатнашни айт, — дедилар почча мен учун қайғуриб. Кейин ойимга ўгирилиб сўрадилар: — Ҳой, Саломхон, шўтта қолавурса-чи? Ана, қанча уй ҳангиллаб ётиби. Ётиб ўқийверсинг!

Ойим танча кўрпанинг қавифини текислаб — хаёлланиб қолдилар. Мен эсам, бир чеккаси қандай яхши бўларди, деб учиб-қўниб турибман-у, бир чеккаси ойимларга ачиняпман: унда

ёлғиз қоладиларми, Асол холамларга ўхшаб? Йўқ, қийналсамам...

Ойим бошларини кўттардилар. Юзлари ёришиб бир у кишига, бир холамга миннатдор қарадилар:

— Майли, почча, қолдирсан-қолдирай. Факат сиз ҳам янги келинпошшани менга кўшворасиз. Мен ҳам ёлғиз қолмай-да, ахир.

Ҳаммалари ялт этиб, бир-бирларига қаравади.

— Ҳо-ов, балли. Балли, Саломхон. Хў-ўп, савобга қолардингиз-да, — дедилар почча ойимнинг топқирликларига беш кетиб, ҳам рапидадай кафтларини тиззаларига ура-ура. У киши бу гапни айтольмай ўтирган эканлар-у, ойим, ойижоним буни қайдан сеза қоптилар?! Уяммас, буяммас, мен бу ерда қолиб, ўрнимга янги кенномим кетаётганидан ҳайратда эдим: қаранг-а, Марғу кенномимга буюрмаган уйлар... унга буюрмоқда эди.

Нима бу — ё тақдир деганлари шумикан?..

## 11. НАВБАТ ЁДГОРМУРОДГА ЕТИБДИМИ?

Биз ҳикматига етолмайдиган воқеа-ҳодисалар қанча-я, тавба.

Қуроқлар ҳам узиб кетолмайдиган ип қидириб, иш орасида дўконга чиқиб қайтаётсам, кўқдан таниш садолар келяпти. Тўхтаб қолаёзибман. Қулоқ тутиб, зингил солсам, шаҳар устилаб роса ҳориб-толган, кўнарга бир макон тополмаган турналар зўрға-зўрга қанот қоқиб, бир ипга тизилишиб келишмоқда. Аҳён-аҳёнда «етиб қолдик-етиб қолдик» дегандек бир-бирларига далда бериб қўйишади, бояқишлир.

Беихтиёр кечаги воқеа ёдимга тушиб кетибди.

Томда қуроқ учираётган эдик. Ипини охиригача бўшатиб, сўри ёғочига боғлаб ташлаганмиз: ўзини осмон ютиб, кафтдек бўлиб қолган-у, дариллаши баралла эшитилиб турибди. Бу ёқда шом тушиб, ивир-живири дараҳтларнинг теппасигача ўрлаб чиқиб борган, лекин қани Ёдортойни томдан туширолсам.

— Шошуманг, бирпас турайлук. Юлдузлар ёнсун, кўрайлук, — дейди нуқул.

Мен унинг кўнглига қараб:

— Майли, ёнса-ёнсин, — дедим.

Ниҳоят, кўкнинг қора барқут духобасида бирин-сирин инжулар пайдо бўлиб, мен яна қистадим:

— Бўлди, тушдик. Ойим уришиб берадилар: қоронғуда томда юрилмайди. Бу ёғига жинларнинг куни туғади.

Ўзини эса кўтариб ола қолдиму нарвондан битта-битта туша бошладим. У жинданми, нимадан чўчиб, бўйнимдан маҳкам қучиб олган, миқ этмасди. Лекин ерга қўйишим билан савол халтаси очилди-кетди: атрофимда гир айланиб, ҳали у, ҳали бу билагимга осилади, енгимдан тортқилайди:

— Ўша жинлар қуроққача ета оладуларму, амаку?!

— Ета оладилар,— дедим, нима деяримни билмай.

— Ундан нару-чи, ўта оладуларму?

— Йўқ, юлдузлардан кўрқадилар.

— Қуроқимуз-чи?

— Тураверади. Биз боғлаб қўйдик-ку, ахир.

Аммо у тинчий олмасди:

— Амақу, амаку... узуб кетса-чу?

— Узса, янгисини ясад бераман, — дедим.

— Янгуси бунақа чиқмайду-да.

— Унда... тушириб ола қолайлук, — дедим кўнглига қараб.

- Йўқ-йўқ, учавурсин-учавурсин, — деб ўйноқлади у.  
— Бўлмаса, кирдик.  
Ўзи орқамдан эргашиб келяпти-ю, саволини қўй-майди:  
— Амақу-амақу, кечаси анувлар келса-чу.  
— Яна нималар? — деб қайрилиб тўхтадим.  
— Анув «қурув-қурув»лар-чу.  
— Турналарми?  
— Ҳа-да.  
— Келса, нима қипти?  
— Урулуб кетса-чу?..  
Мен баралла кулиб юбориб, елкасига қоқдим.  
— Ҳў-ҳў, уларни билмаскансан!  
— Нега? — деб сўниқди у.  
— Улар сезгир! Арғамчисининг бошию учида ҳар қўриқчилари борки...  
— Қанақа қўриқчу? — У азза-базза йўлимни тўсиб туриб олган эди.  
— Сен уларни нима деб ўтирибсан! — дедим тушунтиришга уриниб. — Бирор ерга қўниб, нафас ростламоқчи бўлишса ҳам ўша қўриқчилари мижжа қоқмай бир оёқда туриб чиқишади, билдинг.  
— Нега бир оёқда, амаку?  
— Бўлмаса, ухлаб қолишади.  
— Ҳа-а, зўр экан!..  
Эрталаб турсак қуроқ ипини узиб кетибди. Ҳов, бедапоянинг ўртасидан топиб келдик.  
Мен унақа-бунақа қуроқ узолмайдиган ип олиб келишга ваъда қилганман. Ҳозир ичи тушиб кутиб ўтирибди.  
Хонамга кириб борсам:  
— Э, баракалла, қаёқда юрасиз? Уйиздан неча қайта сўрашди, — дея эсхонамни чиқаришди.  
Ичимдан оловим чиқиб:  
— Нега экан? — дедим.  
Булар сўрашмабди, улар айтмабди. Ичим тушиб, ҳеч ерга сиғмай ўтирсам, ҳайтовур, яна чақириб қолишди. Чопиб борсам, аёлим...  
— Адаси, ўзизми?  
— Мен-мен, нима гап? — дедим юрагим бўғзимга тиқилиб.  
— Ишдан келсам.. шаҳардан одам чиқиб, Ёдгоризни...  
— Ким чиқиб?! — деб юборибман.  
— Одам, — деди у.  
— Қанақа одам? Қаёққа опкетади? Ойимлар-чи?  
— Қандай бермайдилар? Катта буваси сўратиб турса, — деди у.  
— Қанақа буваси? Бува нима қилади унда?! — деб бақириб бердим.  
— Мен билмасам, адаси...  
— Хўп: бувасининг номидан келган... қандай одам экан? Суриштирмай бериб юбораверадими?  
— Машинада опкетган одамларни айтипсизми?  
— Кимни бўларди?! Жилла қурса, машинасини эслаб қоптиларми?  
— Эс-ки «Победа»муш.  
— Ичидагилар-чи?  
— Бинойи кийинган, сипо йигит дейдилар.  
— Ёлғиз ўзи эканми? — дедим тасаввур эта ол-май.  
— Йўқ, қўшниларнинг айтишича, машина орқасида бир милиса ҳам ўтирганаканмуш.

— Э, баракалла сизларга! — дедим захримни кимга сочаримни билмай.— Бўпти, мен ўшанақаси ўтиб бораман, — деб телефон-қулоқни жойига ташладим...

Нега ўшанақаси дедим, ўшанақаси деганда нега Ёдгормуродларникини назарда тутдим — ўзим билмасдим. Назаримда, уларни авраб, болани олиб кетган кимса, албатта, Чаман акаларникига кирган, Ёдгорни суриштириб билгандек эди. Аммо ўзи ким, Кемшиктойни ўғирлаганларга қандай даҳли бор — хеч тасаввур эта олмасдим. Бувиси ҳам эмас, буваси эмиш! Ол-а, шоввозлар! Роса буларнинг кўзини шамғалат қилиб кетворибдими?! Чаман акам келган тақдирда ҳам бундай қилдирмасди-ку. Бу ерда бошқа гап бор. Бошқа бирор келган. Қолаверса, кеча кечаси қуроқнинг ипини узиб кетиши, мен янги, маҳкамроқ ип қидириб юришим, шу пайтда хориб-толган турналарнинг шаҳар устилаб ўтуви — буларнинг ҳаммасида бир сир бордек, ҳаммаси бир-бирига боғлиқдек кўринар, миямдан Ёдгорнинг анув гапи, булар қуроқимизга урилиб кетмайдими, дегани кетмасди. Мана, энди ип топганимда ўзини олиб кетишганмиш. Тавба, Қумлоққа сўроқлаб боришдан бошқа йўл кўролмасдим. Бошқа қаердан ҳам излардим уни?

Ўзи нималар бўляпти? Кемшиктойнинг йўқолиши, Сариқ мошак бир девонага эргашиб кетиши — тушунарли. Тушунса бўлади. Анави сувилондан азбаройи безганидан кетса кетворгандир. Лекин Ёдгормуроднинг йўқолиши... — далага топиб бориб, олиб кетишлари-чи? Фаройибдан фаройиб эди. Негадир ўзимни доғда қолгандек сезиб кетяпман. Эртага Чаман акага нима дейман? Онаси — кеннойимнинг олдига қай юз би-лан бораман? Ким, қайси номард журъят этибди бу ишга?

Ўша Калковуз бўйидаги таниш хонадонга борсам, ҳаммаёқ сув қўйгандек жимжит. На чимирилган «сув-илон» кўринади, на юзини сепкил босган Кемшиктой. Якка тавақа эшикни очиб, ичкарига кириб борибман ҳам, ошхона олдига ўтиб чақириб турибман ҳам, қани бирор овоз берса.

Ниҳоят, уйнинг орқасидаги ҳовуз томондан уч-тўртта эски бағаз кўтариб, пешонасини қийиқ билан танғиган одам чиқиб келди.

У мени эшитди, десам, курси устига чиқиб, бағаз боғлашга уннай кетди. Ноилож, чақириб боравердим. Боғ коровулининг роса «том битгани»га учраган эканман. Унинг қулоғи ёнидаги зирақ-аппарати «ўлиб қолган»ми, ёнига борганимдагина кўрибди.

У соч-соқолига оқ оралаб, қошлири тикрайиб ўса бошлаган оғиркарвон одам экан, саломимга алик олиб, пастга тушди.

— Келинг, жиянми? — деди зирагини тўғрилаб. — Биттаси хар вақтдагидек йўлга кетган. Токлар ҳам қаровсиз қопти, — деди ишкомларга ишора этиб.

— Бошқалар-чи? — дедим.

— Бошқаси — идорама-идора юрибди! — деди ачиниб, — лекин аёл — аёл-да. Аёл кишининг қўли қаерга етарди. Нима дедингиз?

«Сувилон»ни айтаяпти.

Ахийри қулоғига чўзиниб дедим:

— Идорама-идора болаларни суриштирибми? — Азага борган хотин ўз дардини айтиб ийғлаганидек, мен ҳам «ўз дардим»дан келар эдим.

— Кечирасиз, тушунмадим, — деди боғбон қўлини қулоғига тутиб.

— Болаларни айтаяпман, қай бирини қидириб кетдилар?

Оғиркарвон одам елка учирди:

— Билмасам, жияннинг саннашидан асрандиси шекилли, — деб туриб, қўшиб қўйди. — Ҳа, айтмоқчи, анув ширинтой ҳам кўринмайди. Ижарада турган келиннинг жужуғи. Сўрамабман ҳам.

Сал енгил тортган жойимда ичимга қайта оғир тош чўқди. «Уни булар сўратмаган экан-ку, сўратса шу ерда бўлмасмиди?!»

— Ичкарида ким бор, буви бормилар?

— Борлар-борлар, ўтирибдилар шуларнинг дуои-жонини қилиб. Кираверинг.

Оғиркарвон боғбон (буларга тоға бўлса керак) зирак-аппаратини ўчириб, курсига чиқди-да, кўтарилиган ток новдаларини боғлашга тутинди. Мен ўзим билган уй томон юравердим. Ё кудратингдан, бу мўъжазгина, саранжом-саришта уйда аттор қутисими, нима бор эди, кирмасиздан аллатовур ифор ҳидларга қўшилиб, бир ажиб бўй — қалампирмунчоқ<sup>5</sup> ҳиди гуркираб келар эди.

Афтидан, Ойтўра буви менинг қорамни кўрибоқ кўнгиллари бўшаб, бир ерга етганлару яна кўзёшларини апил-тапил артишга уриниб, қўллари билан қалампирмунчоқ шодасини ушлаб кўйгандек эдилар. Мен шунинг устига салом бериб кириб бордим.

У киши (киприклари ўша-ўша нам, ўзлари ийманган ҳолларича) мени қаршиларканлар, юзларига нур иниб бормоқда эди.

— Келинг, айланай. Ваалайкум ассалом, мирзо йигит. Холангиз ўргилсин, бормисиз? — у киши тасбехларини тиззалиридаги оч қўнғирранг тивит адёл устига ташлаб, қўлларини чўзиб эдилар, мен энгашиб елкамни тутиб бордим. Ва шунда дўланаранг тасбех учida қалампирмунчоқ шодачаси борлигини кўрдим. Ҳа, мана, гап қаерда эди!

Буви елкамга қоқиб, пешонамдан ўпганлари камдай, қаншаримни силаб қўйдилар. Бир роҳат сездим, бир роҳат сездим.

У киши қўл очиб, дуо қилар эканлар, ҳатто нима ташвишда келганимни-да, унуга ёзган эдим.

— Яхшиям сиз, сиздай хабар олгувчимиз бор экан. Худойимнинг ўзи меҳрибон-да, Чаманимнинг ўрнигаям сизни етказиб турибди...

Ох, кошки ўзим келган бўлсан!

Мен бош эгиб, ер чизиб қолган эдим. Аммо сир бой бериб бўлмасди. Шу заҳоти ўзимни ўнглаб:

— Ҳалиям қайтмадими у ўйинқароқ? Биз хувиллатиб кетибмиз-да, уйларингизни? — дедим, аммо қани Ёдгор ҳақида айта олсан. Тилим тугиғлик, дардим ичимда эди.

— Асалим шунча жойларга югурибам ҳеч иш чиқаролмади. Осмон узок, ер қаттиқ. Аёл киши — аёл экан. Мана, ўзиям билди, бояқиш.

Мавриди келган эди, сўрай қолдим:

— Милиса-чи, келмадими?

Ҳамма нима ғамда, мен ўз дардим билан эдим!

— Келди-келди, бу ёққа кирмади-ю, лекин тепагача чиқди, — дедилар буви.

— Тепада — болохонада мақиб юрибди? Ақбартойнинг масаласида келган бўлса?

— Билмасам, — дедилар у киши ҳам ҳайрон қолиб.— Аввал Асал билан бир нималарни гаплашди, кейин чиқди.

— У кишини эргаштирибми? — дедим ичим ғурмишлаб. Мен изқуварнинг дарди нима экан, билолмасдим. Ёки Асалнинг ўзи оғзидан гуллаб қўйдимикан, Чаман акам йўғида? Ҳаммасидан шуниси мени талвасага солиб қўйган эди. Буви бош тўлғадилар:

— Йўқ, тушавермагач, чиқди шекил. Шундан кейин, хўп, опахон, хўп, бехавотир бўлаверинг, дараги чиқиши ила хабар қиламиз, деб чиқиб кетди.

— Қизиқ, нима излаб келибди?

— Болаларнинг суратини сўрабдимиши.

— Иккаласиникими?

— Асални гапи-да... Мен балки хато эшитгандирман.

Менга шунинг ўзи кифоя эди. Бекорга болохонага чиқмаган, суратини сўрамаган. Кўриниб турибди, бизнигига Ёдгорни излаб борганам, бу ерга сурат сўраб келганам — шулар. Аммо у

<sup>5</sup> Қалампирмунчоқка жичча нам ё бир томчи кўзёш тега кўрмасин, у алладовурга қадар гуркирайверади. (*Муаллиф*).

ким, қандай нобакор? Милиса формасини кийиб олиб, ҳаммани лақиллатиб юрган изкувар?

Буви афт-башарасини кўрмадилармикан?

Шунча ташвишлар билан ҳам у кишининг юзларидан анави ғаройиб нур камаймаган, бу нур юзларининг руҳиданми, ич-ичиданми силқиб турар эди. У кишининг дилларини оғритиб кўймасликка тиришиб, сўрадим:

— Ойнадан бўлса ҳам кўрдингизми ўзини?

— Кимни? Ўша милисаними?

— Ҳа-да.

— Ўтганда-ку, яхши илғамовдим, лекин қайтганда кўрдим.

— Юзиними?

— Ҳа, илгариям бир келган шекилли, Чаманимни сўроқлаб... Анча йил бурун.

— Демак, эски ўртоқлари... Шундайми?

Буви бош чайқадилар:

— Унисини билмадим. Лекин ғумалоқ юзли, қозоқбашара йигит эди. Ҳозир ҳам кўз олдимда турибди. Қизил шапкаси ҳам тусини ўзгартиргананди.

— Э, уми? Худонинг хўл балоси! — деб юборибман. Ўзимнинг гапимдан ўзим уялиблар кетдим.

— Йўғ-е, сипо қўринди-ку, — буви кишини бунчалик ёмонлаш жоиз эмас, демоқчи бўлардилар.

Мен гапимни сипоришиладим:

— Чаман акамдан ҳайиқкан-да. Агар ўша Эски Жўванинг милисанлигидан ҳайдалиб, бизнинг ёққа ўтказилган одам бўлса, мен уни биламан, — дедим. — Қайтаришибдимикан яна?

— Танисангиз, суриштириб қўринг. Ўзи кўнгли ўксик эди, қаерларда қолдийкин, болам бояқиш, сифинди бўлиб?..

Мен ҳалиги гапдаёқ адо бўлган эдим. Бошим гир айланиб, кўзим тиниб-тиниб келармиди, ё туришга интилармидим, ишқилиб тезроқ кета қолсам, деб қолгандим.

Ахир: ҳувиллаблар қолдик, Ёдгортойни қачон опкеласиз, деб қолсалар, нима дейман? Қайси тил билан мен — ўзим уни излаб юрибман, дея оламан? Ундан кўра...

— Менга жавоб берсангиз, — дея олдим ахийри тил-забон битиб. Яна: дуо қилинг, деган каби қўлимни очдим.

— Илоҳо омин, оғир кунларда бизга бўлишибсиз, Сизга ҳам қайишадиганлар кўп учрасин. Биздан қайтмаса, Оллоҳдан қайтсин.

Қайси яхшилигимни айтадилар? Ҳали билмайдилар-да, куппа-кундузи болани олдириб кўйганимизни билсалар, нима дердилар экан?!.

Тезроқ кетиш керак! Кимнинг гапи — топшириғи билан қилди экан? Бу ёққа келгани етмагандай, бизникигача қаердан топиб бордикан? Яна шунчалик қисталанг опкетгани-чи? Нимага шошган, ошиқкан?

Турдим. Мингта Қўқон манзиратлар билан хўшлашиб, чиқа бошладим. (Бу манзиратлардан ичим сидирилиб боряпти).

— Кеп туринг-а, йўқ бўлиб кетманг-а? Чаман акангиз ҳам тайинлаган-а?

— Хўп-хўп. Эсимда. Кемай қаёққа бораман?!

Анави ток тараётган «зиракли» тоға билан ҳам хайр-лашиб жилаяпман-у, ичкарида бир нимасини унутган одамдек, галдирадим. Кўзим ҳадеб анави болохонали уй деразасига кетиб-кетиб қоляпти. Назаримда, ўша дераза тавақалари бирдан ланг очилиб, ўша той бола — Ёдормурод:

— Амақужон! — деб чақириб қоладигандек, қайрилиб қараганим-қараган. Аммо қани, чақирса! Ҷақирмасди! Энди у уйга киришга, уч ёғидан уч хил одам кўринадиган у сувратни кўришга йўл бўлсин! Назаримда, ўша азизларим «Нима бўлди? Бизни Ёдормуродимизни,

ширинтойимизни нима қилиб қўйдинг? Нимага асрай олмадинг?», деб туришгандек, таъна этишаётгандек.

Мен эсам, қўлимда турмадан тортиб, энг олий идораларгача кириб боришга қодир хужжат туриб, қаерга боришни, кимга учрашни билмасдим: Бизни ким чув тушириб кетди экан? Ўша бинойи, сипо йигитнинг ўзи ким? Уни ким бошлаб борибди? Ўша қозоқ башарами ё бу уними? Ажратиб ол-чи? Мен Калковуз бўйида худди иссиқлаб кетган одамдек юзимни пишиб-пишиб чайганча, ўтириб қолган эдим. Наҳот ўша суллоҳ уни эргаштириб бориб, болани олиб кетган бўлса? Мен уни кошки билмасам... Холамларникида турганимда неча марталаб суриштириб борган. Мениям, кенномиймниям...

Бир куни ўқишдан қайтсан, дарвоза олдида қоқкан қозиқдек турибди. Мени кўриб:

— Ия, жанобларининг ўзлари-ку! — деди ирша-ишиб, — ҳалиям шўттамисан? Жариманинг каттасини солмагунимча туравурасан шекилли. Уйда ким бор? — деди мишиллаб.

— Билмасам, кўриб турибсиз, энди келяпман, — дедим дарвозани очишга шошилмай. Ётганидаям ки-йимини ечмай ётадими, формасини ёғ босиб, ёқаю тирсаклари, тиззалари ялтиллаб кетган эди. Кейин ундан ачимсиқ маҳорка ҳиди анқиб ётарди.

— Почча қаердалар? — деди ичкарига ишора этиб.

— Тахорат оляпгандирлар-да, — дедим сир бермай.

— Хола-чи? — деди суриштиришини кўймай.

— Билмасам, — деб елка қисдим.

— Меҳмон-чи? — деди у дабдурустдан.

— Қанақа меҳмон? — дедим анграйиб. — Ўзимми?

— Сен — отни қашқасини билмасканманми? Анув келинни айтаяпман. Чегарадан ўтиб келган-чи! Кимни гел қиляпсан? — деб ўдағайлади.

Дамим ичимга тушиб кетди. Лекин бу ипирискига айтиб бўладими!

— Мен... унақа меҳмонни кўрганим йўқ, — дедим кўзимни лўқ қилиб. Худди у ишонадигандек яна қўшиб қўйдим, — бошқаси билан адаштираётгандирсиз.

У мазах қилгандай иршайди:

— Ҳе, қишлоқи!.. Кимни лақиллатмоқчисан?! Аввал мишиғингни эплаб ол, — деди-да, ипга осиғлиқ чўпни тешикка тиқиб эди, занжир тушиб, эшик очила қолди.

— Бошлайдиларми ё ўзим кириб бораверайми? — деди мени масхаралаб кулиб, сўнг қорни ғарч-ғурч босганча тепа уйга қараб чақириб бораверди:

— Ҳов, ким бор? Қараворасизларми бундок!

Почча намозни бошлаб кўйганлар шекилли, ёлғиз нокнинг рўпарасидаги ойнаванд равоннинг эшиги очилиб, зинада Муҳаббат кеннойи кўриндилар. У киши адл қоматли, хонзодаларга ўхшаб қаддиларини ғоз тутиб, бир чиройли юрар эдилар. Шу юришда викор тўкиб кела бошладилар. Милиса уларни кўриб, қадами товсиллаб, ошхона эшигига тўхтади.

— Кеннойижон, узр, — деди ялтоқланишга тушиб,— хизматчилик. Сизларникида...

— Нима, бизларникида?.. — дедилар Муҳаббат кеннойи пинакларини бузмай.

— Бепрописка одам... турипти экан. Шунақа хабар тушиб...

— Ким экан ўша... хабаргир? Қаний?.. — деб у киши қўл чўздилар. Мен ортда — ўз дарсхонам эшиги кесакисига суюниб турардим, оқибати нима билан тугаркин деб.

Участковой ҳали у, ҳали бу чўнтагини кавлаб, талмовсиради:

— Ие, қопти-ку. Кечирас, идорага ташлаб келавурибман.

Муҳаббат кеннойи пинак бузмадилар:

— Қолган бўлса, опкелинг. Мен бир кўрай, ўша тухматчини!

— Энди, кеннойижон, — деди милиса, — опкелганимдаям беролмайман сизга. Қонунда йўқ.

— Шунақами? Хатни текширишга қонун бор, кўрсатишга йўқми? Кимни лақиллатаяпсиз? Қани, бир туёғингизни шиқиллатворинг-чи?! — деб у киши қўлларининг орти билан товук

кўригандек ҳайдашга тушган эдилар, у қизариб-бўғриқиб кетди.

— Мен билан ўчакишманг, кеннойи. Охир яхши чиқмайди, — деди пўписага кўчиб. — Биламан, сизлар хориждан ўтиб келган одамни... яшириб ўтирибсизлар. Биронтанглар қамалиб кетсанглар...

— Вой-вой-вой, кўрқитиб юбординг-ку, жуда. Аввал топ-да, кейин гапир! — дедилар Мұхаббат кеннойи.

— Кўймаяпсиз-ку, ахир, — деди у.

— Бор, ана, топиб олақол. — Мұхаббат кеннойи йўл бериб, четланган ҳам эдиларки, почча тўрдаги уйдан чиқиб келдилар. Кейин новвотранг хассаларини тиззаларига олганча, деразанинг пастак тахтасига чўқдилар. (Бир вақтлар расм бўлган шекилли, ўша тўрдаги уйнинг иккала деразасига ҳам ўрнатилган арча қопқалар ўнгиб кетган эди). У киши кафтларини қошларига тутиб, унга зингил ташладилар:

— Зокир, ўзингмисан, қизигар? Нима бало, бетта биз туришимизни... унутиб кўйдингми? — дедилар нимагадир шама қилиб.

— Ассалому алайкум, почча, ўзингиз шўттайкансиз-ку, — деди у ҳайтовур саломини унутмай.

— Ваалайкум, ваалайкум... Ҳа, сени нима жин урди, Раҳматулла аканг қаерда ишлашини билардинг шекилли? — дедилар у киши. (Раҳматулла aka Мұхаббат кеннойининг эрлари, аллақайси катта идорада ишлайдилар).

— Биламан, почча, биламан, — деди у анча ҳовридан тушиб. Сўнг беш қадам наридан тавозеланиб бора бошлади. — Лекин хизматчилик экан, илож қанча?

Хужранинг қия очиқ эшигидан Минавар опам мўралаб, айвонда қора духоба пахталика холам кўриндилар. Почча эса, милисанинг киприк қоқмай ёлғонлаши наша қилиб, қиқирлаб кулдилар. Балки жаҳллари келиб, кулги билан енгаётгандирлар...

— Хизматчилик, дегин? Қизиталоқ, бу сенга хизмат топиб берадиганларам кўпайиб қоптида, а, Зокир? — деб тегищдилар. Сўнг қўлини олиб, афтига ҳам қарамай бош чайқарканлар, дабдурустдан сўрадилар. — Агар тополмасанг-чи, нима бўлади? Жазолашадими?

Зокир қўлини бўшатолмагани устига нима деярини билмай гангиган эди.

— Жазо-ку... беришмас, лекин гап тегиши мумкин, — деди.

— Шунақадан икки-уч марта бўлиб қолса-чи? Бўшатвормайдими, қизиталоқлар?

Бу гапдан у баттар довдираб, елка қисди.

Почча қўлини қўйиб юбориб, хумдек бошларини сараклатдилар:

— Чатоқ, чатоқ, Вазифанг оғир экан, Зокир, — дедилар. Ва кутилмаганда: — Ана, бор, қирақол. Хоҳлаган жойингни титиб чиқа қол, — дедилар.

Зокир буни кутмаган экан, тинтувни қайси уйдан бошлашни билмай каловланиб қолди. Мұхаббат кеннойининг зинаси томон юра туриб, бирдан айниди. (Ё Мұхаббат кеннойининг бояги шахтидан чўчиди, ё Раҳматулла аканинг қаерда ишлашини хотирлаб қолди). Қайта туриб, поччага ялтоқланди:

— Сиздақа тушунгандек одамнинг садағаси кетсанг арзийди, почча. Анув раисингиз бор-ку — Маматохун! Шундоқ қора бўлиб туришга унамади-я. Шошмай турсин. — Айвон ёнбошидаги хужра томон юра туриб, ўз кўнглида изн сўради. — Шу бир чеккадан бошлайверай-а? Қани, опоки, ўзиз бошлай қоласизми?

Холам пахталикларининг тугмасини ечиб-қадарканлар, поччага яқин бориб, қулоқларига бир нима дедилар. Почча бояги-бояги бош сараклатиб, қиқирлаб куларканлар, соқолларини тутамлаб-силаб туриб:

— Кўյавер, санга нима, тинтадиган у экан. Манга деса, кир ўрага тушиб чиқмайдими?! — дедилар.

Зокир милиса айвонга ўтган жойида тўхтади.

— Милисани мазах қиляпсиз, шекилли, почча? — деди у кишининг қиқирлаб қулишларидан чинданам оғриниб. Билмайдики, почча бир нарсадан жаҳллари чиқа бошласа, ўзларини кулиб енгадилар.

— Бор деганда боравурмайсанми, тепчилмаган дўппиларинг билан кимни нима иши бор?! Унга бош-қа бирав керак. Хориждан келиб, яшириниб ётган одам керак. Қаттан биласан, балки у катта қўпорувчиdir. Душманни яшириб ётгандирбиз?! — дедилар овозларини кўтариб.

Поччани ҳеч бу алпозда кўрмагандим: у киши хассаларининг учини қатқалоққа уриб-уриб сўзлар эдилар.

— Мен бир нарса дедимми, Санобар, ана кўрганча кўриб, қидирганча қидирсан, йўқ нарсани, — деб холам ҳужрага бошладилар.

Зокир поччанинг авзойлари нимага айниганини англаб турган бўлса ҳам иккиланга-иккиланга холамларга эргашди. Мен бу машмашанинг нима билан тугашига ҳеч ақлим етмасди. Тавба, почча нега бундай қиляптилар? Айтиб қўя қолсалар бўлади-ку! Сен қидирган одам йўқ, овора бўласан, жўнаб кетиб бўлган десалар, олам гулистон-ку. Атай калака қиляптиларми?..

Мен оёғимдан совук ўтиб бораётган бўлса ҳам, кириб кета олмасдим. Ўн кун излаганда кеннойимни тополмаслигини биламан, лекин бу машмаша нима билан тугаши қизиқ.

У ҳужрадан тортиб, барча уйларга, ҳатто Мұхаббат кеннойининг равонигача бош суқиб чиқди. Бостирмани айланиб кўрди. Бурчакдаги минг хил эски-тускилар сақланадиган жойга кириб, қанча йўқ бўлиб кетди. Кейин билсан, бўш сандиқлару мени бўйимдек-бўйимдек хумлар ичигача бош суқиб кўрибди. Ахийри, қўлининг чангини қоқиб, ҳовлида гарданини қашлаганча туриб қолди. У қаердандир елкаларига неча йиллик исларни илаштириб чиққан, лекин ўзи сезмас эди.

— Хўш, кўнглинг жойига тушдими? Ё том тагларигаям чиқиб боқасанми? — дедилар почча ўша-ўша дераза раҳида жилмайиб ўтирганча. Кейин ҳозир чучкириб юборадиган одамдек лабу лунжларини бир ғалати бужмайтирилар.

Кутилмаганда бу унга тегиб (ё чинданам баҳона тополмай турган эканми), бирдан чўчонглай кетди:

— Кулинг-а, кулинг! Сизга одамни устидан қулиш бўлса! Ҳали йифлайдиган вақтлар ҳам келади! Шошмай туринг. — У зарда билан қўл силтаб, жўнай бошлаган эди (кўриб турибман, холамнинг юzlари оқариб кетди, Минавар опам «ада-ада»лаб қолдилар, Мұхаббат кеннойи эса, милисани инсофга чакиришга тараддуздланиб, қадам босдилар), почча уни хотиржам чақирдилар:

— Менга қара, — дедилар муҳим гаплари бордек. Зокир ҳам бунга ишониб, ўгирилди. У киши аста имладилар. — Бу ёққа кел. Кел, келавер.

У ҳам ишониб қайтиб борди.

— Қулғингни бер, — дедилар ўтирган ерларида қўлларини чўзиб.

У энгашди.

Ҳаммамиз ҳайрон бўлиб турибмиз. Нима гаплари бор экан, деб. Почча унинг бошини ўзларига яқин тортиб, қулғига бир нима дедилар.

— Йўғ-е!.. — деди у кўзлари ола-кула бўлиб. — Эшитганим йўқ-эшитганим йўқ. Чинингиз билан-а? — деди ишонолмай.

— Чин, чин. Чиндан, — дедилар почча турқларини қилча ўзгартирмай.

— Бизда... бизда унақа маълумот йўқ-ку, — деди Зокир тамоми гангиб.

Почча қулдилар:

— Ҳе, сен бу ёғини эшит, — деб яна қўлларини чўзди.

У энгашди. Ва яна почча бир нима дедилар.

— Бир карвон? Шаъм? — деди. Зокир боягидан ҳам гарангсиб. — Нима қиларкан шунча шаъмни?

Почча қулогингни бер, беравер, деган каби яна қўлларини чўздилар.

У яна энгашган эди, яна бир нима деб, кулиб юбордилар.

Зокир турган ерида сачраб, боягидек чўчонглаб кетди:

— Эй боринг-е! Эй қўйинг-е! Мен сизни туппа-тузук одам десам... — У чўрт бурилиб, шатиллаб чиқиб кета бошлади.

У киши нима дея қолдиларки, Зокир милиса чаён чаққандек бу хонадондан чиқиб бораркан, йўлакай орқасига ўгирилиб:

— Ҳали шошмай туринг. Шаъм қанақалигини кўрсатиб қўяман! Милиса билан олишишни кўрасиз ҳали!— деб жавраб-саннар эди.

Почча эса, қани парво қилсалар! Қайтага хумдек бошларини чайқаб-чайқаб, кўзёшларини арта-арта кулардилар. Ўзларини тўхтатолмай: «Вой, Зокири тушмагур, вой, Зокири тушмагур, ҳолинг шу экан-ку», деб қўярдилар.

Қараб туриб, мен у кишини суюб кетдим. Қара-я: шу суллоҳгаям бас келадиган одам бор экан-а!

У оstonадан ўтдиям, орқасидан дарвоза шарақлаб ёпилиб, занжиру ҳалқалари ўйнаб кетди. Унинг вахимасидан ҳаммамиз чўчиб тушибмиз. Аммо почча тирқираб чиққан кўзёшларини кафтларига арта-арта ҳамон «вой қизиталоқнинг югурдаги-еј», деб кулар эдилар.

Ахийри холамларга забон битди:

— Ҳай, Санобар, шу одатиз қолмади-қолмади-да. Ахир кетвотувди-ку, итдек бўлиб?... Зарилмиди жигига тегиш? — дедилар важиллаб ва юзларини буриб уйга қараб юрдилар.

— Нима дея қолувдиз, опоқта? — деб кулимсирадилар Мухаббат кеннойим.

Мунаввар опа эса ҳиринглаб ҳужрага кириб кетдилар.

Почча қўл силкиб, бош чайқадилар:

— Кейин-кейин. Бир кун келиб, айтиб бераман, кулиб юрасизлар.

— Ҳозир айтсангиз-чи? — дедим мен.

— Қизифи қолмайди, жиян. Аммо-лекин бир туширдимми, қизигарни боласини?! — деб таъсирланиб қўйдилар.

Аммо холам оstonага етмай тўхтадилар, иchlарига сиғдира олмай:

— Умрбодли душманам ортириб олманг-да, Санобар. Кошки ичига ютиб кетса. Худонинг ҳўл балоси-ку, — дедилар жигиллаб.

Почча бир қўллари билан орқа — белларини ушлаганча хассага таяниб туриб, секин ўринларидан қўзғолдилар:

— Сен қўпам ғам ема, Санобар. Худойим Ўзи ғамхўр. Шу ҳўл балоси билан ҳам синамоқчи экан, синайверади. Ҳаммаси Ўзининг қўлида. Ёрлақаш ҳам, қийнаб-қийнаб иймонни чархлаш ҳам. Мен ёлғиз Ўзига таваккал қилган одамман. Бўлагидан қўрқмийман. Биласан-ку, ўзинг, — деб у кишининг кетидан танчали уйга юрдилар. Ва бора туриб, менга «Юр, Мақсадхўжа, оёғингни иситвол. Омон бўлсанг, бунаقا томошаларнинг кўпини кўрасан», деб қўйдилар.

Чинданам бу бир башорат экан. Мана, энди бу хонадонларгача келиб юрибди. Улар турдиган болохоналаргача чиқиб борибди. Болалар эса дом-дараксиз. Бу ишда у иблиснинг қўли йўқмикан? Ҳукуматга хизмат қиляптими ё бошқа бировларга?

Арқоннинг бир учи шу ерда экан, нега соғиб-соғиб олдигача бормай?

Мен ичимда бир жаҳд уйғониб, ўрнимдан турдим. Ернинг тагидан бўлса ҳам топишим керак. Ёдгормурод ҳаққи, кеннойим ҳаққи нима гаплигини билишим керак!

Шу жаҳд билан Эски Жўвага қараб юра туриб, каллам бирдан тиник ишлай кетди: уйга бормай туриб, ойимлардан анигини билмай туриб, мен кимни излаб юрибман? Ахир, сипо йигит бунимас, бошқасини бошлаб борган бўлиши ҳам мумкин-ку. Унда «машинанинг орқасида ўтирган формали одам» ким? Аввал ўшани аниқлаш лозиммасми?..

Мен жаҳд билан уйимизга қайта қолдим. Ахир унинг изи қаерда йўқолибдики, мен

қайтмасам?..

(Алҳамдуилилоҳ ало тавфиқиҳи. Китобнинг аввали ана шу жойда эътиомомига етди).

## Иккинчи бўлим

### ҲИЖРОН ШЕВАСИДАГИ МАҲФУЗ ХАТЛАР

#### 1. КЕМШИКТОЙНИНГ СИРИ — ТЎПИФИ ЧИҚҚУНЧАМИДИ?

##### Ёхуд ҳикоячига қоронғу муаллифга аён бир сафар тарихи

Фалокат оёқ остида экан. Қанча ёлғизтуёқ сўқмоқлару тийғончиқ музликларда қоқиниб-суринмаган жонивор довонга чиққандা панд еб, мункиб кетса-я. Тағинам Худо асради. Белигача кириб кетган отни қор ичидан бир амаллаб тортиб олишди. Қоловуз қирғиз чол ҳам ўзига пишиқ экан, таёғи билан қорни пайпаслаб-пайпаслаб бориб, йўлни топиб олди. Жабр кўргандан бола кўрди-да. От устидан учиб кетганда қандай тушди экан, етиб боришганда бояқиш тўпигини ушлаб чинқириб ётар эди. Чиққан бўлса шукр-а, синган бўлмасин!

Бўш-баёвгина кўринган қирғиз чол балодек табиб экан. Кемшиктойни алдаб-сулдаб, тўпигини кўрган киши бўлиб туриб, оёғини бир бураб тортган эди, боягидан баттар чинқириб юборди. Чол:

— Бўлду-бўлду, чопқилдаб кетусан, — деб кафтини кафтига қокиб, ўрнидан турган бўлсада, бола (роса қўрқиб кетган эканми) оёғини ҳеч ерга қўйдирмас, қор-муз устига ўтирволганча, мишиғ-тупугига қоришиб йиғлар эди.

Бу ёқда — кун кетиб, шом тушиб боряпти. Ўнгдаям, сўлдаям тоғлар, тоғларки, бир-биридан улуғ, бир-биридан ҳайбатлав. Туман бирининг ярим белига ўрлаб чиққан бўлса, бошқаси ботиб кетаётган қуёш нур-ларида музтоғдек ярқирайди: чўққиларида булут оқ салладек ўралиб-айланади, айланиб-ўралади. Фақат паст — улар тушиб бораётган томон қўз илғаган жойгача оқаришиб турибди, ундан у ёғи — хов дара четидаги қарағайзорларгача шом қоронғилигига чўкиб бўлган. Шунақа палла.

Бу аҳволда ўша нажот дарасига қандай етиб олишади, ёлғиз Оллоҳ билади. Қолаверса, бу довонда — анув қор остидан чиқиб турган қора харсанг тошлар устида жон сақлабам, тонг оттирибам бўлмайди. Олам кўкламга киргани билан бу ерда ҳали қиши болалаб ётипти. Кечаси билан не синоатларини солмайди бошга! Эс борида қоловуз чолдан орқада қолишмагани маъкул. Униям Худо етказди. Бўлмаса, нима қилишардию қайга боришарди?!

Қулоқлари изғиринда ловуллай бошлиған кўнгилчан одам (унинг қулоқлари гултоҳихўроздек қизариб кетганди!) боланинг тепасида чўнқайганча нима қиларини билмай, бош қашинар эди. Яхшиям Учқўрғондан чиқарда Носир махсумнинг гапи билан сафар олдидан икки ракат намоз ўқиб олгани, «Алҳамду»нинг зам сурасига «Оятал курси»ни қўшиб, хос дуо қилгани<sup>6</sup>. (Бўлмаса, «Саловати тунужина»ни ўқиб, тонг оттиришармиди!).

— Ҳой, юрдик! Эгарга ўтқаз, ўргансин ўтиришният! — Қоловуз чолнинг орқасидан отини етаклаган «Ака почча» илкис қайрилиб, шанғиллади. — Шуни деб кўраримизни кўряпганимиз камми?!

Юракнинг тор-кенглиги гавдага қарамаскан-да, тавба. Отнинг устидан учиб кетгани камдай, оёғи лат еб турибди-ку, болапақирнинг. Тушуниш ҳам керак-да, бунинг аҳволига...

— Мана, ҳозир — туряпмиз, — деб бешикчи боланинг қулоғига шипшиди.— Улар

<sup>6</sup> Оллоҳумма инний аյзу бика мин ваъсака сафара ва кабатил мунқалаб ва суил мунзили вал ахли вал валади». Мъноси будир: «Эй бор Худоё, сафар хатарларидан сакла, қайтиб келишда мол, жон ёки оила ичидан кўнгилсиз ишлар устидан чиқишдан асра».

жилвориши. Бўла қол, Ёдгортой, пайтдан фойдаланиб, иримини қилиб оламиз.

Кемшиктой ўксигини ичига ютиб, унга термулди. Бунинг орасида кўзларини енги ила артиб кўйди. Бешикчи шивирлаб тушунириарди:

— Бунинг энг зўр доруси ўзингда-ку, вой той бола-ей. Шошма, мен тўсиб тураман, сен тўпигингга бир чоптирвиласан. Бўптими?.. Дарага тушгунимизча отек бўлиб қоласан. Бўлақол.

Бола қисиниб ер сузди.

— Вой, полвон-ей, ҳа, сен уялма, таомили шундай,— Бешикчи унинг куракларини силаб қистади. — Бўла қол, мана, пана қилиб турибман.

Бола баттар қисиниб, туришга унналди. Пуштипаноҳ бўлиб ёнида қолган юмшоққўнгил, лекин тарашадек қотма одам ҳадеб қулоғига шивирларди:

— Сен қўрқма, оёғинг музлаб қолмайди. Белбоғим бор, ўшанга чирмаб ташлаймиз.

Бола барибир унамай, ҳакачоқланиб тисарилди.

— Унда шошма, — дедиу бешикчи унинг тақимию қурагига қўл юбориб, даст қўтариб олақолди. — Ҳамонки унамасанг ўзим оптушаман. Бу ахволда эгарда ўтира олармидинг.

Бола аввалига ўнгайсизланиб, тушишга уринган бўлса-да, сўнг ноилож жим қола қолди.

Узун одам қорда икки қадам босдию оёғи мўлжаллаган жойга тушмай чайқалди. Аммо от изига тушиб олиб, юриб кетгач, болага буюрган бўлди:

— Бўйнимдан куч, бўйнимдан. Ҳа, ана шундай. Фақат сен, қўрқма. Пастга тушиб олайлик, ўзим тахтакачлаб қўяман. Қолаверса, Мирзаҳожи бувангникига оз қолди. Ҳали сени опокбуванг кўриб, бир хурсанд бўлсин, бир хурсанд бўлсин. Бизни шундай неварамиз бор экан Тошканди азимда деб. Сен сабр қил фақат. Етказиб борамиз, деб йўлга чиққанмизми — етказиб борамиз. Анув ака почча бунақа довонлару ўғри йўлларни энди қўрмаяпти, қўрқма! — У кўзи оёғининг тагида, ўзи қадамига мослаб гапириниб бор-яптию бола бояқиши оғриқни эслаб қолмасин, деб атторнинг қутисида йўқ сўзларни топар эди, — Мирзаҳожи буванг бизга хонлар ҳам қилмайдиган яхшилик қилган, ҳа. Давлат уйимизни тортиб олиб, бир этак бола билан кўчада қолганимизда, неча йил ташқисини бериб қўйган. У шунақа сахий. Сахийларнинг ҳам сахийси, етти иқлимда топилмайдигани. Одамлар туғишганидан бунақа оқибат қўролмайди. Бир ёқдан мурувват қилиб сочавурадиям, бир ёқдан Оллоҳ ғайб-хазинасидан етказавурадиям. У топган савобни пошшолар ҳам тополмайди, ха.

Олдинда от тийғониб кетиб, қорга уялаб қолди. Бу ёқдагиси эса, ҳуркиб кетганидан тисарилиб, азбаройи кишинаб юборди. Ака почча ўтириб қолган, жон аччиғида жиловни қўйиб юбормай силталар, туришга унналар-у, тура олмас эди. Бояқиши тўриқ, қордан бўйнию боши чиқиб турибди-ю, зўр бериб олдинги оёғига туриб олишга интилади.

— Ҳов, найнов, шерикмисан — ҳаммолми? Болани қўй-да, қараш, — деб чақирди у жон ҳолатда.

Бу эса, болани йўлнинг ёнбағрига шундайча ётқизишга кўнгли бўлмай (ахир, билиб бўладими, текис деб ётқизган жойи ўнгир чиқса ва ё ўпирилиб кетса, боланинг ҳоли нима кечади?) қорни оёғи билан пайпаслаб, шиббалаб кўрди-да, кейин қўйиб, отнинг тизгинини тирсагидан чиқара ёрдамга шошилди.

У думидан кўтариб, ака почча тизгиндан тортиб, «ҳа-ҳу»лашиб бир амаллаб турғазиб олишди. Тағинам жонивор ақлли экан, уннала-уннала, сурина-сурина оёғи остида қаттиқ бир ер топиб, ўшанга таяниб туриб кетди. Бўлмаса, нақ отдан айрилишар экан. Жонивор туриб олибдиям, титроғи тинмайди. Зўр бериб пишқиради. Ўзи тушган чукурга хавфсираб қараб-қараб қўяди.

— Бунинг жони чиқиб қопти, самани об ўт. Ўша билан йўл очиб, тушиб оламиз.

— Туришини қаранг: ўтакаси чиқиб кетипти, юра олармикан? — деди отига ачиниб бешикчи. Қолаверса, болани ким оптушади? Ака поччанинг шу жаҳли бўлса... Муросага келиб: — Майли, унда отларни алмашамизми? — деди ётиғи билан.

Кутилмаганда ака почча уни тушунди. Қорда мўлтирабгина, ҳар замонда бир мишигини тортиб (ҳали ҳам ўксифи босилмаган шекилли) ўтирган саритойга назар ташлаб, фикридан қайтди:

— Бўпти, юравердик. Фақат етишиб олинглар, — дея отини етаклаб, қоловуз чолга эргашди. Бешикчи боланинг олдига қайтаркан, унинг ўтирувидан ачиниб, бир ерга етди: нима бало, бояқишининг қўлига сўзак кириб улгурибдими, кўзида ёш, жонию қўлинни қаерга қўйишни билмай қопти? Ҳали силкиб, ҳали бармоқларини эзғилаб, «кух-кух»лаб бир ерга етяпти? Шунаقا, сўзакнинг кириши осон, чиқиши қийин. Чиққанда ҳам «игна»ларини санча-санча, жонжонигача оғритиб, кейин тарқайди! Унинг давоси муз ёки қор. Қорга ишқаш лозим.

— Шошма, тойчоқ. Ўзингни бекор қийнама. Сўзакнинг давосини мана биздан сўра-да. Биз топамиз-да,— деб у саритойнинг тепасига чўнқайди ва қўкариб кетган қўлчасини кафтига олди. — Вой-вой-вой, тоза яхлабсан-ку, чақаман дейди-ку! Қаерда бундай совуққа олдирдинг? Энди шошма, озгина чидайсан, — дея оёғи остидан бир сиқим қор олиб, кафтчасини (бармоқлари билан қўшиб) обдан ишқай бошлади. Азбаройи қаттиқ ишқаганидан қор сочилганча сочилиб, охиргилари эришга келди. Яна олиб ишқади. Унисини ҳам шундай қилгач:

— Бўлдими, ташлаб қочдими ё ҳалиям?.. — деб жилмайди.

Саритой чехраси сал очилиб, енги ила кўз ёшларини артди.

— Энди қўлни чўнтакка ур, қайтиб келиб қолмасдан, — деди-да, қўлинни чўнтакка тиққан ҳамоно от тизгинини билагига солиб, болани тақими тагию белидан кўтариб ола қолди. — Сал пастга тушайлик, отга минволасан. Унгача бу сўзак<sup>7</sup> изғиган довондан ўтиб оламиз, Худо хоҳласа. Кўр, улардан қанча қолиб кетибмиз...

Олдинда пакана қирғиз чол ҳеч кимга қарамай йўл очиб борар, у анча пастлаб кетганигами ёки шом қоронғилиги ўша пастдан тошиб-кўтарилиб келаётирми, унинг қорасини бир қарашда ажратиб олиш маҳол эди. Шошилмаса бўлмасди. Бунаقا паллада изниям йўқотиб қўйиш ҳеч гап эмас.

— Ҳе-ҳей, жура қолинглар, имилдамай.

Ким экан деса, қоловуз чол экан. Овоз пастдан келар, ўзиям муштдек бўлиб кўринар эди.

Тушунди: вакт кутиб турмайди! Тағинам Худо ол қулим, деди! Кеч тушаётганда шу қирғиз чолни етказди. Учта ўн сўмга довондан оптушиб қўйишга рози бўлди. Ўриснинг ўн сўмлиги Николайнин беш сўмлигидан қолишмайди-да, ўзиям! Алмасиши мумкин бу йўлларда. Худди айнимайдиган тилла пулдай. Унамай бирпас тихирлик қилса, шунақадан яна уч-тўрттасини қўшишмоқчи эди.

— Ҳозир! Етиб боряпмиз! — Улар овоз бериб қўйиб, қадам олишларини тезлатдилар.

Тангритоғга етиб олишса, бас! Бунга ўн ҳисса суюнчи кутяпти. Ҳаммани қўйиб, Мирзаҳожи куруқ қўядими! Қолаверса, гап суюнчидаги ҳам эмас. Э, баракалла, ҳамشاҳарлар, шундан-шу ёққа ола келдингизларми, бизни тойчоқни? Томиримнинг томири, данагимнинг мағизини? Ҳай-ҳай, зўр иш қилибсизлар-да. Бир умр эсдан чиқмайдиган иш бўпти-да, деб бир ерга етиши аниқ.

Шунда ҳам бешикчи қарздан узилдим, яхшилигини қайтардим, дея олмайди. Ундан кўргани олдида бу нима бўпти?! У ўнта жонни неча йил қаватига олиб, бошини силагандан... бу бор-йўғи битта томирини асраб-авайлаб етказиб келса, нима бўпти?

Оёқ остидаги қор баъзан ундей тўзиб, баъзан муз каби ғарчиллайди. Тўғрироғи, аввал муз қавати синиб, кейин оёқни «ютиб» кетади. Баъзан тиззага довур, баъзан тўпиққача. Яхшиям олдингилардан қолган из бор, бўлмаса, белдан ботиби кетиши тайин. Кейин бирор келиб тортиб олмаса, чиқиб кўр. Қолаверса, шу бемахалда ким ҳам келиб тортиб оларди?! Эрталабгача қолиб

<sup>7</sup> Оллоҳга минг катла шукр! Неча ойдан бери қўлимга қалам ололмасдим. Боланинг қўлига кирган сўзакдек бир нарса менинг қўлимга қалам олдирмай қўйган, асар шу жойда узилганча ётиб эди! Шукрки, йўқотиб қўйган сўзимни топиб олдим. У сўзак экан! Оллоҳ, бу ёғини ўзинг осон қил. Қаламим учидан тўқилатурган сўзларни ёзиб олишга шошдириб, уни жумла мўминга манзур қил, самимиятлар ато эт! (*Муаллиф*).

кетган киши муз қотиб қолса ҳам эҳтимол... Баъзилар шундай...

Шом ивир-живирлари устига кўнгилга оғир бир ғашлик оралаб борар, бундай совуқ фикрлардан (аввало, Худо ўзи асрасин!) сесканиб-сесканиб кетарди. Яхшиям анави қирғиз чолни учратдилар. Балки у чол ҳам эмасдир, чинакам Ҳизр буванинг ўзидир? Манави болага Худонинг раҳми келиб, Ҳизр алайҳиссаломни йўллагандир. Мусога қиши қаттиқ келади, деб огоҳлантирганда ўртада бир кийик болалаб қўйиб, қиши сурворгани каби... Қолаверса, ниятларини кўриб-билиб турибди Худонинг ўзи. Бу ерда бекорга тентираб юришгани йўқ. Ишқилиб ўзи кўлласин. Манави бировнинг омонатини эсон-омон етказиб боришин.

Бешикчининг қучоғидаги болакай қунишиб ғингшиди. Йўқ, ғингшиди, деса, инграяпган экан. Унинг бир бурда юзи оппок оқариб кетган, устига-устак беҳол тортиб, кўзини юмиб олган эди. Ичидан қириндими, нима ўтди: тўпифи жойига тушмаган эканми! Ҳалигача тинчиб қолиши керак эди-ку?..

Шу кўркувда... қучоғидаги болакайнини баландроқ кўтариб, қулоғига шивирлади:

— Сен кўрқма, тойчоқ, оз қолди. Довондан тушиб олсақ, табиб топтирамиз. Қирғизлар синди-чиқдига зўр бўлишади. Кўриб турасан, отдек бўлиб, чопқиллаб кетасан.

Ё тўнининг тафти ёқди ё ширин сўzlари элитди, болакай тинчиб қолган, факат ора-чира ўқсиғи тутиб, хўрсиниб-хўрсиниб қўяр эди. Кўзлари юмуқ, беҳолгина бағрига сингиб, ғужанак бўлиб олипти. Ишқилиб, иситмалаб қолмасин. Ўз оёғи билан чопқиллаб келаётган болакай... бу ёғига юқ бўлмаса кошки эди...

Юрак нималарни сезмайди. Ярим соатларга қолмай дарага тушиб олишдию қоловуз чол учта ўн сўмликни кафтида тутганча дуо қилиб, орқасига қайтаверди. Кўлидаги таёфини демаса, ишонган ҳеч вақоси йўқ пакана чолнинг шу бемаҳалда довон ошиб юриши, эртаминан қайтарман демай ёлғиз кетвориши чиндан ғалати эди. Кўрқмагани унинг!.. Ростмана одам... юраги дов бермаса керак эди. Шунга қараганд... чинданам Ҳизр шекилли. Фақат пул олгани қизик эди. Ё киши кўзига шундай қилдимикан?

Аслида ўша учта ўн сўмлик киссасида бўлса-чи?

Бешикчи шу тобда киссасига қўл юборгиси ҳам келди-ю, лекин саритой қучоғида эди, аниқлай олмади.

Шу кетишда хуфтонга қадар ўрага тушиб қолгандек юриб (чинданам уч томон қоп-қора баҳайбат тоғлару фақат тепада бир тутам юлдузлар кўринарди, шунақа дарага тушиб қолишибди), алламаҳалда липиллаган бир ёруғга етиб боришиди. Уни чироқ деб ўйлашган эди, тош ўчокдаги олов бўлиб чиқди. Йўлга орқа ўгирган пастак кулба қорайгандан қорайиб кўринар, жимжитлик ютаман, дерди. Аммо чақиришлари билан бузоқдек ит ҳуриб чиқиб, орқасидан оқсоқ одамнинг қораси кўринди.

— Аристан, жат! — Шу бир оғиз сўздан ит жилиб, ўзи елкаси тушиб-чиқиб кела бошлади. У коронғуда хийла ҳайбатли кўриниб эди, асли калтабақай, ҳам туғма оқсоқ экан. Бир оёқи калта шекилли...

— Келинг, қардаш, — деб номигагина тутилган шоҳдевор ёнида тўхтади у.

— Кўриб турибсиз. бемаҳалга қолдик. Бир кеча қўноқ этасизми, деб... — деди ака почча, — чақириб турганимиз.

Унинг гапидан бешикчи хижолатларга тушиб кетди: тавба, бу кишини ким айтади шаҳарлик деб, кўча кўрган деб? Аввал салом, баъдаз калом, эмасми? Ўзи қучоғидаги болакайнини баландроқ кўтариб тавозуланди:

— Ассалому алайкум, амаки. Биз-ку, ҳар ерда тунаб кетаверамиз, лекин манави жужук бор, бунинг устига оёғи лат еб, азобга қолди. Бир кеча минг кеча бўлмас?..

Юзини илғаб бўлмаётган қўрғон эгаси боланинг аҳволини эшитиб, четан эшикнинг тамбасиними, нимасини олишга шошилди:

— Ваэлайкум, ваэлайкум, қудай етказибду — кирингтар-кирингтар, — деб ўзи йўл

бошлайверди, кулбага яқинлашганда яна сўраб қўйди, — уқтаб қоптуму, тайشاқ?

— Озгина мизғиди. Фалокат-да, отдан учиб, тўпифини чиқарип олди. Шу қайтмаяпти, — деб тушунтириди бешикчи.

— Ай, сундайму? Қудай асрасун. Тайлар қоқулуб от бўлур-да, Қудайим ўзимга жўлладида, — мезбон кутилмагандан сўзамол, ҳам болажон чиқиб қолган эди. У ака поччага отларни қаерга қантаришу қаердан ем олишни тайнинлаб, бешикчини яна ичкари бошлайверди. — Қану, қану, опкелинг-чу, самантайшақну бу ярукқа.

Ўзи пастак эшиқдан дахлизга кириб, токчадан кора чироқни олди-да, кулба ичкарисига юраверди. Бу орада бола уйғониб кетган, қаерга келиб қолишганини англай олмай ҳар ёқса бир жавдирап эди. Бешикчи уни кулба эгаси кўрсатган ер — пўстак кўрпача устига ётқизмоқчи эди, бола нимадандир кўркиб, унинг бўйнига ёпишди:

— Йўқ, йўқ, бу ерда қомиймиз, кетамиз. Бувимга кетаман, — у уйғониб бўлиб ҳам ўша йўлдаги гапидан қолмаётган эди, — уйимга обориб қўйила.

— Ий-й, жигит деганам жиглайму? Қану аёқту беринг-чу, узатинг-чу. — Чўнқайиб улгурган чол қўлидаги чироқни намат устига қўйиб, тўпикқа боғланган белбоғни ечиб эди, у қайтиш ўрнига дўмбира бўлиб шишганини кўрдилар.

— Ай, жигит-а! Ай, тайшагим-а! Сунга сунчаликму? Ҳеч нима қилмапти-ку. Давоси шўттаку, — деб у чироқни кўтариб, яна дахлизга чиқа бошлади. У ҳар қадам ташлаганида ўзидан катта, баҳайбат сояси дам шифтдан қочиб, дам улғаёр эди.

Кўзларини мушти ила ишқаб, мишиғ-тупугига беланиб ўтирган болакай чироқ жилиши билан бирдан яна бешикчининг қўлию тиззасига ёпишиб қолди-ку:

— Бўлди, кетайлук? Қомайлук, жон амаки? — Ичкари кириб бўлишганда унинг ҳархашаси ғалати эди.

— Оёғинг бу ахволда... қаерга борамиз? Кўрқма, бу одам шундай силаб-силаб даволайди, — Бешикчи унинг куракларини силаб, юпатишга уринди.

Аммо Ёдгор деганлари тиззасига баттар ёпишиб, азза-базза хўнграб берди:

— Керакмас: силамасин ҳам, қарамасин ҳам! Опоқбувимга кетаман, уйимизга кетаман.

Бешикчи энди бўғзига бир нарса тиқилиб, юпатар сўзини ҳам йўқотган эди:

— Уйинг қаёқда қолди, биласанми? — деди жаҳли чиқа бошлаб. — Ахир, етиб қолдик-ку, етадиган жо-йимизга. Жиндак сабр қилсанг — бувангниги...

Бола энди унинг тиззаларига шаппалаб, бош чай-қаб-чайқаб йиғлар:

— Керагамас менга бува! Қайтариб опкетинглар: мени ҳеч қанақа бувам йўқ, мен Ёдгор ҳам эмасман, Акбарман! — деб уввос солар эди.

Бешикчи энди унинг бошини, куракларини силаб ҳам, «ҳой, той бола, тойчоқ бола, эшит», деб ҳам юпата олмасди. Бу ёқда, дахлизга чиқкан уй эгасидан уялиб, хижолатларга тушиб кетяпти. Булар ким экан, бола ўғрилари эканми, деб ўйламайдими, ахир?!

Чаккасини бир нима сиқиб келиб, болани даст кўтариб оладигандек, икки тирсагидан маҳкам тутдию ўзини секин силкилади:

— Ҳов, бола! Ёдгормурод ўзимман, опоқбувамни соғиндим, деган ким эди?! — деди шивирлаб.

— Алдовдим... ёлғон эди ҳаммаси... — Бола қайта мишиғ-тупугига беланиб борар, ўзи ҳиқиллаб қолган, бошини тиззасидан узиб бўлмасди: шунақа ёпишиб олибди.

— Бизними, девонаними? — дея олди бешикчи.

— Униям... силаниям...

Бешикчи жим қолиб, ичи сидирилди. Ўзи сезмаган ҳолда болани бағрига торта бошлаган, бошини силай бошлаган эди.

— Нега, ўғлим? Нега бундай қилдинг? — деди секин.

Бола ҳам унинг бағрига сингиб борар экан:

— Кетгим, қочиб кетгим... келувди, — деди ўша кўйи ҳиқиллаб.

— Кимдан? Одам ҳам ўз уйидан қочадими, ўғлим? — деди бешикчи овози ўзгара бошлаб.

Бола жавоб бера оладиган ҳолда эмасди, бошини тобора унинг бағрига тиқар, жавоб ўрнига ҳам:

— Кетайлук, кетайлук, — деб ўтинар эди.

Бу орада уй эгаси излаган нарсасини топди шекилли, чироқ, чироққа қўшилиб ёруғ қайта бошладибо бешикчи шошилди:

— Яхши, аввал оёғингни кўрсатайлук, кейин. Жиндек чидайсан, хўп?

Бола кўниб, бош кўтартунча уй эгаси — пакана оқсоқ чол хитой қофозга ўроғлик бир нарса кўтариб остона ошган, йўлакай жилмайиб келар эди.

Бешикчи боланинг елкасига қоқди:

— Кўй энди, бўлар иш бўпти. Аввал ўзинг тузалиб ол-чи.

Шу пайт ковшандозга қоқиниб, пишиллаганча эшикда ака почча кўринди.

— Қалай, тўпиқ жойида эканми? Эгардан учганига шунчалик, от тагида қолса нима бўларкан? — деб кайфи чоғ ҳолда кириб кела бошлади.

Бешикчи унга ўқрайиб кўйди-ю, лекин сир бой бермай чолдан сўради:

— Нима буниз, от ёғими?

— Ҳа-да. Қани, жигит, мен бир кўрай-чу. Тай балдар жиғлайдиму. Кўрқоқ балдар жиғлайду.

— Чол пуфакдай шиша бошлаган тўпиқни ёруққа солиб, авайлаб ушлаб кўра бошлади. Сўнг: — Шашма-шашма, қўркувдирган жери жўқ, қани, мундай узат-чу, янада узат-чу, — деб туриб, кутилмаганда оёғини бир бураб тортган эди, бола чинкириб юбораёзди.

— Ана бўлду, тушду. Жанунг кируб ухлайсан энду. Йа ҳалуям оғруттуму? — деди у боланинг бошини бағрига тортиб қўйиб.

Саритой зириллаб, нари сурилишга уринди-ю, лекин шу баробар оёғини қимирлатишдан ҳайиқиб, уни икки қўллаб чанглаб олган эди.

— Энди қўрқму. Жиғлоқ балдар уйимга кетаманлайду. Сен қараб тур, эртаман чапқилдаб кетусен, — деб кафтидаги мойни ийлашга тушди.

— Уйга? Ол-а! — Узун-узун қўлларини ёнига шаппалаб, шарақлаб кулиб берди Ака почча.

— Ҳа, опокбувангникига кепқолганда-я!.. Э, сени қара-ю.

Бешикчи қаддини ростлади.

— Бир эркалиги тутиб айтди-да, амакиси. Эртага чопқиллаб кетсин, кўрасиз. — У сирни андаваламоққа уринарди-ю, лекин ўзининг ҳам ичидан қиринди ўтиб борар эди; «Ҳали биз Мирзаҳожи бувага шундай «совға» олиб кетаётимизми?..»

## 2. ХОС ДУО

Кечаси алламаҳалга довур гаплашиб ўтириб эдик. Сўнг ичкари уйга кириб, диванга ёнбошлабману қотибман. Назаримда, ярим соат ҳам ухламовдимов. Ўнг ёним билан ётиб, шу ёним билан турдим шекилли. Лекин роса ширин туш кўраётган эканман: кеннойимни қўргани борган эмишмиз. Дераза олдида саломлашиб туриб эдик. Мен унинг оёққа турганини кўриб, бир ерларга етиб кетяпман:

— Вой, тузалиб қопсиз-ку, эм бўлса, шу-да. Ҳали ўзингиз юриб чиқиб кетасиз бу ерлардан, — дейман. Лекин кеннойим очила қолмайди, маҳзун тортиб, ийманиб боряпти. Ниманидир айтолмаяпти ҳам. Бир маҳал қарасам, қўлтиғида қўлтиқ таёқ!

— Вой, кесищдими?! — деб юборибман...

Қўрқиб кетганимдан ўзимга келолмасдим. Туриб ташқариларга чиқиб келдим. Ётиб яна туш кўра бошлабман. Овозини жуда аниқ-таниқ эшитардим:

— Яхшиям Сиз боракансиз, қайнужонум, — дерди бу гал кеннойим, — мингдан минг

раҳмат, Ёдгормуродумни олуп кетупсиз! Уни ўпуб қўйинг! Хўп?..

Ё қудратингдан! Шунаقا ҳам аниқ-таниқ туш бўладими? Бор-йўғи, илтимосини адо этиб, Ёдгормуродни кўздан нарироқ олиб кетганимми? Кейин-чи, бу ерданам илиб кетишди-ку, барибир. Нимадан белги бер-япти бу туш? Нимага табиб тўрамнинг берганлари эмига тушмабди? Тушуна олмасдим...

Бугун ишдан чиқибок қўриб келишни ўйлаб ишхонага борсам, ойна устида омонат хатча турибди. Юрагим шиф этди: ҳамхоналарим ёзиб қолдиришадиган бунаقا хатчаларнинг кўпини кўрганман. Нари борса, муҳаррирнинг йўқлови ё топшириғи бўларди. Аммо буни қўриб... этларим жимиirlаб кетди.

Худо ҳаққи, қўрқибгина очсан, мудиримизнинг ёзуви. (У киши менга ҳеч хат-пат қолдирмасди. Ҳар қандай ошиғич топшириқ бўлса бетма-бет айтарди.) Бу гал йирик-йирик ҳарфлар билан ёзарди:

«Максаджон, қаерларда юрасиз! Шифохонадан чақиришди. Учиб бораркансиз. Бугун оператсиа куни экан. Сизга жувоб! Ёрдам керак бўлса, айтарсиз. Абдулла акангиз».

Тушим ёдимга тушиб... ичим шувиллаб кетди. Наҳот кеннойим?.. Табибининг доруси-чи? Кор қилмабдими? «Ёдгормуродимни ўпид қўйинг» дегани шундан эканми?

Чиқдим. Хат қаерда қолди, эшикни қайта ёпдимми-йўқми, билмайман. Катта кўчага тушиб, дуч келган машинани тўсадим.

Эгаси чаккасига оқ оралаган, хийла босик одам экан, илтижомни эшитибоқ бош иргади:

— Ўтилинг.

Балки менинг куйиб кетганимни қўриб, рози бўла қолгандир. Чиндан мен ҳозир кеннойимдан бўлак нарсани ўйламасдим: «Тавба, Ҳизрдай оқ-оппоқ қарияни тушларида қўриб, дуосини тилдан кўймай ўтирган одам... нечук оператсиага розилик бера қолибди? Ё бирон кор-ҳол рўй бердимикан?» Ичимни ит таталаб, шайтон хаёлимни ҳар ёққа олиб қочарди. Шофёр ҳам «игнанинг устида ўтирганимни» қўриб, машинасини чорраҳалардан эпчиллик билан ўтқазиб борар, ўзим эса, қайси кўчадан кетаётганимизни фарқламай қўйгандим.

— Катта дарвозасига боравурамизми? — деди у бир маҳал.

Мен дафъатан англамаган эканман, кейин тушуниб қолдим:

— Ҳа, ҳа, ўша ёқдан, — дедим, шу баробар хаёлимда анув «жонимни қоқай» хушрўй аёл — эшикбон ая жонланди. Ахир кеннойимни қаерга олиб кетишганини билар-ку, у.

Шифохона дарвозасининг биқинидаги мўъжазгина йўлагу дорбонхона кўзимга оловдек кўриниб кетди. Юргургилаб чиқиб борсам, ойнаванд йўлакнинг орқасида хушрўй опанинг ўзи сарвдек бўлиб турибди. У кишининг ўзи ҳам мени қўриб, ичкаридан чиқиб келди:

— Вой, бормисиз, оповси? Қаерга опкетишганини биласизми?

— Қаерга?.. — дедим ютоқиб.

У узроҳлик билан боқарди:

— Кеча биратўла айта қолмаганимни қаранг. Овора бўлиб келиб ўтирмасдиз. Кечаси билан ич-этимни еб чиксам-а... Машинангиз борми?

Мен бош иргаб, ташқари қараб юравердим:

— Ўзлари қандайлар, ўзлари? Бугун кўрдизми ўзи?

— Кўрдим-кўрдим,— деди овози ўзгариб.— Бағрим-га босиб, шу тасалли бераман, дейман, қани бера олсан. Қайтага ўзи бардошли экан: «Худо бор, опа, Ўзу қўллайду. Унинг хоҳлагани бўладу, бизниумас. Раҳмат, яхшиям Сиз боракансиз», дейди, алқайди. Йиғлаб хайрлашдик. Ойдек жувон... яримта бўлиб қайтса-я?..

— Нимага бирдан айниб қолдилар? Туззук эдилар-ку?

— Туззук эди, оповси, ранги-рўйи ҳам очилиб борајтувди. Нима бўлди-ю... дўхтирлар чоп-чоп қилиб қолиши...

— Ё анув опкелган дорумни... ичмай қўйдиларми?

Опа бош тўлғади:

— Йўқ, ичган сарим енгил тортяпман, деб ўтирувди. Қолаверса, Сиз билганиз йўқ, тўрамнинг ўzlари келиб, кўриб кетдилар.

Мен сапчиб тушдим!

— Қандай! Ўzlари-я? Биров билан адаштирмаётисизми?

Миям ўқдай ишларди: «Ёки бирор у кишининг сувратида келиб... бирон нарса бериб кетдимикан?» Хаёл қурсин, минг ёққа опқочарди.

— Вой, оповси, у кишини танийман-ку. Қолавурса, юзларидан нур ёғилиб турибди.

— Унда... қистаган ким, қўймаган ким? — дедим ичимга сиғдиролмай.

Опа атрофга безовта аланглаб, қулоғимга шивирладилар:

— Бош врачимиз икки оёфини бир этикка тиқиб, каллам кетишини истамайман, консилиум қарорини бузманглар, деб турволганмиш.

Ҳайрон қолдим:

— Ё Тўра бува келганларидан... чўчиб кетдими?

— Билмасам, кетидан келадиган ғавғосига тобим йўқ, дебдимиш.

Кимдан қўрқяпти? Чаман акамданми ё идорасининг номидан? Бошқа гап йўқмикан?

— Чатоқ бўпти. Қайтага энди эшитади эшитадиганини! — дедим зинадан туша бошлаб.

Опа хушёр тортди:

— Ўзига кира қолинг, ҳалиям бўлса.

— Йўқ, энди фойдаси йўқ: ғишт қолипдан кўчиб бўпти. Қаёққа опкетишиди? — дедим.

— ТошМИнинг жарроҳлигига, — деди қайтага баттар ташвишга тушиб. У менга тасалли бера олмаётганидан хижолатда — ич-этни еб, эргашиб келарди.

— Майли, раҳмат, биз кетдик, балки улгуармиз.

Назаримда, улгуриб оператсиани тўхтата оладигандек эдим.

Жўнадик. Қайтага, Оповси опанинг ўзи хижолатда қолди. Ҳамиша шундай бўлган: яхшилик соғинган кишилар изтиробда қолаверганлар. Биз бурила бошлаганда, у темир дарвоза олдида рўмолининг учини тишлаганча мунғайиб турар экан, сўнгги дақиқада қўлини очиб, юзига тортдими, тортмадими — илғамай қолдим.

Борсак, аллақачон жарроҳлик бўлимиға опкириб кетишибди. Ўпкам бўғзимга тиқилиб, кириб боравердим.

— Ҳай, ҳай, мулла ака, қаёққа? Бу ёққа мумкин эмас, — деб бир ҳамшира азза-базза қўлларини ёзиб, йўлимни тўсиб чиқди. У оқ-оппоқ охорли ҳалату қалпоқчалар кийган, энглиданми-қаердан бошни айлантираёзгудек атрлар гуркирар эди. Оддий бўлса ҳам кошки, юзига қарабоқ англадим: у янги келинчак эди.

Очиғи, уни босиб ўтиб кета олмадим.

— Майли, бери келинг, келинпошша, — дея шивирлаб, четга имладим.

У бу муомаламдан юзлари дув қизариб, яна ҳам кўҳлик тортиб кетди. Аммо ўзи боягидан анча тушган эди.

— Айтаверинг, — деди ўнғайсизланиб.

— Стационардан... касал опкелишдими? Ҳозиргина?

— Аёл киши эдими, опкириб кетишиди, — деб энди менга ачиниб қаради. — Эсиз, энди кўйишмайди. Профессорнинг ўzlари шу ердалар.

— Демак, кесишлоқчи? Шундайми? — дедим ичим сидирилиб.

Келинчак менга ҳалигидек ачинаб бокди:

— Илож қанча, бўлмаса, асраб қолишолмайди: қорасон, ахир!

— Қорасон?!

Мен хушим учиб, ўзимни унуган эканман, ҳамшира зўр бериб мени юпатарди:

— Сиз қўрқманг, профессоримизнинг қўллари енгил: қанчаларни қутқариб қолганлар...

Қулогимга шунга ўхшаш таскин-тасаллинамо гаплар кирав эдию ўзим дераза раҳига суюниб қолган эдим. Шу ҳолимга мен бу соддадил келинчакка ниманиям тушунтира олардим. Ўша оёғи кесиладиган аёл ҳам унингдек бир мушфиқа эканини, бошида ҳеч кими йўқлигини қандай айта оламан? Қолаверса, қариндошларидан ҳеч ким бу ишга розилик бермаганини-чи? Тушунтирганимда ҳам бу ҳамширанинг қўлидан нима келарди?..

Бўшашиб, шундоқ дераза тагидаги ўриндиқقا чўка қолдим: Нима қилсам экан? Хат киргизсамми? Хатимга қарашармиди? Ёдгорга овора бўлгунча, ўша ёққа чопмайманми! Тўра бува келганларида мен бормабман! Борсам, оператсиага қўярмидим! Энди Чаман акага нима дейман? Акамга-чи?!

Кимдир шип-шип кела бошлади. Йўқ, йўлакдамас. Шу яқинда. Қаршимда тўхтаб эди, боягидек атир гуркираб кетди. Кўзимни очсан, чиндан ўша келинчак.

— Балки... бошлиғимиз билан... гаплашиб қўрарсиз. Ҳув, ануви хонадалар, — деди ёлғиз ўзимга эшитиларли қилиб. Шундагина унинг сурма тортилган қўзлари кийикникидан ҳам маъсум эканини кўрдим. Таклифи эса, ундан ҳам гўзал эди.

Даровқе, нега бўшашибман?! Мени ким айтади мухбир деб? Қизил гувоҳномам-чи? Шу ерда иш бермаса, қачон иш беради?!

— Бормисиз! Боядан бери айтмайсизми!

Мен тура ўша хонага интилдим.

— Фақат мени айтди, демайсиз, ўлдиришади, — деди келинчак шивирлаб.

Мен ўгирилиб, бошим ерга теккудек таъзим қилдим:

— Ишонинг, миқ этсан тилим... кесилсин...

Эшикни ўзим очдимми, бироми — билолмай қолдим. Остонада юзини ёшлигига чечак чакичлаб кетган барваста одам туради. Бошдан-оёқ оқ-оппоқ кийинган киши оғзига оқ дока тута-тута чиқиб келмоқда эди. Биз сал қолса, урилиб кетарканмиз.

— Жон дўхтири ака, бир дақиқа, — дея бостириб кира бошлаб эдим, у оқ тоғдек бўлиб ўйлимни тўсди. Оғзидан оқ матони олиб ўтирамай:

— Мумкинмас. Ўзим кеч қоляпман, — деб ғўлдиради.

Бўш келсан, кўкраги билан туртиб эшикдан чиқариб қўядиган.

— Бугун сизларда нодир оператсиа боракан. Шунга келиб эдик, — дедим сўнгги имкониятимни ишга солиб.

Бошлиқ гарангсиди:

— Қанақа-қанақа?

— Нодир оператсиа.

— У нима деганингиз?

Мен бўш келмадим:

— Яъни, қорасон. Тўғрими?

У ноилож бир қадам чекинди:

— Хўш, нима бўпти?

— Шахсан профессорнинг ўзлари қиляптилар экан.

— Тўғри, — деди у ҳамон ҳеч нарсага тушунолмай, лекин оқ доканинг боғичини қулогидан тушириб, рост-мана одамга ўхшаб гаплаша бошлаган эди. — Қаердан бўламиз, дейсиз?..

Мен газетанинг номини айтиб, қизил гувоҳномамни узатдим:

— Мумкин бўлса, ўша оператсиага қўйсангиз. Битта халат топилар, ахир?

Чечак излари тундлашиб, у бош чайқади:

— Афуски, рухсат беролмайман. Профессор сиз ўйлаганча эмас.

— Қандай? — дедим гарангсиб.

— Сизга қўшиб мени ҳам ҳайдаб чиқаришади. Шуни истайсизми?

— Унда... унда...

— Иложингиз қанча. Шу хонада кутиб турасиз. Сўнг эпини қилсангиз, гаплашиб оларсиз. Хўп, мен кетдим.

У оқ боғичини тута-тута чиқиб кетди. Мен миқ этолмайин ҳам қолавердим. Ана, ёлғоннинг умри! Ҳатто қизил гувоҳномам иш бермади!.. Ол-а, энди нима қилдим? Йўлакка чиқолмасам (тўғриси, келинчакнинг юзига қандай қарайман?), пастга тушиб кетаверишга ғурурим йўл бермаяпти. Не-не вазирликларга кириб бора олган одам... шу ерда йўл топа олмаган эдим. Ноилож стулга чўқдим. Бош муҳарриримизнинг сўzlари қулоқларим остида жаранглар эди: «Бизнинг муҳбирлар ҳеч кимнинг кабулхонасида кутишга ҳаққи йўқ. Ҳамма эшиклар унга очиқ. Киролмадими, тамом, газетачи эмас!» Эмас, эмас, эмас.

Менга алам қилаётгани бу ҳам эмасди: шундай қўл чўзса етгудек жойда туриб, мана, етиб келдим, деб кеннойимга бирров кўриниш беролмаётганим, оғир кунда тепасида бўлолмаганим алам қиласди. Қолаверса, нима бўлган ўзи? Нега кесишяпти? Шусиз мумкин эмасканми?

Чидамай туриб кетдиму бетоқат кезина бошладим. Юрагим бўғзимга тиқилиб келиб, тарс ёрилай дер эди.

Шу вақт эшик очилиб, остонаяда бояги ҳамшира кўринди.

— Ўтирибсизми? — деди у жилмайиб. — Кетиб қолмасакансиз. Хўп?

— Нима, бирор янгилик борми? — дедим энтикиб.

У ширин им қоқди:

— Бор, бор, хали айтишади.

— Ҳозир айта қолинг? — деб ялиниб боравердим.

— Кетмай тураркансиз, профессор айтдилар.

— Профессор?

— Ҳа, газетага ёзадиган иш бўляпти экан.

— Шошманг, тушунтириброқ айтинг.

Келинчак елкасини ширин қисиб, қимтинди:

— Жиндак сабр қилинг — биласиз.

Нафасим ичимга тушиб кетди: Наҳот оператсиа тугаб, кесиб улгуришди?! Профессор нима билан мақтанмоқчи? Кеннойимнинг аҳволини тасаввур этиб, этларим жунжикиб кетди.

Келинчак қайтаётиб ўгирилди.

— Сиз суюнчини ҳозирлайверинг, — деди шипшиб. Сўнг ичига сиғдиролмай айтди-қўйди:

— Кесишмайдиган бўпти, билдиз.

— Воҳ. Оллоҳ бор экан-ку! — Мен дўппимни осмонга отадиган ҳолга тушган эдим: — Нечук?

— Арра олмабди.

— Олмабди? Олмайди ҳам-да! Ана, мен нима девдим?! — Мен янги бўлган жиннидек шовқинлаб, қувнар эдим!

Ҳамшира шошиб қолди:

— Вой, киринг-киринг. Мени балога қолдирасиз.

Шу вақт йўлак охирида уч-тўрт оқ халатли кишилар кўриниб, келинчак баттар ўтиниб-ялинишга тушди:

— Ана ўзлари, илтимос, кириб тура қолинг.

Мен остонаяда турганча ич-ичимдан ёқа ушлардим:

«Ё, тавба, бу қандайин мўъжиза? Арра олмаганмиш!»

Мен ҳамон гарангсиб турарканман, оқ халатию билагига қадар кийдириб қўйишган зангор енглиkkacha ўзига ярашиб тушган профессор яқинлашиб кела бошлади.

— Мана шу йигитни айтувдим, — деди бояги чечак юзли бошлиқ.

Профессор ёқимли жилмайди:

— Айни вақтида кепсиз. Ҳизр эмасмисиз, мабодо?

Рост шекилли?! Мен ҳаяжонда унга қараб алпанг-талпанг қадам ташладим. У йигитлардек кафтини кафтимга уриб кўришаркан, қўлтиғимдан олиб ичкари бошлади.

— Мен ҳаммасини бирма-бир айтиб бераман. Аммо аввалдан келишиб олайлик: ёзмайсиз. Ёзмайман, деб сўз берасиз, — деди у.

— Нега? — Мен қувонишимни ҳам, қувонмасимни ҳам билмасдим.

— Чунки бу газеталарда овоза қиласиган иш эмас. Бу — мўъжиза! — деди у мени тонг қолдириб. — Сўз берасиз, а?

— Айтинг, айтаверинг-чи, — дедим сир бермай.

— Йўқ, менинг бошим иккитамас, ўртоқ муҳбир. Қолаверса, сизники ҳам, — деди у хонага кирган заҳоти ўзини диванга ташлаб. Сўнг ярим ёнбошлаб олди-да, қаршисидаги стулни кўрсатиб, ўтиринг, деди. — Мен умрим бино бўлиб, бунақасини кўрганамасман. Ўлай агар. Юзлаб одамларни оператсиа қилганман. Ўнлаб оёқларни кесиб ташлаганман. Лекин бунақаси бўлмаган.

— Қанақаси? Мумкин бўлса, тушунтирироқ айтинг, — дедим яқинроқ сурилиб.

Професор негадир лабини жийирди, сўнг қаддини кўтариб ўтириди:

— Рости, дахрийроқ бўп кетганимизми ўзимиз ҳам...

— Хўш, хўш?..

— Бу жувонда бир гап бор. Ҳамма аломатлари айтиб турибди: қорасан бошланган, кесмаса бўлмайди. Лекин қандай дуо ўқиб қўйган, арра оёқни олмаяпти — пичоқни ё отиб юбориб, ё синиб тушяпти.

— Тиззаси-чи, шиш-чи? — дедим ютоқиб.

Професор кўзойнагини олиб, афтиғимга тикилди:

— Сиз... қаердан биласиз?

Мен қовун тушириб қўйганимни англа, ерга қарадим. Энди ростиға кўчмасам бўлмасди:

— Ўша жувон — менинг кеннойим бўладилар.

— Э, шундай демайсизми? — Професор тепакалини силаб, ўзига келди ва орқасига суюниб, қайтариб сўради. — Ростини айтинг, табиға қарататётганимидинг-лар?

Мен унинг юзига қарайолмай бош силкидим. У чукур тин олди:

— Айтувдим-а, техникага нима жин урди деб. Сизга рухсат, хушига келтирадиган хонага олмасларидан кў-ришингиз мумкин.

Мен сакраб туриб, эшикка йўналдим. Професор хўрсинди:

— Фақат бир нарсани айтмай кетиб қолманг-а.

— Нимани? — дедим ҳайрон қолиб.

— Арра олмаганининг боисини. Сўранг-чи, қанақа дуо экан?

— Албатта, албатта. — Йўлакка чиқсан, ҳалиги хонадан тўрт ғилдиракли аравачада оқоппоқ чойшабларга ўралган биравни опчиқиб келишяпти. Ютургилаб бордим. Бир аниқ баҳтсизликдан кутулиб қолган кеннойим юзлари оқариб, ўзини билмай ётар, хатто сунъий нафас юборадиган аппаратларигача олинмаган, кўзлари ҳам юмуқ, фақат мижжаларида икки томчи ёшми — нима, йилтирас эди.

— Кеннойижон? — дедим мен ич-ичимдан бир титроққа тушиб.

Аммо шу тобнинг ўзида икки ҳамшира икки қўлтиғимдан олиб, четга тортдилар.

— Мумкин эмас, сиз кимлари бўласиз?

Мен айтдим. Улар бош чайқадилар:

— Хушларига келишларини кутасиз.

— Кутаман, фақат бошларида ўлтиришга рухсат этсангиз бас, — дедим тўлиқиб.

— Яхши, чақирамиз.

Мен шунга ҳам мингдан минг рози эдим. Асрга яқинми, алламахалда у хушига келиб, кўзини очди ва минг шукрки, кўз очиб мени кўрди.

— Худойимдан... интиқиб-интиқиб... сўраб эдум, етуб кебсуз... Сўраганларумну... барчасину ижобат эт-ду, — деди жуда ҳам паст товушда.

— Етиб келдим, етиб келдим. Минг қатла шукр, топиб келдим, — дедим бўзғимга сўзларим чўғдек ёпишиб. Кейин энгашиб, мен ҳам қулоқларига шивирладим: — Тузалиб чиқсангиз, менга ҳам ўргатиб қўясиз ўша дуо-илтижоларни<sup>8</sup>.

— Худо хоҳласа,— деди у ўша-ўша шикаста овозда.

\* \* \*

Кечга яқин кутилмагандага кеннойимни палатага олишиб, жавоб тегиб қолди. Катта дўхтирлар стационарга олиб кетавериш мумкин, дейишибди. Бирпасда машина етиб келди. У кишини аравачада пастга олиб тушиб, жойлаб беришди. Мен ёnlаридан бир қадам жилмай бирга бораётганимдан ёш боладек бошим осмонда. Кеннойим ундан хурсанд, ундан мутаассир. Икки гапининг бирида яхшиям сиз боракансиз, яхшиям етуб кебсуз, дейди. Сизну қадамлариз, дуолариз шарофату биланму, Аллоҳ ҳам қўллаб юборду, асрару, дейди.

Бунга сари мен уни хурсанд этадиган, севинтириб-суюнтирадиган воқеалардан сўзлагим келади, кўнглини кўтаргум келади:

— Биласизми, айтган жойларингизга чиқдик. Каттабоғга, эски уйларимизга кирдик.

— Вой, шунақаму? — У ётган ерида бир ерга етиб термулди: — Турган эканму, топдингизму?

Машина аллақачон жилиб кетгану мен у кишининг ёнгиналарига ўтириб олиб, (қаердан ҳам бошлаб қўйдим, ҳали уринтириб қўймасам эди!) минг хижолату ҳаяжонда ўша маҳфуз хатларни қандай топганимни сўзлаб боряпман. Ичимда, миридан сиригача шартмиди, дейман. Ўзимни тўхтата олмаяпман, тия олмаяпман:

— Турганакан, қаранг. Жин ҳам урмабди. Аммо шундай қуруқшаб кетибди, хазондай шалдирайди. Айтган жойизда экан, ари инида...

У кўзлари бир чақнаб кетиб, яна аллақандай бў-шашди.

— Аллоҳга шукр, араган Ўзига шукр,— дея пи chir-лади, қайтиб миннатдор тикилди.— Лой-тупроққа қори-шиб, бирорларнинг қўлига тушиб кетмабди, хайрият.

— Ҳа, ҳа, — дедим мен уни тинчлантиришга уриниб. — Вақтида борганақанмиз, суриб юборсалар, кейин тополмай юарканмиз.

— Сизга мингдан-минг раҳмат, — деди у.

Аммо мен уни бу раҳмату ташаккурлардан чалғитгим, бошқа янгиликлар билан хурсанд этгим келарди:

— Қолаверса, Ёдгормурод бир халтacha топиб олди.

— Қандай дедунгиз?

— Духоба халтacha экан. Мимитдек. Ичида...

— Вой, ушатта эканму, у оҳанраболар?

— Ўшатда экан. Ёдгор топди.

— Уни қаранг-а, ўзига буюрибдиму? — деди кеннойим энтикиб.

Шу вакт машина тўхтаб, ҳамширалар ғимирлаб қолдилар. Етиб келган эканмиз. У кишини тушира бошладик. Кейин аравачага олиб, ёnlарида бора бошладим.

— Яхши топубсиз. Бўлмаса, ёмғур-селларда қолуб нима бўларду, — деди у битикларни ёдга солиб.

<sup>8</sup> Йиллар ўтиб, мен Қуръон ўқишига тушгач, қанчадан-қанча омонлик сўраб ўқиладиган оятларга дуч келдим. Шулардан бири Ҳашр сурасининг охирги уч ояти эди. Уни ҳар сахар уч бора ўқиган кишини Оллоҳ 70 минг фариштаси билан хифзу ҳимояга олиши ва кечгача омонликда сақлаши айтилади бир тафсирда. Қахрамоним балки мана шундай дуолар шарофати билан кўргонланиб, оёғи кесилмай қолгандир (*Муалиф*).

— Келаси гал опқеламан, майлими? — дедим мен.

У бош тебратди (Ўзи чайқадими ё аравача ғилдираб бораётиб, чайқалиб кетдими, англолмай қолдим.)

— Туравурсин. Шу ишончлув.

Хайрон қолдим. Хатни айтаяптими, оҳанрабо халтачаними? Қайтариб сўрашга эса тилим бормасди.

— Омонат бўлибми?.. — дедим ахийри.

Кеннойим им қоқиб, бош силкиди:

— Майлун, — деди-ю, яна мутаассирлана бошлаб, нигоҳини олиб қочди. Овози ҳам аллақандай титраб чиқа бошлаган эди. — Бир кун келуб... балки ўзларига топширасиз...

Менинг ҳам халқумимга бир нарсалар тиқилиб келарди.

— Ундан деманг, яхши ният қилинг, кеннойижон,— дедим тўлиқиб, — мана кўрасиз, ҳаммаси яхши бўлиб кетгай, — деб ёnlаридан қолмай эргашавердим. Биз ўша таниш йўлка, азим тераклар таги билан кетяпмиз-у, қулоғим тагида бир нарса шовуллайди. Ваҳоланки, тераклар у қадар барг ёзиб улгурмаганлар. Нима экан, билолмасам. Кўзларимни эса ёш қоплаб боряпти, ҳеч нима кўролмаётирман. Аравача тутқичини ушлаб олганману қўйиб юбормайман.

— Илоҳум, — деди у.

— Мана, қараб турасиз, — дедим яна, — ҳеч нарса кўрмагандек бўлиб кетасиз.

— Илоҳум, айтганиз келсун. Ёдгорумнинг баҳтига. Акангузнинг баҳтларига.

Мен бу сўзларни ўз қулоғим билан эшитдимми ё шундай туюлиб кетдими — ажрата олмасдим.

Бу орада биз ўша олди пешайвонли бинога етиб борган, ҳамширалар аравачани ғилдиратиб, аллақандай эшиклару пастки йўлаклардан олиб ўтишар, мен эргашиб бораверишимни ҳам, ҳовлида қолишимни ҳам билмасдим. Ниҳоят, улар ўрта йўлакка чиқиб, ўша таниш кунжакдаги хона томон кета бошлашди-ю, мен ўзимга келиб, бу яқин орадан бир телефон излаб қолдим. Мен ишхонага қўнғироқ қилиб, қаердалигимни айтиб қўйишим, зарур бўлса, етиб боришим керак эди. Қилсан, мудирим бор эканлар.

— Қалай, қутулиб қолдингизми? — дедилар.

— Қайтариб олиб келдим, яхшилар, — дедим.

— Унда кириб ўтарсиз, биз шўттамиз, — деди у киши. Билдимки, боришим зарур.

Ваъда қилиб чиқсан, ҳамширалар ҳам жойлаштириб, аравачани олиб чиқишяпти.

Изн сўраб кириб бордим.

Кеннойим «ўлан тўшаги»да менинг киришимга интиқ ётар эди. Кўриши ила миннатдор тикилди:

— Сиз ҳам ишлариздан қолуб кетдунгиз мену деб.

— Ҳечқиси йўқ, муҳими, сиз қутулиб олдингиз, — дедим мен. — Балки Тўра бувага ўтиб келиш лозимдир? Агар дориларингиз қолмаган бўлса?..

— Йўқ-йўқ, ташвишлантиранг у кишини, доруларим ҳали бор, — деди кеннойим.

— Нега, қайтага хурсанд бўладилар-ку, бу суюнчиликдан, — дедим.

Кеннойим бош чайқади.

— Ундан кўра, вақт тополсангиз, эртами, индин-ми, — деди у ўтиниб, ҳам кўзларимга мўлтираб, — тойҷоғумни ола келсангиз. — Киприкларида ёш йилтираб, овози ҳам ўзгариб борар эди. — Кўрмаганумга ҳам қанча бўлду.

Мен кутилмаганда бўшашиб тушган, мана, ҳозир кеннойим учун жону жаҳонимни бериб юборишига тайёр одам... энди нима деяримни билмай қолган эдим. Ахир Ёдформурод қаердалигини кошки аниқ билсан?! Устига устак уни бизникидан олиб кетишганини... кошки бу кишига айтиб бўлса?!

\* \* \*

Ё раббий! Бугун қандай кун бўлди?! Эрталаб оператсиа хабари билан ўпкамни қўлтиқлаб, бир энлик этдан тушган эдим. Кеннойимни Худо асраб, шифохонасига жойлаб қайтсан, иш столимга ўтирмасимдан қўнгироқ бўляпти.

— Мақсаджон, Сизга экан, — деди мудирим. — Бугун нима бўлди, эрта демай, кеч демай, сизни сўроқлаб қолишиди?

Мен чиндан хавотирланиб гаплашгични олдим.

— Алло, эшитяпман, — дедим юрагим пўкиллаб.

Сим ортидан аёл кишининг мулойимдан мулойим овози келарди:

— Мақсутхонмисиз?

— Ҳа, ўзим.

— Ўша газетада ишлайдургон?..

— Ўша, ўша, — юрагим баттар ҳаприқиб кела бошлаган эди, дам ўтказмай сўрадим. — Кечираасиз, ўзиз кимсиз?

— Мен Асал опангиз... узр, кеч бўлса ҳам безовта этдук.

Аммо мен бундай ширин овоз эгасини ҳеч эслай олмасдим.

— Қайси?.. — дедим уятлу бўлса-да.

— Чаман акангизнинг... опалари-чи, келгансиз-ку.

Ия, сим ҳам одамни шунчалар алдарканми? Ичимда шу ўша Асалми, дердим-у, тилим айлана қолмасди. Ниҳоят, минг бир хижолат ила:

— Эшитяпман. Танидим-танидим, — дедим. Нима бўла қопти?! Ўша заҳар-заққумойнинг ўзи сим қоқмаса? Ё кемшиктой топилибдимикан?!

— Мумкин бўлса бир келиб-кетинг, жон ука, — деди у кутилмаганда Худонинг зорини қилиб.

— Айтавуринг, айтавуринг, нима бўлди? — дедим юрагим чиқиб.

— Ақбаримизни бир қаёқларга опкетишаётган экан, Ёдгор фаҳмлаб. Тушуняпсизми?.. Уни анув кеннойингизни боласи деб ўйлашиб...

— Қаердан олдингиз бу гапни? — деб юбордим. Биласангиз, эсим тескари бўлиб кетаёзган эди бу хабардан.

— Сиз манавини кўринг, ўқинг...

— Нима у, ултиматумми?

— Ултиматумиз нимаси? — деди у.

— Гаровга олиб, шарт қўйишса, юборишадиган хат. Шундайми?

— Йўқ, унақа гап йўқ, йўлдан жўнатишибди. Пўчтада.

— Шундай демайсизми, — дедим сал ўзимга келиб. — Қаердан ташлашибди?

— Ўшдан экан.

— Ўшдан?! Мухри шундайми?

— Шундай.

— Унда қўрқманглар, — деб таскин беравердим, — тинчлик экан.

— Сиз шундай дейсиз-да, ўқиб эсимиз чиқиб кетди-ку.

— Нима деб ёзиби? — Дарвоқе, мен хатни қўрган-билгандай таскин беришимни-чи! Қайтариб сўрадим.— Жичча ўқинг-чи.

— Ўзи жиндак.

— Унда ҳаммасини ўқий қолинг.

— Ҳозир, — у гаплашгични қўйиб, аллақаёқقا йўқ бўлиб кетди. Мени эса ғам босиб келарди: «Ақбарни авраб олиб кетганлар Ёдгорнинг ҳам изига тушмадилармикан ишқилиб?» Бу орада у қайтиб келди. — Мана, эшитинг: «Етиб маълум бўлсинким, жилла курса, бола тирик

эканидан хабар топинглар, деб шу хатчани жүннатяпмиз. Фақат қарғамангиз. Булар мусофиричиликнинг тошдан қаттиқ нонига қўниб-қўниколмай юришганидан шуни маъкул кўрдик. Биз болани бувасиникига олиб кетяпмиз. Эсон бўлсак, онасини ҳам етказгаймиз бир кун. Ўша Тангритоғга. Оллоҳдан сабр тилангиз... Худойберди бешикчи».

— Ким?

— Бешикчи.

— Сизлар тарафда шунаقا одам... борми? — дедим гарангсиб.

— Эслай олмаяпмиз. Эшитмаган эканмиз.

— Қизиқ-ку, — дедим. Улар ким бўлиши мумкин? Ҳеч ақлим етмасди.

— Нима қиласайлик? Овоза қилмай ўтиратурайликми ё... эртага ўзиз келасизми?... — деди ўзини Ақбар саритойнинг онасиман, деб атаётган аёл.

Мен ўзини сал таниётган бўлсам-да, овозини ҳеч ўхшата олмаётган эдим. Шундай бўлса-да:

— Сабр қилинг, эртага бораман. Ҳеч кимга оғиз очманг. Эшитдиз-а? — деб тайинладим. Ростдан ҳам нега бормай? Саритойни Ёдгор фаҳмлаб ўғирлаб кетишадио... яна онаси — азиз кеннойижонимни Тангритоғга олиб кетмоқчи бўлишадио... мен етиб бормайманми?! Яхшиям, кеннойим шифохонада! Бўлмаса, нақ ўғирлаб кетишаркан! Биз қўлимизни бурнимизга тики-иб қолаверарканмиз.

— Ўлибман-да... — деди Асал опа энди ўзига ўхшай бошлаб. Унинг заҳар тили қичиб келаётганини кўриб, мен гапимни андавалай қолдим.

— Анув Зокир бадбаҳт келса, дейман-да. Биласиз-ку, уни, йўқ ердан ҳид олади. Қорасини кўрсатганий ўқми ишқилиб?

— Қаёқда! Ўша даб бўлганча кетиб боряпти. — Шу вақт унга кимдир нимадир деди. Аёл кишининг чалакам-чатти овози эшитилгандай ҳам бўлди. Асал опа «Хўп, хўп, айтаман», дея менга «юзланди»: — Дарвоқе, Сизга омонат гап бор экан, ойим айтияптилар.

— Омонат? — Мен хушим бошимдан учиб, гўё оёғим остида ер айланмоққа бошлади.

— Ҳа, Чаман акангиздан, — деди у.

Ана, холос! Шунча борганимда индашмаган, энди айтишяптими? Учини ҳам чиқаришмаган эди-ку?

Мен симнинг у томонида одам борлигини ҳам унтиб, «Нима экан ўша омонат?», дер эдим ўзимга ўзим.

Мана шуниси ҳаммасидан ғалати эди.

### 3. ТАНГРИТОҒ ТОМОНЛАРИДАН АЙНИЙ БОШЛАГАН ОБ-ҲАВО...

Офтобга қарасам, у театр биноси томидан ошиб ўтиб, кун пешинга яқинлашиб қопти. Биз ана шу муҳташам кошонанинг шундай бикинида, кўчанинг бериги бетидаги бинода ўтирамиз. Деразамиз ҳам ўша фавворали майдонга қараган. Майдонни гир ўраган чинорларнинг шоҳчалари энди бўртиб кела бошлаган, қайрағочлар ҳали бошидан кора рўмолини олиб улгирмаган бўлсалар-да, фаввора ишлаб кетган, шувиллатиб сув отиб ётар, атрофида одамлар солланиб кезишни бошлаган эдилар. Майдончадаги гулзорларда оқ, сарик, пушти гуллар ер бағирлаб чандон очила кетганларки, тепадан бир чиройли баҳор капалакларига ўхшаб кўринардилар.

Кўчада ҳам одамлар гавжумлашиб, ғимирлашиб қопти. Демак, тушлик яқин. Ҳамонки, Ёдгор муродларникига ўтадиган бўлсам, йўлакай қиттак тамадди қилиб олганим маъкул. Қайтгунимча ошхоналар тим-тирс беркилмаса ҳам совуқ овқатга куним қолмасин. Ҳозир Тошкентда нима кўп — қурувчи кўп, ҳар юртдан келганлар кўп, бизнинг ошу кабобларимиз тансиқ. Ҳар бурчагу бурилишда ошхона очилиб, дошқозонлар осилаётгани билан ўша тансиқ нарсалар тугаб, бир соатга етмай чойхоналаргача хувиллаб қоляпти.

— Мен сурдим, — деб пастга тушиб, қўчани кесиб ўтаётсам, орқамдан бирор чакиряпти. Отимни айтса ҳам майли экан, эркала бу чакиряпти:

— Ҳов, пакана пари!

Ялт этиб ўгирилиб қарасам, қўча ёқасидага қайрағоч тақкинасига бир ажойиб хориж машинаси секинлаб келиб тўхтаяпти. Жонивор илоннинг оғзидан чиққандек ялтирайди. Ўша киноларда кўрадиганимиз — шамолдан тез, хаёлдан учқур қора «Волва». (Бунақаси Тошкентда ягона бўлса ҳам эҳтимол. Агар ҳукуматникини ҳисобга олмаса!) Ичидан эса норғул бирор туша бошлаган-у, мен уни танимайроқ турар эдим. Овози танишдек эшитилганди, лекин ким бўлса экан? Шаҳарда ҳеч ким мени бундай атамас эди-ку?!

У ўгирилиб, кўз-кўзга тушди-ю, мен шошиб қолдим. Нигохи жуда ҳам таниш эди-ю, аммо ўзини ҳеч ўхшатолмаётган эдим. Наҳот шу — ўша қилтириқ Олим акам бўлса? У Султонмурод акамга ўхшаб норғул тортиб кетган эди. Ё Султонмурод акамнинг ўзимикан?!

Мен саросимада қолганимни қўриб, у ўша ерданоқ майин жилмайганча қучоқ очиб кела бошлади:

— Вой-вў, кўрар кун бор экан-ку! Топар кун бор экан-ку сизларниам! Сен танимасанг, мен танидим. Мен топдим! Боракансизлар-ку!

— Олим ака! Наҳот ўзиз?!

— Ўзим-да, жигаргўшам, ўзим!..

Мен-да, қучоқ очиб талпиниб бордим-у, йўл ўртасидаёқ қучоклашиб қўриша кетдик.

— Вой, учратган жойимни қара-я! Қаерлардан изламадим сизларни, қаердан суриштирамадим! Бирор Фарғонага кўчиб кетишган, дейди, бирор қайтишган. Боракансан-ку, жигаргўшам, — деб қучогидан қўймай у пешонамдан ўпар, юзларини юзларимга суйкаб, куракларимни силарди.

Мен эса унинг қучоғида бамисоли йўқ бўлиб кетган эдим. Олим акам тоғаларимдек шунақа норғул тортиб кетибди. Ҳатто чекка соchlарига оқ оралаб улгуриб, катта киши нусхи уриб кетибди. Воҳ, шунча сувлар оқиб кетибдими?

— Қайтганмиз, қайтганмиз, — дедим.

— Мен ҳам қайтдим. Бўлар шунча тентираганларим, дунё кезганларим, — деди у ҳам, — энди одамга ўхшаб яшай мен ҳам. Соғиндим ўзимизниларни, — дерди у, менга тикилиб тўймасди. Ҳали бағрига тортади, ҳали пешонамдан ўпиб қўяди.

— Уни қара-я, «Ҳизр»ни йўқласам бўларкан. Кўнг-лимдан ўтишинг ила йўлимни кесиб чиқиб турибсан. Ўтири, кетдик, — деб қисташга тушди у.

— Қаёққа? — дедим беихтиёр.

Қолаверса, у жуда bemavrid йўлиққан, қисталанг пайтда учраган эди. Мен йўлакай бирон жойда тушлик қилиб олиб, Саритойларниги ўтмоқчи эдим. Ваъдам бор...

— Қаёққа десанг, мен тайёрман. Озод күшман. Фақат сен имо берсанг, бас.

Биз бу дунёning эрка кийиги «Волва»га ўтирволганмиз, қаёққа десам, ўша ёққа ҳайдайдиган. Аммо мен ўша ёқни айтольмай турибман, нияту ваъдамдан кечолмай турибман.

— Шу кечкурун бизникига кета қолсак-чи, ойим ҳам бошлари осмонга етар эди, — дедим.

— У энди қочмайди. Ҳозиргисидан гапир. Яхиси. ҳозир бир етга ўтамиш. Бир отамлашайлук, — деб у машинасига ўт олдира бошлади. Шунда ҳам кўзимдан кўзини узмай ризолигимни кутар эди.

Мен эсам уни Худо етказганидан суюниш ўрнига имиллардим. У билан Ёдгормуродларниги боргим йўқ. Ишқилиб, Калковуз бўйидаги ўша ҳовлига яқинлаштирамасам дейман. Акамга алоқадор одамларни билмагани маъқулдек.

— Озгина тамадди қилиб олиб, ўтадиган жойим бор эди, — дедим ахийри.

— Яхши, ҳаммасига ҳам улгурамиз. Аввал бирон баҳавороқ жойга борайлик, сўнг ташлаб кўяман. Бунга нима, чўтми? — деди тулпорига ишора қилиб.

— Шундай-ку, лекин... қандай тушунтирсам... — деб мижғовлана бошлаб эдим;

— Агар мен билан бошлашиб боришинг лозим бўлмаса... ўзинг ўтаверасан. Ёки бирга тамадди қилгинг ҳам йўқми? — деди у ҳеч оғринмай.

Ҳалиги хаёлларга борганимдан уялиб кетдим.

— Йўқ, нега? Қани эди тулпорингиз ўша жин кўчаларга кириб боролса! Жон дердим-ку!

— Кетдик, кетдик. Ўйчи ўйлагунча, таваккалчининг иши битибди.

Эшикни ёпиб, орқага суюнсам, денг... воҳ, ўриндиқ дегани шунчалар юмшоқ-роҳатижон бўладими! Анг-танг қолибман. Бунақа роҳатни умрим бино бўлиб, куёвлик чимилдиғига кирганда тўрт қават духоба кўрпача устига чўкиб ҳам туймаган эдим. Шунақа майнин, ҳам юмшоқ, сўнг бир ажойиб ифорлар гуркираб келар эдики...

Оlamda шундай ужмоҳлар бўлар эканми, деб аланг-лар эканман, у оҳиста жилди. Жилди нимаси, турган еридан худди сувда сузгандек сузиб чиқиб, кўча ўртасига тушиб олди-да, шувиллаб кета бошлади.

— Зўр-ку, бизникилар бунинг олдида қалдироқ арава экан-ку,— дедим акамга.— Биз сўккан капитализм-нинг мевасими шу?

— Сен бу «қўғирчоқ»ларига маҳлиё бўлма. Орқасидан келадигани ёмон, — деди акам негадир қўл силтаб.

— Ўзингиз-чи, опкепсиз-ку?

У менга қараб қўймайин ҳам бурнини жийирди:

— Ҳавас қиладиганмас уларнинг ҳаёти. Егани олдида, емагани орқасида бўлгани билан... эртаси вой.

Мен тушунмадим:

— Қандай қилиб?

— Оллоҳ буларнинг бу дунёсинигина берган... у дунёсини билсами, уввос солиб йиғларди ҳаммаси.

— Йўғ-е.

— Ҳаммаси охиратидан бехабар. Охиратини ўйласа, закоту садақани ҳам биларди. Дунё тўла оч-наҳорлар. Лекин ўшаларга бир мири илинсин-чи! Ҳе, йўқ, уларнинг фалсафаси — яшаб қолиш, бошқалар эзилиб ўлиб кетмайдими!..

Олим ака ё таниб бўлмас даражада ўзгариб кетган, ё мени синаш учун айтиётгандек эди бу гапларни. Ўзи-чи? Ўзи ўша нарсани миниб юрипти-ку, яна бу дунё матоҳларини менсимагандай сўкиши ғалати. Ўзи қайси бойваччадан кам?! Бўзсувида, акасининг қароргоҳида нималар қилиб юриб эди, (неча йил йўқ бўлиб кетиб!) энди охират ҳақида гап сотиб қопти?! Устамонлик ҳам эви билан-да! Қўйиб берса, муфтийлик салласини ўраб амру маъруф қилмоқчи.

Мен машинасига чиққанимдан пушмонда эдим: қани энди бир мўъжиза рўй бериб, кўча ўртасида ўчиб қолса-ю, ишим зарурлигини баҳона қилиб, суриб юборсам...

Қаёқда! «Волва» катта йўлдан шувиллаб боряпти, қилт этса қани! Бошқалар шамолига ҳам етолмай колиб кетяпти. Гўё бу ғилдирагини ичига тортиб олгану йўлдан тўрт энлик кўтарилиб олиб, учиб бораётгандек.

— Барibir тан бериш керак, биз ҳали-вери етолмаймиз уларга!— дедим мен беш кетганимни яширамай.

Олим акам менинг ғўрлигимданми, нимадан илжа-йиб қўйди. Гўё сен нимани ҳам билардинг, дегандай.

— Ўқишингга арзимайди! Улар етган жойга биз ҳам етармиз, лекин бизда борига улар етолмаслар!

— Тушунмадим...

У хўрсинди:

— Биздаги оқибат, муруватпешаликнинг урвогини топсалар, дўппиларини осмонга отар

эдилар. Афсуски, у ерларда мушук ҳам бекорга офтобга чиқмайди. Билдинг?

— Ўша ерда ҳам Худо таоло дейдиганлар бордир, ахир?

— Бор, лекин оқибат ўзига яраша, биздагига қиёслабам бўлмайди.

— Бу ёқдан ўтиб борганлар-чи? Ахир бир вақтлар озмунча одам... — дедим.

— Ҳижрат қилиб кетганларни айтасан-да? Улар алоҳида олам. Керак бўлса, жонларини фидо қилиб юборишади. Мен анув ўзларини дунёнинг устуни ҳисоблаб юрганларни айтаяпман. Асли Оллоҳ уларни дунёга сочиб, тўзитиб қўйибди-ю, англаб етгилари келмайди. Ўз ақлларига маҳлиёлар: манавинаقا илоннинг оғзидан чиққандек машиналар, кемалар, учоқлар яратолганликларидан ўзларини унтиб қўйганлар. Ваҳоланки, инсонга ҳардал уруғича ҳам илм берилганмас...

— Биз қаёққа кетяпмиз? — дедим бирдан атрофга аланглаб. Қарасам, Хадранинг чорраҳасидан ўтиб бораяпмиз.

— Қаерга бўларди, «ЖАР»га-да. Овқатнинг додахўжаси ўшатта-да. Ўшанақаси борадиган ерингга ташлаб қўйман. Хости И момга борасанми? — деди Олим акам лабининг четида жилмайиб.

Мен ёқа ушладим: «Хости И мом томонгалигини қаёқдан била қолди? Кимни галигини ҳам билар балки?»

— Биз киролмайдиган жин кўчалар яна қаерда қопти? Ҳаммаси бузилиб бўпти-ку, — деди у. Мен ўзимнинг анқовлигимдан ўзи зил кетиб, гапни бурдим:

— Ишқилиб, ўзиз марказроқда турибсизми? Ғиротингиз бунақалигига яраша?

— Менми? — деди у ялт этиб қараб. — Айтмадимми ҳали? Ўша ишхонангга яқин ердаман. Ҳукуматти уйлари бор-ку. Ўтганимисан ҳеч?

— Йўлим тушганича йўқ, — дедим тан бериб. (Ўшатданки, жой олган бўлса, демак, хизматни қилиб қўйган экан-да? Оббо, анойи-еї, яна охиратдан гап сотади!).

— Ўша Тупроққўргоннинг орқасида. «Қуш учиб ўтолмайдиган» жойлар бор. Шундай пастимииздан анҳор оқиб ётиби.

— Анҳор ёқаси бўлса, ёмонамаскан, — дедим ичимдагини қулт ютиб. Ичимда эса, бошқа нарса ғимирсилаяпти: ўзи зодагонларнинг қаватига жойлашиб оп-ти-ю, яна кимларни сўкяпти?!

— Сен бир кун ишдан чиқадиган вақтингни айтсанг, мен кутиб олардим: бир отамлашардик. Кейин холамларни, келинни опкеласан. Борди-келди қиласиз. Одам одамга ғанимат,— деди у яна ҳам яқин олиб.

— Худо хоҳласа, — дедим манзират фаҳмлаб, — мавриди ҳам кепқолар.

— Йўқ, чиндан айтаяпман: борди-келди қиласиз. Бу дунёнинг зийнати шу-да. Қолаверса, пайғамбаримиз айтганлар: қариндошлар билан орани яхшиланг, деб. Шунча узилишиб кетганимиз етар. Ҳали Нусрат поччаникига топиб боролганимча йўқ. Қўлдош тоғамлару кенжа тоғамизни, бир-биридан азиз холаларимни кўргим, дуоларини олгим келади. Истасанг биргаллашиб ўтардик. Зилзила бўлиб, ҳаммалари ҳар ёққа тўзиб кетишибди. Топишиб юборсанг, хўб савобга қолардинг-да.

Олим акам айни дамдагина шунаقا кайфиятдамиди ё чинданам соғинганми, ҳеч ажратолмасдим. Оллоҳ ўзи кечирсин. Кўнглимга бир-биридан шубҳали гумонлар оралаб, айланиб-айлаланиб келяптики: одатдаги тилёғламалиги эмасмикан, дейман ва шу заҳоти бу фикрни калламдан қувиб соламан: Астағифируллоҳ, астағифируллоҳ, қанака одаммиз ўзи? Шайтон етовига тушиб қолмаганмизми мабодо? Биров сидқидил юрагини ёрсаю биз қаёқдаги гумонларга бориб юрсак?!

— Нега бошлаб бормасканман, бир оғиз сўзингиз... — дедим ич-ичимдан чиқариб.

— Раҳмат, укагинам, — у рулда ўтирган ерида қайрилиб елкамга қоқиб қўйди. — Шунақа дейишингни билардим. Сўзимни ерга ташламаслигингни, чақирсамоқ учиб келишингни билардим. Раҳмат, сен ўзи бир бўлакчасан. Зўрсан, пакана пари.

— Жудая унчаликмас, қўйинг, — дедим хижолатларга ботиб.

— Йўқ, беҳазил. Энди чин ака-ука бўламиз. Мақсуд. Ахир холам кимлар бизга? Онадек гап...

Кап-катта, салобатли одам ўзини бундай кичкина олиб, илтижо этиб турса... ғалати бўлиб кетдим. Мутаассирланиб, ичим аллатовур товланиб, қарадим. Бояги ғашликларнинг урвоғи ҳам қолмаган эди:

— Секинроқ айтасизми,— дедим ийиб келиб,— бор давлатимиз шулар-ку — холаларимиз, тоғаларимиз-ку.

— Нимасини айтасан! Қадрларига етмай қаёкларда юрибмиз, нималарга оворамиз?! — У пушмонини яширмай бош чайқай-чайқай тиззасига шаппалаб қўярди, — ким кунда, кун ора кириб хабар олиди, зиёрат этибди, дуоларини олиб қолибди — ўша чин ютуққа эришибди! Одамдан қоладигани шу-ку. Биз нима қила олибмиз?

Шу ҳолатда машинани тепада қолдириб, «ЖАР»га туша кетдик. Пастга қадар айланиб тушиб борган жин кўчанинг қай бир қайрилишидаги якка тавақали кўк эшикнинг йўлагидан ўтиб, кафтдек ҳовлининг бир чеккасидаги супада иккитадан жигар кабобу бир талинкадан хасип едик. Мен кўпдан бундай тансиқ таом емаганимни шунда эсладим. Ўзимизам оврўпача ошхоналарда пиширлган совуқмижоз нарсаларга кўнишиб кетиб, чимтомоқ бўлиб қолибмизми, бундан ортиғига ярамадим. Аммо таъми оғзимда қолди. Кимсан, мухбир бўлиб ҳам шунақа жойлар борлигини билмас эканмиз. Бу ерда хатто оврупача кийинган, (дунёнинг тескарилигини кўринг!) аёллари сириб шим кийволиб, эрлари халитдан тиззаси очиқ калта бир нарсага ўтган хорижликлар чугирлаб юришар, бу тупроқ томли пастак уйларнинг содда-тўпори эгалари шунақа лаззатли таомлар тайёрлай олишларига беш кетиб, улар турадиган мазгиллар, бу тик кўчалару тор йўлакларни, сўри остидаги супачаларни, норин тоғоралару хасип солинган қозонларни суратга олиб чарчамас эдилар. Қай бирлари бу тансиқ нарсалардан кўпроқ еб кўйганми, юқориляб кетган айланма йўлдан кўтариолмай мишиллаб қолган эдилар.

— Очопат хайитда ўлади, дегани шу-да. Булар нафсидан бўлак нимани билади? — деди Олим акам ижир-ғаниб.

— Тансиқ-да, булар учун. Экзотика қидириб келишган ахир, — дедим мен. — Бошқа нима ғамлари бор?!

— Ғамлари шу-да, дунёнинг лаззати. Оллоҳ ҳам ниятга қараб беради, — деди у.

— Нимани? — дедим уни англай олмай.

— Бу дунёсини-да. Охиратини ўйлармиди булар.

Ҳайратангиз ҳол: акам илгариги Олим эмас, бирор уни алмаштириб қўйгандек эди. Фикри ҳам бошқача, қараши ҳам. Биз ўлсак ҳам бундай дея олмаймиз. Лекин акам ўйлаб ўтирмай айтиб ташлаяпти. Нима бу? Дунё қўргани аломатими ё атай ўзини менга қўрсатиб қўймоқчими? Тушунолмадим. Нимадан ижирғаняпти? Баднафсликлариданми ё қадамлари шу ергача етиб келганиданми?

— Биз юртимизни қизғанишни ҳам унутиб қўяяпмиз шекилли. Ўтир, ташлаб қўяман. Ишингни ҳам битириб кетақол, — деди у тепага чиқиб.

— Вақтиз... — дедим хижолатга тушиб.

— Вақт нима! Машинага беш минутли йўл. Агар ишинг тезроқ битса, кутиб туришим ҳам мумкин, беҳазил, — деди у.

— Йўқ, раҳмат. Ўтадиган жойларим, гаплашадиган кишиларим бор, ушланиб қоламиз, — дедим шоша-пиша. Очиги, Чаман аканинг уйини унга қўрсатгим йўқ. Билиб бўладими!

— Ўзинг биласан,— деди у тулпорини жилдириб.— Аммо эртага бир вақт ажратсанг: анув Илҳом сутчиникига ўтиб келардик. Адам раҳматлининг қарз саломлари бор. Суриштириб қўярсан?

— Суриштиришга-ку, суриштираман, лекин эртагача топиб бўлармикан? Ёнғиз одам...

қаёққа күчди, кимнинг қаватига борди? — дедим ростига күчиб.

— Нима, бола-чақаси йўқ, сўққабошмикан? — деди акам бир ғалати ҳайратга тушиб. У ялт этиб қараганидан сездим, бўлмаса эътибор бермаётib эдим.

— Бор, деб эшитганман. Лекин борди-келди қилишмас экан.

— Қизиқ-ку?! Иссик-совуғи-чи, ким қарайди экан? Шундай одам билан юзкўрмас бўп кетишмагандир, ахир?

— Билмадим, биз эсимизни танибмизки, сутчилик қилиб, ёлғиз туради.

— Тарки дунё қилганми ё? — деди Олим акам ишонқирамай. Нимага бу одамга қизиқиб қолди — тушунолмасдим.

— Дарвеш бўлиб... дарвеш эмас. Фақат қанақадир одамовироқ.

— Ғалати, — деб таажжубланди акам, аммо қайтиб бошқа сўрамай қўя қолди. Иймандими ё бошқа гап борми, билолмадим. Сағбондан ўтиб, Хости Имомга бурилгунимизча ҳам жим борди. Мен эсам энди уни гапга солишга журъат этолмай, бу қадар узоқ сукутга кетганидан хавфсираб ўтирадим. Тушунуксиз бор ҳол: қарз саломини етказадиган одамни шунчалик суриштириш зарур эканми?

— Ҳар эҳтимолга қарши манавини опқўй, — деди у нихоят жимитдек мезбонқоғоз узатиб.

— Кўнғироқлашармиз, бўйтими?

— Яхши, ишларимдан кутулишим билан қиласман,— дедим майдонга яқин жойда тушиб қолаётиб.

— Уйда бўлмасам, ишхонамдан топасан. Тортинмай сўрайвер, — деди у.

Демак, ишлайди. Узилишиб кетмаган илгариги хизматидан. Сутчини зўр бериб суриштириши ҳам бежизмас.

— Яхши, — у ҳақда яна ёмон хаёлга бора бошлаганимдан хижолатга тушиб, машина эшигини тез ёпақолдим.

У жилмайбина им қоқдию зигирча ҳам шубҳага бормай жўнаб кетди. Мен уялиб қолавердим. Энг ёмо-ни — ўзимга таскин берадиган сўз тополмасдим. Дунёда бирор ҳақда ёмон фикрга боришдан ёмони йўқ экан, тавба.

Лекин Оллоҳ ўзи кечирсинг, бошига шунча ташвишу кўргиликлар тушиб турган бу хонадонни, унинг эгаларини ҳар кимга маълум қилиб ҳам бўлмасди-да. Қолаверса, Чаман акамни Олим акам танимаса ҳам майли экан...

Бир чиройли тараб қўйилган токлар текис шўралай бошлабди. Одди (кунгай томонлари) бир ажойиб — жимит барглар ёзиб офтоб нурини эма кетганлар.

Кўклам ишкомлар устига кўк ёпинчиғини ёпиш ҳаракатига тушган бўлса-да, ҳов — тепадаги овлоқ ҳовузнинг гир атрофига сафланган қора толлар аллақачон ороланиб, шамолда чайқалиб ётибдилар. Фақат ҳовуз жонивор неча йилдирки, сув кўрмаган. Ариқларни тозалаб, сув очиб келгувчи кимсанинг ўзи йўқ, Чаман акам ўша кетганча бедарак. Яна қанақа омонат қолдирибди экан менга? Ўша келганида бераверса бўлмас эканми? Ё шундай тайнинлаганми ўзи?

Сўри тагида тўхтаб, чақирганимдан сўнгтина ичкаридан сарвдек бўлиб опаси чиқиб келди. У узун сариқ атлас кўйлакда эди, тақимига тушиб турган йўғон икки ўрим сочи ундан-да бўйчан кўрсатарди уни.

— Келинг, келдизми? — деди у танғиган рўмолини пешонасига туширибрөқ ўраб. Мулозамат — аёл кишининг кўрки-да, қаранг, унга ҳам ярашаётib эди. Фақат ҳамиша чирсиллаб, юзидан заҳар томиб тургувчи бу аёлдаги ўзгариш — тушунуксиз эди. Чиндан асрандисига ачиняпти микан? Борида турткилаб бир ерга етаркан, энди қадри ўтибдими?

Мен салом бериб, яқинлашиб бордим. Аммо ич-ичимдан ҳайиқиб турибман.

— Яхши ўтирибсизларми, холамойим бардам-бақувватмилар? — дедим чўчиғина.

Билиб бўладими, бу заққумойни? Чиндан ҳам унинг зулук қошлари чимирилиб тушди.

— Анув тентираганнинг юришини кўрмайсизми? — деди бошламасига.

— Ким? — дебман англаб-англамай.

— Ҳамиша шу! Бир кетса — бадар кетади! На уйини ўйлади, на жойини. Билмадим, ойим кўчага тукқанмилар уни!..

Тушундим! Чаман акамни яниб боряпти. Янигандаям ойисига эшиттириб, узиб-узиб оладиган қилиб саннаб боряпти. Сал бундайроқ айтаверса, боякишни аяса бўлади-ку, йўқ, феъли шунақа, албатта, нишини бировга суқиб туриши керак!..

Мениям ичимдан бир нарса тошиб кела бошлади:

— Мени шунга чақирганмисиз? — дедим эргашишдан тўхтаб.

У хуши учиб қайрилдию авзойимни кўриб (қараса, бурилиб кетворишдан ҳам тоймайман!) юмшади, юзига бинойи одамлик сиёхи югурди:

— Вой, маъқиб турибсиз, келавурмайсизми?

Мен ҳам «ўзиззи гапиззи қаранг, зардангизни қаранг!», дегандай чимирилдим.

У кўл силкиди:

— Мен қўяверинг, эътибор қилманг. Азбаройи тўйиб кетганимдан айтаман-да, — деб ёрилди. — Илгари қанақа эдим, хў... билмайсиз. Ҳаммаси анув шўртумшуғимдан бошланди. Бўлмаса, юрувдим саннаб-саннаб, гар-гар кекириб... Ҳеч кимга сўз бермай. Баъзан заҳаримни сочиб, баъзан назаримга илмай. Бу турмуш деганларигаям тупуриб... Шу бола шунақиб кетдию... — У энди ёнимга тушиб олиб, дарди дунёсини тўкиб борарди, — мен уни «Ҳа, аразлади-да, бир», деб ўтирибман. У бўлса, нима қилиб кетибди!..

— Нима қилиб кетибди? — дедим мен ўгирилиб.

У тўхтаб, ҳамма гап шунда-да, дегандай им қоқди:

— «Грой»лик қип кетибдилар, ўзларича.

— Йўғ-е, — дедим ишонолмай.

У яқин келиб қулоғимга бир нарса демоқчи бўлиб эди, ялпиз ҳиди гуркираб кетиб, унинг бўйига эсим оғди. (Қулоғида ё кўксига эканми, ялпиз жонивор, билолмадим). У шипшиди:

— Ойимларга айтиб ўтирманг-у... анув, балога йўлиқкургинанинг Ёдгорини қидириб келганлар шунга йўлиқкан чиқади. Бўлмаса, мен Ёдорман деб кетворадими? — У нари чекилиб, яна ялпиз ҳиди гуркиради. Унинг бўйи шунақа тансиқ, шунақа тоза эдики, димоғизга урилишидан одам ўзини йўқотиб, оламни унутар эди.

— Ўз кўнгилларида мени бир куйдирмоқчи бўлганлар-да.

— Йўғ-е, бола-ку, ҳали. Қолаверса, қайси бола онасига ёмонлик соғинади, — дедиму тилимни тишлиб қолдим. Мен ўзим сезмай қовун тушириб қўйган эдим, орқасидан сипоришлашга уриндим: — Шошманг, бу гапни... қаердан олдингиз?

— Қайси, Ёдорман деб кетворганиними? Кўчовзадигилардан-да. Болаларни ўртасида гап ётармиди, — кейин мен томон энгашиб, шивирлади: — Ойимларга билдирмай қўяқолинг, кейинам нечтаси сўроқлаб келиб-кетди.

— Нечтаси? Кимни сўроқлайди? — Тушуна қолмасдим мен.

— Ўша кеннойизни арзандасини-да, кимни бўларди.

Юрагим шув этди:

— Қаердан ис ола қолишибди?

— Билмасам...

Биз юқорига қараб юравердик, лекин менинг ичим ғурмишлагандан ғурмишлаб боряпти.

— Нима истайдилар? Айтмаганингизга қўйишмаяптими? — дедим қўрқа-писа.

Асал опанинг қошлари чимирилди:

— Сиз менга осон тутманг, оповси, — деди феъли айний бошлаб, — ўзимники етмагандай, уникига ҳам қувишими керакми? Далага опкетишган, дедим.

— Бекор қилибсиз шуни, — дедим оғринибгина.

У ялт этиб ўгирилди:

— Нима, топиб борищдими? — деди саросималаниб.  
— Шунга ўхшашроқ, — дедим мавхум қилиб, асли ўшаларми, бошқаларми — билмасдим.  
— Неча киши эдилар?  
— Ким?  
— Ўша келганлар-да.  
— Ҳа, уларми? Биттаси аниқ эсимда: жуда пўрим кийиниб опти-ю, ўзи четда турибди. Колганлари бозорнинг болалари эди шекилли.  
— Қизик, — дедим мен, — қаердан била қолдиз?  
— Тилидан-де, шу ўзимизни Тошканни «вотти-вотти» боллари.  
— Шу холосми?  
— Тағин биттаси келганмиш самбитдек йигитча мен йўғимда. Ойим биладилар.  
— Қаерданлигини айтишмадими? — дедим ичим тошиб.  
— Ижроқўмданмиз, дебди шекилли.  
Ичим шув-в этди: Аниқ ўшалар! Ўз идорасининг номи қолиб, ижроқўм соясида юргувчила!

Колаверса, бу сочи узун — ақли калталарга ҳеч замонда тўгрисини айтарканми?! Бошқа ким ҳам бўлиши мумкин?

Бирдан ичкарига кирмайин ҳам... кетворгим келиб кетди! Ҳали бизникига борганлар ҳам шуларга тегишли чиқмаси эди?!

Ичим фурмишлаб, Асал опанинг юзига термулдим:  
— Ҳар гал ёлғиз келармиди?  
У дабдурустдан тушунмади:  
— Кимни айтасиз?  
— Ўша ижроқумни боласи-да.  
— Ҳа, йўқ. Ўзи икки мартагина келибди. Анувлар эса алмисоқдан қолган «Победа» миниб олишибди, тағин димоғларидан қурт ёғилади.  
— Тушунарли, — дедим-у, лекин ўла қолсин, агар бир нарсага тушунган бўлсан, ким юборган экан уларни? — Хатни қўрсам бўладими? — дедим ниҳоят.

— Айтмоқчи, ҳозир опчиқаман, унгача ойимлар билан кўриша туринг, — деб у ўз уйи томон юрди. Рости, бу ўзига тоза бино қўйган жувоннинг унчалик ҳам ақлли эмаслигига ҳайрон қолиб турардим. Шу ҳусн, шу қад, шу қўркни берган Худо уни наинки фарзанддан, озгина ақлдан ҳам қисгандек эди. Бўлмаса, бироннинг боласи, кўзининг оқу қорасини (аниқ айтмаган тақдирда ҳам!) қаёққа олиб кетганимизни айтадими? Мен билмайман, деса олам гулистон-ку, Ўзини ёқтирумаса, боласига ачинмайдими? Она бўлиб кўрмаса, қийин экан-да.

Ойтўра буви бир бошқа олам эди, ўша ўтирган ерида қалампирмунчоқми, мушк-анбарлар ҳидигами кўмилиб, ўша-ўша оқ-оппоқ бўлиб ўтираси. Менинг овозимни эшитгандаёқ бир ғалати жонсараклик билан йўлимга кўз тикиб ўтирган эканлар, кўра юзлари офтобдайин ёришиб кетди.

— Вой, ўзим айланай, мирзо йигитдан. Бормисиз, бўйлариздан ўргилай, келинг.  
Мен энгашиб, елкамни тутиб бордим. У киши бағрига тортиб, куракларимни силай кетди.  
— Вой, болагинамнинг суюнган тоғгинаси, ишонган боғгинаси. Яхшиям сиз боракансиз. Сизни кўриб соғинган кўнгилларимиз бир хотиржам тортди.

Хонтахта ўрнига ҳам устига ялангқават бир нарса ташланган курси ёнига чўкиб:  
— Тинчликми, буви, қандай ўтирибсизлар? — дедим дуодан сўнг.  
— Ўтирибмиз, мирзо болам, ўтирибмиз. Қаранг, келганиз қандай ярашиб турибди. Қадамларизга хасанот, уйларимизни тўлдириб юбордингиз, — дердилар буви ҳеч ерга сифмай. Фақат ўтирган ерларидан туролмасдилар. Туролсалар, билмадим, қандай айланиб-ўргилар эканлар устимда. Тавба, бу аёл қариганда шунчалик, ёшлигига қандай ўтган экан? Юзларидан ёғилаётган бу нур қайдан балқиб чиқиб келаётиби — ҳеч адo бўладиганмас. Икки оғиз ширин

гапирсалароқ ё суйиб тикилсалар бас, балқиб чиқиб келаверади, чиқиб келаверади.

— Сўратган экансиз, — дедим ийманиб.

— Ҳа, айтмоқчи, Чаманимдан одам келувди.

— Одам?! — дедим ҳайратга тушиб: қайси бирини айтаяптилар экан?

— Ўша, ўзининг об-ҳаво ишхонасидан. Самбитдек йигитча.

— Қанақа ишхона? — Самбитдек йигитчани фаҳм-лагандек бўлдим-у, лекин ишхонасига... тушунмадим. Чаман акадек бехаловат одамнинг қўним бир ишхонаси бораканми?

— Вой, ўша тоғ-тошлардаги гадойтопмас истансаларгами — шуларга қарайди-да... Ойлаб бадар кетиши шундан, болам, — дедилар буви ҳамма оналарга хос бир содда-дўлворлик билан. Ё менга шундай туюлдимикан? Лекин ўзим бу гапни эшитиб анг-танг қолгандим. У киши эса юзларига бир хотиржамлик иниб, тушунтирас эдилар:

— Шунақа бадар кетганида, узоқ-узоқлардан бир-бир идорасига хабар бериб, уйга одам юбориб қўяди. Биззи сўраб, ҳам хотиржам тортириб. Юбормаса, нима қиласардик? Дуои жонини қип ўтиришдан бўлак нимага ярардик? Ило-ой, соғ-омон кўриштирасин Ўзи...

Менинг хаёлимда эса тамоми бошқа ўйлар ғужгон уради: об-ҳавони кузатиш идораси?.. Қанақа «об-ҳаво»ю қанақа «кузатиш»? Ҳеч тасаввуримга сифмасди Чаман акадай бир одамнинг шунақа ишда ишлаши, истансаларма-истанса айлангани кетиши. Менинг тасаввуримда у тамомила бошқа иш билан «санқий»дигандек эди. Ҳозир қай бири ҳақ-ростлигини ажратолмай саранг эдим.

Аммо битта нарсадан қўнглим тўқ: Асал опа ўша ўзи кўролмай қолган самбитдек йигитча... биз ўйлагандек ғалати сўроқлаб келувчи эмас, Чаман аканинг ишхонасидан экан. Ўз одами экан. Бундан ҳйла хотиржам тортиб сўрадим:

— Яқин орада қайтиб қоларканларми ё бошқа гап билан кептими?..

— Яхши эсимга солдиз, унутай дебман. Сал ушланиб қолаётган экан, тайинлаб юборибди. Сизга тегишли гап, — буви овозларини пастлатиб, ташқари ҳовлига аланглаб олдилар. — Атай Асалим йўғида келиб, айтиб кетди.

Мен бу гапдан ҳайрон қолган эдим:

— Йўғида айтиб кетди?

У киши маъноли бош силкидилар:

— Ёдгоримизни аясини сизга тайинлаб кетган экан, шуни...

— Тайинлаб кетганлар, тўғри, ками бораканми? Нима дейди?.. — дедим юрагим пўкиллаб. Оператсиадан хабар топа қолибдими ё?... Шунга қўнгли тинчимай...

— Билмадим нега, жавоб тегиши билан далангизга опчикиб кетаркансиз. Ёдгориниям, ўзиниям...

— Нега, тинчликмикан? — дедим ичим аллатовур симиллаб.

— Билмасам... Жуда қаттиқ тайинлабди. Ўзи тушунади деганмиш.

— Тушунади?! Ким, менми? — дедим баттар хавотирим ортиб.

— Ҳа, болам, сизни айтди.

Аммо менинг ичимда тушунуксиздан-тушуниксиз бир қўркувлар уйғониб келар эди. Ғалатидан ғалати хабар. Чаман акам ўша ёқда туриб ниманинг исини сезибди, мени қидириб қопти? Ёдгорни сўроқлаб келишлари, Кемшиктоининг «Мен Ёдорман» деб кетворишиларида... ҳаммасида чинданам бир сир бордек эди. Энди бундай топшириқ!.. Ростдан ҳам об-ҳаво ўша Тангритоғ томонлардан айниб келаётган эканми? Улар Султон акамнинг ўзи қолиб, энди аёлини излаб қолишган бўлса-чи? Чинданам қўрқулик-ку! Эс борида этакни ёпгулик-ку!

— Ўша йигитча ҳар эҳтимолга қарши Сизнинг адресиззи ёзив олди. Қанғлида туришади, дедим...

— Ким? — дедим дафъатан англаб етмай.

— Ўша Чаман юборган йигит-да, болам, ким бўларди?

— Ҳа-а, — дедиму бирдан нафасим ичимга тушиб кетди. — Шошманг, у Чаман акам билан ишласа, ўзлари юборган бўлсалар, адресимни айтмабдиларми? Ғалати-ку, — дедим бувига.

— Вой, шуни айтинг. Менам лақقا тушибман-ку. Чаманим айтса керак эди, — дедилар бўшашиб.

Мен ижикилаб сўрашга мажбур эдим:

— Илгариям келганми ҳеч?.. Чаман акам борларида?.. — дедим ақлим бир тиник ишлай бошлаб.

— Самбитдек йигитчами? Йўқ, энди кўришим шекилли, — дедилар юзларига ажинми-нима ина бошлаб. (Лекин ажабки, бу ажинлар ҳам юзнинг ич-ичидан балқиб чиқмоқда бўлган, анув ипакдай мулойим нурни йўқатолмас эди.) — Сиз уни ким деб ўйлайсиз? — дедилар у киши ташвишланиб.

— Ҳайронман. Чаман акам тайинлаган бўлсалар, ишхонамданоқ топиб оларди. Бу ердан излаб юрмасди.

— Ҳа-я, шуни айтинг. Бизни хўб авраб кетибди-ми, а?

— Билмасам-билолмасам,— дедим мен, — уйга борсам, маълум бўлмаса, ҳозир бир нарса дейиш қийин.

— Вой, мен эси йўқ, Чаман деса, лақقا тушииб ўтирибманми? Қайтта туришиззи айтиб берибманми?.. Вой, мен — эсхонаси учган! Нима қип қўйибман?

Ойтўра буви азза-базза ўзини қўярга жой тополмай адёл остида тош қотган оёқларининг тиззаларига шаппалаганча, айтиб қуинар, қўлини тиззаларига ҳар ташланганда, ўзининг залвориданми, аламининг зўриданми, каравот лопиллаб силкинар, кампирнинг ўзини қўтариб ташлагудек бўлар эди. Шунақа қуиб кетибди.

Мен эса у кишининг қўлларию тиззаларига ёпишиб, бир нималар деб тасалли бериб ётибман.

— Вой, холамойижон, ахир Сизда нима гуноҳ, тинч-ланинг. Ҳали ҳеч гап йўқ-ку. Мен тўғри ўша шифохонадан келяпман-ку. Тинчлик-омонлик-ку.

Ўзим шундай деяпман-у, ичим сидирилиб тушиб боряпти: Ўзи бугун бир ўлимдан қолгани билан бу ёқда ҳали шунча хатарлар турган эканми? Энди нима қиласиз? Тузалмай туриб, шифохонадан қандай опчиқиб кетай? Ёдгормуродни-чи, қаердан топдим?..

\* \* \*

Уйга қандай етиб келганимни билмайман. Шунақа вактда ўзи бир белги беради шекилли: ич-ичимдан ғулгула аралаш бир қўрқув туриб, бош қўтариб келяптики, оқибатини эсласам... нафасим ичимга туши-иб-тушиб кетарди. У ёғини ўйлашга ҳатто журъат этолмасдим.

Уйга кирсам, қўрқанимдек, «Амақужон!»лаб чопқиллаб келадиган болакай на ҳовли сахнида қўринар, на ичкаридан овози чиқарди!

Уйларимиз аллақандай ҳувиллаб қолганди.

— Ёдгор қани, бола қани? Ким опкетди уни? — деб бақириб юбораёздим аёлимга.

— Вой, адаси... ўзиз биларкансиз-ку...

— Кимни биларканман?! Нимани биларканман?..

Саида кўзларини пирпиратди:

— Буваси... — деди дудукланиб.

— Нима, буваси?

— Сўратибдимиш-ку, кўргиси келиб.

— Шу гапга ишониб ўтирибсанларми? — деб юбордим умримда биринчи марта сенсираб.

— Ким келди, қандай нобакор?

Менинг овозимга ойим уйларини очиб, оstonада қўриниш бердилар. Жойнамоз устида

тасбех айтиб ўтирган бўлсалар, қўрқитиб юборибман шекилли, деб сал паст тушдим.

— Телефоним бор, ишхонам бор, мен ўлгани кетган эмасман-ку, хабар қилмайсизларми?

— Қилдим-ку, адаси.

— Бўлар иш бўлиб, бўёғи ўчгандан кейин...ми?

— Ҳа, болам, ўзингни бос, — ойим айвонга чиқибоқ гилам устига чўка қолдилар. — Ҳаммаси сен қўрқанчамас. Келинга айтмовдим. Мана, хат ташлаб кетган, — дедилар нимчалари чўнтағидан буқлоғлиқ қофоз чиқариб.

Қарасам, тумор хат. Қўлларим титраб очдим: «Ука, Тўра буванинг илтимослари шундай бўлди. Ёдгормурод жиянчамизни яна ҳам бехавотирроқ жойга ола кетдик. Узр, кутолмадик. Қисинманг жудаям. Мен ўзингиз билган Зоҳидхонман»...

— Чин-мочинни отликقا ҳам топилмас қора костум-шимиди... сал бойваччароқ қўринди, холос, бо-лам, — дердилар камига ойим.

— Э, ўша Зоҳидхонми!..

Ойим эркин тин олдилар:

— Ана, таниркансан-ку, болам. Одамни юрагини чиқариб юбординг.

Таниганда қандоқ! Кеннойимга табиб излаб борганимда кимни учратибман?! Ўша кептими?

Унда самбитдек йигитча ким? Чаман акамнинг номидан уйларигача излаб борган? Ёдгорни сўроқлаб юрган? Буларга қандай даҳли бор?

Тагига етиб қўр-чи, бу жумбокни!

Мен ҳотиржам тортишимни ҳам, тортмасимни ҳам билмасдим...

#### 4. ЭШОН БУВАНИНГ ҚАРЗ САЛОМЛАРИ ёхуд шафоат ҳуқуқи

Ойимларга бериб кетишган хатча читтак қанотидек келиб-келмас, биз болаликда ясад оладиган қофоз күшчаларимизга жуда-жуда ўхшаб кетарди. Фақат бунинг жиндек думчаси бору, тумшуғи йўқ.

Шунаққиб Ёдгормуродни ана шундай семургчанинг белчасига ўткази-иб, учирни-иб кетишибди! Яна уни «бехавотирроқ жойга ола кетдик» деб авраганларига ўлайми! (Энди у менга бир авровдек туюлмоқда эди. Алданиб қолганга ўхшардим.) Оббо бойвачча-еї, сўрамасдан-истамасдан олиб кетаверибди-да? Дарвоқе, ким дейди? Тўра бува дейдими? Ўша юзларидан нур ёғилиб, чиройли кузалган соқолларию бироз қисиқ, бодомковоқ кўзлари анави расмлардаги Навоий бобомизгами, кимгadir жуда ўхшаб кетадиган табиб... юборибдими? Ўша борганимда, келдингизми, белги берган сизнинг кеннойингизмиди, деб... токчадан аввалдан тайёр-лаб қўйган доруларни олиб берган одам-а? Наҳот ўша одам ҳамма нарсадан воқиф?..

Ёки кечаги кўнгил сўраб борганиларида... кенно-йимнинг ўзи илтимос қилдимикан? Ёдгормуродимдан кўнглим тинчмас, деб? Балки.

Худонинг қудратини қарангки, шу бир оғиз сўз кифоя этиб, мен тинчий қолган эдим. Чиндан ҳам Тўра бува аралашган бўлсалар, нимадан қўрқаман, хавотирланаман?!

Фақат бир нарсадан ҳайратдаман. У киши кенно-йим ётган жой — шифохонани қандай топиб борди-ю, Ёдгормурод бизникидалигини қаердан билди? Ахир кеннойим бизнинг янги жойларимизни билмайди-ку, айтди десам? Балки булар ҳам ҳов ўшандагидек, дору тайёрлаб, бирор келишини кутиб ўтирганидек, ўзи белги берадимикан? Боланинг устида, бу муштипар оиласнинг тепасида айланган қора хатарни ҳам шундай сезиб... буларга қайишдимикан?

— Балки Ҳизр деганлари шудир?..

— Ким дединг? — ойим муштдек бўлиб, тасбех ўгириб, сано айтиб ўтириб эдилар, ялт этиб юзимга қарадилар.

— Табибни айтаман.

— Қайси? — у киши англамай кўз пирпиратдилар, сўнг кафтларини ўпиб, салга ёшланиб келаверадиган, ажинлар мижжаларига қадар сикиб борган кўзларига босиб қўйдилар.

— Маҳфуз кеннойимга қараётган одамни айтаман. Ёдгорниям ўша одам олдириб кетибдимиш ўз пано-хига.

— Ҳех, болам-а, — дедилар ойим чўзиб, сўнг бош чайқаб, билинар-билинмас лабларини жийириб қўйдилар. — Банданинг дасти қаерга етарди?! Аввало, Оллоҳ ўз паноҳига олсин!

— Ҳар қалай-да, ойи. Ўзи ҳам ўша ёқдан экан. Бекорга...

— Қаёқдан-қаёқдан? Ўша Мирзахўжабойлар бориб қўнган тарафдан эканми?

Мен дафъатан англай олмадим.

— Мирзахўжабойингиз ким?..

— Эсингдан чиқдими? Ким бўларди, ўша келинимизнинг бой отасида, ўғлим. Ўша бир вақтги қоч-қоч, қув-қувларда қаёққа қочиб, жон сақлабди?!

— Ҳа-а... ўша кўчиб боришган ери — Тангритоғда ҳам бу ёқдагидек бир Олмазор боғ қилиб, унгаям бир анҳор сув опчиққан, ўртасида ҳовузу шийпону супа-супачалар курдирган, шусиз бу ёқдаги жойларини унутолмаган одамни айтасизми?

— Ўша табибинг... бойни, буларни билса керакда!

— Билса керакки, одам юбориб, Ёдгорни опкеттириби. Бўлмаса, унга нима эди қайғуриб?..

Аммо ойим бирдан маҳзун тортиб, қўлларининг юзини (ўша териси бир куйиб тушиб, қайта эт битгандайин қуруқшаб қорайиб қолган, томирлари эса кўқ ипакдайн ингичка тортган қўлларини) силаб қолдилар. Ичимга ғулғула тушиб, юрагим дукирлаб келди: «Нимани назардан қочирибман? Ойим ҳуда-бехудага ташвишга тушмасдилар-ку...» Ўзим эса юрак ютиб сўрлмасдим. (Уришиб беришларидан ҳайиқиб турибман.)

— Аканг тинчмикан, ўзи? Ҳеч бир хабар бўлмади-ку, — дедилар хавотирланиб.

Мен ичим сидирилиб, бош чайқадим.

— Билса, ўша Чаман акам билади, у ҳам бир кетганча... бадар кетиб боряпти. Нега унака деяпсиз, ойи?

— Маҳфуз кеннойингни дараги чиққанидан бир суюниблар эдим, Оллоҳнинг марҳамати билан ўзи ҳам осмондан тушгандай кириб келиб қоладими, деб ўтирувдим. Манави воқеалар... яхшилиқдан дарак бермаётгандай-ку?

— Қайси воқеалар, ойи, — дедим зўрға. Сиз нимани назарда тутяпсиз, демоқчиман-ку, айттолмасдим.

— Кеннойингни дараги чиққанида бу табибнинг пайдо бўлиб, анави боланинг йўқолиши, Ёдгорни олдириб кетишлари... — дедилар ойим нигоҳларини узмай, — ҳаммаси аллақандай ғалати-да, болам.

Этларим жимирлаб кетди. Лекин ўзим сир бой бергим келмасди:

— Йўғ-е, ойи, сиз ўйлаганчаликмас, ҳамма-ҳамма билан шунақа ҳалим, тақводор одам-а? Кўйинг.

— Отаси ундей бўб кетувди, боллари бундай тўзимаса дейман-да.

Мен эса фикримдан қайтолмасдим:

— Қолаверса, у табибни ўзим излаб топиб борганман, ойи, у буларнимас...

— Кейин-чи, кейин ҳам кўргани йўқми?

— Кимни? Кеннойимнimi? — дедим бўшашиб.— Борибди...

— Ана, айтдим-ку.

Мен ойимнинг юзларига эсим оғиброқ тикилдим:

— Буларда бир сир бор... дейсизми?

— Шаҳрингда нима кўп, келгинди кўп. Айникса, ўша ёқдан келганлар.

— Келса, ҳаммаси қочиб ўтганлар, — дедим мен.

Баривир, ойим бош тебраб, қўшилмадилар:

— Уларнинг орасида қанча — эшитар қулоги, ай-ғоқчиси борийкин? Уларам анойимасдир?

Ойим шунга зингил ташлаганларига ҳайрон қолиб, беихтиёр меҳрим товланди. (Ахир, бу ҳаммаси кеннойим учун-ку, шулар ҳам бир халоват топа қолса эди, деб куйинганлардан-ку, бўлмаса, у кишига нима!):

— Сиз ҳақсиз, ойи,— дедим чинига кўчиб,— лекин Ёдгорни олдириб кетиб яхши қилибдилар қайтага.

— Шундай бўлсаям,— у киши илтижо этгандек тикилдилар,— ойинг ўргилсин, эҳтиёт бўл, чув тушириб кетишмасин тағин. Ҳаммадан бурун Олимдан ҳазир бўл.

Мен ҳар нарсани кутсан ҳам, буни кутмаган эдим:

— Сиз... у ҳамма нарсани билади, деб ўйлайсиз-ми?

У киши бошларини қуи солинтиридилар:

— Бир нарса деб... Оллоҳнинг олдида гуноҳкор бўлиб қолишдан қўрқаман-у, лекин, болам, акангнинг бошида яна қора булутлар ўралашиб қолганга ўхшайди. У бекорга келмаган. Эсласанг, илгариям бир шундай бўлиб эди.

Қароргоҳга саллот ташлашгандагиси рост. Лекин эндијам уни ўртага суқишаپтими? Ўз укасининг қўли билан нима қилишмоқчи? Ичимда шундай саволлар чарх уриб ётиди-ю, айтолмасдим:

— Эндијам дейсизми? — дея олдим зўрға.

— Ишқилиб мен адашаётган бўлай, болам. Кимни ҳидоятга бошлаб, кимни залолатга солиб қўйганини ёлғиз Ўзи билмаса, бандаси нимани билади!

— Нима қил, дейсиз? — Ўзимни ночор-нотавон, маслаҳатга муҳтож сезиб кетдим.

— Эҳтиёт бўл, болам. Ҳар кимни ўзингга сирдош тутаверма. Давлатни катта газетида ишлайсан. Орқа-ўнгингга қараб юр. Сениям олиб кетиб қолишса, мен нима қила оламан?..

— Ойи, ҳов, ойи, нималар деяпсиз? — Ҳеч кутмаганимда ойим гап ўзанини бу ёқقا буриб, кўзёш қилиб қолишларидан ўзим ғалати бўлиб кетдим. — Ҳозир унака даврмас-ку, ахир.

— Сен айтаверасан!.. Лекин буларнинг тусланиб-тovланишига, сўзларига ишонма. Етимнинг бошини силашларига, душман изламасликларига ишонма! Ҳамма балоларни қўрган мен биламанми, сен биласанми буларни? Сен ҳали нимани кўрибсан? Кўрмагинам, куймагинам, илоҳим.

Ойим рўмолларининг учини мижжаларига боса-боса ахийри тинчиidlару юзимга хижолат аралаш қарадилар:

— Нима дейди? Ёрилдими ҳеч?

— Ким, ойи? — дедим дабдурустдан англамай.

— Олим аканг-да. Бекорга ўралашиб юрмагандир орқангда, — кейин қўшиб қўйдилар. — Бизга-ку, сир бермайди. Лекин сенга айтгандир.

— Айтди, ойи, айтди. Бир кишини топишвориши керак экан, — дедим ётиғи билан.

У киши ялт этиб қарадилар:

— Яна кимга қизиқиб қопти?

— Анув эски мижозиз бўларди-ку, Илҳом сутчи. Ўшанга.

— Вой, ўлмасам, у ғирт таркидунё қилган одам-ку. Унинг нимасига қизиқади? — Ойим ҳайратларини яширолмай юзларини сийпаб қўйдилар. — Айт, тинч кўйсин бояқиши. Ўзининг куйгани етарли.

Менинг савол халтам очилиб кетган эди:

— Нимадан, ойи?

— Бирор тагига етолмайдиган тарих бу, болам.

— Нима туфайли?

— Кошки бир оғиз сўз билан тушунтириб бўлса.

Ойим ниманингдир андешасида бу тарихни очгилари келмас, мен эсам тагига етмагунимча

кўнглим жойига тушмас эди:

— Юзкўрмас бўлиб кетишганми ё...  
— Ундей деб ҳам бўлмас...  
— Болалари бормиш-ку, бизлар тенги. Шундай одамлар ҳам... — Мен айтмаганларига кўймай ижикилай бошлаган эдим.

— Ҳа, энди, болам, тақдирнинг ёзмиши-да. Ким ундан қочиб қутулибди. Булар ҳам ўша имтиҳон тузогига тушганлардан,— дедилар ойим ўзларидан қочириб.

— Имтиҳон тузоги?— Мен энди ҳеч нарсага тушунмай бошлаган эдим.— Ким туфайли? Қачонги тарих?

— Ҳе-е, болам-а, Оллоҳ суйгулик қилса қилсин экан-у, куйгулик қилмасин экан ҳеч кимни. Буларни тарихи шунақароқ, — дедилар бир чеккасини очиб. Жудаям қизиқ эди, қайтариб сўрадим:

— Оғзиларига бирон сўз олиб қўйганмилар?

Ойим, шунга яқинроқ, деган каби бош силкидилар:

— Бўлмаса, ўзи бойнинг қизини опқочиб келиб, ўқитиб муаллим қилиб, никоҳлаб олган. Шунақа мулла одам. Аммо орага уруш тушиб, бир кун қайтиб келсаки, ойдай хотини аёл зотига суяги йўқ мудирнинг қўлига ишга ўтиб қопти. Шу ғашланганча... уйининг остонасигаям қадам босмай кетди.

Шунақа рашкчи эканми? Ё бирон гап эшитиб, тўнини тескари кийибдими? Ўзим минг хил ўйларга бориб келяпман-у, кошки ойимлардан сўролсам...

— У одамга ҳам бир оғиз бир нарса демабдими?— дея олдим ахийри.

Ойим бош чайқадилар:

— Нима деган, нима қўйган — билмадим. Лекин шу воқеадан ярим йил ўтиб, ўша одам қамалиб кетди. Ўз оёғидан йитдими, у қаматдими — ёлғиз Оллоҳ билади.

— Шундан кейинам қайтмадими?

— Қаёқда. Қанча одамлар ўртага тушди. Хотиниям хиёнат қилмаган экан... Лекин у сўзидан қайтмади. Бошқа уйланмадиям, рўйхуш ҳам бермади. Шаҳарда катта идорада ишларкан, у ердан ҳам кетиб, бизнинг шу Чўлпонотага келиб қолди.

— Одамовилиги шундан экан-да?

— Бир чеккаси шундан бўлса, бир чеккаси ишидан ҳам этак силкиб кетганга ўхшайди. Омад шунақа — бебақо, болам, у юз ўғирса, ҳар ақллилар девонага айланиб, у кулса, ҳар адашганлар ҳидоятга тушиб қолади. Бу одам серзардароқ қўрингани билан ўзи халим. Факат ҳар ким билан ики суйиб гаплашавермайди.

Ойим айтганларича бор эди. Айниқса, қора совуқ тушган қиши кунлари эски мовут қўйлак-шимию нағалли этиги устидан узу-ун жун чакмонни илиб, намат телпакни бостириб олса, денг, жуда тунд кўринарди. Кўлига битта наган етишмасди. У бўлса бир гала сутдан бўшаган бонкаларини обкашига қўшиб орқалаганча бозордан қайтар, атрофига қараб қўймасди. Баъзан Соли писмиқнинг гапида ҳам жон борми, деб ўйлаб қолардим. Анвар кеннойим (Солининг ойиси) топган узун-кулоқ гапларга қарагандан бу одамнинг олдига, ўша бирорнинг ташқисида турадиган жойига манман деган ўғрилар ҳам юрак ютиб киролмасмиш. Бошига наганини қўйиб ётармиш. Анвар кеннойи бу гапни қаердан олган, наганини қаердан кўра қопти — ҳеч ким билмайди. Лекин неча йилки, шу дув-дув гап тўхтамайди-тинмайди. У ҳам биронтасининг пешонасидан дарча очиб қўйганини ҳеч ким кўргани ҳам, эшитгани ҳам йўқ. Аммо у ўтиб кетгунча ҳаммамиз ҳайиқиб турганимиз-турган эди.

Мана энди Олим акам шу одамни суриштириб-сўроқлаб юрипти. «Бу буз-буз, кўч-кўчларда қаёққа жилдийкан, суриштириб қўрсанг, ўтиб келардик», дейди. Ўзи уни қаердан билади, бизнинг томонларга келиб қолганининг дарагини қаердан эшитган — айтиб ўтирмади. Ўзи шахсан танимаган (балки танир) одамни орқаваротдан суриштириб, қидириб юриши қизиқ. Мен

уни топиб беришга ҳам, бермасликка ҳам ҳайрон эдим. Ахийри ўйлаб-ўйлаб ойимларга маслаҳат солишга мажбур бўлдим.

— Балки шу кўч-кўч баҳонасида болалари... энди қаёққа ҳам борасиз, деб... олиб кетишгандир? Улар асли Кўтармаданмиди? — дедим.

— Сутчими, қайтса ўша бошидаёқ қайтарди. У туфлаган туфугини қайтариб оладиганларданмас. Ундан кўра ҳалиям бўлса гузардан суриштири, — дедилар ойим.

— Яхши, лекин бошлаб бориб уялиб қолмасмиканман? — дедим оёғим тортмаётганини сездириб.

— Нима иши боракан ўзи? Айтдими?

— Бир учини чиқаргандай бўлди.

— Нима дейди?

— Отам раҳматлининг қарз саломлари бор, дейди.

Ойим бу гапдан эслари оғиб, афтимга тикилдилар:

— Нима, нима?! Кимнинг гапини гапиряпсан?

— Ўзининг гапи... Шу одамга қарз саломлари бор, етказишим керак, дейди.

— Ўйлаб гапиряпсанми? Эшон поччани олиб кетишганига қанча бўляпти?! У киши тенгилар кўкариб чиқди-ку...

— Мен билмасам, ойи. Ўшоқдан келдим, қўлимда жон бердилар, дейди.

— Ўшоғи — қаёқ... экан? — дедилар ойим ҳамон ўзларига келолмай.

— Тангритоғдан... топдим, дейди.

— Ё қодир Оллоҳ! Ҳаёт эканларми?!

— Даракларини эшитиб, топиб борганмиш. Ўзи қўли билан ерга қўйганмиш.

— Субҳаналлоҳ! Охирги дамларини кўриб қолиш унга буюрган эканми? — деб ойим аззабазза кўзларига ёш олдилар. — Эшон поччани-я? Қанча вақт, қанча сувлар оқиб ўтиб-а? Туманли юртми — аллақаёққа олиб кетган дейишарди-ку. Бу ёқда эканларми? Оллоҳим хифзу ҳимоясига олиб, ризқ-рўзларини шу ёққа сочган эканми, тавба?

Ойимларга қўшилиб, мен ҳам ғалати бўлиб кетдим; тавба, биз бу ёқда не хаёлларга бориб юрибмиз: туманли юртларга сургун қилинган бўлсалар, гўрлари қаерларда қолди экан, шундай одам кафансиз кетдилармикан, деб ўтирибмиз-ку! У киши эса, мана, қаерда эканлар! Яна у одамни тирик кўриш, дуоларини олиб қолиш — келиб-келиб кимга насиб этибди!

Воҳ, ким бу хонадонни тўзитганлар билан келишолмай, қаерларда сарсон-саргардон юрибди, ҳатто юртига сифмай — бош олиб кетди, унга йўлиқмай шу Олим акамга йўлиқибдиларми? У кишини кўриб, дуоларини олиб қолиш шунга насиб этибдими? Бунда қандай сиру синоат, ҳикмат бор экан, англаб етолмасдим. Ахир, Султонмурод акам ҳам ўша Тангритоғ томонларда эди-ку?! Қолаверса, у киши у диёрга қандай бориб қолибдилар? Нима бу, тақдирнинг карамими ё Оллоҳнинг инояти? Ойимлар айтмоқчи, Оллоҳ хоҳласа, бандасини чоҳлардан ҳам тортиб олиб, адашган фарзанди-зурриёдига рўбарў қилишга ҳам қодирми?!

Ойим шундай хабарлар топиб келганимдан бир ерга этиб, юз-кўзларимга мамнун-мамнун тикилар эканлар, яна аллақаёнча нарсаларни сўрамоққа шайланиб-шайланиб ҳам қўяр эдилар. Ниҳоят, бир калима Қуръон тиловат этиб, савобини бағишилагач:

— Айтмоқчи, у киши сутчини қаердан танирканлар? — деб қолдилар.

— Ким? — дедим мен англаб-англамай.

— Эшон поччани айтаман-да. Ҳамонки, қарз саломлари бўлса?..

Чиндан ғалати эди: эшон почча қаёқдалару ҳукуматнинг ишонган идораларида хизмат кила-қила бу дунё хою ҳавасларидан этак силкиган сутчи қаёқда!

— Билмасам, ойи. Сўрамабман, қаранг-а,— дея олдим.

— Сўрашинг керак эди, болам. Эшон поччадай Оллоҳ азиз қилган одам ҳар кимга ҳам дуои салом йўлламасалар керак. У кишининг назарлари тушибдими, шундан билавер. Топишиб

юборсанг, савобга қоласан.

Ойим шунақалар. Ўтганларга дахлдор иш чикса, тамом, маҳкам ушлаб оладилар. Оллоҳ рози бўладиган иш экан, орқасидан қолма, деб туриб оладилар. Адо этилмагунча сўрайвериб, суриштиравериб, кишини ҳол-жонига қўймайдилар.

Ҳозир ҳам раъйларига қараб:

— Хўп, бугуноқ ўтиб, суриштириб келаман, — дедим-у, лекин юрагимнинг бир чеккасидаги ғашлиқдан хеч кутула олмасдим. Қулғим остида кўзга кўринмас бир маҳлуқ ҳадеб висирлар эди:

«Ҳамма қолиб, шу доғулига ишондингми? Олимга-я?» «Хонумонингни куйдиради-ку, бу сени Илҳом сутчингга қўшиб!..»

## **5. ЮРТДАН МУЖДАЮ СУЮНЧИЛУҒ яна ўша ҳикоячиға коронғу, муаллифга аён сафар тарихидан**

У қаъдага ўтириб, энди пайғамбар алайҳиссалом ҳақларига саловат бошлаб эди, ҳовлида қачондан бери чертак ўйнаб, халинчак учайтган қизалоқлар гурра чопишиб қолдилар:

— Вой, опоқбувамла...

— Чопдик-учдик, эшонтамла!

— Гузардан келуттила...

— Намоздан келуттила...

Ҳожининг дарагидан кап-кatta одам Худойберди ҳам шошиб, икки ёнига салом берib, намозни якунлай қолди. Бу вакт ноз-неъматларга тўла дастурхон ҳам бир четда қолиб, лўлаболишни тирсаги тагига тортганча аста ёнбошлаган Ака почча — шундай алп одам ҳам уйқу элитиб мишиллай бошлаган эди. Тоғу тош ошиб, дуч келган ерда тунаб келатурган сафар кишилари учун бой отаникидаги бу эътибору бу мулозаматлар... уларни элитмай кимни элитсин...

У бир табиатли, ислимий гуллар солиниб, оқ ипакдан сувлар юргизилган, устига устак аллақандай ифорлар гуркираб турган жойнамозни токчалар ўртасидаги қозикқа илиб, шеригини шоширди:

— Ҳой, ака почча, туриңг, тура қолинг, Ҳожи бува келиптилар...

— Нима, ким? — Ака почча азбаройи чўчиб тушганидан бошини сирланган деворга уриб олди. Кўзи мошдек очилиб, норозиланди: — Ваҳмангни қара-ю...

— Ўзингиз ҳам, — деди бешикчи, қистаб келатурган кулгусини босиб, — чўқдим дегунча бошиз оғиб кетовурмасин-да. Мехмон деган номиз бор.

— Читтақдек одам ўзингга teng қилдингми? — Ака почча ижирғаниб ўрнидан қўзғолди. — Тағин қиёматли ўртоқмиш бу.

— Биз билан юриб ҳали дуони каттасига шерик бўлганизда биласиз. Ҳали Ҳожи ота билсинлар.

— Ҳаммасидан бир чимдим уйқу ўтаверсин, — дея тўнғиллаб, усти ёпиқ ханик четида ярқираб турган офтоба билан турнадек бўйни чўзиқ обдаста томон ўтаверди у.

Бешикчи кулди:

— Тўну совға-саломлардан ҳам-а? Елкангизга ташлашганда ёқиб қолар?

Бешикчи ўзига қайтиб келадиган гапни сезмай қолган эди. Ака почча мийигида кулди:

— Саритойни чолга невараси ўрнида ўтказиб-а? Тўн тешиб чиқмасин.

Бу гапдан бешикчининг боши айланиб, этлари жимирлаёзди:

— Оллоҳ асрасин! Ким бу ниятда кептию шундай бўлади, деб ўйлабди? Сиз мени ким деб ўйляяпсиз, ака почча?

— Узр-узр, ундей демоқчимасдим, ўзингга олмайсан. — У чўнқайиб, юзини чая бошлади. Улкан одамнинг юзидан ортган сув офтобанинг дўнгалакчасини ўпид тушиб, ичига жилдираб йўқолар экан, у ошнасининг кўнглини оладиган бир сўз қидиринар эди. Ниҳоят, белбоғига артиниб туриб эди, ўша сўз ҳам тилига кела қолди:

— Шу билан қиёмат қарздан қутулсанг — биз хурсанд, ошна. Совға-саломсиз ҳам одамни куни ўтаверади.

— Ҳа, бу бошқа гап, ака почча, энди ўзизга келдиз..

Бу орада нашватилари мойгулдайин очилиб, асалариларга «ватан бўлиб» улгурган ҳовлида бояги қизалоқларнинг қувалашиб чопишгани, раҳмат айтиб бир ерга етганлари — сакраб қувнаганлари эшитилди. Улар Эшон отадан насибаларини олиб қайтмоқда эдилар. Кейин қай бири чуғурлаб, у кишидан суюнчи ола бошлади:

— Вой, Эшонта, меъмон болуни кўрмабсизу...

— Қани-қани? Қандай бола?

Бой отанинг алланглаб, камзуллари ҳамёнини кавлаштириб неваралари ичидан саритойни излаганини тасаввур этиб, бешикчи беихтиёр жилмайди. Сўнг ўзи ҳам у кишининг истиқболларига чиқаркан, шеригини шоширди:

— Бўла қолинг, ака почча, у кишини тавоғ этгали чиққаймиз.

У ҳовлига тушиб борганда чўққи соқолидан нур ёғилиб, қўзлари ҳамиша ёшланиб тургандай, аммо су-йиб-суйиб тикилгувчи ўша жиккак чол йўл-йўл банорас тўнининг пойлари ерни ўпганча чўнқайиб, меъмон бола — кемшиктойнинг пешонасидан ўпид тураг эди.

Боя читтигул ўйнаб, ҳалинчак учайтган, қирқ кокиллари етмагандай, толчовкандан сочпопуклар таққан қизалоқлар бири олиб, бири қўйиб, буваларига тушунтириш беришар эди.

— Бува, бува, улар довон ошуб келишипту...

— Узокдан келишипту... Тошкан деган жойдан келишипту.

— Валлоҳ, валлоҳ! Оллоҳ азиз қилган жойлардан-а? Шундайми, бўтам? — дерди бой ота болакайнинг юз-қўзларига ютоқиб тикилиб. Муштдек юраги жимитдек вужудига сифмай қолган бўлса эҳтимол. Суйиб, бир ерга етиб тикилар эди.

— Ўшоқданму? — дерди аллақандай титраб-қақшаниб. Аммо ўшоқнинг номини айтольмасди. — Ота диёр-лардан-а?

Саритойнинг овози чиқа қолмас, юзлари дув қизарган, ўзи оёғи ила ер чизарди. «Ҳм», деди ахийри бош силкиб.

Бой ота уни шу қўйи бағрига тортиб, бўйнидан искаламоққа бошлади:

— Айтувдим-а, қандай таниш бўйлар уфуряпти, деб. Вой-вой-вой, бўйларингдан сени, — дерди мутаассирланиб. Ва шу қўйи кўзи бешикчига тушиб: — Валлоҳ, кимни кўряпман?!— деб юборди,— Худойберди, қандай шамоллар учирди?!— дедио бўшашганидан ўрнидан туролмай қолди. Назарида, бутун кучи оёқларидан ерга ўтиб кетган-у, болакайга суяниб қолгандек, агар бағрида шу саритой бўлмаса, ерга ўтириб қолса ҳам мумкиндек эди. Ва ниҳоят, қария ўзида қандай бир куч топиб, аста қаддини ростладио мутаассирланганидан бирон сўз айтольмай қучогини яrim очганча унга қараб юраверди. Ҳамма кўриб турибди, бой бува ундан бўлак ҳеч нимани кўрмай, ҳатто оёғининг тагига қарашни-да унутиб, унга қучоқ очиб келар, энди атакчек юришни ўрганган кишига ўхшар эди...

— Кимни кўряпман, Худойберди?!

Бешикчи чидолмади.

— Мен, бой бува, ўзингиз билган Худойберди, — деб (ичдан босиб келган хўрсиникларнида ютиб) у томон талпинди. — Шошманг, мен ўзим...

Учиб бордими, икки хатлашда етиб бордими, лекин найнов теракдек бўлиб бой отанинг бағрида туарркан, бу табарруқ мўйсафидни даст кўтариб олақолгиси, юзларини юзларига суйкаб, оппоқ соқолидан ўпгиси келар, аммо ўша юзларни иссиқ бир томчилар ювиб туша

бошлаб, лаблари чеккасидан шўртнанг бир нарсалар сизиб кирап эдики, ўзини тута олмаганидан уялибми, ҳадеб юзини четга бурар, бу аҳволу бу алпозда у зотга қарай олмас эди. Аммо салом бериб, тавоғ этмак ҳам қарз, ҳам фарз. Озмунча яхшиликлар кўрганми бу одамдан!

— Эсонмисиз, бой бува, Сизга уй ичимиздан саломлар обкелдим. Невараларииздан, келинииздан...

— Бормисан, Худойберди?! — деди қария тўлиқиб.— Кўрсатганига шукр, ҳазор-ҳазор шукр. Диёрдагилар... — дедио у ёғини айтольмади.

Шусиз ҳам тушунарли эди. Бешикчи қарияга қаттиқроқ чирмашди:

— Омонмиз, омон. Тангрига минг қатла шукрлар,— дедио қариянинг бағридан бир олам роҳат олаётгандек тақрорлади. — Қайтиб кўрарманми, яхшиликларингизни қайтарарманми, дердим, етказганга шукр. Қиёматта қолмади.

— Фақат шунинг учун... шундан шу ёқقا... довон ошиб келдингми, Худойберди? Бошингни ташвишларга қўйиб?..

— Ташвиш нима, бой бува! Қиёмат қарз эди, узиб қўяй деб келдим. Яхши мужда учун довон нима экан, Музотдан ошса арзиди.

Қария бошини кўтариб, унинг кўзларига bemажол тикилди. Нигоҳи кемшиктойга бориб-келарди.

У тушунди:

— Ҳа, бой бува, томирингизнинг томирини топгандекмиз. Бу ўзини...

— Ё Қодир Оллоҳ! Қизимизнинг дарагини топиб келдингми, Худойберди?! Бу... меҳмон болам, десам, ўз томирим — неварамизми ҳали Худойберди?! — Қария азбаройи довдираб қолганидан шу турган ерида чўка қолиб, бир қўли ила кемшиктойни қучоғига торт-ган, бу қўли билан Худойбердини узун оёқларидан қучиб олган эди. Гоҳ унинг пешонасидан ўпиб, гоҳ бунинг тиззаларига юзини босар эди. — Оҳ, ўзим ўргилай сизлардан. Худойимнинг муруввати — марҳамати шунчалар улуғ бўларми! Қўзим очиқ кетмайдиган бўлди, Худойберди! Мен сендан у дунё — бу дунё розиман. Берган тузларимга-да, қанотимда олиб ўтирганларимга-да, розиман. Оллоҳнинг қарами кенг. Сен туфайли мен қариянинг бошини қўкка етказди. Энди омонатини бемалол топширсан мумкин. Маҳфузамни Парвардигор ўзи асраран экан, ҳифзи-химоясига олган экан. Оҳ-оҳ, манинг саман тойчоққинам, қизалогимнинг ёдгоргинаси.

Кемшиктой Ёдгор номини эшитиб, бир унга қараб, бир кўзларила ер чизарди.

Худойберди ўртага тушишга мажбур бўлди. Чўнқа-йиб, болакайнинг аввал ёқасини, сўнг йўлакай Ўшнинг бозоридан олишган пистонли ироқи дўпписини тўғрилади. Эркалаб, юзини сийпаб қўйди.

— Катта Эшонтанг... бизни бой бувамиз — мана шу кишим бўладилар. Этакларини ўпиб, тавоғ қил. Бу кунларга етган бор, етмаган бор... — деб Худойбердининг ўзи бой отанинг йўл-йўл банорас тўнининг барини кўзига суртиб ўпаркан, беихтиёр кўзларига ёш қўйилиб келди. Дарвоқе, бошига мусибат тушиб, бола-чақаси ила кўчада қолган у кезлари, ўшанда мана шу мурувватпеша одам жонларига ора кирганини унутиб бўладими! (Ўшанда масжиддан қайтаётиб эканлар. Аҳволни англаб, кўрғонларига бошлаб кетган, ташки ҳовлиларидан жой берган эдилар. Яна қанча — бир қиши ўрнига уч қиши қолиб кетишиб эди). Ана энди бу кишининг ўша тузнамаклари, мурувватларини узиш, қайтариш вақти етганда, шунинг учун етиб келганда у йиғламай ким йиғласин?! Бу зотнинг этакларини у ўпмай ким ўпсин?!

Фақат (унинг нияти холис эканини) бу болакай қайдан билсин? Анави кунги хархашаси, «йимга кета-ман»лари, бу кунги соқовлигию мана бу бироз ийманиб, ҳам тумтайбиғина туришлари — ҳамма-ҳаммаси қаерга келганию қандай улуғ хонадонга мансублигини ўзи билмаганидан-да. Агар шу Ҳизрдай пок кимса ўз буваси эканини билса эди... қучоғига отмасми эди ўзини! Манавиндай ийманиб, тумтайиб тургунча.

Ё бой отанинг саловатлари босиб... жим қолдими, болакай?

— Салом бердингми, ўзи? Бор, ўп. Ўзингни танит,— деди у далда бериб, ҳам курагидан секин итариб. — Қара, барларидан қандай бўйлар уфуриб турибди. Жаннат асли шу кишиларнинг оёқлари остида, болам...

Аммо ийманчиқ болакай (тавба, Тошканда бундай эмасди-ку, довон ошиб, оёғи «синиб» шунаقا бўлди-кўйди!) журъат этгунча бой бува барларини тортиб, бир қадам тисарилиб ултурган эдилар.

— Ҳай-ҳай, Худойберди, бу нимаси? Сизларда этак ўпмак, сажда этмак... ҳали-да расмми? Ундан кўра, туриңгиз, ичкарига кириңгиз. Қаерлардан мозор босиб келмабсиз, ахир. Туриңгиз, — деб азза-базза қўлтиғига қўл юбордилар. Дағалликдан тамоми ҳоли қўл — ажиб тафтли эди. Худойбердининг этию вужуди ширин жимирилаб келиб, ўзи туриб ола қолди.

— Узр, бой бува, Оллоҳ азбаройи шу кунларга етказгани шукронасига эди, бошқача тушунманг. Дийдор шукронаси эди.

— Оллоҳ кечирсин, ширк ғулуси дилимизга-да, оралаб кирган бўлса, шайтон васвасасига учган бўлсак. Азиз меҳмоним бўлингиз. Бир отамлашайлук, дийдорлашайлук. Қани, той бола, ўзлари ҳам юрсинлар.

У кемшиктойни пинжига тортиб, қучиб олган, юз-бошларини силаб, бир ерга етар, кулоққинасининг таккинасидан ҳидлаб-ўпиб, қистар эди.

Йўлакай ариқ бўйида қўл қовуштириб турган Ака поччани қўриб, унга-да, мулозаматлар килди:

— Э, меҳмон, тоғ ошиб, мозор босиб келган қадамларизга ҳасанотлар. Келинг-келинг. Уринмай-ла, яхши етиб келдингизларми? Дам ғанимат — дийдор ғанимат. Қани, бир омонлашиб қўяйлик.

Ажаб дунё. Шундай басавлат одам жинчалоқдек чол олдида қўл қовуштириб таъзимда турар, кўзларига тик қарашга ботина олмас, мусулмончилик андишасими, нимадир йўл қўймас эди. Аслида у ҳаммас, бу ҳаммас, чолнинг ўзию сўзидан ёғилиб турган муло-йимлигу ҳалимлик, ҳам юзларидаги тиниқ бир нур уни гангитиб қўйган эди: тавба, одам қариб-мункиллаб ҳам шунчалик қўхлик тортиб кетуви, ёқимтой бўлиб қолуви мумкин эканми? Қайдан шунча нур ёғиляпти? Балқиб чиқяпти?

Ака почча умрида биринчи марта қари одамга ҳаваси келиб, суқланиб боқди. Ё, Оллоҳ, шундай қаримоқ мумкин эканми? Қариб ҳам ёқимтой бўлиб қолмоқ мумкин эканми, тавба?!..

Ё зуваласи ўзи шундоқми, ҳаммаси насадданми?

— Қани, қани, Тошканимизни нафасини олакелган азизлар, биз соғинган диёрдан муждалар келтурган меҳмонлар, ўтгайсиз. Мозор босиб келган қадамларизга ҳасанотлар бўлсин. Ҳой, Дарвешали, қайдасан, ўғлим. Ота юртдан элчилар кепти-ку, ахир. Томирларимиз кепти-ку, бизни сўроқлашиб. Нима қип турибсан? Опчиқмайсанми қора қўчкорни?! Оёқлари остига думалатмайсанми?!

Дарвешали деганлари:

— Ҳозироқ, бой ота, — деб кўздан чекилган эди, улар ҳовуз бўйига қаратиб солинган меҳмонхонага етмасларидан бир қўчкорнинг думбасига арқон солиб, сургаклаб келди ва кўз очиб юмгунча, Худойбердининг ҳай-ҳайлашига қарамай... уни ўша арқони-ла қуллаклаб, жониворни буларнинг оёқлари остига бўғизлаб юборди. Кемшиктой бунақа урфларни энди кўриши эди, ҳайиқиб чолнинг пинжига тикилди. Кейин оёғидан пуфланиб шиширилаётган қўй устига тўдалашиб келиб, чўнқайишган болакаю қизалоқларни қўриб, ўзига келди.

Аммо Эшон бува уни бу ерда қолдиргиси келмай қистагандан-қистар эди.

— Юринг, той бола. Бу қўй аллақачон жаннатга кириб кетди. Ё айтами, пуфагини сизга олиб қўйисинларми? — Эшон бува ширин қулиб қўйиб, қўйнинг оёғини кўтариб пуфлаётган Дарвешалига тайинлади.— Ҳой, қассоб акаси, эшитдингиз-а, пуфагини бегона қилмайдиган бўлдиз.

Дарвешали қорни дўмбира бўлиб шишиб, оёқлари кўтарилиб бораётган қўйни суриб, бош силкиди:

— Бир оғиз сўзиз, бой бува...

— Ана, эшитдингиз-а, той бола. Сиздан ўтиб ҳеч ким унга эга чиқолмайди. Юрдик, юрдик.

Дастурхонлари тузатилиб, устига енгилгина дока тортилган мәҳмонхонага кириб боришаркан, бой бува ўша-ўша сўзамоллик ила кимнидир чакирдилар:

— Қани, барака топгурлар, опкела қолинглар, бизга аталган неъматларингизни.

Аввал чой, кетидан устига жиндек мурч сепилиб, бир қошиқ асал солинган ширчой келди. Оҳ-оҳ, унинг мазаси! Асалининг гуркираши! Бу дунёнинг ширчойи бўлмабди! Худойберди бунақасини қачон ичганини эслолмади.

Шу аснода сухбат ҳам қовушиб келиб, бир-бировларидан қўнгил сўрашга тушдилар. Айниқса, бой буванинг ёnlарига чорлатиб олган «невара»лари ила танишувлари гўзал кечарди:

— Олинг, той бола, буни ширчой дейдилар, совутмай оладилар. Жиндек нон тўғраб юборсангиз, нақ мой бўлиб кетади, ха, олинг. Ана шундай бўлсин. — Сал ўтиб қайтариб сўрайдилар. — Дарвоқе, отиз нимайди, той бола?

Кемшикточ ширчойга нон тўғрашдан тўхтаб, Худойбердига жавдиради: ростини айтай деса, булар ўтирипти, икки бирдай одам. Ёлғонлашга тили бормаяпти. Худойберди шундай тушунди, болакай не деярини билмай ундан изн кутарди. Шунга ҳам шукр. Болалигига борса, нима қила оларди?

У қош учирив, бош ирғади:

— Айт, айтовур.

Аммо саритой унинг имосини ўз билганидай тушунган эди:

— Акбарали, — деди.

Ҳаммалари анг-танг қолиши. Худойберди косани қўлига олган жойда... Ака почча эса ширчойни хўриллатиб ичишга тушган кезда... У ҳатто қалқиб кетди ва шеригига «Одамнинг хар нарса бўлгани яхши!», дегандай қаради. Бусиз ҳам Худойбердининг дами ичига тушиб кетган эди. «Шунча пишиқлаганда... тоза уятга қолдирди-ку, бу ҳувари! Гунгурс девона бизни тоза туширди-ку. Шуларга ишониб... йўлга чиқиб юрибмизми?»

Ўртага ҳеч гап сиғмайдирган (на оқлаб бўлади ўзини, на тушунтириб!) жимлик чўйкан эди. Хижолатдан Худойбердининг бурни учларига қадар тер босди-ёв... Дунё юзини кўриб, бунақа ўнғайсизликка тушмаган эди...

Эшон бува — эшон бува-да. Уларни бу ўнғайсиз аҳволдан ўзлари кутқардилар. У киши ҳеч кутилмаганда, кемшикточнинг елкасига қоқиб, бошини силадилар:

— Улуғ-улуғ. Кўп қутлуғ ном топишган экан. Икки дунё кам бўлмагайсан, болам. Ниятларига етишсин волиду волидаларинг. Қани, менга айт-чи, нечага кирдинг?

Бой буванинг ёнига чўйканча коса гардишини «ўйнаб» — силашга тушган болакай халоскор амакиларини хижолатга тушириб қўйганини сезибми, бошини кўтара қолмас, жавобга ҳам шошмас эди.

— Хўш, нечага етиб, нечадан сакраб ўттиз?

— Саккиздан, — деди бола ахийри забон битиб.

Бой бува ундан назарини узмай ўзича хомчўтлар эди:

— Кўп яхши-кўп яхши. Қадди улуғ, кабир йигит бўлар экансиз, Худо хоҳласа. Ол, болам, ширчойни совутма. Нони ҳам мойга айланиб кетгандир.

Ўзи ширчойдан хўплаб, болани ҳам қистади:

— Мен сени суйиб қолдим, ол, болам, тўғрисўз экансан. Охиригача шундай бўл, илоҳим. Айт-чи, кимнинг ўғлисан?

— Адамни... — деди бола энди-энди элакиша бошлаб.

— Аданг ким, таниймизми? — деди қария аллақандай интиқиб.

— Мен уларни.. ҳеч кўрма...ганман, — деди бола маъюс тортиб.

Бой бува унинг куракларини силади:

— Қаерга кетган, аянг билар? — Қария яна нимагадир умид тутар эди.

— Билишмайди, мени... асраб олишган...

— Асраб олишган?..

Кенг уйга аллатовур жимлик чўккиб, бой бува томоқ кирди:

— Аянгни-чи, эслай оларсан?

Болакай бир қараб қўйди-ю, кўзи ғилтиллаб, бош чайқади.

Ҳаммалари мутаассирланиб жим қолиши. Ака поччанинг-ку, қовоғи тушиб кетди. Орачира ер остидан шеригига ўқрайиб-ўқрайиб қараб қўяди. Лекин у ҳам қани бош кўтара олса: ичэтини еб, тиззасини силаб ўтириби.

Бой бува узун тин олган каби кўзларини юмиб, бир муддат жим қолдилар-у, сўнг қўзғолдилар, боягидан ҳам юмшаб-ҳалим тортиб, болани елкасидан қучдилар.

— Етимнинг бахти еттита, — дедилар суйиб, — сен ўкинма, болам. Аввало, ғамхўри Худо.

У қўллаб турса, бош силагувчи қўл топилмай қолмас. — Сўнг елкасини силаб, ўзларига тортиб қўйдилар. — Бу амакиларинг ҳам ҳафа қилишмагандир, ахир? Уларга қандай рўбарў бўлдинг?

— дедилар узоқдан келиб.

— Эшигимизга девона келиб эди, — деди бола энди яширмай.

— Қандай девона? — дедилар у киши Худойбердига қараб олиб.

Бола тушунтира олмай қийналди:

— Ка-ат-та... сап-сариқ одам.

— Тиланибми?

— Эшикма-эшик юрган экан, «ҳақ-дўсти»ни айтиб...

— Дарвеш экан-да, Сўфи Оллоёрдан ўқиб борган бўлса?! Ё қаландармиди?

Бола елкасини қисди. Унинг ўрнига ҳам Худойберди жавоб қилди:

— Жиндек билади шекилли ўшани ҳам...

Қария бу гапга эътибор қилмай, боладан сўради:

— Кейин-чи?

— Эргашиб Калковузни кўпригигача бордик.

— Хўш-хўш? — деди қария бир нарсаларни англағандек бўлиб.

— Кейин анҳор бўйига ўтириб, сўрай кетди.

— Ниману?

— Мусоғир борму, кимницида тураду, деди.

— Сизлар-чи? — деди қария титрана бошлаб.

— Бизницида, дедим.

— Сўнг?

— Сен кимусан, деди. Ўғиллариман, дедим.

— Ла илаҳа иллаллоҳ! — деди қария ичдан имон келтириб.— Хабарини чиқараман, деса шу экан-ку!— У гапиравур, гапиравур, дегандек, им қоқиб, боланинг елкасини силар экан, қўллари титрашга тушган эди.— Отингни... сўрамадими?

— Сўраб эди... Ёдгор, дедим...

— Нега, болам?

Бола кўзлари ила ер сузди:

— У билан кетгим, кетиб қолгим келди.

— Вой, сени! Нега, ахир? Ким ҳафа қила қолиб эди?

— Улар урушганлари-урушган эди...

Ҳаммалари ҳайратда қолган эдилар.

— Уларнинг ким? — деди бой бува. У ҳамон саритойнинг куракларию бошларини силар

Эди.

— Асал опам... тергайвериб... уришавериб кўймасдилар.

— Ким, асраб олган опангми? Ё ая дермидинг?

Бола бурнини тортиб қўйди:

— Ая, деб ҳам кўрдим, опа, деб ҳам... Қарғаганлари қарғаган... эди.

— Ҳа-а, — деди қария боланинг ҳолига тушуниб. Узок жим қолиб, елкасига қоқди: — Мусофирлар-чи, Ёдгор-чи, ким эди сизларга?

— Улар болохонамизда туришарди. Тоғам кўчириб келгандилар.

Қария шошиб қолди:

— Шошма, шошма, тушунтириброк айт. Қайси тоғанг? Қаердан кўчириб келган эди? — деди бой бува бир нарсаларни англаш етгандай, етаётгандек. Қолаверса, яна боягидек унинг куракларини силаб-сийпалашга тушган эди.

— Мен билмайман, Чаман тоғам биладилар, — деди бола.

— Улар-чи, Ёдгорни ўзи, опаси-чи? Дарвеш борганда қаерда эдилар? — негадир ижиклаб сўрашга тушиб кетганди қария.

— Ёдгорнинг аясими, баннисада эдилар.

Худойбердилар ҳеч нарса дёйлмай қолишган, савол-жавобни ёлғиз бой бува қилар эдилар.

— Валлоҳ-валлоҳ! Кўпдан берими? Бола бояқиши-чи?

— Ким, Ёдорми? Соғиниб кетганда обборишмаса, бошқа оборишмасди. Чиқаришмасди уйдан.

Бой бува ичи оловга тўлиб бораётгандек бир ҳолатга тушиб, хўрсинди.

— Ё Оллоҳ! — деди ичи сидирилиб. Бир муддат боягидек, балки ундан кўпроқдир, кўзларини юмиб тек қолди. Сўнг: «Шундаймиди, шундай кунларга қолишиб эдими?» деб шивирларкан, болани қайта-қайта бағрига тортиб, пешонасидан ўпар, нима қилаётганини ўзи унча англаш етмасди. Ахийри ўзига келиб, боланинг кўзларига қаради:

— Дарвеш-чи, узоқ-узоқларга олиб кетсанми, дедими?

Бола башоратчи чолнинг юзларига термулиб қолган, қаердан била қолганини англаш етолмас эди. У девонанинг гапларини сўзма-сўз айтиётган эди.

— Ҳа, — деди бола ахийри ҳеч нарсани яширмай. — Тангритогга кетсанму... бувангларни ютига, деди.

Чолнинг вужуди титраниб келиб, ўзи bemажолгина орқасига суялди. Суялдию бир бурда тортиб, пар ёстиққа ботди-қолди. Аммо хаёл опқочиб, қисиқ торт-ган кўзларини болакайдан узмас, узомас эди. Унга аллатовур бир умид-ла бокарди. Нихоят, зўр-базўр ютинди:

— Ўшал Ёдортойнинг аясини кўр... кўрганмисан, ўзинг?

— Нега кўрмай?! Болохонада каттакон расмлари турар эди, — деди жонланиб. — Ўзлари яқинда тузалиб чиқадиган эдилар.

— Тузалиб чиқадиган? Шундай деган тилингга шакар сенинг, болам. Шу вақтгача қаерда эдинг?! Аввалида айтмайсанми шуни! Қандай муждалар олиб келганингни биласанми, болам!

— қария уни қайта бағрига тортиб улгурган, пешонасию юз-кўзларидан ўпиб толмасди. Орапракай Оллоҳга ҳамдлар, шукроналар айтиб тинмасди.

— Ё, қодир Оллоҳ, чиндан буюксан, ҳар нарсага қодирсан, чеварсан. Шуларни сабабчи этиб, жигарларимдан хабар бермоқдамисан, муждалар етказмоқдамисан? Ўзинг нақадар раҳиму раҳмонсан. Фамхўру меҳрибонларнинг меҳрибонисан, — дердию болани бағридан бўшатмай ёшли кўзларини юзларига суйкар, бошларидан искаланиб, пешоналаридан ўпар, бу дунёнию қайда ўтирганларини унутган эди. Сўнг ўзига келиб, яна алқай кетди:

— Ёдортойнинг аяси деган тилларингдан сени!.. Нима деяётганингни, қандай улуғ хабар келтирганинг-ни биласанми, болам?! Биз ота юрга йўллаган, Оллоҳ паноҳига юборган қизимиз, тирноққинамиз тирик экан! Ҳатто Ёдгорчasi, тойчоғи бор экан! Тилларингга шакар

сенинг! Уларни кўрган мана шу қора кўзларингдан сени. Сўзларини эшитган мана бу жимит қулоқларингдан ўзим ўргилай. Неварагинамиз билан бир ҳовлиларда чопқиллашиб ўйнаган оёқларингнинг гарди бўлай, бўтам. Юртга ош тортиб, зиёфатлар беришга арзийдиган хабар келтирибсан, ўғлим! Барчангизнинг қадамларингизга ҳасанот.

У аввал қисиниб, сўнг лол қолиб ўтирган Ака поччаю Худойбердиларга ўгирилиб, миннатдор-миннатдор тикиларкан:

— Сизларга-да, ҳасанот. Оллоҳнинг раҳматлари бўлсин, — деб алқарди. — Сизлар қисинманг, хонадонимга суюнчилиғ опкеласиз-у, хижолатга ботасизми?! Аввал-бошда ниятингиз тоза бўлган, улуг бўлганки, мана, Оллоҳ ҳам сизни уялтирмади. Қайтага юзларингизни ёруғ этиб турибди. Тангри шундай буюқ, пок ниятларни юзага чиқариб, юзни ёруғ этгувчи зот. Унга ҳамду санолар бўлсин! Субҳоналлоҳи ва биҳамдихи, субҳоналлоҳил азийм.

Эшон бува кутилмагандан дераза тавақаларини очиб, ташқарига овоз бердилар:

— Ҳой, ким бор? Дарвешали?

— Лаббай, бой ота. — Катта кади нок тагида қўй сўяётган бояги норғул йигит қўлидаги пичоқни териси шилиниб, оёғидан айришохга илинишга тахт бўлаёзган «пилла қўй» (жонивор бир энли ёғ боғлаб кетибди ўзиям!) ёнига ташлаб, ўзи ариқдан хатлади.

Аммо Эшон бува (одам чақиришга чақириб қўйиб!) ҳаяжонини овоза қилишдан тийилган эди. Мехмонлардан истихола қилдими ё фикридан қайтдими, қўл силкиди:

— Майли, биз ўзимиз... ўзимиз кира қоламиз. Той болам билан, хушхабар опкелган элчи болам билан. Ахир отин бувингиз бор у ёқда, ичкаридагилар бор, муждага илҳақ ўтирганлар бор. Юринг, той бола. Амакилар айбга буюрмай ўтириб туришади. Биз ичкари кириб чиққаймиз. У ёқдаги сандиқларни очтирайлик-чи, отин бувимизнинг бизга атаган нималари бор экан!— деб меҳмон болани етаклаб, аввал ҳовлига тушишди, сўнг ариқ устидаги тахта кўприкчадан ўтиб, ичкари ҳовлига қараб юрдилар. Катта ариқ ҳам худди ўша жойда девор тагидан ўтиб, ичкарига кириб кетган, у ёқда икки четини сапсар гуллар тутган сув ёқалаб борган йўлка кўринар, у ҳовлининг ўртасидаги ҳовуз-шийпонни айланиб ўтиб, яна бир тахта кўприкка тақалар, у ёғи гулини қийғос тўкиб, хумча-зирак тақиб юборган гилосзор ортида ичкари уйларнинг деразаларигина кўзга чалинар эди. Ичкари шунақа ораста, гулу гулзорларга, сатта гилосзорга кўмилган, у ёқдан тиқ этган товуш келмас эди.

Лекин орадан бир муддат ўтиб, Эшон бува той бола билан бошлашиб, ўша тахта кўприкдан ҳам ўтиб (унинг икки чеккасига бежирим панжара ўрнатилиб, ҳаворангга бўяб қўйилган, шунақа кўприкчалар ҳар ер-ҳар ерда — шийпонга бориладиган, ошхонага ўтиладиган жойларда ҳам кўринарди) ожизалар салтанати — отин бувининг қарамоқларига кириб боришидию ичкари бамисоли бешиксолар тусини олиб, аёлларнинг ҳай-хувларию бола-бакраларнинг қий-чувлари билан тўлди. Улар сочқи терармидилар ё келинга тишлатиб олинган нонни опқочармидилар — дафъатан англаш қийин эди. Аммо сочқи сочилаётгани аниқ, дуолар қилинаётгани аниқ. Бояги ҳалинчак учаетган қизалоғу болакайлар ўша ёкка югуриб кетишган, гоҳ бир ерга ёпирилиб, бир нималар теришар, гоҳ бир-бирларига кўз-кўз қилиб, сакраб-кувнашар эди. Эшон бува айтмоқчи, отинойининг сандиқлари очилиб, соч-қи қутилари бўшаётир эди.

Той бола эса қандай саруполар билан сийланди экан??!

Бу ёқда Худойберди билан Ака почча иchlари тушиб, жуда ҳаяллаб кетишиди-ку, дегандай ҳовлига мўралашар, бир кўнгиллари қўйни нокка илиб, ичак-чавоғини тоғорага олаётган қассоб йигитнинг олдига чиққилари, у ёқ-бу ёқдан ҳангомалашгилари келарди-ю, изн бергувчи йўқлигидан қимирлай олишмасди. Лекин, ахийри яхши чиқди, а, уяладиган иш бўлмади, а, дегандек бир-бирларига жилмайиб қўйишар, бутун фикру зикрилари ичкарида эди.

Бу орада хўппасемиз ошпаз охун кириб, чойни янгилаб кетди. Орқасидан чинни ликопчаларда жимитдай қошиқчаси ила (оҳ-оҳ, шунақаям гуркирайдими ҳиди!) нима денг —

нўхатшўрак киритиши! Ака почча умри бино бўлиб бунақа мазали (илиг-а, илик!) таом емаган эди! Устида ёғи-думбалари билан яна! Тавба, эндинга нокка осилиб, ҳали бўлаклаб улгурилмаган, боя оёқлари остига сўйилган қўйнинг думбаси қачон қозонга тушиб улгурибди экан? Ёки бу бошқа қўйдир. Дарвоқе, бой отанинг қўйлари биттами, сўйиб бўлишгунча қозон осолмай ўтиришса.

Шу тоб болаларнинг шод қийқириқлари янграй кетди:

— Пуфак, пуфак! Мехмон болага пуфак!..

Худойберди ўгирилиб, ичкари остонасидан хатлаб ўтган ўртадаги меҳмон болага кўзи тушдию ғалати бўлиб кетди. Уни қаранг, ким келяпти?! Чиндан ҳам бой ота билан етаклашиб ким дeng — оғзи қулоғида тўй бола, ҳа-ҳа, зар тўнга ўралиб, бошига ялтир-юлтир пистонли дўппи, унинг устидан оқ-оппоқ салла ўраган, пешини эса қулоғи ёнидан тушириб (вож, шахзода бўп кетибди-ку, бизнинг кемшиктой!) нақ пешонасига жига — укпар тақсан той бола келар эди. Оёғида пошнали жажжи қизил этик. Шахзодадан қаери кам?!

Энг орқада эса икки хизматкор қўшқуллаб сарупо кўтаришганча шу ёққа келишар эди. Уларга аталгани шекилли?!

— Ие, ҳали бизни уялтириб... нима қилмоқчилар? — деб юборди Ака почча.

— Менинг қўрқанларимни айтинг, Эшон бувадан уялиб қоламанми деб!.. — дея енгил тин олди Худойберди. — Бу ёғини Оллоҳ ўнглаб қўйганини, Ёдгор бўлмасаям, ўша ҳовлидан бўпчиқканини кўринг! Чиндан Оллоҳ ўзи чевар экан-a!

— Нимасини айтасан. Адаштиrsa, ҳозир ким эдик?! Бир қоп лойми?..

— Илоҳим, бундан кейин ҳам Ўзи ўнгласин, уялгулик қилмасин, — деди шивирлаб Худойберди.

Шу тоб зинада оёқ товушлари эшитилиб, улар шошиб ўринларидан қўзғолишиди.

Остонада зар тўнининг ёқаларига қадалган пистонларию ялтир-юлтурлари кўзни олгудек, салласининг жигасидаги упкари сепкил юзини бирам очиб юборган той бола кўриниб, бешикчи унга қараб юрди.

— Вой, саритой «шумтака»ей, шу кунларни орзулаб, ўша ёлғонни тўқиган эдингми? Бало экансан-ку! Шахзода бўп кетибсан-ку, — деб юборди у. Кейин икки қадам босиб, қучоқ очганча чўнқайди:

— Кел-кел, ўша ярқираган пешонангдан бир ўпай,— деди интиқиб.

## 6. ЎША ДОВҚУРЛАРДАН БИРИ

### 1

— Вож, уни қара, Мақсуд! Зилоллигию тиниқлигини кўр! — Олим акам кўприқдан ўтибок машинасини йўл чеккасига бурди. — Бу сувда юзни чайиб, тўйиб-тўйиб ичмаслик, тавоф қилмаслик гуноҳ...

У соғинган нарсасига етишган кишидек, кўприк тагидан қайнаб-чарх уриб чиқаётган бир тегирмон сувга суқланиб қолган эди. Анҳор эса ёқасидаги майсаю ялпизларни ўпиб, яна чаппор ўриб оқиб ётарди.

— Қаерлардан ўтиб келяпти, бу жонивор, биласанми, Мақсуд?

— Нақ Бешоғочдан келади. Кўлнинг ичи билан ўтиб, Семонқўприкнинг таги билан чиқиб, шунақаси Чилонзору Қатортол оралаб...

— Қойил, биларкансан. Чиндан пакана парисан-да, ўзинг, — дея акам анҳор бўйига чўнқайиб, юзини пишиб-пишиб чаймоққа тушди. — Оҳ-оҳ-оҳ, ҳеч ерда топилмайдиган анхоримиз бор-да.— Сўнг ярим ўгирилиб, им қоқди: гўё келмайсанми, соғинмадингми, демоқчи бўларди.

Унинг кайфияти менга ҳам юқиб, яқин бордим-да, чўнқайиб кўзёшдан ҳам тиниқ сувни ҳовучимга олиб туриб қолдим. Жонивор ҳовучимда килкиллаб турар, нафсим қилқилляптими, сувми ажрата олмасдим.

— Бунақаси жаннатларда бўлади, холос. Қониб-қониб ич, ҳали ўрнига юз-минг думалаб ҳам тополмайсан, — дея Олим акам ҳовучлаб-ҳовучлаб ича кетди.

— Унақа деманг. Ҳаммаёқ бузилиб кетса ҳам, бу анҳорлар қолади, — дедим мен. Ростини айтсам, ичимга бир ғашлик ўрмалаб кирган-у, уни ўзим ҳам тан олгим келмасди.

— Ҳех, содда-бекубор укам-а! — деб юзини артмайин ҳам майса устига узаниб олди акам. Ўзига қолса, шу шарқироқ сув бўйида, мана шу тол соясида ёнбошлагиси бор. Кейин кўччанинг икки ёқасидаги ўз ҳолича ғужгон гуллай бошлаган етим олучаю нокларга паришонхол тикилиб, култ ютинди. Кўзлари намланиб келди.

— Шундай гузаргаям... ит тегибди, Мақсуд, — деди бурнини аламли жийириб. Лекин ўзи кўзларимга қарай олмасди.

Мен ҳовучимдаги сувни тўкиб, у айтган томонга ўгирилдим. Тупроғи ўйнаб улгурмаган кўччанинг икки бетидаги томлари очиб ташланиб, эшигу деразалари аллақачон кўчириб кетилган ҳовли-жойлар бир ғариб кўринар эди. Кимсасиз ҳовли-боғларда кесилмай қолган меваларнинг ўз ҳолича қийғос гуллаб ётуви ундан-да ғалати эди. Асаларилар устида минг ғужғон ўйнамасин, қарқуноклар қив-қивлаб, қушлар учиб-қўнмасин, кўзни қувнатолмасди. Гузар бало оралаб, одамлари шоша-пиша ташлаб кетган бир мазгилни эслатар, анҳор ёқасидаги чойхоналар бўмбўш, супалар ҳувиллаб ётар, мактаб ҳовлиси сув қуйғандек жимжит эди. Каттакон дарвозаси валонгор қолган, бир тавақаси қулаб тушиб, кўприк устида ётар, синфхоналар ҳам бузиб кетила бошлаган эди. Ҳов, нарироқдагина — Мастуба опанинг дўкони олдида аллақандай қаланги-қасанғи одамларнинг қораси кўринади. Биз бир маҳаллар — ҳайитларда Миртўха амакининг чойхонаси олдидаги шарқироқ ариқ бўйига чўнқайиб, митти рух қошиқчалар ила бу оламнинг энг хушхўр таоми — нўхотшўрагимизни пақкос тушириб, жажжи ликопчаларни ялаб қўядиган жойимизда энди ўша келгиндилар учта-учта бўлиб, Мастуба опанинг дўконидан опчиқкан нарсаларини майдалашар эди. Нечук, Миртўхта амаки кўрмай қоптилар? Кўрсалар, узун супургиларини олиб, қувиб қолардилар-ку. Ҳа, ана, ўzlари:

— Энди сенлар қолувдиларинг, бу ерларни ҳаром қилмаган! Танглайларингни шу билан кўтарганми, нима бало, шу дўконга танда қўйволдиларинг? Қурган иморатинг билан қўшмозор бўлгурлар. — Миртўхта амаки — жимит бобой саннай-саннай, вайсай-вайсай у «чақирилмаган меҳмонларни» қувиб юбориб, супургиларини тахтасўри тагига ташлаганча ичкари кириб кетдиларам, дўкон олдига бошқа «лайлак тумшук» машина келиб тўхтаб, ичидан бошқалари тушиб келишди. Мастуба опанинг дўкони худди чанқовбосди бир чашмаю уларнинг бошқа борадиган ерлари йўқдек эди...

— Гузар ҳам хароб бўпти, — дея Олим акам қўлини қоқиб, ўрнидан турди. — Кетдик.

Шусиз ҳам тушунарли нарсани айтиб ўтирганидан оғриниб, бетига қараб эдим, у баттар ачитиб, чақиб олди:

— Булар тумшуғини тиқмаган шу ер қолувди! Шундай деб ёзиб кўр-чи, босармикан газетанг?

Аламимни қулт ютиб, мен ҳам турдим. Индамай бориб, машинанинг орқа ўриндиғига чўқдим-да, эшигини қарс ёпдим. Ичимда эса, бир олам ғалаён кечарди: сиз ўз акаларингизнинг қароргоҳидан машваратлар хабарини бериб юрган чоғда шу ақлингиз қаерда эди?! Ҳаммани каллаварам «қўй» хисоблайсиз!.. Пичноқни аввал ўзингга ур, оғримаса бировга...

У қишлоқ йўлига ҳечам ярашмагани йилт янги (ҳов ёнғоқ тагида, кимсасиз чойхонанинг супалариаро қувалашиб учиб юрган бир жуфт қораشاқшақ қанотидан ҳам қорароқ) машинасига келиб ўтириб, кафтдек олд ойнасидан маҳзун қараб қўйди:

— Кечирасан, пакана пари, ярангни янгилаб қўйган бўлсам...

Шу бир оғиз сўзи билан... воҳ, гиналаримни пар-қудек тўзитиб юборса-я.

— Кетдик, ҳов анави тут тагида тўхтаб ўтайлик, — дедим, — зора Миртўхта амаки билса, қайтдимикан, йўқми?..

— Ким?

— Қидирган кишимиз-да.

— Ҳа-а,— деди у эслаб ва бир хижолатга тушиб.— Отто тогами?

Ўз навбатида мен ҳайратга тушдим:

— Ким, сутчими?

Акам бир тур ўзгарди: айтса, худди сирни очиб қўядигандек ўзини гўлликка солиб, машинасига чал-ғиди:

— Рост айтасан, машинани ўша ерга ташлаб кета қоламиз. Чанг жониворнинг ич-ичигача кириб бормасин.

— Ихтиёрингиз, — дедим мен.

— У ёғи оз қолди шекилли?— деди у тусмоллаб.— Тепадан ўтсак, бас-да!

— Йўқ, — дедим мен, — Умаржон аканинг тепасини ошмаёқ шундай мезананинг пастида.

— Эсладим. Анави девор билан ўралган ёлғиз қўрғонни айтасан-да. Биламан, биламан, — деди у машина ойнасини артишга чалғиб.

У чалғиган сари менинг савол халтам очилиб борар, бояги гапи ҳеч қулогим остидан кетмасди. «Отто тогаси нимаси экан, ўзининг бир чиройли исми-чи?». Сўрашга эса тортинардим.

У арзандасига ўт олдириб, оҳиста йўлга бурди-да:

— Қара-я, — деди, — шундай машҳур одам умрининг охирида қаерга келиб макон тутиби!

— Обкаш кўтариб юришини айтасизми? — дедим мен.

— Дарвешнамо туриши-да, — деди у.

— Балки шу ёшга етгач, ҳамма ҳам тинчини қўзлаб қолар?

— Ҳамма ўз йўлига, лекин у бўлак тоифадан. Сен билмайсан-да.

— Қандай? — дедим мен ичим қуриб.

— Ҳов, — деди акам бир ғалати энтикиб, — унинг-дек бўлиш ҳаммага насиб этсин-чи! Этмайди! — У ичимга олов ёқиб, қараб қўйди. — Биласанми, илгари уни кимга менгзашарди? Ўша энг гуллаган чоғлари?

— Кимга? — дедим ҳайратим ортиб. Ичимда эса бир олам иштибоҳ! Ўшандай одам... шунча шуҳрати билан ҳаммасига этак силкиб, манавиндай сутчилик қилиб юарканми? Қаёқдаги гапни айтади?

— Чинакам рицарларга! Бўлади-ку, ўтда ёнмас, сувда чўкмас мард кишилар! Ўшалардан ҳам ўтар эди.

Олим акам мени маҳлиё этиб қўйиб, энди ўзи бетимга қараб ҳам қўймас, қора тулпорини оҳиста ҳайдаб борар эди. Мен эсам унинг қўзларига, қўз қорачиқларига бир қур қарашга зор-интизорман. Опқоч-яптими, чинданми — билгим келадики, у ёғи йўқ. Ўзи эса, камига давом этарди:

— Энг қалтис ишларни шунга топширишади экан! Шугина ўринлатиб келаркан!

— Шунақа, чапаниси эканми?!

— Чапаниям гапми!

— Этик ечмай сув кечгич, денг?

— Бўлади-ку, ерга урса осмонга сапчигич, тегирмондан ҳам бутун чиққувчилар! Тасаввур этяпсанми?

— Этдим. Довқурнинг ҳам довқури!

— Ўлма! Ботур дейдилар бизда. Улар эса рицар! — деди у викор билан. — Бекорга Отто тоға дердиларми?!

— Отто тоғаси нимаси? — дедим ўша кафтдек чўзинчоқ бежирим кўзгудаги «кўзлари»дан нигоҳимни узмай.

У жиндек қизарди, ҳа-ҳа, оқ юзининг бир чеккасига билинар-билинмас қизиллик югуриб, ўша кўзгудан хижолатли қараб кўйди. Аммо жавобдан қочишга баҳонаи сабаб тополмади:

— Аввало, нима эмас, ким! — деди ўлганининг кунидан. — Оттодан ҳам ўтади деганлари! Бўлган-ку, шунақаси: Отто Скорцени деганлари. Эшитганмисан?

— Қайси, анави Муссолинини опқочганми?

— Биздан ҳам битта ўшанақаси чиқкан экан.

— Нима, у ҳам шунга ўхшаш топшириқни... адо этганми? — «Кимни.. опқочган?» демоқчи бўлардим-у, тилимнинг учидаги сўзни айтольмасдим. Шу тоб қай бир паға булат офтоб устидан сузиб ўта бошлаб, сояи раҳматини ерга ташлади Олим акамнинг юзидан ҳам нур қочди. Ўзи тулпорини бир четга олиб, тўхтатишга чалғиди.

Биз чойхона олдидаги улкан тут тагига келиб тўхтаган эдик.

— Буни, очиғи, ҳеч ким билмайди. Тахмин қилишади, холос, — деди калта қилиб. — Колаверса, бу давлат сири. Тушундинг? — деб у машинасидан туша бошлади.

— Тушундим, — дедим мен ҳам. Лекин ҳамма гапни тушуниб турган бўлсан-да, ичимда мингта иштибоҳ чарх ураг, уларнинг биронтасига тайинли жавоб тополмасдим.

— Мавруди келиб, бари очилади, — деди у пастга тушиб олиб, — албатта, эллик ё юз йил ўтиб, лекин унда дунё икки айланиб келган, сутчи ҳам, бошқаси ҳам кўкариб чиқкан бўлади. Бу дунё шунақа, укам. Ҳар довқурларгаям бўлишганмас. Бўлишса, шу одам топарди қадр.

Воҳ! Шунинг учун баридан этак силкиб, сутчилик қилиб юрган эканми?! Уй-жойиданам, яқинлариданам кечиб?

Астағириуллоҳ! Шу хаёл кечгунча вақт ичида сутчи назаримда Улуғ хокисор одамдан — майда, ўткинчи бир кимсага айланиб улгарган, кўнглим ундан ириб бормоқда эди. Наҳот бор-йўғи бир жizzаки кимса бўлса? Биз уни ким деб, салкам авлиё санаб юрсагу...

— Довқурлиги шуми? — дедим ҳафсалам пир бўлиб.

Олим акам юзимга қараб туриб, ичимдан ўтаётган нарсани англаш қолди шекилли, ногаҳон юмшади:

— Балки биз адашаётгандирмиз. Ахир, бирордан ўтганини бирор қаердан билади?

— Шуниси ҳам бор...

Ахир ҳазилми, ҳамманинг наздида ким бўлиб юрган одам... бир кун келиб, манавиндай тарки дунё этиб, бир кулбага кириб олса?!

Олим акам мени бу каби ўйлардан чалғитиш учунми, кўча ўртасига тушиб, бир айланди:

— Вой-бўй, — деди у атрофга аланглаб, — гузарнинг гузарлиги қолмабди-ку. Қани унинг гуриллаган даврлари?

— Бу-чи? — дедим мен атай, сут бозорнинг қаватида ёлғиз омон қолган дўкон билан чойхонага имо этиб.

— Бу ҳам беш кунлик омонат-да, кейин нима қолади? Гузарга автобус ҳам келай кўйғанмиш-ку, тўғрими? — деди у.

— Анча бўлди, пастки йўл билан Қанғлига ўтиб кетяпти. Бир обод бўлган жойнинг бир хароб бўлиши шу бўлса керак-да, — дедим бир энлик эт ташлаб.

Олим акам четга чирт тупринди. Биз илгариги бакқолчилик расталари рўбарўсида маҳзун турар эдик. Ҳозир у расталар ўрнида на қурутчи Олим отанинг курсисию на ёймачиларнинг ҳимарилган халталари кўринар эди.

Шу тоб Миртўхта амакининг ўзи чойхонасидан саннаб чиқиб кела бошлади:

— Ҳой, Маству, уйгинанг куймагур Маству, буларингга нарироқ бор, десанг тилгинанг қирқиладими? Ҳе дўконингга ўт кетсин, шуларни сугоргунча. Икки дунёнг куйиб кетди-ку, бу савдонгдан.

У жаҳолат ичида бизни кўрмаган эканми ё қўрган бўлса ҳам, бу дўқайлар эшитиб қўйсин, деб шанғиллаётган эканми, кўчага чиққан жойида ҳовридан тушиб, тўнғиллаб қўйди:

— Одамнинг ҳар нарса бўлгани яхши: шусиз кунинг ўтмай қоляптими?! — Сўнг қўлларини қоқиб кўришгани кела бошлади.— Ие-ие,вой, эшон боллар-ей. Нечук-нечук, бу путури кўтарилиган гузарларга кириб юрибсизлар?

— Бир танишимизни сўроқлаб-да, ота, — деди акам гапнинг учини очиб, — қарасак, ҳаммаёқнинг итирқинини чиқариб ташлашибди. Ким қўчган, ким қолган — тусмоллабам билиб бўлмай қопти.

— Нимасини айтасиз, ўғлим, итирқинам гапми, тўзитди-ку жуда. Шундай жойлар хароб бўлди-я, вой-вой-вой, уволи тутсин-а, уволи. — У муштдек бошини сарак-сарак қилганча яноғидан ҳам кичкина тортиб кетган даҳанини қоқ бармоқлари билан тутамлаб-силар эди. — Кимни айтяпсиз, балки танирман?

Мен тушунтирдим:

— Анув Умаржон аканинг тепасидаги мезананинг тагида турадиган киши-чи, сутчи...

— Ҳа, авлиями? — деди амаки ғўлдираб, аммо уни суйиб-ёқтириши юзиданоқ қўриниб турарди.

— Қандай авлия? — деди акам тушунолмай.

Миртўхта амаки тиҳисиз милкларини кўрсатиб, сассиз кулди:

— Охиратини деб, бу дунёсига этак силкиб қўйган одамни авлиё демай, ким деймиз?!

— Э-ҳа, шундайми? — деди акам.

— Ҳаммаям этак силкий олсин-чи! Олмайди, нагаки дунё ширин, — деди у бир ғалати бош иргаб. — Илҳом қори бир йўла ҳаммасидан кечди.

— Қори? Бир йўла?.. — Акам ҳеч нарсадан ҳеч нарса йўқ, қалқиб кетган эди.

— Ҳаллоқ-ҳаллоқ. Халоқ денг, эшон бола, — деди у.

Акам қайтариб, ўзига келди. Миртўхта амаки давом этардилар:

— Иймони бутун экан, кечди-қўйди-я, ҳаммасидан. Мана, биз ҳам ўтирибмиз-да, чойхонамиздан ажрасак, бор будимиздан айрилиб қоладигандек...

— Бугун қўринмадиларми? — дедим гап орасида.

— Авлиями? Ҳар куниям асрга қолмай қайтади. Пешинни Камолондами, Новзадами ўқиб, асрни, албатта, таҳоратни янгилааб, уйида ўқийди. Унинг бу тарз — фақир киши панада юриши ҳам шундан. Дарвоқе, топиб бора олармикансизлар, ё бола қўшайми?

— Тепакўча сурилиб кетмаган бўлсаёқ топиб оламиз, — дедим.

Миртўхта амаки «ҳов»лаб, қўл силкиди:

— Ҳо-ов, эшон болаларим-а, тепа қоптими-я?

— Мезанаси-чи, униям олиб ташлашмагандир?..

— Туриби сўппайиб, ўлган отни устихонидай... Ҳамма файз ўша тепаминан экан.

— Демак, тоға ҳам кўч-кўронларини кўтариби... — тусмоллади акам.

— Ким, авлиями? Қаёқда! Ҳеч ёққа жилмай, кум-тошдек ўтирибди.

— Йўғ-е?! — дедик бараварига.

— Баракалла ўшанга! — деди амаки ғўлдираб, ҳам кўтарилиб. — Кўкрагида ёли боракан! Бошқалар миқ этмай кўчиб-кўчиб кетганида, у қўзголибам қўймади! Қани, ҳамма унингдек бўлолганида! Қўзғотиб бўлармиди бу халқни бу жаннат жойлардан? Ҳаммалари ҳар ёққа ҳижрат этиб бўлган экан. Сўнгиси шу экан!

Мен Миртўхта амакининг гапларидан анг-танг қолган эдим. Кимни айтяпти бу одам? Наҳот Султонмурод акамни, у билан боғлиқ тарихларни билади? Ўшаларнинг сўнгиси, демоқчими?

Ялт этиб Олим акамнинг юзига қарасам... у ҳам амакининг гапларидан лолу ҳайратда турибди!

— Чиндан-а? Ўша неча бор «тегирмон»га тушиб чиққан одам-а? Зада бўлмабдими? — деди,

сўнг амакининг жавобини ҳам кутмай бош тўлғади, — йўқ, эсини еб қўйибди, тоға! Бу ўт, бу олов билан ўйнашиб бўларканми??

Миртўхта амаки бошини орқага ташлаб-ташлаб қулди:

— Хех, эшон бола-я, эшон бола! У сиз билган Ил-ҳоммас ҳозир.— Амаки кулганида тирқираб чиқкан кўзёшларини дам кафтига, дам енгига артиб тинчили-да, афтимизга қарамайин ҳам: — Қани энди ҳамма ҳам у қўрқкан нарсадан қўрқиб, қўрқмаганидан қўрқмай қўя қолса! Олам гулистон бўлар эди-ку! — деди.

— Йўғ-е, — акам қаншарини ҳардамхаёл силади.

— Шу одамларнинг дуосидан қиёмат қўпмай турибди-да, укам, Ўтсангиз, кеч кирмай ўтиб кела қолинглар. Асрдан кейин топа олмай қоласизларми, уй бузувчилар олдига айланиб кетадиган одати бор. Машинангиз шу ерда қолаверсин. Ўзим кўз-қулоқ бўлиб турман.

Миртўхта амаки ширин ғўлдираб (унинг овози негадир қулоғимга ёқиб қолган эди, тавба) сидқидил дуо қилди ва биз жилдик.

## 2

Дайди ёмғир шивалаб ўтиб, кўча тупроғини чакичлаб кетган катта қўчадан пастга қараб бориб, ўнгга бурилдик. Гузар ҳам баҳарнав экан. Қайрилишдан ўтиб, анҳор бўйига чиқдигу қаёққа юраримизни билмай қолдик. Ҳаммаёқ кавлаб-суриб ташланган, на Туваккўчанинг кўчалиги, на пахса деворли қўргонларнинг қўргонлиги қолган эди. Анҳор ёқасидаги ўрикзор-ку, довуччаси қинидан чиқмаёқ кундаковга тушибди. Қанчаси симарқон билан суғуриб, етимхона девори тагига олиб бориб ташланган эди. Эсиз-эсиз қантак ўриклар, шу ҳолларига энди барг ёзиб келар эдилар! Сал берирокда эса ҳали кучаласини ташлаб улгурмаган азим ёнғоқ илдиз-пилдизи билан суғуриб олинган эди. Қандай куч, қандай техника топишибди экан?! Қараб туриб, ичим сидирилиб кетди: қирон келса, шу экан-да?!

— Қандай ўтамиз? Анҳор ёқалаб бораверамизми?— деди Олим акам. Қарасам, йўлни йўқотиб, гарангсиб туриди.

— У кишиники бу ёқда, тепадан ўтгач эди, шекилли, — дедим ўзим ҳам тусмоллаб.

— Қандай тепа?.. Тепанинг ўзи кўринмайди-ку?!

Ростдан ҳам ҳозир на йўлни, на унинг икки бетидаги тепани таниб бўларди. Ҳаммаси суриб ташланиб, ёлғиз мезанагина (ўша оёқ кўйиб чиқкан саринг бир ажойиб жангиллайдиган темир мезана!) ҳайхотдек таги билан сўппайиб туради. Ҳов нарида эса, тепадан чиқкан тупроқлар тоғ-тоғ бўлиб ётипти. Ўша ердан кириб бориларди, шекилли, сутчиникига?..

— Яхшиям машинани қолдириб кебмиз, — дея ҳандақдан ҳатлаб йўл бошлайвердим.

— Бу аҳволда у киши қандай тирикчилик қиляпти экан? — деди акам ортимдан эргашиб.

— Қайсарлик қилмай, дўм олиб қўя қолмабдилар-да, қари одам, — дедим.

— Сўз қилган бўлса, олмайди. Шунаقا тоифа, — деди акам.

Тушунмадим. Олим акам уни қаёқдан била қопти? Ош-қатиқ бўлиб юрган одамдек гапиради-я!

— Айтди-ку, амаки ҳам...

Ўгирилиб қараб, ҳайрон қолдим. Ўзи оҳорли туфлисими аяб, лой-тупроқлардан бир-бир сакраб, ўтиб келяпти-ю, хаёли менда: сезилади-ку, баъзан... Тавба, кимни гел қиляпти?.. Рости, ғашим келди. Уни сутчининг олдига бошлаб бораётганимдан, шу ишни бўйнимга олиб қўйганимдан... ўзим ҳафа бўлиб кетдим. Бир кўнглим: «Ҳов, ака, нима ниятда келяпсиз ўзи?.. Яххиси, мени аралаштирунг, бу ишларизга», дегим бор-у, лекин андиша кучлилик қиляпти!

Ноилож, юриб кетдим. Эгалари ташлаб кетган ҳовлию чорбоғларда омон қолган яккам-дуккем дараҳатлару ишкомлар бир ғарип кўринса, анави сурилган тупроқ уюми орқасидаги тизза бўйи ўт босиб, лолақиз-ғалдоғу чучмўмалар очилиб берган ёлғиз томда кантар қонидек қирмизи

қизғалдоқлар шабадада бир чиройли тебраниб, чучмұмалар саломга әгилиб-әгилиб келар эди.

— Қаранг, Маҳмуджон аканинг ташқиси шекилли? У киши сутчига раҳм қилиб беріб күйган жой, — дедим акамга күрсатиб.

— Ўша эканми, ҳеч ким тегинолмаётган жой? — деди у ҳайратланиб. Қизғалдоқларгами, нимага тикилиб қолган, хаёлидан нималар кечяпти, билиб бўлмаса-да, ҳаяжонланаётгани, сутчини кўришга муштоқлиги юз-кўзидан шундай аён эди. Худди довругини эшитиб юриб, минг йилдан бери ўзини кўрмаган одамни истаб келаётгандек, бир интиқлик бор кўзларида. Ростдан бир кўришга орзими? Нияти-чи, қандай?

Кўнглимнинг бир чеккасида бир турли ғилу ғашликлар қайнаб келяптики, унинг зўриданми бунинг сидқидиллигига ҳеч ишонолмасдим. Тавба, шунака шубҳа-чи, кўнгли бир совуса, қайтиб илимайдиган одам эканманми? Бу яхши фазилат эмас-ку. Ахир, ўшандан бери қанча сувлар оқиб кетди-ку. Назаримда, мен уни бекор бошлаб келаётгандек эдим.

Тупроқ уюмидан ўтишимиз-ла ҳалиги устини тизза бўйи ўт босиб, бўғотларида лолақизғалдоқлар очилиб берган том ёнидан чиқиб қолибмиз! Дарвозаси қаёқда экан бу антиқа кўрғоннинг, деб аланглаб турсам, қурувчи-бузувчи тушмагурлар тепани шу ергача суреб келиб, хайҳотдек дарвозани азза-базза тўсиб қўйган эканлар. Кирадиган одам деворга қисилиб, зўрга ўта оларди.

— Э, баракалла, қўмиб юбора қолларинг бирорнинг уйини!

Изимдан келаётган акам ҳам ажабланди.

— Шунгача ҳам миқ этмабдими? Балли! Тоға чиндан қарибди.

Нега шундай деди — тушуна олмадим.

Дарвоза қўш тавақали, бир вақтларги дарвозамисан — дарвоза эди. Фақат офтобда ўнгиб, девор рангига кириб кетибди. Девор эса, тагидан уқаланавериб, аллақанча жойи емирилиб тушган эди. Лекин том эса сувалавериб, лой чиқавериб, тирсак бўйи кўтарилиб кетган, шунча тупроқни бу уй, бу деворлар қандай кўтариб турибди, ақл бовар қилмасди.

— Шумикан, ўзи? — деди акам аланглаб.

— Чақириб боқайлик.

Мен дарвозанинг пастки ҳалқасини тутиб, ҳайрон қолдим. Шундай улкан дарвоза шунчалик енгил очилади, деб ўйламаган эдим. У қўлим теккандаёқ ўз-ўзидан очила бошлаган эди. Очилганда ҳам бир қисми очилиб келар эди. Қарасам, болачаси экан.

Ол-а, дарвешлар, биз қандай киравимизни билмай турибмиз, очиқ экан-ку!

«Болача» шу ярим очиқ ҳолига ҳовлининг талай қисми — ўртадаги пастак деворгача кўриниб турар, у тамоми нокзор бўлиб, баланд-баланд қари ноклар — шунча қариллигига қарамай, қийғос гуллаб ётар эдилар. Қолаверса, қачон тўкиб ултурган — таги ҳам оппоқ, усти ҳам оппоқ. Тагидаги кўпми, устидагисими — ажратиб кўр-чи! Лекин устида асаларилар шундай ғужғон ўйнайтиларки, визиллаган овозларидан улар тўпи-тўдасию поишшоси билан шу ҳовлига тушиб, кўр тўкканга ўхшарди.

Ичкарига бир қадам босиб, чиқирмоққа ҳозирланган жойимда дарвозахонанинг хойҳотдек шифтию ён устунларига қўзим тушиб, анграйиб қопман.

Дарвозахона бир баланд, унинг ёнидан чиқиб борган ёғоч зина ундан узун, тепада эса олди очиқ болохонанинг эшиги кўринар эди. Бир вақтлар ўша ерда ҳам ўтирилган эканми, тавба. Ақлим бовар қилмасди. Пастдаги жиловхона эса ундан ажойиб. Устунлару тиргаклар вақт кечиши, замон ўтиши билан ўнгиб-оқариб кетган бўлса-да, ўша-ўша бақувват, ўша-ўша маҳобатли эди. Устунларнинг кўл етар жойларида ясси қалпоғига қадар занглаб кетган улкан михлар кўринади. Бир вақтлар бу хонадонга узоқ-яқиндан айтувли-айтувли меҳмонлар келиб турган, от-увловлари ўша михларга боғланиб, ўзлари ичкарига олинган шекилли. Ҳозир ўша ичкаридан асар ҳам қолмаган, фақат шу жиловхонага ёндошиб тушган ёлғиз уйгина омон эди. Бояги томини тизза бўйи ўт босган шу уй бўлса, эҳтимол.

— Чақирмайсанми? — деди акам мўралаб. Унинг ортимдан кириб келавермай аллақандай тортиниб туриши... ғалати эди. Тавба, унга нима бўлган — ҳеч тушунолмасдим.

— Ҳов, ким бар? — деб ичкарига кириб бора бошлаган жойимда овозим жиловхонада жангиллаб кетиб, қисиниб тўхтадим. Чиндан асалариларинг кимсасиз нокзор ҳовлига эга чиқиб, бир маромда визиллаб ётуви, бунинг устига манави жиловхонанинг жангиллаб акс-садо бериши ғалати эди. Булар ҳаммаси қўшилиб, одамни тушунуксиз сир босиб келар эди.

Шу маҳал дарвозахонага туташ уйнинг ҳовлига қараган эшигими, деразасими (харқалай бизга кўринмасди) очилиб, бирор томоқ қирди:

— Ҳозир...

Мулойим овозидан сутчининг ўзи эди.

— Ўша, — дедим остона томон чекилавериб.

— Ростдан-а? — деди акам жавдирааб — Шунаقا қариб қолганмилар?

— Ҳалиям қаримасинларми, қачонги сутчи? — дедим.

— Вақтнинг ўтишини қара-я.

Ҳайрон қолдим: акам уни ким деб фаҳмляяпти? Қолаверса, уни охирги марта қачон кўрган экан?

Бу орада қариянинг ўзи кўринди. Ҳа, ўша, бирор билан иши йўқ, дароз одам чиқиб келар эди. Факат ҳозир енгил уй кийимида, Нусрат поччага ўхшаб, узун оқ иштону оқ кўйлакда, устидан енгил нимча кийволган эди. Бошида эса учли тақя. Жойнамоз устидан туриб чиқяптими ё китоб кўриб ўтирган жойидан — билиб бўлмасди.

У мулойим жилмайиб (қарангки, мулойимлик унга ярашиб турар эди!) ўша ҳовлиданоқ мулоzимат қилиб кела бошлади:

— Э, сизларми, келинглар-келинглар! Мен тағин анавиларми, деб тўнимни тескари кийиб чиқаётган эдим. Аллоҳга шукр, сизлар экансиз.

— Ким? — дедим фаҳмлаб турган бўлсам-да.

— «Буз-буз»чиларнинг элчилари-да, ким бўларди,— деб боягидек ҳалим тортиб, жилмаяверди қария. — Билмайдиларки, мен анави мезанадан ҳам оғирроқ тошман. Қани, жилдириб бўлса.

Акам остона ҳатлаб олдинга ўтди:

— Ассалому алайкум. Сўраб-сўраб Маккани топғанлариdek, ўзларини топиб келяпмиз. Бардам-бакувватгинамисиз, тоға? — деди у бориб қўшқўллаб кўришаркан.

— Ие, ие, йўқлаб-а, атай-а? — Қария ҳали таниб улгурмаган бўлса-да, мутаассирланиб қолган эди. — Келингиз, келингиз. Қадамларингизга хасанот.

Акам қайтариб сўради:

— Ким экан ўша билиб туриб, қисталанг қилаётганлар?

Сутчи юмшоқ кулиб, енгил кўл силкиди:

— Эътибор қилманг, олса шу кулбани оладими? Мен уни талашаётганим йўқ. Унинг орқасида қанча боғлар, болалар дам оладиган жойлар бор. Ўшалар кетмасин, дейман-да.

Энди эсладим. Анхорнинг ёқаси кета-кетгунча, гузардан Каттабоғга қадар ўрикзору ёнғоқзор боғлар эди, шу соя-салқинда ёз бўйи болалар дам олишар, Бўзсув бўйларига саёҳатга чиқишар, бунаقا баҳаво жойни ҳеч ердан топиб бўлмасди.

— Бормисиз! Яхшиям ўртага тушибсиз! — дедим мен ич-ичимдан қувониб: бор экан-ку, «хей» дейдиганлар ҳам!

— Атай ўтирибман, атай, — деди қария бизни ичкари бошлайвериб. — Нима йўқотардик биз — сафар кишилари — Оллоҳ чақирган куни хузурига қайтадиганлар? Нимамизни олади! Қураман, деса бошқа жой қуриб қоптими? Қани, кела қолинглар, кираверинглар.

Якка тавақали кўй эшиқдан даҳлизига кириб бордик. Уй нимқоронғу, зах-моғор аралаш кўхна китоблар ҳиди анқиб турар эди ундан. Кафтдек деразани айтмаганда, ёруғ тушадиган жойнинг

ўзи йўқ, икки томон токчалару тахмондан иборат эди.

Эски намат танчагача бўлган жойни зўрға тўлдирган, унинг четидан бўйранинг титилган учлари чиқиб турибди. Танча ковшандознинг шундоқ ёнгинасида — деразага яқинроқ жойда эди. Унинг ёнларида юпқа — ялангқават кўрпачалару ковшандоз томонда қора пўстак кўринарди. Сандал устидан якандоз ёпилиб, гирдоб тўнкариб қўйилгану устида одми кўзойнак билан муқовасига қизил жилд сирилган қалин китоб кўзга ташланади, холос.

Сутчи кириши билан уларни токчага олиб қўйиб, гардин патнисни ўнгарди-да, қозикдан ўйл-ўйл дастурхон олиб ёзди. у ғарибина яшashi шулардан ҳам маълум, ўзи бундан бошқалардек қисиниб-қимтингмас, балки аллақандай эмин-эркин эди.

— Қани, азизларим, юқорироқ ўтаверинг. Ҳамонки, меҳмон бўлиб кепсиз, жой-жойингизни билиб-билиб ўтиринг. Мана, мен чўқдим, — деб дераза рўбарўсига ўтира бошлади.

Ноилож, ўтдик, акам — тўрга, мен дераза тагига — амакининг рўбарўсига. У қўлини дуога очди:

— Қани, омин, қадам етди, бало етмасин. Оллоҳ барчамизга тўзиму қушояишлиар берсин. Нима ниятда қадам ранжида қилган бўлсангиз, нияtingизга ўзи етказсин. Оллоҳу акбар. Хуш келибсизлар.

— Хушвақт бўлинг, — деди акам, мен унга қўшилдим.

Сутчи қўлини кўксига қўйди:

— Тилагингизни Оллоҳ берсин.— Кейин иккимизнинг юзимизга қараб қўйиб, мулозаматомуз деди: — Сўраганнинг айби йўқ, жиндак чой қўяй, қумғоним салда қайнаб чиқади. Сўнг бафуржа...

— Сиз нимани лозим кўрсангиз, шу. Биз сўраб-сўраб топиб келмоқдамиз. Қолаверса, мен узоқ бир юрт — мухожиротдан омонат салом келтирганман. Ўзингиз яхши билган кишининг... қиёмат қарз саломлари.

Сутчи ҳар нарсани кутса ҳам буни кутмаган экан, хушёр тортиб, акамнинг юзига қаради. Қарияларнидек қисик-мулойим ва сал хомуш қўzlарида ҳайрат уйгонди:

— Мухожиротдан?!

— Ҳа, ўша ўзиз билган Тангритоғ томонлардан, — деди акам.

— Валлоҳ-валлоҳ!.. Мухожирларга ансорлардек қучоқ очган юртдан-а? Мунаварраи сонийдан-а? — Қария азза-базза қайта чўқкалаб, акамга ўгирилиб ол-ди. — Очиқ-ёриқ айтаверинг, мен қарияни қийнамай! Наҳот — ул зотнинг ҳузурларидан?..

— Ҳа-ҳа, ўшал зотдан. Сиздан бу дунёю у дунёда қайтарибу узуб бўлмас яхшиликлар кўрган бир кишининг қарз саломларини ола келганман. Омонат васиятларини етказишга буюрилганман.

— Субҳоналлоҳ!.. Сиз... Сиз ул зотга ким бўлгайсиз? Эшон поччамни қаердан билгайсиз?

Сутчи илон авраган одамдек акамнинг оғзига тикилиб қолган, шундан бўлак нарсани сўрашишташ хаёлигаям келмай, жавоб кутар эди.

Акам хижолат аралаш жилмайди:

— Мен у кишининг кенжалари... хизмат юзасидан ўшоқларда юрган ўғиллариман. Энди танидингизми?

Сутчи бу хабардан ҳайратланиб, азза-базза ўрнидан тура бошлади:

— Аллоҳ, Аллоҳ! Уни қаранг-а, шундай дэнг-а?! Иккита зурёдлари бор, деб эшитар эдим. Сизми бири?— дея акамни қучоғига олиб, тавоф этаркан, уни кўрганидан бир ерга етган эди. — Уринмай-ла келдизми? Сизни етказган Худоимга ҳамду санолар бўлсин. Кутмагандим, кутмагандим. У томондан, эшон поччам томонларидан, деб ўйламагандим, — деб елкаларига қоқиб, куракларини силади. Сўнг ўтириб дуо қилди, биз қўшилдик. Сўрадилар:

— Кенжалари, дейсизми?

Акам тиззаларини йифиб ўтириб, хижолатли боқди:

— Падарибузуркворимизни олиб кетишганда... биз ёш бола эканмиз.

— Тушунарлы, тушунарлы.

— У киши ҳаёт эканликларини ҳам билмасдик. Оллохга минг шукрларки, дараклари ўша ёқдан чиқиб, ўша юртда кўриш насиб этди.

— Уни қаранг-а, дуоларини олиб қолиш... сизга насиб этибди, — деди сутчи беҳад мутаассирланиб.

— Ҳа, рози кетдилар биздан, — деди акам аллақандай таъсирланиб ҳам овози ўзгариб келиб, — шу жумладан, Сиздан ҳам...

Бу тарихларни эшлитиш, айниқса, келиб-келиб, ўша Тангритоғ томонларда юрган Султонмурод акамга эмас, айни Олим акамга у кишининг дуоларини олиб қолиш насиб этгани ғалати ҳам ҳайратланарли эди. Бунинг ҳикмати нима экан, ҳеч ақлим етмасди.

Акам ёнидан рўмолчасини чиқариб, намланган кўзларини артишга тутинаркан, мен унинг киприкларида ногоҳ бир томчи ёш кўриб, ўзимдан шундай жирканиблар кетдимки... қочишга қани жой топилса! Аммо бошга қилич келса-да, чинини айтмоқ керак: кўнглимнинг туб-тубида, калламнинг аллақайси бир пучмоқларида тиёлғламалик қилмаяптимикан бу устомон, деган иштибоҳ чарх ураг эди, тавба.

Сутчи ногоҳ тин олиб, тўлғонди. Ва:

— Ҳай, дариф! Бу фоний дунё ўшандай зотларни ҳам сифдирмадими-я? — дея тебранди. У тебранармиди, тўлғонармиди, ажратиб бўлмасди. Унинг такводор чоллардек шу тебраниб ўтиришини суйиб қолмаслик, яхши қўриб кетмаслик мумкин эмасди. Кейин кўзларини юмиб, ўша чўк тушганча миқ этмай қолди.

Акамнинг кўзларига қалқкан намдан ҳам кўра, унинг шу ўтириши таъсирлироқ эди. Уларнинг ўртасида қандай кечмишлар, қандай боғлиқликлар борки, унуга олмаяпти — билиб билолмасдим, сўраб сўролмасдим. Аммо нимадир борлиги аник. Шуни сезиб тургандайман-у, нималигини ажрата олмаяпман. Қолаверса, акам ҳам сўрамаяпти, ўзи ҳам айтмаяпти.

Нихоят, у ўсиқ-бароқ қошларини кўтариб бизга қаради-да:

— Ундей бўлса, бир калима Қуръон бағишилаб, дуои хайр лозим экан, — деди ю чўккалаб олиб, тиловатга берилди. Назаримда тангри таоло бизни кўриштириб, ёдлаштириб қўйганида ҳам бир сир, бир ҳикмат бордай туюлар-у, уни тўла англаб етолмасдим. Нихоят, қария юзига фотиҳа тортди-да:

— Аллоҳ раҳмат қилсин у зотларни. Балонинг қаттигию зўрини бекорга уларга юбормаган. Ҳикматини ҳамма ҳам билаверсин-чи, билмайди. У балоларини агар тоққа ташласа, тоғ кўтара олмасди, улар кўтариб кетишиди — деб, оғир сўлиш олиб, тура бошлади. — Мен жилла қурса чой қўйиб юборай. Шундоқ табаррук жойлардан мозор босиб келибсиз. Қўшимиз қолаётгани йўқ, қолаверса, дам ғанимат, дийдор ғанимат.

— Сиз уринманг, фақат кўрсатвorsangiz бўлди. Мана, Мақсуд қайнатиб кела қолади, — деди акам мени туришга унданб.

Мен сакраб турдим, аммо қария унамади. У эшон почча номини эшлибиқ ўтиrolмай қолган, у зотнинг хурмати учун ҳам бизни сийлашга тушиб кетган эди. Озгина каллакқанд, жиндек майиз ҳам ёнғоқ дегандек, пиёланинг тагида дурда олиб келиб қўйди. Токчадаги нон кутидан яримта гижда билан ушатиғлик чуррак нон олиб қўяркан:

— Айбга буюрмайсиз, эшон бола, сал суви қочибди нонимизни. Бугун дўконга киролмаб эдим. Ўзи шунаقا пайтда меҳмон келади, — дея хижолат тортган бўлди.

Сўнг ташқаридаги ғишт ўчоққа олов қалаб, ўтни жўнаштириб юбордик. Салда қумғон жигиллай бошлади. У киши мени уринтирмай муштдек чойнакларига чой дамлаб келиб, яна сандал атрофига — ҳаммамиз ўз жойимизга чўқдик. Чой қуиилиб, яна сухбат ўз маромига тушди. Акам бояги гапни улаган бўлди:

— Мен, рости, ҳали-ҳали ақлим бовар қилмайди, ўша ишга қандай журъят этганингизга.

Ахир, ҳазилми, бир одамни Сибирдай жойдан — шундан шу ёқقا ўтказиб юбориш?! Яна қамоқдан опчиқиб!.. — деди ҳайратини яширолмай. — Отам раҳматли ўла-ўлгунча ҳам дуо қилиб ўтдилар. Ўша яхшилигингизни унутмай.

Мен ҳам ҳайратдаман-у, ўз оғзидан эшитмагунимча ишонолмай турибман: Чинданам қайси юрак, қайси журъат билан қилди экан бу ишни? Чегарадан олиб ўтди экан?

Лекин сутчи аллақандай хижолатга тушиб, қисиниб-қимтинарди:

— Аллоҳ рози бўлсин. Биз нима, Парвардигор иРОДА қилмаса, агар.

— Ҳарқалай-да, — деди акам, — қанча сувлар оқиб ўтиб кетди, энди айтса бўлар?

— Эшон поччам... айтмаганмилар? — деди қария ўша воқеанинг сирлигича қолишини истагандай.

Акам қўлидаги чойни қўйиб, бош тўлғади:

— Йўқ, бу ёғига ўтмасдилар. Алқардилар, дуо қилардилар-у, тафсилотига кўчмасдилар.

Сутчининг юзига мамнунлик балқди:

— Қари билганини пари билмас, деб... шуни айтадилар, — деди ширин қулимсираб.

Демак, бу ҳам айтмайди. Бу шундай сирки, уни инсон зоти тагига етолмаслиги керак. Акс ҳолда ҳали ҳам гап тегиб қолуви, кимдир жабр кўруви мумкин... шекилли. Балки шу туфайлидан уни муддатидан илгариёқ жилдириб юбориб, киши қўзига шундай бир овлоқ гўшада ошини ошаб, ёшини яшашга маҳкум этиб қўйгандирлар-у, бу сутчилик қилиб юрганмикан? Мен шундай тахминларга бориб ўтиарканман, акам уни тушуна қолмасди. Балки атай ижикилаётгандир, ўз оғзидан илинтирмоқчидир? Мен ўз хаёлларимдан ўзим чўчиб, унинг юзига қараб-қараб қўярдим. Акам хижолатларга тушиб бўлса-да, эланишини қўймас эди:

— Бир учи, бир чеккасинигина айта қолинг. Фақат ўзимиз учун.

Сутчи ўша-ўша ширин қулимсираб, чойга алаҳсиди. Аммо иложини топса, гап ўзанини бошқа ёқقا буриб юборадигандек кўринар эди. Шу боисданми, акам унга қайта юзланиб илтижоланди:

— Ишонинг, шу гап шўтта қолади! Ўттиз икки қўриқчиси бор бир қўрғонда муқим қолади. Эшон отамизнинг хотиралари ҳаққи-хурмати. Шўронинг ўша чоҳларида қолиб кетганлар ҳаққи-хурмати...

— Ҳов, акам жуда уста экан! Бир ширин сўзлар, такаллумлар билан уни аврар, икки ўртада бир эмин-эркинлик пайдо қилар эдики, қария унинг самимилигидан мутаассирлана бошлаган ва бу кетишда унинг илтимосини рад қилолмайдиган бир ҳолга тушиб борар эди.

Қолаверса, ўзим ҳам унинг оғзидан чиқадиган сўзга интиқиб ўтирибман. Тавба, бирор назарга илиб-илмайдиган, ниҳояти бонка кўтариб, сутчилик қилиб юрган бир киши шундай ишларга қодир бўлса! Ота диёридан қувилиб, бир умрга совук-туманли ўлкаларга бадарга этилган, күёш юзини кўрмай, қор кечиб, муз тешиб яшашга маҳкум бир маҳбусни бу дунёнинг азобу жаҳийидан қандай опчиқиб келибди экан? Қамоқхона қўриқчиларию исковучлари кўзини қандай шамғалат этибди экан? Мулла одам жилла курса, умрининг охирида эмин-эркин яшасин, хотиржам ибодатини қилсин, деб ўша тоғли диёрга опчиқиб қўйибдими? Тўғри, Оллоҳнинг изнисиз бирорнинг бирон соч толаси, туки ҳам тўқилмас, ҳеч кимга рўшнолик эшиги ҳам очила қолмас. Лекин бу одам нима умидда бу ишга қўл урди? Нияти нима эди-ю, нимага эришди?

Сутчи чойнак устига сочиқ ташлаб, четроқ сурди ва томоқ кирди:

— Бу тарихни ҳаммадан яширсак ҳам сизлардан яшириб бўлмас. Негаки, Эшон поччам бошларига тушган мусибат — унақа-бунақа мусибат эмас. У бало Сизларни етим қилиб, киндик қонингиз тўқилган жойларда ўйнаб-кулишдан, эмин-эркин ўсишдан ҳам мосуво этди. Етимлик кўчаларида тентираб, аламзадалик зардблари ила сугорди. Ҳали-ҳануз тўзиб юрибсиз, диёридан адашган турналардек. Сизга айтмай кимга айтаман, юрагингиз ҳоврини сал-да оладиган бу тарихни.

Воҳ, сутчига қилт этмай тикилиб қолган Олим акамнинг кўзларида (нимани дeng?) филтиллаб айланган, киприк қоқсаёқ дув тўкилишга тайёр ёшни кўриб, кўнглим бузилиблар кетди. Ҳиқиллаб қолмаслик учун кўзларимни олиб қочдим. Ўзимни бир нималарга чалғитишга уринар эдим.

— Айтинг, айтаверинг, — деди акам тўлиқиб, — куйган юрагимизга зора малҳам бўлса сўзлариз. Умрбод қарздормиз биз Сиздан. Сиз ҳеч ким қилмаган, қиломайдиган яхшиликни бизнинг отамизга — падарибузрукворимизга қиласиз-у, биз топиб келмайлукми, тавоф қилмайлукми! Айтинг, жон қулоқларимиз-ла тинглаймиз гавҳар сўзларингизни.

Қария ийманигина тиззасига тўкилган нон ушоқларини тераркан, акамга қараб қўйди.

— Ҳамду санони Аллоҳга айтмоқ керак. У ёлғиз Тангримга ярашади. Биз ниҳояти Аллоҳ розилигини қидириб юрган бандалармиз, — деб жим қолди.

— Ҳарқалай, Сиздан бошқаси. журъат этармиди, йўқми, — деди акам.

— Ундаи эмас, эшон бола. Мен бўлмасам, бошқаси қиларди, бошқани сабабчи этарди Аллоҳ. Мухими, отангизнинг мусибатлари ариб турган. Биз сабабчи, холос.

Биз миқ этмай, ҳатто нафас ютмай ўтирадик. Ютсан, чалғиб, уни тинглолмай қоладигандекмиз. У эса бир маромда, қариялардек салмоқланиб давом этяпти, гоҳ-гоҳ ушоқларни кафтига териб жамлаб, оғзига солиб қўяди.

— Хуллас, дeng, шундай топшириғу вазифа бўлиб қолди: бир одамни ўшоқдан олиб, бошқа юртга ташлаш лозим экан, — деб қария акамга маъноли қараб қўйди. — Бўлади-ку, шунақалар: хизмати тугагунча маҳбуслар ичидаги қоладиганлар...

Мен сотқинлар эканми, деб тушуниб, тепа сочим тикка бўлаёзди. Лекин акам хотиржам бош силкиди:

— Хўш-хўш?

— Шунақалардан биттаси топшириқ билан янги жойга ўтказилиши керак экан.

— Тушунарли, — деди акам.

Бунга сари мени ижирғанишми, нима қамраб бор-япти. Ёдимга Олим акамнинг ўтмишию анув йўқ бўлиб, бадар кетганлари тушиб кетяпти. Ўзи эса, парвосига келтирса, ўлсин агар. «Хўш-хўш, кейин-чи»лаб қария-ни қисташ, оғзидан у тарихни «суғуриб олиш» билан овора.

— Ҳамма ҳужжатларини тўғрилаб, ҳар эҳтимолга қарши битта тоза муҳрланган қоғоз ҳам қўшиб беришди.

— Тушунарли, тушунарли, қайта тўлатиш керак бўлиб қолса-да, — деб қўйди акам.

— Поезддан поездга ўтиб, тақира-тукур билан тўққиз кун деганда етиб бордиммикан, валлоҳи аълам. Қамоқхонасиям шахардан нақ бир кунлик йўлда, ўрмоннинг ичидаги экан. Ит азобида топиб борсам, (Худо ол қулим, деса шу-да) маҳбусларни ёғоч қирқишидан олиб келишаётган экан. Дарвозадан кириб кетишгунча ичим ачи-иб қараб турибман. (Ҳарқалай, маҳбуслар, бунинг устига, ўзимизнилар, қиров босган оппоқ соқоллиларини демаса, пахталик шим-камзуллару бир хил қулоқчинда, миллатиниям ажратиш қийин.) Шунда ёнимдан ўтаётганлардан бирор отимни атаб, ташланиб қолса бўладими: «Илҳом, азизим, ошна!» деб. Чоп-чоп, ҳай-ҳай бўлиб кетди. Соқчилар югуриб келиб, тортиб олишди ю судраб кетишиди. Ҳалиги маҳбус оёғи ерга тегмай боряпти-ю:

— Илҳом, азизим, ошна, танимадингми, менман! — деб бақиради.

Бирпасда соқчилар мени ҳам ўраб олишди. «Кимсан, бу ерда нима қилиб турибсан», деб тергаш, туртқилаш бошланиб кетди-ку. Бўш келсан, маҳбусдай тиқиб қўйишлари ҳам мумкин. Ҳужжатимни кўрсатиб, турма идорасини сўрай қолдим. «Ҳа, шундоқ демайсанми, ўртоқ», деб кўрсатиб қўйишиди. Мен қидириб борган одамим ҳамон маҳбуслар орасида эканидан, унга ҳам бошқалардек муомала қилишаётганидан ҳайрон эдим. Нима гуноҳ қила қолибди — ҳеч тушунолмасдим. Ҳали жавоб бермай қўйишлари ҳам мумкинлигини ўйлаб, хушёр тортган эдим.

Бошлиққа ҳам элбурутдан унинг қоғозини кўрсатиб ўтирамай:

— Бир-иккита «зек»лар билан қўришишим керак, шароит яратиб берсангиз, — дедим.

— Марҳамат, ана, бўш хона, айтинг, чақириб беришади, — деди у. Ишим хамирдан қил суғиргандек осон кўчаётганига ҳайрон эдим мен. Лекин сир бой бериб бўладими! Айтдим. Шунаққиб, ҳалиги одамни чақириб беришди.

— Ким экан, танидингизми? — деди акам.

— Қаёқда! — деди қария. — Ҳеч эслай олмасдим, у бўлса, таниб, ялаб-юлқаб ётипти. Нукул йиғлайди, кўзёшларини шашқатор оқизиб, шу таваллолар қилади, сиктайдики, қани овутиб бўлса, тинчтиб бўлса... Мен бу эшонларнинг қарғишига қолдим, намозхонларнинг дуоибадига учрадим, дейдими-ей, қаерданам шуларнинг ичига ташлашди, уларни сотиб, тутиб бердим, дейди. Йиғлаб-сиктаб, бир ерга етаяпти. Бу кўргилигу кийноқлар холва, дейди, ҳали охирадагиси, Маҳшаргоҳдагиси бор. Ана ўшанда Оллоҳга қай тил билан жавоб қиласман? Мана бу тил, мана бу кўзларим гувоҳлик берсалар, ўзимга қарши гувоҳ бўлиб турсалар, дейди. Оллоҳнинг дўзахига сургаб кетишаётганда ким, қайси идора қутқариб қола олади мени, Илҳом, дейди. Сизлар ўз ҳолингиздан ортармикансиз? Ҳолингиз меникидан яхшироқ бўлармикан, дейди.

Ногоҳ титраб кетдим. У тўғри айтяпти-ку, деган ўй ичимни ўртаб, ачитмоқка бошларкан, ўзимни ҳам, уни ҳам бу ҳолдан қутқариб, чалғитиш учун, қўйнимдаги қофозни олиб, стол устига ташладим.

— Бу нима? — деди у кўзёшларини енгига артиб.

Ўзингга шукр, тинчиди-ку, деб ўйлаб, буйруқни айтдим.

— Ўзга юргами энди? — деди у кутилмаганда.

— Алам-аччиқнинг ўрнимас. Худога шукр қил. Эсларига тушиб қолганингга. Бошқа вазифа чиқиб қолганига, — дедим мен.

— Бу гуноҳларим кам бўлса, у ёқда, у юртда тўлдирап эканманми? Шундайми? — деди у «тўнини ҳамон тескари кия бошлаб».

— Эсингни йиғ, бундан ортиқ яхшилик бўлмайди. Қолаверса, сен билан мен қаерда, қайси юртда ўтирганимизни унутма. Улар чақириб қолмасларидан ҳал қил. Ҳали бу қофозларни кўрсатганим йўқ, — дедим.

У қофозларни қўлига олиб, хўмрайганча кўз югуртиаркан, кутилмаганда муҳрланган, оқоппоқ қофозни қўриб:

— Буниси нима? — деди кўзлари чақнаб.

Мен тушунтиридим:

— Ҳар эҳтимолга қарши: қайта тўлғазиши керак бўлиб қолса...

У совуқдан мўматалоқ бўлиб, шишиб кетган каттакон кафтини ҳалиги қофоз устига ташлади. Унинг важоҳатидан қўрқулик эди, шунақа ўзгариб кетган эди у.

— Гап бундай, — деди у эшикка аланглаб, аллақандай паст товушда, — бир иш қиласми. Фақат менинг айтганимга кирасан.

Ўлай агар, бирон нарса тушунган бўлсам.

— Бу нима деганинг? — дедим ориятим қўзиб. — Мен сени олиб кетгани келганманми ё сен меними? — дедим туриб.

— Шошма, ўпкангни бос, — деди ўтиришга ундан, ўзи столга кўкрагини бериб, ёпишиб опти. Кўзимдан кўзини узмайди. — Мусулмонмисан? — дейди.

— Алҳамдулилоҳ... — дедим.

— Худо биттами? — деди у ўша-ўша, тузи ўзгармай.

— Битта, — дедим гапни қаёққа бураётганини англаб-англамай.

У кутилмаганда ўтирган ерида чўзилиб, иккала қўлини елкамга човутдай ташладио силкиб қўйди:

— Ҳозир ҳам ёлғиз эмасмиз бу хонада. Худо шоҳид, у кўриб турибди барча-барчасини...

Шундайми?.. — деди ниятини оча қолмай.

— Шундай, — дедим.

У елкамни қўйиб юбориб, бояги-боягидек столга кўкрагини бериб тикилди.

— Шундай экан, бир иш қиламиз. Манави бўш қоғозларни мен айтган одамнинг номига тўлдирасан.— Сўнг чақнаган кўзларини кўзимдан узмай қаддини сал кўтарди, — икки бурдек одам, Худони таниган икки ўзбек тил топиша олармиз?!

— Нима демоқчисан? — дедим юрагим гурс-гурс ура кетиб.

— Кўрқма, панд бермайман. Қолаверса, сени ҳамиша мард, деб эшитганман. Мардни эса Оллоҳ ҳам қўллади, — деди у. — Шунча гуноҳларимиз эвазига бир иш қилиб кетамиз. Оғир кунда мени суяган, мендан ирганмаган, бетимга тупурмаган бир одам бор: ўшани ола кетамиз! Фақат йўқ демайсан, дея кўрмайсан. У кишииз кетсам, Худонинг олдига нима билан бораман?! Тушун.

— Ким? — дедим.

Шунда у эшон поччанинг номларини айтди мени ҳайрону лол қолдириб. Кўз олдимдан эса ҳалимдек юмшоқ чолнинг нурли юзи ўтиб, ичимдан хўрликми, йигими бир нарса тошиб келарди.

— У киши ҳам шу ердамилар? — дея олибман.

— Ҳа, мен туфайли, мендек нобакорлар туфайли,— деди у...

— Эшон поччани ўша одам туфайли қутқариб келганмиз ва чегарадан ўтказиб қўйганмиз, қолаверса,— деди у бир енгиллик туйиб.— Тушунинглар, мен ҳеч ким эмасман у кишининг олдида. Агар шу ишимизга савоб ёзиладиган бўлса, аллақанчаси унинг чекига тушгай.

Ўртага аллақандай бир хушҳоллик иниб, ҳаммамиз жим қолган эдик.

— Ахир йўқ демабсиз-ку. Шунга-да, мингдан-минг ташаккур, — деди акам.

— Сизнинг ўрнингизда бошқаси унармиди, йўқми,— деб юбордим мен.

Сутчи ҳалим қариялар сингари ширин кулимсиради ва шу баробар юзларидан нур ёғилиб:

— Деёлмасди, — деди ишонч ила. — Аллоҳ хоҳлаб турса, қай банда йўқ дея олади?! — деб бетимга қаради. — Аллоҳ «кун» деса, бас, ўша нарса бўлгай. Эшон поччамнинг мусибатлари ариб турганки, биз етиб борганимиз, ўша қоғозлар ила...

Ташқарида майнами — бир нима сайради. Ўгирилиб қарасам, иккита қорашақшак ялтираган қора қанотларини ёзиб, оқ-оппоқ гуллаган ноклар тагида қувалашиб учиб юрибди. Бу ниманинг аломати эди, тушуна олмасдим.

### 3

Шу маҳал дарвоза болачаси очилгандай бўлиб, ўша ёқдан қиз боланинг овози келди:

— Амакижон?..

Сутчи ўрнидан оғир қўзғалди:

— Мен қарай-чи.

Ўша чўккараб ўтиришида оёғи увишиб қолган экан, уни силаб-сийпашга тутинди ва шу ерданоқ овоз берди:

— Ҳозир, пучук қизим, ҳозир...

— Мен қарай қолай, — деб ўрнимдан тураётиб эдим, у киши унамай, ковшандозга тушдилар.

— Қимирламанг, ўзим чиқмасам, касал бўп қолибдилар экан, деб ваҳма қилиб юрмасин, тагин.

Бу орада пучукнинг ўзи ҳовлида кўринди ва деразадан кўзи бизга тушибоқ орқасига пусинди. У ажина гулли кўйлак устидан бир чиройли жажжи нимчани сириб, сочини майда

ўрган, камига пистонли ироқи дўппи кийиб олган эди, қўлида тугунми, бир нима бор.

Сутчи чикиб, акамга саволчан қарадим:

— Шундоқ одам... шундай яшаса-я?

Акам бармоғини лабига босди:

— Жим, эшитса оғринади, — деб шивирлади, — ўзи шуни истаса нима дейсан. Бўлмаса, хар иззат-икромларга ҳақли.

— Ё ҳайдалганми, ўша иши очилиб? — дедим.

Акам қатъий бош тебради:

— Билишмайди ҳатто.

Аммо менинг савол халтам очилиб кетган эди:

— Очилиб қолса-чи, нима бўлади?

— Қамашади, албатта, — деди акам бошқа гапга ўрин қолдирмай.

Юрагим ачишиб келиб, гажирлигим тутди. Муноғиқ, деворгим келди уни. Отасига шунча яхшиликлар қилган одамни нима деяпти?! Қамашади эмиш! Оллоҳ-чи, қараб турарканми!..

Тўрсайиб олдим. Буни қўриб у ялпизлашга тушиб эди, сутчи қайта бошлаб, жонимга ора кирди.

Унинг қўлида устига битта гижда ёпиб, боғланган тугунча бор, тагидаги коса экани билиниб турар эди.

Сутчи келиб жойига чўқди, сўнг тугунчани дастурхон ўртасига қўйиб, еча бошлади. Уйни енгил нон-қовурдоқ ҳиди тутиб борар эди.

— Насиба-да, эшон боллар, пучук қизим менга илиниб опчиқкан экан, ўртада баҳам қўрадиган бўлдик. Қутлуғ уйдан қуруқ кетилмайди, деб шуни айтилади-да, — деб қизчанинг қаерда туришини тушунтира бошлади. — Улар мижозим бўлишади, илгари сутларини олиб турардим.

Косадаги овқат чиндан нон-қовурдоқ эди. Сутчи сири қўчган, лекин тоза бир лаган олиб келиб ағдариб эди, бир лаган чиқди. Буғланиб, ажойиб бир хид таратиб, нафсни қитиқлай кетдики, беихтиёр оғиз сув очиб борар эди. Уй эгаси битта ёғоч қошқи келтириб акамга тутди, биз қўлда оладиган бўлдик.

— Қани, етказганига шукр, неъматини маҳтал қилмай оламиз, — деб ўзи бисмиллоҳ-ла бошлаб берди.

Мен қўпдан бундай totli taom emagandim, nukul bolaligimizda — Яккабоғда турганимизда ойимлар пишириб берадиган ўзи жиндеқ, лекин ҳеч таъми оғиздан кетмайдиган қўзиқорину нон қовурдоқлар қўз олдимдан кетмасди. Бояги гапим — шундоқ одам, шундай ғарип турадими, деганларим эсимга тушиб, ич-ичимдан уялиб ўтирадим.

Овқат ейилиб, бир пиёладан иссиқ чой ичиб эдик, уй назаримда, шоҳона саройлардан аъло туйилиб кетди. Ва сутчининг қулфи-дили очилиб, ҳикоятгами, ривоятгами тушган эди:

— Аллоҳ суйган қулларини ора-чира бу дунёning неъматлари ила сийлабам туради. Лекин афзали Абу Дардонинг тутган йўли, — деб қолди.

— Абу Дардо? — деди акам ниманидир эслагандай, сутчининг юзига ялт этиб қараб.

— Ҳа, пайғамбаримиз соллаллоҳу алайҳи васаламнинг шундай саҳобалари ўтган. Қавмидан энг кейин иймонга келган одам. Лекин этидан тирноғигача иймонга тўлиғ бу одам дунё молию матоҳини қўшқуллаб итқитган экан. Тижоратим мени Аллоҳнинг зикридан қолдирипти, олди-бердилар ибодатдан чалғитяпти, деб ҳатто дўқонидан воз кечган экан. Бошқа саҳобаларга этиб олиш учун, динга кеч келиб, йўқотган савоблари ўрнини тўлдириш учун ҳам шундай қилган экан. Совуқ ва изғиринли тунларнинг бирида ана шу Абу Дардонинг уйига йўловчилар тунашга изн сўраб кирибдилар. Абу Дардо уларнинг олдига иссиқ овқат киритиби-ю, қўрпа-тўшак бермабди. Ётар чоғ қўноклар бирон чойшабми, нимадир сўраб унинг ҳужрасига боришса, Абу Дардонинг ўзи совуқдан ғужанак бўлиб ётганмиш. Кампири эса бир чеккада букчайиб

ўтирганмиш. Устиларига ёпадиган бирон нарса кўринмасмиш.

Кўноқлар таажжубда Абу Дардодан сўрашибди:

— Ёпишга кўрпа-тўшагингиз йўқми? Улар қани?

Шунда Абу Дардо: «Бизнинг бошқа жойда ҳовлимиз бор. Топган матоларимизни ўша ёқка жўнатганмиз. Бу уйда бирон нарсамиз бўлганда сиздан аямасдик. Колаверса, нариги уйимизга элтадиган йўл устида ўтиш оғир бўлган, машаққатли довон бор. Ундан ошиш учун енгиллашиб турган чоғимиз эди», деган экан.

Ҳазрати Умар ҳалифалик даврларида ўша саҳобани зўрлаб Шомга волий қилиб тайинлашибди. У ерда одамларнинг роҳат-фароғат кетидан қувиб, дунё жамлашга берилиб кетганларини кўрган Абу Дардо ҳалқни масжидга чорлаб, бундай хутба ўқиган экан: «Эй Дамашқ аҳли, Сизга не бўлдики, олимларингиз кетиб бормоқда, жохилларингиз улардан ҳеч нарса олиб қолишга шошилмаяпти? Эй Дамашқ аҳли, Сизга не бўлдики, Аллоҳ таоло ўз зиммасига олган нарсага иқбол қилиб, ўзингизнинг зиммангизга юклangan нарсани унутяпсиз, тарк этяпсиз? Сизга не бўлдики, еб битиролмайдиган нарсангизни жамлаш билан оворасиз? Яшамайдиган биноларингизга бино қўйгансиз? Етишолмайдиган орзуларингизга интилганингиз интилган?..

Эй Дамашқ аҳли, Од қавмининг аҳлию мол-дунёси ер юзига сифмас эди, ким бугун мендан улардан қолган меросни икки дирҳамга сотиб олади», деганида бутун масжид аҳли, уни тинглаётганлар хик-хик йиғлашган экан.

Ўша покиза зотлар хақида яна бир ривоят айтай. Ҳазрати Умар қўл остидаги вилоятларни текширишга чиқиб, Шомга бемаҳал — тунда етиб келибдилар-да, тўғри дўстлариникига тушибдилар. Очик турган эшиқдан тортинмай кириб борган меҳмонни Абу Дардо туриб кутиб олибди. Чироқни ҳам ёқмай сухбатлашиб ўтириб қолишибди. Бир маҳал ҳазрати Умар Абу Дардонинг ёстигини пайпаслаб кўриб, дўсти эгарга бош қўйиб ётганини сезиб қолибдилар. Шошиб тўшакка қўл чўзсалар, қўллари қуп-куруқ кум билан майда тошларга тегибди. Яна бир пайпаслаб, дўстининг эгнидаги Дамашқ аёзига дош ҳам беролмайдиган юпун кийимни пайқаб қолибдилар.

— Ҳой, Аллоҳнинг раҳматига етишгур, бу нимаси, қўлинг шунчалик қисқами, ахир имкониятингни кенгайтириб қўйгандик-ку, — дебдилар ҳалифа.

Шунда Абу Дардо:

— Эсингдами, эй Умар, Расулуллоҳ (с.а.в.) бизга нима дегандилар? — дебди оҳиста.

— Хўш, нима деб эдилар?

— «Сизнинг дунёдан оладиган насибангиз мусофирининг хуржунидаги озуқасича бўлсин», демабмидилар? Биз-чи, у кишидан кейин нима ишлар қилиб юбордик, эй Умар? — дебдилар.

«Шундок-шундок», деб турган ҳалифа йиғлаб юборган эканлар. Биз у зотларнинг олдида киммиз? Бу амалу ибодатларимиз Аллоҳ бир пуф деса, чангдек тўзгиб кетмайди, деб ким айта олади? Яна Аллоҳ ўзи билгай: раҳмат назари билан кимга қарайдию кимга назарини ҳам раво кўрмайди!..

— воий, — деди акам биз хайрлашиб эшикка чиққач, (узр, олдиндан айтиб қўяяпман!) — худди шу гап, шу ривоятларни отам ҳам айтар эдилар-а! Қай бирлари қай бирларидан эшитган эканлар-а, тавба-а...

Мен сал илгарилиб кетдим, унгача — тургунимизча акам яна бир гапни айтди. Тўғрироғи:

— Тоға, Сиздан бир нарса сўрасам майлими? — деди. Мен унга ҳайрон қолдим. У биз тошкентликларга ўхшаб амаки деб мурожаат этиш ўрнига фаргоналиклар каби тога демоқда эди. Ўз кўнглида улуғроқ кўрдими, ё яқин олдими, билолмадим. Ҳарқалай шундай мурожаат этди.

Сутчи амаки ҳам бунга ортиқча эътибор қилгани йўқ.

— Сўранг, эшон бола? Сиз сўрайсиз-у, мен йўқ дейманми? — деди юмшаб, тобора

ҳалимлашиб.

— Сиз... сиз тўрамнинг терговларида қатнашган экансиз...

Қария кулимсираб, бош тўлғади:

— Сизга чатоқ маълумот беришибди. Ҳозиқ тўрани ҳеч ким сўроқ қилганмас. У киши уй қамоғида ўтириб, ўша инқилоб қандай амалга оширилганини Московнинг илтимоси билан қофозга тушириб берганлар. Араб имлосида экан, мен ўгиранман, холос. Мендан кейин ўрисчага ағдаришган.

— Ҳа, шуни сўрамоқчийдим, бир учини эшитиб эдим, — деди акам шошиб қолиб.

У энди сўзсиз бош тўлғади ва ҳийладан сўнг деди:

— Менинг сизга маслаҳатим — бунга қизиқа кўрманг ҳам, суриштириб юрманг ҳам. Бу нарсалар эллик йилсиз очилмайди. Балки умрбод очилмас.

У келишдик-а, дегандай киприк қоқиб, қўлини фотиҳага очди:

— Илоҳо омин, эшон поччамдан яхши муждалар олиб келган сиз азизларни Аллоҳнинг ўзи ҳифзу ҳи-моясига олсин ва у кишининг руҳларини яшил қушларига жойлаб, жаннатларига чорлаган бўлсин.

Шом тушиб келар эди, сутчи биз билан хайр-хўшлишибоқ намозига шошилди, биз эса гузарда қолган машинамиздан хавотирланиб, қадамилизни тезлатдик.

Осмон ҳали ҳам синкага солингандек беғубор эди-ю, аммо тупроқ уюмлари ортию томи ўпирилган вайроналар ичи билан, етим пахса деворлар тагилаб, бир коронгулик ўрлаб келар, шу паллада анави сурилган тепалик ўрнидаги темир мезана тагидан ҳайҳотдек бир қора унинг устига тармашиб ўрламоқчига ўхшар, ўхшайверар эди. Ҳеч ердан негадир аzon товуши эшитилмасди. (Дарвоқе, уйлари ташлаб-ташлаб кетилиб, хувиллаб қолган жойда аzon товуши нима қилсин!)

Аммо акам ҳандақлардан сакраб, тупроқ уюмларини айланиб ўтиб, шошиб бораркан, «Вой, Мақсуд, уни қара-я», дея таъсирланишини қўймасди.

Ахийри ўгирилиб:

— Биласанми, отам, уни нима деб дуо қилардилар? — деди.

— Нимага ўзига айта қолмадиз? — дедим мен ҳайрон қолиб.

— Айттолмадим, юраги кўтармайдими, деб қўрқ-дим, — деди акам.

— Нега?

— Чунки ҳар кимга ҳам ундей дуо насиб қилавермайди.

— Қандай? — дедим сабрим чидамай.

— Бир сахар жойнамоз устида ўтирганларида бехос эшитганман, — деди у қимир этмай аллақаёқларга тикилганча.

— Шундайми? — дея олдим мен, орага бошқа гап сиғмас эди.

— «Эй, Аллоҳ, сендан ёлғиз илтижом, агар жаннати наъимларингта мушарраф этгудек бўлсанг, усиз мени киритма. Жилла қурса, шафоат ҳукуқини беру мен уни бу дунёда қилган яхшиликлари эвазига жаннатга чорлай олай»... дердилар. У шу одам эди.

## 7. ҲОЗИҚ БУВАГА АЁН БЕРГАН НАРСА ёхуд ҳикоячига коронғу, муаллифга аён тарихлардан

Эшикбон ўша хушрўй жувоннинг ўзгинаси эди. У тўнтариғлиқ пиёланинг орқасига ўсма сиқиб ўтирган жойида буларни кўриб, типирчилаб қолди. Қошини апил-тапил чайиб келиб, пешвоз чиқди:

— Ассалому алайкум, Ҳозиқ бува! Бизнинг томонларгаям келаркансиз-ку, кўрадиган кунлар бор экан-ку сизни... — дея тошкентча манзиратлар ила сўра-ша кетди, — Холамойим бардам-бақувватгинамилар? Ўзинглар ўрганишиб қолдингларми бизни шахри азимларга?

— Раҳмат, пошша қизим, раҳмат. Ие, уни қаранг-у, Аллоҳнинг марҳаматини кўринг. Ўзингиз-ку, мушқулимизни осон этибди-ку.

У шу бир оғиз сўзданоқ ташриф боисини англаб, юраккинаси ширин қалқиб-ҳаприқди. Устига устак, табибининг қаватида ёпишибгина турган жавдироқ болакайни кўриб (у қош-кўзлари попукдек, қиз бола бўлиб туғилишига бир баҳя қолган шириントй эди), ичи шиф этдию дукирлашга тушиб берди! Бу митти чехра чиндан ҳам ўша мушфиқага ўхшаб кетар, куйиб кўйгандек эди.

— Вой, ўзим ўргила қолай, аяжонисини кўргани келган тойчоқлар ҳам тортиниб-бегонасирайдими? Вой, ўзим бўйларингта қоқиндиқ, зап келибсиз-да.

У сиқилган ўсма хидларини гуркиратиб, болакайнинг пешонасидан ўпди ва қуракларини силаб, бу-ларга йўл бераркан, қариянинг кўнглини олишга уринди:

— Келинг, тўра бува, жиндак нафас ростланг. Иссиққина чой қилай.

— Раҳмат, пошша қизим, боғ тузукдир, баҳавороқ,— деди табиб азим тераклар тагига интиқаётганини сездириб.

— Майлин, майлин, у ернинг ғир-ғир шабадасига нима етсин, — деб йўл бошларкан, ичидан «Софинибдилар-да, теракзор тагларида айланишларини», деган ўй кечди.

Табиб энтиқди.

— Бу ернинг нақ жаннатдан чиқадурган ўйноқи бир ел-сабоси бор, боғбони хўб топган жойни. Ўтган бўлса, Аллоҳ раҳматига олган бўлсин, тирик бўлса, умрини зиёда этсин.

— Илоҳим, илоҳим, — дея дуога қўшилишди жувон ҳам.

Йўлақдан ўтиб, қатор қулоч етмас азим тераклар таги билан боришаркан (унинг хол-хол кумушранг танасидан тортиб, кўклаб бораётган шоҳларига қадар юракка яқин эди, тавба), ҳаво ҳам юмшаб бораётганга, аллатовур бўйларни таратиб, бир ажиб эпкинлар юзга урилаётганга ўхшар эди. Шу эпкинлар ичida шифохона ҳиди димоққа урилиб қўярдики, унинг баҳор бўйларидан бегоналиги яққол билиниб қолар эди. Улар йўлка ёқасига — тагидан қизғиши сурҳ навдалар бериб, бўй қўрсата бошлаган гулзор четидаги ўриндиққа чўкишаркан, табиб узрли қаради:

— Нечук, ҳеч ким кўринмайди, бемаврид келиб қолдикми?

— Бемаврид эмас, Ҳозиқ бува. Сиз келасизу ким нима дейди?

— Ҳарқалай гап тегмагани маъқул-да.

— Худо хоҳласа, тегмайди. Муолажа вақти ҳам тугаб қолди, зўр келса, ўзим чақириб чиқа қоламан,— деб у отлана бошлаб эди, қария тўхтатди:

— Ўзи қалай? Қадам босяптими?

— Босяпти-босяпти, берган дорунгиз патосларини тақа-тақ тўхтатди. Оллоҳга шукр, Сиздан шундай миннатдорки...

— Ҳаммаси Аллоҳдан. Қолаверса, кўргиликлари ариб турганки, дору эм бўпти. Ўзига шукр, уялтирганига шукр. Яхшиям жужуғи — той болани опкелибман. Ичикканлар бир яйрашсин.

— Шуни айтинг, — жувон болани қучиб, бошларини силади. — Вой, ўзим ўргилай куралайгина кўзидан. Аясининг боши осмонга етадиган бўпти-да. Қолган дардлариям ариб.

— Яна муолажа белгилашдими? — деди Ҳозиқ бува хавотир ичиди. Унинг назарида ўша дамлаб ичиладиган дорунинг ўзи кифоя эди: бу дўхтири тушмагурлар яна нималарни тиқишишиб ётишибди экан?

— Яранинг ўрнига-да, битиришга-да: нурмикан, моймикан...

Қариянинг кўнгли жойига тушиб, хавотири бўшашди:

— Ундей бўлса, безарар-безарар. Биз шу ерда ша-бадалаб ўтира турайлик, сиз хабар берадиган бўлсан-гиз.

Изн теккан аёл қарғашойи рўмолини ўрай-ўрай ичкарига йўналаркан, икки ўрим сочи нимчасининг белидан пастини ўпганча тўлғониб борар, Ҳозиқ бува илгари кўрганидан ҳийла

калтайган кўринар эди. Тавба, хаш-паш дегунча бу ерда турганига ҳам ҳийлагина вақт кечиптими? У мана шу йўлкада эрта сахару шомдан кейин сайди этишни ёқтирас, ҳеч канда қилмасди. Ҳозир ҳам аста туриб, той болани етаклаганча қатор азим тераклар таги билан кетган соя йўлдан секин юриб бораркан, ўша ёқдан ўйноқлаб келган эпкин-шаббода юз-кўзларини ўпид ўтиб, таниш насимдан кўкси кўтарилиб тушди. Ўзи боғ чеккасидаги шу йўлкада Худо берган бир бошқача файз бор: Ўша насим, ўша шаббода ўйноқлаб ўтди дегунча ичдаги губорларни суғуриб кета қолади. Тераклар ҳам бу ҳаво ёқиб тушиб шундай бўй талашганларки, енгил шовуллаб кишини шундай аллалайдиларки, асти қўяверасиз. Бу орада гулзор ёқалаб, ҳошияси қора-қора, қаноти момиқдан ҳам оқ капалакни қувиб юрган болакай ҳам ниҳоят қайтиб келиб, саволларини қалаштира кетган эди:

— Бу ер қандай боғ, опоқбува? Дўхтурхонага борамиз, деб эдингиз-ку.  
— Олмазор боғ, болам, олмазор боғ, — деб тушунтирган бўлди бува, сўнг йўл ёқасидаги суюнчиғли ўтиргичга чўкиб, узана қолди.  
— Чиройлув экан,— деди бола атрофга сукланиб.— Вой, анавуни қаранг, филкулоқму? — у гулзор ўр-тасида бултурги кўмилган бандидан фил қулоғидек барглар ёза бошлаган ўсимликка (хойнаҳой бу атрофникимас, қайси бир иқлимдан кўчириб келтирилган — ўшанга) тикилиб қолган эди.

— Топдинг, болам, биз томонларнинг гулимас бу.  
— Сиз кўрганмусиз, биласизму? — Бола унинг тиззаларига суйкалиб эркаланди, — айтинг.  
— Неча йилда бир очилади. Мен ҳам кўрмаганман. Совуққа йўқ нарса, — деди у.  
— Бу ерда-чу, қандай ўсяпту?  
— Аввал ичкарида ўстиришган, кейин ўтказишган. Тушундинг?  
Бола «тушундим» дедио хаёли бояги ўсма қўйган аёлга кетди:  
— Анаву опоқу нима дейду? Биз кимну кўргану келганмуз?

— Аянгни. Сени бир хурсанд этай деб айтмаб эдим,— Ҳозиқ бува уни эркалаб, бошини силади.— Қарасам, соғиниб кетибсан. Нима, илгари опкелишмаганми?  
Бола азбаройи таъсирланиб, кўзлари бир турли ғилтиллади. Ўзи қулт ютиниб, ер сузди:  
— И-им, бу ерга ҳич келмаганмуз. Бала-анд уйга чиққанмуз...

— Худо хоҳласа, бу ердан ўз оёғи ила юриб чиққай. Мана, кўрасан.  
— Ҳозирму? Худду ҳозир-а? — Болакай ичи тошиб, сакрамоққа, митти кафтчалари билан унинг тиззаларига урмоққа бошлади.

— Чиқса керак, айтгани кетишиди-ку, — кулимсиради у.  
Бола яна коптоқдай сакраб, ўйноқлади:  
— Ур-ре, чиқадиканлар, чиқадиканлар. Аям тузалубдилар. — Қайтиб келиб яна ёпишиди, — айтинг, опкетамизму, жавоб беришадиму?  
— Худо хоҳласа, опкетгани ҳам келамиз.

— Нега?... Ҳозир жавоб беришмайдиму?.. — деди бола бирдан сўнишиб. У ҳафа бўлиб қолган эди. Қария бағрига тортиб эркалади:

— Фақат сен шошма-да. Шунча кутган, яна жиндек сабр қилсанг бўлади-ку.  
— Майлу,— деди болакай кутилмагандан кўниб.  
— Ана бу — бошқа гап. Ақлинг гуркираб кетса — шу-да, — деб қария унинг елкасига қоқиб кўйди. — Борақол, унгача филкулоқни томоша қилиб тур.  
— Бўпту. — Болакай ўша ёқقا қараб чопди.

У энди ўзига таниш ошиён томон — жигарранг эшик-деразасидан тортиб, пештоқларига қадар қадрдан бўлиб қолган ўша мўъжаз ҳам қўркам оқ бинога қарадио ҳайратда қолди.

Фасубҳоналлоҳ! Бу қана-қаси?! Оқ бинонинг пештоқларидан тортиб, бутун то-ми шафақранг аланга ичидаган, қуёш нурими деса, аланга унинг бўғотию пештоқларидан тошиб чиқар ва қизғиши черепицали бутун томини ўраб борар эди. Водариф, бу нимаси? Куппа-кундузи ўт

кетяптими?!

Қария ўрнидан турмокқа уриниб, асосини пайпаслаб-излаб қолди. Лекин шошганда саломга алик топилғанми, асо қўлига илинмасди. У ҳушёр тортди: «Унда нега ҳамма жим? Бақир-чақир йўқ?» Демак, бу бир ғайб, сирли кўриниш, холос. Тавба, нега шундай бўлмоқда? Илгари ҳам бир келганида шунга ўхшаш ҳол содир бўлмаб эдими?! У нимадан белги беряпти? Қачондир ўт ичидა қолувиданми? Кимга ҳам айта оласан бу ҳолни?..

Хасса шундай ёнгинасида экан. Уни қўлга олди-ю, лекин туриб улгурмади. Қайтиб оқ бинога назар ташлаганды алана сусайиб, ниҳояти азим тераклар ортидан қиялаб, энламасига тушаётган офтоб селига айланиб улгурган эди. Во ажаб, неchanчирип марта шундай бўлмоқда. Аввал том баравар кўтарилиб (ҳатто қулоқларига оловнинг чарсиллаб ёниши эшитилиблар кетди!), гуриллаб туради-ю, сўнг томга ётган нур бўлиб чиқади! Бу нимади? Дарвоқе, бу нарса биринчи марта қачон кўриниб эди? Келганининг учинчи куними? Ўшандан бери неча йил кечди, мўъжаз оқ бино — ўша ўзи икки қишигина истиқомат қилган жой, каранг-ки, ҳали ҳам қилт этмай турибди. Назарида, эрта-бириси куни гув этиб ёниб, кул бўлиб тушадигандек! Ҳозир манави шифохонага қўшиб берилғанмиш. Айтувли фахрийлар тушиб қолса, шу ерга жойлаштиришар экан. Атрофидаги қуюқ шапалоқ баргли тутлар тагига ёғоч каравотлар қўйиб, гиламлар тўшаб, кўрпачаю пар ёстиқлар ташлаб қўйилганидан билаверинг. Бу ҳукумат, бу катта даргоҳлар рисолага кўра, ҳалқ ғамидан бошқа нарсани билмаса-да, ўзини ҳам унутмаган кўринади. Аммо... шундай жойга, бир мусоғир муслима, манави болакайнинг муштипар онагинаси қандай тушиб қолди экан? Ким жойлаштирибди?..

Ялпиз ҳидиними, бодроқ исиними гуркиратиб шабада ўйноқлаб ўтди. Қария энтикиб кетди. Ҳалиги муаттар исни соғиниб, яна бир ҳидлагиси келиб, чуқур тин олди. Йўқ, у шабада қурғур гулини аллақачон тўкиб, ўрнига қўша-қўша кўк зираклар тақиб, барг ёзиб бошлаган пастдаги олчазор кўчалар томон ўйноқлаб ўтиб кетиб улгурган, бу ёқдан эса, хушрўй жувон пилдираб-шошиб келмоқда эди.

— Топдим, ота, фақат... — ҳавоми, нима етмай ютоқди, — фақат бироз кутасиз экан. Муолажа тугаши ила тушиб келади. Табиб тўрам ўzlари кептила, кўргани кептила, дедим. Эшитиб бир ерга етди...

— Майли, майли. Биз мана шу баҳавороқ жойда ўтира турамиз. Бу ҳам бўлса, Худоимнинг марҳамати. Баҳри-дилимизни очмоқчи экан, шу ерларга етказибди, кута турамиз...

— Бир пиёлагина чой олиб чиқайин? Хитойни хушбўй чойидан бор, кийик ўти аралашган? — унинг кўнглини овлашга уриниб, парвона эди аёл. Унинг жоннисорлиги, куйманчиклиги ўзига бир ярашарди. (Бироннинг устида ўлиб-кутуладиган аёллар ҳозирги кунда анқонинг уруғи, мингтадан битта топилар. Лекин шуниям борлиги — Аллоҳнинг марҳамати. Бу миллатга берган катта неъмати) Қария ийиб кетиб, бош силкиди:

— Майли, бир пиёлагина бўлса... малол келмаса агар...

— Малоли нимаси, мен ҳозир... — деб тинмагур аёл кираверишдаги мўъжаз уйчаси томон пилдиради. Шунда боягидек муаттар ялпиз ҳиди гуркираб кетдию у аёлнинг сиқимидаги рўмолчаданми, нимадан келаётганини илғаб улгурди. Кимдир илиниб инъом этгану халатининг чўнтағига сола қолмай, рўмолчасида анқитиб борар эди.

Бу орада Ёдгортой олдидан икки бора чопиб ўтди, шиша кўзли тўрқанот ниначини қувлаб, яна гулзор томон чопди. Қариянинг хаёли эса бу гўшага келиб тушган ўша биринчи кечага қочган эди...

Уни ҳукумат боғидаги дам олаётган жойига чақириб боришиди. Инглиз элчисининг қабулига кийиб борган қўмондонлик формасини ҳали ечиб улгурмаган эди. Шунчалик қисталангмиш.

— Сизни шахсан Олампаноҳ сўрайтилар! Шарқ табобатини билган табиб сифатида! Ўйлаймизки, у зотнинг илтимосларини рад этмассиз?..

— Унда мен... табиблардек кийиниб олай, — деди. Қаёқда! Ўзини Муссолинини тоғдаги қароргоҳидан олиб қочган немис ясовулларидан кам тутмаёттан бу қарчиғайдек эпчил йигитлар хеч гапга кўнмасдилар. Жавоб қисқа бўлди:

— Чегарада кутиб туришибди! Керак бўлса, ортингиздан етказиб боришади!

— Табиб ҳалталар-чи? Уни олмоқ лозимдур? — деди атай.

— Бизга униси буюрилмаган, табиби гард юқтирмай етказиб келгайсизлар, дейилган, вассалом.

— Тушунарли. — Не мушкул дамларда қилт этмаган юраги бир сесканди. Ва Аллоҳга таваккал қилмоқдан ўзга иложи қолмаганини англаб, «Ўзимни Ўзингга топшириб, Ўзингни вакил қилдим — Ҳасбияллоҳу ва неъмал вакил...», деб шивирлади.

— Нима дедингиз?.. — қулогига ярим-ёрти кир-ган қаломуллоҳ қалимасидан ғалати ҳолга тушган ясовулбоши (у довқур кўринса ҳам ёши бир қорага ет-ган одам эди) тисарилиб кетди. — Дуоибад эта кўр-манг.

У эса вужудидан бояги титроқ чекилиб, ўрнига бир ёқимли хотиржамлик оқиб кира бошлаган эди, жилмайди:

— Ўлибман-да, мўъмин мўъминга ёмонлик соғингайми? Аллоҳ асрасин! Демоқчиманки, ҳамонки олиб кетишингиз лозим экан...

— Хўш? — деди у феъли айниб. — Унда нега имилляяпмиз?

Тавба, на яхши гапга кўнади, на ёмонига. Нак азоб фаришталарининг ўзи... Ўзлари Аллоҳнинг чинакам азоб фаришталарига йўлиққанларида нима қилишарди экан? Пушмонлари иш бермаслигини билсалар эди...

— Менга ҳам қулоқ солинглар, жилла курса? — деди қатъийроқ қилиб.

— Айтинг тез, вақтимиз зик, — деди у.

— Ҳамонки иш шу даражага етибди, мен қарияни маъзур тутинглару таҳорат янгилаб олмакка рухсат этинглар.

Ясовул йигитлар (ким ханг манг, ким хуши қочиб) бир-бирларига қарашди. Қандай даҳшатли ишга бош сукқанларини биринчи марта англаб қолганлар ҳам бордай эди ораларида. Қай бирларининг иchlаридан шайтанат чекилиб, иймон юз кўрсатгудек: рухсат бер, деворгудек ҳам эдилар-у, аммо сўнгги дамда ясовулбошининг юпқа лабида аллатовур нур кўринди:

— Бизга Сизни дор тагига эмас, бошқа даргоҳга элтмоқ буюрилган. Қўрқманг, Ҳожи ака.

Тоға ёхуд почча деса, Мадаминбек юртидан экан-да, деб ўйласа мумкин эди. Бу «ака»ляяпти, қаердан экан? Лекин тагига от, қўлига қилич берсанг, кимга йигит бўлганини узоқ вақтгача англамайдиганлар ҳилиданга ўхшамасди, тавба. Унда на миллат туйғуси, на миллатдошлик — диндошлик туйғуси йўқ дейиш ҳам қийин. Фақат ҳаммасини ясовулбошиликка алмашворибдими?!

Шунга қарамай, буйруқлари, ўзини тутиши бир пошоча эди!

— Барibir, биз бирон ерга таҳоратсиз чиқмаганмиз. Бехосият бу, — деди чинидан қайтмай.

Қаттиқ турмаса, бу бешармларда субут борми! Бирон жар ё ўрда орқадан тиф уриб, гум қилиб кетмасликларига ким кафолат беради! Калима келтириб улгурасан ё улгурмайсан. Таҳоратсиз эканинггаю банда сўнгги тилагини тилашга ҳақли эканига қарайдими булар. Намоз вақти ёхуд ювиқли-ювуқсиз, бебисмиллоҳ қўшилиб қолгандан бино бўлган бу шайтонваччалар.

Йигитлардек чапдаст бошчиси қатъий бош тўлғади:

— Узр. Ҳозир мавридимас. Ҳар қанча таҳорат бўлса, ўша ёқда улгурасиз. Чегарадан ўтиб олайлук, кейин, — деди у қўлини ҳавода тескари сермаб ва ясовулларига буюрди. — Жилдик.

Уни ягона опел машинасига ўтқазиб, ўзлари ҳам суқилиб кирдилар-да, эшикларни қарс-қурс ёпганча рулдаги йигитнинг елкасига қоқдилар:

— Қани, қанотинг бўлса, чиқариб уч!

Рулда (қай кўз билан кўрсинки!) ўз шофёридан битта туки кам бўлмаган дунган йигити

ўтирад эди. Билмаган одам ҳукумат машинаси йўлга чиқиб, Тўрам давлат қаёққа отланибдилар, дерди. Ана устамонлик! Бу ёқда улар боғ қоровуллару соқчиларни гум қилиб, ё алмаштириб кўйиб, дарвозадан чиқиб олганча «келишилган жой»га суриб борардилар. Бу ерни тинчитган, чегарадан ўтолмайдими?! Хамирдан қил суғургандек ўтарлар... Ҳаммаси адо бўпти! Нихоясига етипти! Озодлиги ҳам, мустакиллиги ҳам! Наҳот барча-барчаси тугаб, етим қолмоқда бу азиз юрту унга ишонган, жону жаҳонини тиквортган халқ?! Имм, қаерда адашди? Нимани хисобга олмади?! Ё ўша бирвақт, довонда йўлиқкан маҳлук... бежиз эмасми? Барчаси бесамар кетувидан бир имдодми? Ҳикмати не эди?.. Ёхуд фармонда шошдими? Бу уч вилоят — бутун Танг-ритоғ дегани эмас! Ҳали етти вилоят озодлик деб инграб ётипти, мужоҳидлар, бутун кўшин шай турсин! Улар озод бўлса, биз ҳам озодмиз. Уларга ҳуррият олиб кирсаккина, барчамиз ҳурмиз, бутун Тангритоғ ҳурдир! деб... шошдими? Балким...

Чегарада — ҳаммаёқ ўт-ўлану уфқка қадар лолақизғалдоғларга кўмилган даштда ғир-ғир шабадалар ҳукмрон, қир қушлари ўзлари билан ўзлари андармон бир тарзда қайбири қўкатлар ичра, қайбири мусаффо осмон бағрида чулдираб ётишар, бу ёқда текис майдон ўртасида ниначидек учиб келиб, қўклам гилами устида қўнибми, тўхтабми қолган кичкина учоқ қаноти соя-сида хумдек боши устарада қиришланган норғул бир одам бетоқат юринар эди.

Нихоят, у қизғалдоқларни тўзғитиб, орқасидан эса қўш кўкиш из қолдириб ўзи томон учиб келаётган пилдироқ қора қўнғизмисол опелга қўзи тушиб, шошиб қолди ва қўлидаги кепкасини кийишни-да, унутиб, улар томон пешвоз юрди.

У оғзи қулоғида, бу буюк мамлакатнинг катта раҳбарларига расм бўлган кителининг тутмаларини ечиб-қадаркан, рапидадай қўлини кўтариб, тўхтанг, ишорасини беришдан ўзини тия олмади. Бу дунгандарга ўхшаб кенг пешона, кепчик юзли, хумбош одам уни ҳузурида кўраётганданми (балки топшириқ қотириб адо этилганидандир!) ўзида йўқ хурсанд эди. Ва бундан жилла қурса, андеша қилишни унуган эди.

У бунинг шошқалоқлигидан уялди. Ким тагига от бериб, устига тўн ёпса, ҳамият кўрсатиб, оқсоқол кўтарса, ҳалқи қолиб ўшанга хизмат этиб кетаверишдан тоймайдиган ўғлонлари бор бу миллат учун ачиниб, ичдан зил кетди: биз ҳам қачон одам бўларканбиз? Бир-биримизнинг пайимизни қирқмоқдан уяларканбиз, тўхтарканбиз? Бир миллат болалари каби яшарканбиз?... деб ингранди.

Лекин унинг ич-ичидан отилиб чиқмоққа тайёр ингроқларини ким ҳам эшитарди, ким ҳам аҳамият берарди?!

Бунга сари у ўзини тутмоққа, қўз соққалари остидан-да, тирқираб чиқмоққа тайёр кўзёшларини босмоққа, бу одамлар олдида паст кетмасликка уринар эди. Босди ҳам, ҳар нарсага қодир Аллоҳ сўраганини берди ҳам. Унга чиндан осон экан: арзимас дақиқа ичидаги хотиржамлик ато этди-кўйди. Ўзига ҳамду санолар бўлсин! Эс-хушини йўқотиб, бир замбар лойдек ўтқазиб кўймади. Хотиржамлик билан баро-бар ғуруринию ҳайбатини, шунча ишларга бош бўла олган киши салобатинию ўзлигини қайтариб берган эди.

У ҳам бир ҳукумат бошлиғи сифатида тушиб борди.

Мезбон уни аввало қўмондон кийимида кўриб, капалаги учди. Яқинига боргунга қадар ҳам хуши ўзига келмай ҳайкалдай қотган эди, сўнгги дақиқада, қўз қўзга тушиб, тилига жон битди. Ва салом бериб, кўришгани бормаги лозимлигини англаб, пешвоз юрди:

— Ассалому алайкум, тоға. — Айиқдек бесўнақай одам — шунчалар самимий бўлиб чиқуви — ғалати эди: Ё баҳода янглишдими? — Яхши етиб келдингизми? Узр, безовта этдук.

Унинг қўли қаттиқ эди: ёки ортиқча самимият кўрсатаман деб қаттиқроқ қисиб юбордими? Ҳарқалай шунга яқинроқ эди. Унинг юмшоқ кафтини сиқиб турувни ўзига эп билмай нихоят икки кафти орасига олиб, тавоф этгандайин ярим хижолат ичидаги силай бошлади.

— Маъзур тутасиз бизнинг йигитларни, — деди яна бир бор узр айтиб, — Топшириқ қисталангроқ эди, бошқача йўл кўринмай... кириб бораверишга журъат этишди...

Чегара дегани қўшнининг девори эмаски, ҳар бир улоққан кўппак хоҳлаган наҳрадан ошиб ўтаверса, истаган жойини ҳаром оёқлари билан пайҳон этиб кетаверса! Яна қаергача кириб боришибди! Элчи йўллаш деган гаплар қани? Икки давлат ўртасидаги борди-келди расм-руслар-чи, улар қаёқда қолди?

Мезбон ўнғайсизланиб, унинг қўлини қўйиб юборишни ҳам, юбормасликни ҳам билмас, қўллари енгил титрар эди. Бу унинг қўй қўзларига қараб қўйиб:

— Нима гап? — деди, ўзи эса дил ғашлигини енгиллатса зора, деб қир томондан эсаётган шабадага юз тутди. Қани, бояги хотиржамлик? Ўзини Аллоҳга топшириб қўйиб келаётгандаги кўнгил тинчлиги? Бу ғашлик қаёқдан оралай қолди-ю, уни укпарданам енгил манави насимлар ҳам кўтариб кетолмаяпти? Наҳот ҳаммаси тугаб, нусрат юз бурди? Мустақиллик тонги туғиб улгурмай унинг шоми келиб етди? Мезбон жавоб ўрнига ҳам унинг қўлидан тутиб, куракларини силарди...

— Тоға, ўзингиз тушунасиз-ку. Ҳамма тушунмаса ҳам Сиз тушунасиз-ку. Биз Унинг олдида киммиз?! Ким эканмиз! Хоҳласа чивиндай эзғилаб ташлайди, хоҳласа кафтида кўтаради. Иложимиз қанча?..

Ана, сидқидилига қўчди! Тан олди... бор-йўғи кичкина одамлигини! Тагидаги от ҳам, эгнидаги тўн ҳам бирорники эканини! Қуллиги эвазига берилганини! Бояқиши миллат! Кимларга кунинг қолган?!

Уфқдами, қайдадир, сўнгиз кўм-кўк гулдор гиламнинг охири — кирнинг мусаффо осмон билан туташган жойидадир балки, кумушдай ялтираб каттакон сув кўрингандай бўлди. Наҳот сув мусаффо осмонга туташиб кета олса? Нима у, денгизми ё уфқдан ҳам берида ётган бир нарса? Балки саробдир. Куппа-кундузи сароб кўринса-я? У намланган киприкларини қоқиб ҳайрон қолди: ҳалиги денгиз бир томчи кўзёшга айланиб, ўз билагига томди. Ё, Аллоҳ, бу ниманинг белгиси, нимадан имдод? Наҳот ҳаммаси тугади? Аччиғи келди ва тўғри келган томонга юра кетди, шу баробар зарда ила:

— Сен кичкина одамман десанг, мен кимманки, десам, қачон одам бўламиз ўзи? — деди қалби сидирилиб-оқиб. — Борми ўзи бу юртда эл учун бошини тика оладиган бир инсон?!

Мезбон унга етиб олишга тинчлантиришга уриниб, орқасидан талпинди:

— Тоға! Тушунинг, ахир. Ҳар нарсага етган ақлингиз наҳот шунга келганда оқсаса? Тушуниб турибсиз-ку! Нега тушунмаганга оласиз?..

Аммо у қулоғи гоҳ чиппа битиб, гоҳ шанғиллаб очилиб кетса-да, унинг илтижоларию ров-рўкачларини тинглашни ҳам истамас эди.

— Борми тилка-пора қилсалар-да, сохта пайғамбарларга иймон келтирмайдиган мардлар?! Борми Хузофадек динини сотмайдиганлар?! Баданимдаги туким қадар жоним бўлса, шу динимга садқа ҳаммаси, дея оладиганлар! Борми?! — дерди бўғилиб.

У эса етиб олиб куракларини силар, зўр бериб бағрига босиб, «жон тоға»лар эди.

— Жон тоға, бир гал менинг ҳам сўзимга киринг. Шайтонга ҳай беринг. Унинг раъийга тўғаноқ бўла кўрманг. Хўп денг, дея қолинг.

У жим қолди.

Осмони фалакда тўргай бўзлаб-бўзлаб йиғлар эди, ким менинг маконимга бесўроқ кирди, полапонларимни оёқости этти, деб. Ҳов, қирда бир бижилдоқ қушча ғумай шоҳchasига қўнволиб шу чулдирап эдики, у роз айтяптими, бўзляптими, билиб бўлмасди.

— Хўш, нима дейди, ўшал Олампаноҳинг... кремлида ўтироволиб?! Ҳозир тўғри ўшоқقا олиб бормоқчимисанлар? — деди тақдирга тан бергиси келмай.

— Йўқ, — мезбон кучоғидан қўйган бўлса-да, елкаларини силашдан тўхтамасди.— Ҳозир бизнинг қароргоҳга борамиз. Алоҳида жой ҳозирлатиб қўйганман. Ўшатта бир-икки кун тура турасиз. Дам оласиз. Сўнг маълум бўлади — қабул вақтлари.

— Бу сизларнинг қарорингизми ё кремлига қамалволиб, бутун мамлакат уйқуга кетганда иш

кўрадиган ўшал зотнинг амри?

Мезбон бўшашиб, унинг кўзларига ўтинч-ла тикилди.

— Биласиз-ку, тоға, биз киммиз — ниҳояти кичкина одамлар. Ҳаммаси ўша Олампаноҳнинг раъий. Бизда ихтиёр қанча?!

Бир чеккаси ачинди, бир чеккаси — тўғрисига кўчганидан суюнди: биларкан-ку, ҳечкиммаслигини! Ўшал зулм машинасининг ниҳояти бир мурвати холос эканини!.. Шунга-да, шукр. Аммо гуноҳи кабиранинг энг бадбахти шу эмасми? Билиб туриб зулм итларини мамлакатга қўйиб юбориш, ўз қавмини талатиш эмасми? Жавоби бор-ку, ахир бу ишларнинг ҳам!..

— Тахт бор-у, тож йўқ. Ном бор-у, нишон йўқ. Мамлакат бор-у, ихтиёр йўқ! Шу ҳолингизга «Шарқдан чиққан маршал»мисиз?

— Тоға, менинг ўрнимда бошқаси ҳам бу ўйиндан чиқолмасди. Ўзингиздан қолар гап йўқ-ку, тоға. Биз ҳаммамиз унинг қурчоқларимиз-ку, ахир.

У бўшаши.

Жилла қурса, тан оляпти-ку. Аммо Маҳшаргоҳда бу билан қутула олгайми?

Секин сўради:

— Биз мусулмонмиз-а?

— Алҳамдуиллоҳ.

— Аллоҳ ҳақ-а?

— Ҳақ, ҳақ.

— Китоблари бор-а?

— Бор.

— Пайғамбарларига ҳам ишонамиз-а?

— Ишонамиз, тоға. Ҳақ ҳаммаси.

— Қиёмат-чи, қайта тирилиш-чи? Ҳақмасми?

— Ҳақ, тоға...

— Ҳақ бўлса, бу ишингиз учун қиёматда не деб жавоб бергайсизлар?

У ўзини тортиб, дабдурустдан тисарилиб кетди! Шу баробар ўша томондан димоғига аллақандай ачимсиқ ҳид урилди. (Нима бўлса, экан бу?).

— Қайси ишимизни айтмоқдасиз?

— Мана шу... — у ўзларининг мана шу ёлғиз туришларига, сал нарида эса бир оғиз сўзига маҳтал ясовулларига ишора этди, — мана шу қилмишингиз — куппа-кундузи бир мамлакатнинг каттасини ими-жимида ўғирлаб кетишингизни айтаман.

У эланиб бир қадам босди:

— Тоға, Сиз тушунинг...

— Бутун бир ҳалқ ана энди эркка чиқдик, мустақил бўлдик, деганда, ўз ихтиёrimизча, иймон-ишончимиз бўйича яшаймиз, деганда, уни ким қилиб кетмоқдасизлар? Қиёматда Аллоҳ олдида нима деб жавоб бергайсизлар? Бу ҳалқ талаб қилолмагандан, бўзлаб қолавергандан, хар нарсадан огоҳ Аллоҳ бор-ку? Унга нима дегайсизлар?

У ер чизиб, тош қотди. Сўнг бир титраб-сесканиб тушдию кепчик юзи қув оқарди. Кўзига зўрға қарай олиб, шивирлади:

— Мен бу ёқларини ўйлаб кўрмаган эканман. Ўлай агар, ўйлаган бўлсан. Фақат Сиз мени тушунсангиз бас, кечирсангиз бас. Ўшанда Оллоҳ ҳам кечиргай, гуноҳларимдан ўтгай, тоға. — У боягидек эланиб, ёпишиб келди. — Тоға, бўлар иш бўлди. Эшитинг мени.

Бояги ёлғиз ачимсиқ, қўланса ҳид унинг оғзидан келаётган эди. Кўнгли кетиб, ўзини четга тортид:

— Айт, не дейсан?

— Бўлар иш бўлди, бу ёғига менга ишонинг. Ялиниб-ёлвориб бўлса-да, мен сизни у

Жодидан тортиб олгайман. Асраб қолгайман. Ғишт қолипдан күчган. Сизни асраш мумкиндир-у, мамлакатингизни асраб бўлмайди. Мустақиллигингиз аллақачон бирорларга инъом этиб юборилган! Эшитяпсизми, инъом этиб юборилган. Тангритоғдай мамлакатни улар ҳеч қачон бир ялов остига бирлаштириб қўймагайлар. Ён босмагайлар, овора бўласиз! Сизнинг тутган йўлингиз — шариат бўйича иш кўришдан тортиб, қолган вилоятларни ҳам озод этмакка қилган чақириғу аҳдингиз — ҳамма-ҳаммаси у зотга маълум. Аллақачон етказилган. Мен келмасам, бошқаси юбориларди. Бошқа бир жаллоднинг қўли билан йўқ этардилар. Яхшиси, тақдирга кўнайлик. Сизни менинг қўлим билан йўлдан кўтариб ташласинлар-у, аммо бу ёғини... бу азиз бошингизни асрашни менга қўйиб беринг. Буни бир сизу бир мен ва ёлғиз Оллоҳ билсин. Ўзга йўл йўқ, тоға. Балки шу туришимиз, шу келишув Оллоҳнинг хоҳлашидир. Бизни ўз паноҳида асрashiдир..

Ҳеч зоғга, ҳатто энг ишонган елкадошлари тугул, аёлига-да, оғиз очмаган, исини-да чиқармаган покиза ниятлари, дилга туккан, ўйлаб қўйган ишлари нима бўлди? Ўндан бирига-да жазм этмаганди-ку, ҳали?

У оёғининг остига, қўкат бағрига қараб қолди. Воҳ, не ажабки, у — ерга ўйлаб, оҳиста қадам қўйгувчи одам, бирор жонзотга жабр қилиб қўймадимми, деб титраб тургувчи инсон... ер бағирлаб ўсиб-да, эмин-эркин туп ёзиб юборган, туп ёзиш нима, бир ажойиб гуллаб юборган лайлакоёқни босиб турар, унинг лайлакоёғи мисол қизғишиш-пушти гуллари этиги остида эзғиланиб ётар эдилар.

Жони ачиб, тисарилиб кетди! Лекин у қолиб, бошқасини босди, бошқасини-да аяб, яна янгисини эзди. Қаёққа қадам қўйса, баҳори келиб яшнаган бир гулни, очилиб-сочилиган бир қўкатни босар, пайҳон этарди. Ажинагуллару лолақизғалдоқлар топталар эди.

Чумолига-да озор бергиси йўқ одамки, шундай ноилож қолса!... Ёким очилмоқ бор экан, пайҳон бўлмоқ ҳам борми? Худди унинг ниятлари каби, мақсади каби. Энди гул кўрсатганда... яксон этсалар?

Унинг алам-аччиқ ичида, лабини тишлаб, тишламаса — инграб юборари ҳеч гап эмасди — жим қолувини мезбон қандай тушунди (балки ризолик аломати деб билгандир) ва анов ясовулларига қандай ишора бериб улгурди, қизғалдоқзор ўртасида турган учоққа бирдан жон битиб, парраги айлана кетди. Овози ўтлоғу қирни тутиб, унинг қулоғи чиппа битди...

Кимдир тиззасига ёпишиб, билакларига шаппалар, енгидан тортқилаб, ҳоли-жонига қўймай хушига келтирмоқчими, ўзига қаратмоқчими бўлар-у, у нималигию кимлигини англай олмас эди. Алҳол, қақажон қизалоқницидек бир кўхлик юзга, (тавба, киприклари мунча узун-узун?) қўзлари охуникидан ҳам маъюсроқ болакайга (ҳа-ҳа, у ўғил бола эди!) кўзи тушиб, қаерда ва қай тахлитда ўтирганини эслаб, бир сескандию қулоқлари зинг очилиб, ўзига келди.

Бола муштчалари ила унинг қўксига муштлаб, бидирлар эди:

— Бува, бува, уни қаранг, мен кимни топиб олдум! Қаранг, ким келопту. Эшитопсизму?..

— Эшитдим, эшитяпман, — У ўгирилиб, етти қадамча нарида анг-танг қотганча туриб қолган жувонни кўриб, бир унинг, бир тиззалари орасига суқилиб олган болакайнинг юзларига қараб, ҳайратга тушди. Бу истараси иссиқ, жажжи юзни яна қаерда кўрган эканман деб юрибди! Ё мусаввири олам, қуиб қўйгандек-ку! Нур инган бир томчи сувдай-ку иккиси!..

Бола унинг ичидағи ғалаёндан бехабар соқолларию юзларини силаб, ўйнокларди:

— Қаранг, бува. Мену қаерга опкелупсиз? Аямну опкетуб қолушган жойга опкелупсуз. Қаранг, тузалуп коптулар. Юруп кетуптулар, қаранг.

Ҳозиқ бува унинг бошларини силаб, дўппичасини тўғрилаб қўйди.

— Кўрдим, болам, кўрдим, ният ҳолис бўлса, шу-да. Аллоҳ шифосини берса, шу-да. — У ҳассасини қўлига олиб, шошқич туришга унналди. — Келинг, қизим, опоқмисиз энди? Аллоҳнинг мадади ила сан кўр-ман кўр бўп қолдими узвларингиз?

— Вой, турманг, кўзғолуманг, — жувон сал оқсаганча куйманиб жойидан жилди, — менга Сизну айтишуб эди. Ёдгормуродумну кўриб, эсум оғиб қолибу. Ким била қандай келибу, деб...

Бува тавозе-ла бош эгди:

— Маъзур тутгайсиз, қизим, мендан ўтибди. Мен дунёбехабар қария... айттиришим керак эди...

Жувон шошиб қоди:

— Йўқ-йўқ, асло!.. (Ундаи дея кўрманг!) Қайтага бағрум тўлду, кўруб бир ерларга етти бошум. Соғинган эканман қўзимну... — деб ёпишиб борган ўғилчасини ўзига тортиб, бошларини силади.

Ўзининг паришонлигидан (қандай ғафлатда қолди, тавба!?) жиндек саросимагами, хижолатгами тушган қария калима келтирди: Ла илаҳа иллаллоҳ! Чиндан Аллоҳнинг карами кенг, ҳикмати бекиёс! Уни сабабчи этиб, буларни ёлғиз кўриштиргани қандай гўзал бўпти! Онасининг этакларига ёпишиб, бағрига сингиб бора-ётган болакайга нигоҳи тушиб, енг учи ила мижжаларини кишибилмас артиб оларкан, бу топишув асли дардларнинг аришидан бир мужда эканини ўйлаб кетган эди у.

— Вой, нега бу ерда ўтирибсуз? Юринг, ичкару киринг. — Жувон бу орада ўзига келиб ултурган, мулоzиматга тушган эди.

Аммо қария еллар измига бўй бериб, кумуш «кафт-чалари» ила ўзига хос қарсак чалиб ётган (улар ҳам Тангрига тасбеҳот айтиб чарчамасдилар) манави азим тераклар остидан жилгиси, бу салқин ҳам тинмагур шабадалардан ажрагуси йўқ эди. Ташаккур айтиб, енгил таъзим этди:

— Агар мумкин бўлса, шу ерда ўтира қолайлук. Жаннатнинг бир бўлагидек жой экан: ором ёғилади-я, жонивор бу тераклару тинмагур еллардан.

— Вой, нега мумкин бўлмасун. Ихтиёрунгиз-ихтиёрунгиз.

Ёдгортой ҳам аясига ёпишиб, нимчаларидан торт-қилар, қистар эди:

— Ўтирамуз, ўтирамуз. Энди ҳеч ёқقا кетмайсуз. Сизсиз кетмаймуз биз. Тўғрими, бува? — Болакай қариядан нажот кутгандай қаради. — Айтинг сиз.

Қария жилмайди:

— Зўрга топиб олганимизда қандай ташлаб кетарканмиз? Опкетамиз... эрта-индин, Худо хоҳласа.

Болакай сакраб-қунади:

— Ана, опкетарканмуз, опкетарканмуз.

Ўғилчасининг бу «қилиғи»дан хижолатларга ботган (аммо ичиди яйраб бораётган!) жувон атрофга аланглаб, жужуғини бағрига тортди:

— Вой, жим, эшитганлар нима дейду? Бу ерну билмайсанму?.. Бу ерда шовқун солмайдулар. Болакай онасининг қучогидан қарияга жавдиради:

— Шунақаму, бува? Урушуб берадуларму?

Ўлтиришга чоғланаётган қария тағин-да ширинроқ жилмайди:

— Сенга кечирарли. Ҳамма ҳам аяжонисини сендай топиб келсунчи...

— Ана-ана-ана! Эшитдуз! — деб аясининг қучогидаёқ сакраб-қувнади у.

Жувон эса уни қучогидан қўймай қулоғига бир нималарни шивирлар эди:

— Ёдгор, сену ким айтаду, менинг Ёдгорум деб?!

«Ёдгорум деб?!». Қариянинг пешонасидан бир нима юриб бораётгандек... бехос вужудига титроқ инди. Ичидан юрагини сидириб-куйдиргудек бир нима тилиб ўтди: «Кимнинг Ёдгори? Ўша Ботурними ёхуд бошқа бирорвни? Ботурнинг тирноғи деб адашмадикмикан ишқилиб? Унда бу мушфиқа ким бўлиб чиққай? Аёлими?»

Ўлтиридилар. У ўша бояги — жойлашиб ўлтиrsaёқ белларию кураклари бир ажойиб қолипга тушгандек, хуш ёқиб ўрнашадурган жойга чўқди. Оёқлари ҳатто (тўрт энликкина) кўтарилиб

ҳам қолди. Бундан тиззаю болдирлари бир ором топаётгандек эди. Аммо аёл кишининг олдида бу ўлтириши ўзига эп кўринмай, қаддини қўтарган эди, оёклари ерни ўпиб, ўзи жиндек таскин топди.

Жувон эса чеккароққа омонатгина чўккан, унга қараб қия ўлтирар эди. Ўғилчаси бўлса, аллақачон унинг бағридан чиқиб, ўртадаги жойга тармашар, икковларининг ўрталарида бир яйраб ўлтироққа ҳозирланар эди. Болалигим — пошшолигим, деб шуни айтадилар-да, кўнглига келганини қилмай қўймайди. Қани, шу ёшда бўлиб қолса... Аллоҳдан нимани тилар эди? Ўтган умри, босиб ўтган йўллариними ё... дедио ичидан бир ғулув уйғониб келиб, бўшашиб кетди. Шу бўшашиб ичида тили истифорга жуфтланди: «Астағируллоҳил азийми ва атувби илайҳи». Ўзинг мағфират айлагайсан... тақдири азалдан қочиб бўлурми?— деди тин олмай. Манавилар ҳам юрибди экан-ку, мусофирилик тузини тотиб... Тангритоғдан узоқда. Ўзи тўзитиб, айрилиққа солиб қўйган бўлса-да, шукр этиб... чидаб.

Аммо шу билан бирга кўнглининг бир чеккасида нимадир ғимиirlар эди: ростдан шулар Ботурга тегишли эканми? Бу унинг тирноғиу униси аёли?

Сўрашга оғиз жуфтлаб-жуфтлаб қўяяпти-ю, лекин тили бормасди. Тескариси бўлиб чиқувидан қўрқяптими? Балки.

Ахийри, бўлмади, қария томоқ қирди:

— Мен сиздан хабар олиш баҳонасида тойчоғингизни етаклаб келганимдан хафамасмисиз?

Жувон ҳам ёрилди:

— Оллоҳга шукр, Тангри берса, қўшқўллаб беради экан.

— Йўғ-е, яна қандай янгиликлар? — деди қария шошиб қолиб.

Жувон унинг юзига ботиниб-ботинмай қараб қўйиб, чиройли жуфтлаб ўтирган тиззалири устида қовуштирган қўллари ила урингангина қўйлагининг этакларини сийпади.

— Бугун нурга солуб қўришиб эду...

— Хўш-хўш? Ўзгаришлар қандай? — Қария ярим ўгирилиб, ўриндиқдаям тинчимаётган болакайнинг тиззалирига қўлини қўйганча, жувоннинг хайрли сўзлар чиқаётган оғзига тикилган эди. У эса аллақандай тўлиқиб, хўрсинди:

— Сизга, Сизну менга топуб берганларга миннатдорчилигумни қандай изҳор этсам: ғубор ҳам қолмаганмуш...

Қария енгил тин олди: у мавлосигами, кимга шивирлар эди: хайрият, уялтирамбсан қулингни. Сенинг илму қудратинг олдида бандангники ҳечdir. Томчича ҳам эмасдир. Ўзинг қўлламасанг, ким ҳам қушойиш беролгай эди манави мушфиқага?!

Унга ҳам шу гапни айтди:

— Биз сабабчимиз, холос, нажотни берган Аллоҳ. Барча таҳсину ҳамдларга ёлғиз Ўзи лойиқ, Ўзи сазовор. Бандаси нима қила оларди, агар Аллоҳ қўлламаса, хушламаса. Хушласа, юз йиллик дардлар ҳам аригай бир зумда. Узун жудоликлар барҳам топгай. Айрилиқлар адо бўлиб, соғинганлар қандай топишганини билмай қолгайлар, худди бугунгидай. Қўзичноғингиз олдингиздан ўйноқлаб чиқиб қолгандай. Тўғрими, пучоқтой? — деб эркалаб, бармоғини боланинг тугмачадай бурничасига теккизмоқчи эди, Ёдгор бошини онасининг бағрига олиб қочиб қиқирлади:

— Ҳечам-де.

— Нега энди? Ёмонму тугмачага ўхшаса? — деди қария тегишиб.

— Йўқ, — деди у бийрон ва онасининг юзига қараб қўйиб. — Менинг бурнум, биласизму, кимниги ўх-шайду?

— Хўш?

У ўриндиқдан сакраб тушиб, аяжонисининг ёнига туриб олди.

— Қаранг энду, кимниги ўхшайду?

Жувон лоладек қизариб кетган эди, уни уялибгина бағрига тортди:

— Вой, сен тушмагур. Бу гапну қайтдан топдунг?

— Мақсуд амакум айтдула. Ёмонму?

Қария бошини орқага ташлаб, таъсиrlаниб-таъсиrlаниб куларкан, мижжаларидан тирқираб чиқкан ёшни кафтларига артиб, адо этолмасди:

— Қайси, доруга борган йигитчами? У айтган бўлса, ишонмоқ керак, ишонмоқ, — деб туриб, жувондан сўраб қолди: — кечирасиз, у Сизга ким бўлгай?

— Қайнум, — дедио жувон қизариб кетди.

— Ие, шунақаму? — дедио қария ўзининг саволидан ўзи ўнғайсизланиб қолди. У мушфиқага сир бериб қўйганидан ичидан зил кетмоқда, ҳожати бўлмаса-да, тиззалирини уқалаб, тўнининг барларини тўғрилаб-текислар эди. Нима гўзал, ҳар нарсанинг чини — ҳақиқати гўзал. Лекин шу тобда андиша ўнданда гўзалроқ эди. Айниқса, манави той боланинг олдида, унинг мушфиқа аяжонисига тегишли нарсаларда. Негаки, ўзининг ғамлари етарли, кўргуликлари етарли. У шу асно аяжонисининг тиззалирига ёпишиб, bemavrid эланаётган болакайга чалғиган каби, унга су-йибгина қараб қўйди.

Келин (той боланинг аяси) у ўйлагандан ҳам сезгир эди. Унинг шу нигоҳиданоқ бир нарсаларни сезаб, ўғилчасиа жавоб беришга шошилди:

— Хўп, болам, хўп, фақат узоқма. Гулзорларга оралаб кетма.

Учиб-қўниб турган тойчоққа шу керак эди: у икки ёнchasига шатталаб, самантойлардек чопа кетди.

Қария ўйноклаб боратурган болакайдан нигоҳини узмаскан:

— Буниззи у ёқда кўрсангиз, далада яирашини кўрсангиз, — деди.

— Қаерда? Мақсадхўжаларнукидаму? — деди жувон тил-забон битиб.

— Унданам нари... — деди қария чиними-чинига кўчиб. — Тарновда. Ғир-ғир шабадалар диёри — бизнинг боғимизда.

— Вой, нега? Буларнику-чи? — деди у ташвишга тушиб.

— Ҳарна кўздан нарироқ,— деди табиб ўша-ўша ҳалимлик ила чинидан қолмай.

— Тушунмадум, — деди келин титраниб.

Қария уни хотиржам этгали, мулойим боқди:

— Шунақа илтимослар бўлиб эди.

— Илтимослар?— дедио келин у ёғини айтольмай тек қотди: Айтишга уятми, ҳаёми, андишами — қўймасди.

Қария шошиб қолди: хижолатларга ботди:

— Сиз кўрқманг, эски қадрдонимиз Мирзаҳожимдан... элчи келуб эди.

— Элчу? Адамлардан-а? — Келин эси оғиб, туриб олган, қайтиб ўтириш ҳаёлига-да келмасди. — Сиз у кишину...

— Таниганда-чи, — деди қария. Сўнг юзларидан нур ёғилиб: — Шунақа, бир қарашда олам кенг, ҳамма бегонадек кўрингани билан аслида ундей эмас, — деди.— Одам игна эмаски, йўқолиб қолса. Мана, Аллоҳ күшойиш берса ҳеч гап эмаскан. Қадрдонимизнинг сиз азиз гавҳарларини топиб турибмиз. Фақат у Ботур Мирзаҳожимга куёв бўлишини билмасканмиз. Билсак, аллақачон етиб келардик-ку бу ерга. Шунгаям шукр. Дилемизга солганига, кўриштирганига шукр, — деди қария Аллоҳга ҳамд айтиб.

Мушфиқа келин эса севинчлари булоқ сувидан-да тиник кўзёшларга айланиб, юзларини юваб тушар, шунча қувонч устига Ботур ҳақида сўрашга жазм этолмас, ҳаёси қўймас эди. Қария шу ҳолига мушфиқани бир йўла хурсанд этмоқни ўйлаб, унинг яна бир азиз кишиси ҳақида сўз очгиси келарди.

— Дарвоқе, Ҳожимнинг қуёвлари, бизнинг Ботурдан қандай дараклар бор? Кўрганимга ҳам валлоҳи аълам неча йиллар кечди? — деди сўраш ўзи уятлу бўлса ҳам.

Тахмини рост чиқиб, бояқишигина гангигб қолди.

— Ким, Султонмурод акаму? Сиз... у кишину-да танигаймусиз? Билгаймусиз? — деб юборди бир ерга етиб.

— Нега билмайин, қизим? — деди у томоғига иссиқ бир нарсалар қадалиб ҳам күйдириб келиб. — Мени деб... юрак ютиб бу ёқларга-да довон ошиб келган Ботурни унугиб бўларми?

— Ўша киши-я? Шу ёқларга-я? — Жувон бир қачонги тарихларни хотирлаб хушхол тортди, ичи ёришиб, ўзи қалтираб борар эди. — Қачон, қай вақт? Беш йиллар бурун...ми? — дея олди.

— Шундай-шундай. Олди оқ ўриклар ҳол ташлаган кез. Мен ҳеч кутмаган бир кун, аср билан шом ораси, — деди қария хотираларга берилиб. — Шу-шу қайтиб кўрмадим. Билолмадим, ҳоллари не кечди. Ишқилиб, Аллоҳ ўз паноҳида асраган бўлсун у ботурларни, у тоза ўғлонларни.

Қария-ку, кумуш терак тепасига тикилганча жим қолган, ботирларининг тақдирини ўйлаб кетган, жувон эса иккала кафтини юзларига босганча ҳик-ҳиқ йиғлар эди. Бугина эмас, унга қўшилиб тепадаги азим тераклар шовуллаб, адоксиз кумуш барглари кўклам елларида пирпираб титрар эдилар. Кумушдан ҳам товланганроқ орқа бетларини кўз-кўз қилишар-у, аммо буни унинг остида ўтирганлар кўтар аҳволда эмасдилар.

Оллоҳ уларни айни шу маҳал, шу соатда анави гулзор ёқалаб ҳол-ҳол гулли митти капалакнинг gox баландлаб, gox паствлаб қанот қоқиб борувига хуши оғланча қолган болакай туфайлидан учраштириб, ҳеч кимга-да очиб бўлмас сирларидан воқиф этаркан, бунинг ҳикмати не — яхшиликками ва яна андухгами, билолмасдилар.

Шу тобда қариянинг кўзи дафъатан оқ бинонинг пештоқидан ўрлаб чиқиб бораётган таниш алангага тушиб, сергак тортди. Аланга бир муддат кучайиб-гувишлаб борди, аммо бу гал томнинг пештоқларидан кутарилмай бўшашибмоққа бошлади. Қариянинг кўз ўнгидаги сусайдиб бориб, оч қизғиши пештоқнинг ўзига сингиб кета қолди.

Табиб куппа-кундузи содир бўлиб турган бу нарсага ишонишини ҳам, ишонмасини ҳам билмай қотиб ўтиаркан, жувондан уялибми, истиҳола этибми, кўзларини юмганча шивирлади: «Ё қодир Аллоҳ, бу не каромат? Каромат бўлса, ҳикмати не?», дея олди.

Унинг бу ўтиришию бу ҳолига кўзи тушган жувон ҳовлиқиб қолди:

— Вой, Сизга нима бўлду? Кўзингизни очинг, бери қаранг.

Қария кўзини очиб, бошини сараклатди ва оҳиста орқасига суюнди:

— Ҳечқиси йўқ, ўтиб кетди,— деди хижолат аралаш.

Жувон сесканди:

— Нима эди? Нима кўринду?

Қария унинг юзлари оқариб бораётганини кўриб, кўзголиб қўйди. Ва ҳеч гап йўқлигини билдиримоқчидек, тиззаларини уқалади:

— Сиз мабодо ўша оқ бинода турмайсизми? — деди тераклар ортидаги оппоқ бинони кўрсатиб.

Жувон бош тўлғади:

— Йўқ, биз бу ёқдагисидамиз, нимайди, ота?

— Унда бир сир бор, одам боласининг ақли етмайдирган, — деди қария бош кўтармай ва хаёлга толиб қўшиб қўйди: — Ҳовфимда кўринса, таъбир қилиш мумкин эди, ўнгимдагиси қизик, у нимадан белги бермоқда, ҳеч тушуна олмадим<sup>9</sup>.

Тераклар шовуллар, еллар райхон ҳидларини сочиб ўйноқлаб ўтар, гулзор атрофида чопган болакай ҳали тўрқанотли ниначиларга, ҳали унқанот капалакларга маҳлиё — тикилиб-тикилиб қолар эди.

Баҳорнинг тинч, бегубор бир палласи эди. Кўп тарихларга шоҳид оқ бино эса ярми сояга кўмилиб, ярми нурга чўмилиб ётар эди.

<sup>9</sup> Орадан кўп йиллар кечиб, бир кеча ўша оқ бинодан ўт чиқиб, у тамомила ёниб тушди. Ким қутулиб, ким жабр топдию бинони яна ўзидек қилиб куриб кўйишиди. Ўт нимадан чиқди, ҳеч ким билолмади (Муаллиф).

## 8. ОҚ БИНОНИНГ ЁЛҒИЗ «ЭГАСИ» Яна ўша муаллифга аён тарих давомига

Ниҳоят, бозорлиқни кучоқлаб кўтариб олган Ёдгортой олдинга тушиб, унинг қилиқларию ўзига ярашган «виқорли юришлари»га маҳлиё онаизор орқасидан эргашди:

- Майлу, биз тезда қайтамуз.
- Бемалол, bemalol. Бамайлихотир ташлаб чиқаверингиз. Мен ўтиратураман, — деди қария.

Жужуғини хўб соғинган мушфиқа ўғлига қараб тўймасди. Олдига тушиб, бир қоп семириб, эркаланиб боришлирига маҳлиё-маҳлиё тикилар, кўзларига ишонмасди. Дарди арий бошлагани устига бунинг келуви бояқишигинанинг бошини кўкка етказган эди: қолаверса, инсонга кўпам нима керак? Аллоҳдан бекорга жиндек хотиржамлигу тан соғлиғи сўраладими?

Олмазор ортидаги чакалакда адашиб булбул сайради. Унга жўр бўлиб, боғ ичида қораشاқшақлар беозор қувалашиб учиб-қўнди. Тераклар орасидан бир тўп чумчук (қаёқка шошади булар?) ўқдай учиб ўтдилар. Ғимирлаган жон борки, кўклам неъматлари ичида ўйнаб-кувнарди. Ичида зарҳал қайнаб, ўн саккиз минг оламга нур сочаётган офтоб ҳам оқ бино ортидаги қўш теракнинг белидан ошиб қолган, шу туришида икки терак ўртасига зар ҳаллинчаклар ташлар эди.

Бу ёқда, қария ўтирган ерга эса азим тераклардан ҳамон сояга қўшилиб, ором ёғиларди. Кимдир пастдан шипиллаб кела туриб, яккам-дуккам очилиб берган бўйчан сариқ сафсар гуллар тагидаги ўриндиқда ўтирган оқ-оппоқ чолни кўрмай ўтган жойида, салом берди:

- Ассалому алайкум...
- Ваалайкум...

Овозиданми, нимадан у қарияни таниб, турган еридан жилолмай қолди.

Қария ҳам уни салқи қовоқларию шилпиқ кўзидан (пастки мижжалари ўша-ўша осилиб, жияклари қизариб турарди) таниди. Бу ўша оқ уйнинг мутасадди пазандаси эди. Ўшанда бир оғиз сўзи билан жавобини бериб юборишган эди-ку, яна қаердан пайдо бўла қолибди?

— Ҳа, Жамолохун, қандай шамоллар учирив?.. — деди қария Оллоҳнинг гуноҳкор бандасини хижолатдан қутқариб.

У ночор-ноилож қайрилди. Минг хижолатга ботиб (ер ўпиб кел, деса келарди!) оппоқ ҳам тўмтоқ бармоқларини чўзиб (нима бўлган — ўнг қўлининг тўрт бармоғи текис йўқ эди!) икки букилиб кела бошлади.

— Узр, тўра бува, илғамай қолибман. Эсонмисиз-омонмисиз? Нечук-нечук?..

Қария унинг довдирашидан мийифида кулди: қўлини олмаса бўлмай (ахир кечирган!) деди:

— Ўзларига йўл бўлгай?

Жамолохун баттар ўнғайсизланиб, шилпиқ кўзларини олиб қочди:

— Хизматчилик, яна чақириб қўйишмай, — деб қисинди.

Қария «вазифанг оғур, Мансур»<sup>10</sup>, деб юборай де-ди-ю, мулзам этиб, гуноҳга ботгиси келмади. Дунёда бандасини изза қилгандан ёмони йўқ. Ўлибдими, энди қайтиб у ишларга қўл урса. Ўзи эса ўша муздек бегона қўлни бўш қўйди:

— Яхши боргил, кўрганимдан хурсандман. Ҳарқалай ғимирлаб юрган экансан-ку.

— Раҳмат, ҳазрат. Кечирасиз, тўрам тақсирим, — деб гап ўртасида узр ҳам сўраб қўйди. — Бизга хизматлар бўлса, тортинмай буюраверасиз, — деб жилпонглади. (Ўзи кутулганига шукр қилиб, қочолмай турибди-ку, яна ялтоқланади. Сут билан кирган — жон билан чиқаркан-да!)

Ҳозиқ бува ичида Аллоҳнинг қудратига таҳсин айтиб турган бўлса-да (нега айтмасин, Аллоҳ

<sup>10</sup> «Алишер Навоий» драмасидаги хуфия хизматчига ишора (*Муаллиф*.)

бундай бандаларини нимага яратиб қўйибди — турган-битгани ҳикмат-ку!.. Одам қай кўчага бош сукса — маҳлуққа айланажагига мисол-ку бу!), ўзига қаттиқ-қуруқ гапирмади.

У эса, «раҳмат, ҳазрат, кечирасиз, тўрам тақсирим», деганича қўли кўксидаги беш қадамча тисарилиб бориб, сўнг шипиллаб кета бошлади.

«Чакириб қўйишмади...» Нима рост — шу рост. Шўро ўзига хизмат қилганларни унумтайди, хор қилиб ҳам қўймайди. Айниқса, мана бунга ўхшаганларни...

Ҳозиқ бува ирkit ўйлардан чалғимоқ учунми, ўрнидан туриб, терак тагидаги шарқироқ ариқ лабига борди. Қарангки, у жаладан кейинги бўтана сувдек лойқа эди. У юз-қўлини чайиб, бир енгил тортгиси келиб эди, ниятига етолмади. (Бўлади-ку, ахир шундай: ҳамма нарса хоҳишингга тескари келаверади!). У баҳавороқ жой излаб, йўл ёқалаб пастроқ тушди, тепароқ чиқди. Йўлнинг бу ёқасидаги ёлғиз қари сада тагигача борди, аммо ўзи боя ўтирган жойга ўхшатмади. Қайтди. Ҳаммаси ғир-ғир елларга кўксини очган ўша жойдан ўтаверсин эди! Аммо... аммо бува ўзини шунча чалғитгани билан ўша ўтмишни — анави ирkit кимса ила кечган воқеани унотолмасди...

— «Мана, зоф ҳам киромтайдиган боғ. Тангритоғдаги боғингиздан зўр бўлса зўрки, кам эмас. Бу ҳам ҳукуматники. Мана шу оқ бино бутун хизматчилари или Сизнинг ихтиёрингизда. Истаган нарсангиз ўша заҳоти муҳайё этилади. Бемалол яшайверинг. Фақат боғдан бир қадам жилмайсиз. Бирорлар билан мулокот, олди-берди ман этилади. Улуғ Олампаноҳдан изн бўлди дегунча қабулларига элтамиз. Унгача... шу ердасиз».

Шундай деб ташлаб кетишганича... учинчи куни пешиндамикан, валлоҳи аълам, қаср намозини энди ўқиб бўлиб, жойнамознинг бир четини қайириб, тасбех ўгираётib эди, эшикни шамолми — нима итаргандайин «ғийт» очилиб, туриб қолди. Ҳеч ким кирмадиям, кўринмадиям. Ёлғиз намоз ўқиган кезлари шунаقا бўлгучи эди, у ёқда. Буни жамоат бўлиб намоз ўқимоққа тушган фаришталарга йўйиб, бир ғалати сир босиб, хушу ва хузу ичидаги қолар, эшикни ёпишни ҳам унитар эди. Ҳозир ҳам ўшандайин бир нарса содир бўлиб, шу ҳолатга туша бошлаган чоғида... ўша қия очиқ эшикни яна бир нима аста итарди.

Шарпа шу қадар ғайритабии (шамол бўлиб шамол эмас, маҳлуқ бўлиб маҳлуқ) эдик, тирноғидан бошига довур дувиллаб бир жимирлов югуриб, соч толаларидан чиқиб кетдими, тирноқлари учидан тиззаларига, ундан жойнамозга ўтиб кетдими, билолмай ҳам қолди. Фаришта тушса, намоз тугаб тасбеҳотга ўтирганда тушадими? Аср пайти бўлса ҳам бўлак гап эди: фаришталар алмашинмоқда деса... ҳали пешин-ку...

Шу тоб бехос ўшал эшиқдан аста мўраламоққа бошлаган кимсанинг оқ-оппоқ япаски юзига кўзи тушиб, шунча қалтис дамларда қилт этмаган юраги шиф этди. Бу титроқ тиззаларидан жойнамозга ўтиб улгурмай... ўрнига бир шукр, бир таскиндан аввал... қазои қадарга таслимият — ўлимни бўйнига олмоқлик босиб келдию «инна лиллаҳи ва инна илайҳи рожийун» дея шивирлади. «Ўзингга шукр, Аллоҳим, омонатингни бош-қа бирон жойда эмас, жойнамоз устида оладиган бўлибсан», деб кўзларини юмганча... тасбеҳга берилди. Тили тасбеҳотдаю дилидан бошқа ўйлар кечарди: «Ҳў, биз ким бўпмиз, қандай улуғ зотлар шу жойнамоз устида шарафли ўлим топмишлар: Расулуллоҳнинг улуғ саҳобалари — хулафои рошидонлар — ҳазрати Форуқ, ҳарати Усмон, ҳазрати Али!.. Ўзингга шукр, ўшал шаҳидлар жумласига қўшган бўлсанг»... Киприклари ўз-ўзидан намланиб келиб, ўша шарпа қоплондек ташланишини... кутиб қолди.

Аммо қоплон... ҳансираганча ёпишиб, ишини битира қолмасди...

Чиндан ҳам эшик ғийт этиб, юзига ёпилдию тахта полда ўша қоплоннингми, ниманинг шипшип юрган оёқ товушлари узокиб бориб, тинди-қўйди. Шунаقا бир хунук сокинлик чўқдики, бунинг олдида тунги жимлик авло эди. Куппа-кундузи, пешин чоғи, яна намоз пайти дунё нафас ютмай жим қолиши (!) ғалати эди. Уй ичидаги тиқ этган товуш эшитилмас, бу-ку, ичкари, хатто ташқарида ютиб юборгудек бир жимлик хукмрон эди. Худди улкан зилзила ёхуд қазои қадар

олдидан бор мавжудот тош қотгандек эди! Уй орқасидаги қўш теракда эртадан кечгача чуғурлаб бозор қилиб ётадиган чумчуқлар ҳам (худди оғатни сезиб гурра кўтарилигану ғойиб бўлгандек) қани бир оғиз чурқ этиб қўйсалар. Жимжитликки, қулоқ солиб туриб, ваҳимага тушиб кетмоқ мумкин эди.

Энг ёмони, зулжалоли қодир Аллоҳ уни бу бешараф асиридан кутқариб, шаҳидлик шаробини ичира қолмаган, бу дунё мосуволикларидан бир йўла озод этиб, охиратнинг улуғ мартабасига етказа қолмаган эди! Раво кўрмади шекилли... Муносиб санамадими ё?..

Тасбехот саноғида ҳам адашиб кетди. Илгари ўттиз уч марта «Астъфируллоҳ аллазималлази»ни айтгандаёқ хотиржам тортиб қолар, сўнг ҳамдга берилар эди. Ҳозир истигфорни уч ўғирди ҳамки, таскин тополмасди.

Ахийри қулоқлари ортидаги ўша тинимсизчувиллаш бирдан тиниб, ўзи сергак тортди! «У япасқи юз ким бўлса экан? Қачон, қаерда кўриб эди?» «Э-ҳа, Жамолохун-ку. Бошида оқ қалпоғи ҳам бордай эди!.. У бўлмай, ким бўлсин! Унда... нега мўралади-ю, эшикни юзига ёпиб қайтди? Балки...»

Ана шу балки тасбехотни ададига етказмайин ҳам юзига фотиха тортиб, туришга мажбур этди.

Қани, чиқиб боқсин-чи, кутяптими ё қорасини ҳам кўрсатмай гум бўлдимикан? Шипиллаб сурворган бўлса, нияти чиндан бузуғу, жиндек кечиккан, агар кутяпган бўлса, бўлак гап: ўзи шайтон васвасасига учган бўлиб чиққай.

Чиқса, ўриндиққа омонатгина чўкканча, ҳақ деб кутиб ўтирибди. Кўра дик этиб туриб, ҳожасининг қаршисида қўл қовуштириб, бир ҳокисор қиёфага кирди. Камига намознинг ҳаққи — қарз саломини унутмади.

— Ассалому алайкум, ҳазрат...

— Ваалайкум... — деб алиқ олди-ю, оғринганини яшира олмади. — Ҳа, Жамолохун, янами?

У тушунди:

— Узр, тўрам тақсирим, — деб таъзим этганча икки қадам тисарилди, — энди қайтарилимагай. — Шу туришида қўли кўксига ёпишиб кетган, тавозеси самимий кўринса-да, кўзи ғалати бежо эди: тик қарай олмасди. Юзига ҳам тушунуксиз алланималар соя ташлаб тургандек. Нима бўлса экан? Кўп доғули одамлар шундай юмшоқсупурги бўлмасмиди?.. Балки униям тушуниш керакдир. Бир чеккаси хизматчилик, бир чеккаси ҳазилакам одамга боғлиқ вазифалар. Йўқса, ошпаз қиёфасидаги тингчидир, «қўз»дир, «қулоғ»дир, балодир-бадтардир, ишқилиб, бир хуфиядир. Бекорга қўйилмайди-ку. Ўзи-чи, кимсан Тангриотдек бир мулкнинг молики эди. Оддий тутқун бўлсаки, ит ҳам, бит ҳам туртиб-нетиб ўтаверса.

— ... олиб кира... вурайинму?.. — деди у аллақандай жавдираб-изн кутиб.

Ана шу жавдираши иттифоқо ғалати кўриниб (ё Худонинг қудрати!) кўнглига бир иштибоҳ оралади:

— Опой-чи, бу гўшанинг оқсочи? — деди у томон ярим ўгирилиб.

Жамолохун ўзи оқсариқ одам... дув бўзарди, сўнг бир нимадан ҳайиқкан каби бир қарич тортиб кета туриб, сир бой бермасликка уринди. Япасқи юзига узроҳлик қалқди:

— Кечирасиз, тўрам тақсирим, бир қошиқ қонимдан кечасиз. Сиздан берухсат Опойга жавоб бериб қўйибман: кўнглум бўшлиги қурсин, аёл киши кўзёш қилиб турса, йўқ дея олмайман ҳеч.

Ёлғонни ҳам хўб тўқидими! Ўз кўнглида чиппа-чин ишонтирдим, деб ўйлар. Лекин ниманинг чоки кўп — ёлғонники кўп. Бир еридан ситилса, тамом, ҳаммаси сўқилиб кетгай! Ақлинг кўтоҳ, Жамолохун. Ўзингни устомон санайсан-у, сир бериб қўйганингни сезмайсан.

Ўзига индамадию тўрт томонига кўк духоба қўрпачалар ташланиб, ўртага мўъжаз хонтахта қўйилган, ҳамиша тузоглиқ тургучи меҳмонхонага (номи шундай: тутқуннинг олдига қандай меҳмон келиши мумкин, ахир!) қараб юраверди.

Буни ижозат деб тушунган Жамолохун эса таъзимда толган қаддини кўтармай ҳам

тисарилдиу хизматга шошилди. Худди шу маҳал бўғот ичидами, пештоқ тагидами — ишқилиб, гулдор фанер орасида ин қуриб, ватан тутган чумчук болаларидан қай бири чиф-чифлаб, потирлаб бердию зум ўтмасдан тинчили-қолди. Фанер ичиди бир нима сирпаниб, тўсин ортига ўтиб кетди-да, сув қўйгандек жимлик чўқди.

Бу уй, бу гўшани вақтинча ватан тутган тутқун ҳали меҳмонхонага кириб улгурмаган эди. Бир оёғи ичкаридаю ўзи остонаяда шифтга алангларкан, ичи ғашланиб, ўзи аллатовур чўчиди:

— «Сирпанган — нима бўлса экан, илонми, нима бало?»

Остонаяда бу алпоз турувию полопоннинг хунук чиф-чифлашини ёмон фол олиб, бир кўнгли қайтмоқни ҳам ўйлади. Лекин исломда ёмон фол олмоқ ножоизлигини эслаб, ичиди «Ҳар яхшиликни бергувчи ҳам, ҳар ёмонликдан асрагувчи ҳам Ўзингсан. Ўзингни вакил қилдим», деб дуо ўқиб, ичкари кираверди. Кўнгли ҳийла хотиржам тортиб, кўрпачага чўккалаб эди ҳамки, ойна ортида ранг ола бошлаган сариқ гилос шохига она чумчук бирдан чирқиллай кетди. У шохдан-шохга сакраб, тиним билмай чарх уриб чирқирав, тумшуғида ола келган кўкиш қанотли бир нарсани ташламайин ҳам (ахир полопонларининг ризқи, улар эса жойида йўқ) ўзини ҳар ён уриб, гирён қиласиди, нарёғи йўқ. Унга бошқа чумчуқлар ҳам қўшилиб, бир пасда дераза тепасида қиёмат қўпди.

Шу асно оқ-оппоқ бўлиб, билагига сочиқ ташлаб, кўлда патнис билан, патнисда эса чойнак-пиёлаю тақсимча ва косада неъматлар ила остонаяда Жамолохун кўринди.

Дераза ортидаги қиёматга хаёли қочган меҳмоннинг кўз ўнгидан Тангриофдаги бир тутамгина эли, гўшаси кетмасди: Улар ҳам манави чирқиллаб қолган чумчуқлардан қаери кам? Улар ҳам бир тонг, ҳали қуёш чошгоҳга кўтарилемай туриб сорбонларидан айрилиб қолмадиларми? Қаён борарларини, уни кимдан сўрарларини билмай, даҳанини кўкка тираган тоғлар орасида етим кийикдай бўзлаб қолмадиларми? Фарқи, булар полопонларини олдириб ўтирибдилар, улар эса сорбонларини...

У остонаядан ўтишга журъат этолмайин қайта-қайта изн сўрару бу кўз олди аччиқ тутундан тамоми хира тортиб-ёшланиб, бу ёшдан жаъми нарсалар чаплашиб кетиб, бўғзига иссиқ бир нарса қадалганча қолган, остонаядаги одамнинг эса лаблари қимирлару овози чиқмас, ё бунинг кулоқлари чиппа битган эди...

Алҳол бирор жуда яқиндан:

— Рухсат этинг, ҳазрат... — дея ўтингандек бўл-ди-ю, у азбаройи чўчиб тушди.

Остонаяда оқсоч... нега оқсоч, оқ-оппоқ ўранган бир маҳлуқ — илон бўлиб илон эмас, одам бўлиб одам — нақ оқ илон икки букилиб, патнис кўтарганча изн сўраб турарди.

Этлари жимирлаб, сесканиб кетди: бу қандай рўё ёхуд кўриниш? Япасқи юзи, қизил жияклари осилиб тушган шилпиқ кўзидан кимгадир — одам зотига ўхшайди-ю, лекин аланг-жалаң бежо турувидан (ё қудратингдан!) ора-чира тилини чикариб-чиқариб қўяётган илоннинг ўзгинаси эди. Фақат вишиллаши етмаяпти, холос. Илон одам каломида сўзлар эди:

— Ҳазратим, изн берсангиз, тушлигингизни опкелуб эдум...

Нима бу, инсми ё жин? Илонлар ҳам жинлардур, деган ҳадис бўлармиди? Унда нега бир қиёфада эмас, ярми илон, ярми одам сиёқида?

Кимсасиз ғорларда адашиб-улоқиб юришганида қилт этмаган юраги увушиб, тик жар ёқалаб кетган ёлғизоёқ сўқмоқларда қалтиргмаган оёғидан жон қочиб борарди.

Фақат Худога минг қатла шукрки, бу қўрқинчдан дили орқасига тортиб, тили музлай бошламаган эди. Калима келтира оларди, келтирди. Ёлғиз нажот ундан эди. Ўзидан сўради: Аллоҳ ўзинг ҳақсан, қиёматинг ҳам, қадаринг ҳам, ёзуғинг ҳам ҳақ, ризқимиз битган бўлса, бу тутқунликда ўлим топмоқ пешонада бўлса, у ҳам ҳақ, қиёматда қайта тирилтириб олмоғинг ҳам ҳақ. «Ийяка наъбуду ва ийяка настаъин, ихдинас сиротал мустақийм...» Ёлғиз Ўзингга ибодат қилгайман, ёлғиз Ўзингдан мадад кутгайман, хидоятингни дариғ тутма, тўғри йўлингдан оздирма, бешараф ўлим топдирма. Ўзимни Ўзингга топшириб, Ўзингни вакил қилдим,

ҳасбияллоҳи ва неъмал вакил...

Эти жимирилаб келиб, оёғига жон қайтди. Ичига сокинлик чўкиб, ёқимли бир хотиржамлик инди вужудига. Кўз олдидаги хира парда ҳам қўтарилиб, ақли тиниқлашиб кела берди:

— Кел, ҳамонки, опкелибсан, нега турибсан, кир,— деди Жамолохунга бамайлихотир.

Охун ақли шошиб, оstonада қоқилишигаю қўлидаги неъматлар патнис-матниси билан учиб кетувига бир баҳя қолди.

Аммо сўнгги дақиқада қўшқўлаб тутиб қолиб, унга узроҳлик билан қаради, ёлғондакам илтифот қилди:

— Насибангиз бутун экан, мен учиб кетди девдим...

У ўзини ҳар оғиз сўзи, илтифоти, таъзиму тавозесидан тутиб бермоқда, оқ уйнинг тутқуни эса индамай, мийифида жилмайганча унинг қалбида кечган-кечаётган титроғу ғалаёнларни кўриб-билиб тургандек эди. Жамолохун патнисдаги неъматларни дастурхон устига қўйиб, чўккалаган жойидан тураётib эди, у қўлини оҳиста қўтарди:

— Шошма, ўтири, — деди бошқа гапу баҳонага ўрин қолдирмай.

Жамолохун амрга бўйсуниб, патнисни тиззасига олганча, қайтиб жойига чўқди:

— Буюрсинлар, бирон нарса қўшайму? — деди ич-ичидан ғимирилаб келаётган ҳадикни жиловлашга, ҳазратнинг кўзини боғлаб кетишга уриниб.

— Йўқ, ҳаддан зиёд уриниб юборибсан, Жамол-охун. Бир киши тугул икки кишига ҳам етарли-ку бунинг, — деди у нимагадир шама этиб.

— Раҳмат, ҳазратим, Сизга манзур бўлса, бас, шу кифоя бизга, — деб шилпик кўзларини юмди у.

Ажаб. Кўзини юмса, бинойи одам экан-ку! Ҳамма иллат — ўша қонталаш кўзларидами экан? Йў-йў, иллат ичда, деб туриб, ўзига «мулозамат» этди:

— Қани, патнисни қўй, тузукроқ жойлашиб ўтири. Бирга-бирга сенинг қўлингни ҳам кўрайлук, — деди атай. — Қани, бисмиллоҳ ила бошла-чи, аввал қайсиносидан тотинамиз?..

— Йў-йў-йў... Нима деяпсиз? — У бизга мумкин эмас, сизнинг олдингизда биз ким бўпмиз, деган каби сапчиб тушган, ҳатто чўккалаган жойидан суриниб, гиламга тушиб олган эди.

— Қизиқ, жўжа нима демоқдаки, бу алпозга тушмасанг, Жамолохун? — деди улуғ тутқун.

— Жўжа? Йўғ-е, таом ҳам гапиргайми ҳеч замонда? — деб каловланди у.

— Бўлмаса-чи, айтиб турибди-ку: еманг тақсир, заҳарланганбиз, деб.

— Астағириуллоҳ, сизга-я, жўжа-я? — у яна тисарилиб, ёқа ушлади.

Улуғ тутқун қўлини дуога очмоққа чоғланди:

— Нима қиласай? Аллоҳдан астойдил сўрайми? Сен ҳам, барча инсу жинлар ҳам эшитадиган қилиб айтсинми?

— Йўқ-йўқ, ҳазратим, кераги йўқ, — у тўрт оёқли маҳлукдай эмаклаб-суриниб келди, — ўзим айтгайман, — шу баробар этакларини ўпишга, ўпиб-ўтинишга уринди, — мен нобакорни кечиргайсиз, итлиқ қилиб қўйдим.

У дуога очган кафтларини аста юзига тортиб, шивирлади: «Ўзингга шуқр, шарманда этмадинг. Шарафли ўлим бўлса, бошқа гап эди. Мингта жоним садқа эди сенга».

Фасубҳоналлоҳ! Аввалига туйқус иркит нарсага дуч келган каби ирганиб туриб эди, энди унинг ит каби билакларида суриниб келиб, пойини ўпиб ётувидан ичи ачишиблар кетди. Ё қодир Аллоҳ, бу не кўргилик? Аввалбошда ўзинг азизу мукаррам этиб яратган зот — бандангга нечук бу хил турфа тақдирлар битмишсан? Ким бу? Қобил авлодими ёхуд бобокалонини ўз гуноҳига шерик қилиш кисмати битилган кимсами? Мунча кўп экан бу халқнинг сўқирлари? Ўз диндошию биродарига, элатдошию қондошига тиф қўтармоқдан чўчимаган, заҳар солмоғу қотил номини олмоқдан ҳазар қилмаган ғофиллари? Қачон одам бўламиз биз?

У намозга ўтган чоғи эгнига илган узун сариқ йўлли тўнининг барига бирон нарса тегиши ёхуд мук тушиб, оёқ остини ўпиб ётган кимарса дабдурустдан тиззаларига ёпишиб қолиши

мумкиндеқ нари сурилди. Кимса эса бошини ярим құтариб, рангидә ранг қолмай түрам тақсирға термуларкан, шилпик құзлари, во ажаб, худди ҳозиргина мил тортилган каби қип-қизил ғилтиллар әдилар.

— Күй, Жамолохун, энди ўтингчларинг бефойда! Сени Худо уриб қўйибди, гунохингни бандасидан эмас, Ўзидан сўра. Раҳмат-марҳамати кенг зот раҳм айласа ҳам, қаҳр айласа ҳам Ўзи билгай. Сендеқ адашган, нобакор бандалари кўп ўтган, Аллоҳ суйган бандаларини Сизларнинг қўлингиз билан ҳамиша маҳв этиб, хузурига тилатиб олган. Уларга-ку, жаннати наимларини тайёрлаб қўйиб, қотилларини қай жазога маҳкум эт-гай — бу менга қоронғи. Бу ғайб, Жамолохун. Ёлғиз Аллоҳ билгувчироқдир, — деди оқ уйнинг ёлғиз тутқуни шу топда жуда жуда хотиржам тортиб ва айни пайтда сокин хаёлларга ботиб. — Маним эса, ниятлариз амалга ошмаганидан маълумки, ҳабибимга ёқадиган хуш амалларим унчалик кўп эмас чоғи. Ёхуд билиб-бilmай қилган гуноҳларим бир талайдир-у, уни ювиб улгурмагимга муҳлат берилдимикан? Балки. Шунга-да, шукр. Аллоҳ уни ювмакка, покламакка имкон қолдирганинада, шукр. Қолдирмаса, нима қилардим? Энди сен тур. Ўзинг харом этган неъматларни ўз қўлинг-ла тупроққами — бир ерга кўм. Токи, қайтиб бирорнинг умрига зомин бўлма. Ўзингни эса бу даргоҳда қайтиб кўрмай. Қиёмат ҳақ, Жамолохун. Аллоҳга рўбару бўлишимиз бор. Бандасидан уялмасанг, Худодан қўрқ. Ундан уялгин бу хил ишларига. Бор.— У туриб пешайвонга қараб юравердию таҳоратини янгилаши зарурлигини англа, тўнини алмаштиришга тутинди.

Ташқарида чумчуқлар чирқиллай-чирқиллай ўз ўкинига тушиб тинчиган, ичкарида ҳам Жамолохуннинг на шовури, на оёқ товуши эшитиларди...

— Бува, бува, биз келдук, аям турадурган жойларгача кўруб чиқдук,— Ёдгортой ҳов наридан чопқиллаб келганча, тиззалири орасига ўзини отди.— Опкетайлук уларни ҳам, айтунг, бува,— деб қўксига ёпишди.

— Опкетамиз, болам. Нега опкетмас эканмиз. Фақат бироз соғайсин, — У боланинг куракларини силаб-эркалаб, ироқи дўпписини тўғрилаб қўйди.

Ёдгор аразлаган каби тош қотди-ю, қиз боланикидай узун-узун киприкларини пирпиратмай тикилиб қолди.

— Қаердан билдуз, қўрмадиз-ку, — деди болаларча соддадиллик-ла.

Бува унинг кўнглига қараб жилмайди:

— Кўринг, десанг, кўрибам қўявераман. Лекин ранги-рўйи айтиб турибди: бироз бор.

Бола чиройли аразлаб юзини буриб олди:

— Бинойилар-ку.

Қария унинг митти елкаларидан қучиб, бағрига тортди:

— Сен соғингансан-да, болам, сенга шундай кўринаётир.

— Сизга-чу? — деди у аразидан тушолмай.

— Яна бирон хафта бор, кейин бир умрга қайталамайди, аянг ҳамиша сен билан. — Кўр, ҳали ранглари тиниклашиб кетмаган. Дарди арисин, атиргулдай очилиб кетгай, демоқчи бўлди-ю, айтмади.

Бу орада куттириб қўйганигами, шундай улуғ, қўли енгил табибининг ўзи, ўз оёғи билан қўргани келиб ўтирганидан хижолатга тушибми, илдамлаб келаётган жувон ўша нарироқданоқ узрехликка лаб жуфтлаган эди:

— Айбга қўшмагайсиз, узоқиб кеттум. Сизну куттируб?

— Бир-бирингизга тўйиб олган бўлсангиз, мен рози!— деди қария Ёдгортойнинг елкасига қоқиб. — Энди Асалтойни ичкитирмай опкелиб турамиз. Мана, кўриб олдик-ку, йўлни. Шундайми, той?

Ёдгор ялт этиб ўгирилди:

— Соғинсам, ўзизга айтавураманму? — деди ўша-ўша болаларча соддалик билан.

— Айтавурасан. Ўзим оптушавераман.

— Ҳов, ўшақдан-а? Бөғиздан-а?

— Нима бўпти? Машина чақирамизу ғувва етамиш.

— Аямлар-чу, уларният ўша боғга опкетамишму?

— Опкетамиш. У ердан ҳеч ким тополмай юрсин. Ҳатто Мақсуд амакинг ҳам, — деди-ю, шу ерга келганда тилини тишлади. Шуни айтмай қўяқолса бўларкан. Жувон «вой» дедиу, кафтини юзига босиб қолди.

— Ҳали қайним... билмайдиларму?

Қария бу узун тарихни қандай тушунтиариини билмай тутамга келиб-келмайдиган, аммо икки қулоқ юмшоғига қадар узайиб борган, қорасидан оқи мўл соқолиу юзини силаб-сийпади. Шу асно маъноли томоқ қириб:

— Қайнингиз... Ботурнинг туғишиқоними ёки тутунгани? — деб эди, жувоннинг оқ юзига дув-в қизиллик югуриб, қизил гуллар ичида қолган ёлғиз атиргул тусига кирди.

— Вой, туғишиғандан ҳам аъло-ку, холаваччалар-ку,— деди уялигина.

Табиб ўзига ярашган ва бир бошқача нуру файз берворган тўнининг барини қоқиб, ўрнидан турди. Шунда ҳам той болани ўзидан қочирмай узун-узун, таҳоратда оқарган бармоқларини унинг елкасига қўйиб турарди.

— Шундай денг, биз кўз қорангизни ундан ҳам нари тутиб юрибмиз.

— Нари? Вой, нега? — жувон гапни оқимидан дафъатан шошиб қолган эди.

— Тинчлик-тинчлик, ҳозирча тинчлик, — деди уни юпатиб, — лекин яхши одамларнинг хабарларига қараганда эҳтиёт лозим шекилли. Бу ёқда Ботурнинг тирноғи борлигидан хабар топишмиш.

Жувон бу хабардан чайқалиб кетди. Боши гир айланиб, кўзи тиндими ёхуд аввал кўзи тиниб, сўнг боши айландими, англай олмади. Яхшиям ёнида табиб боракан, унинг қўлтиғидан тутиб қолди.

— Соғ-омонмиканлар ишқилуб? — дея олди титроққа тушиб. Овози қалтираб чиққанини ўзи ҳам сезиб, баттар хўрлиги тутди. — Сиз биладургон одамлардан эшиттизму? Каерда жон сақламушлар?

Қария бир ёнида жувон, бир ёнида болакайни эргаштириб дарвоза томон бораркан, ажабланиб тўхтади:

— Сиз ҳали эшитмаганмисиз, қизим?

— Йўқ, мана неча йилдирки, бир оғиз хабар йўқ у кишидан, — дедиу кўзларидан дувиллаб оққан ёшларни тўхтатолмай қолди.

— Э, балли. Сабрингизга балли, она қизим. Ўша кетганча... дом-дараксизми? — деди табиб азза-базза тўхтаб ва қандай юпатарини билмай кифтларига қоқиб, куракларини силади, — тағинам Аллоҳ ўз хифзу химоя-сида асрабди, қизим, шукр этинг. Қанчалар тўзиб, дунёнинг ҳар чеккаларига тариқдай сочилиб кетмади. Сизларни Тангрим асрабди, ўз маҳфузасига олиб. Билмам, кимнинг бахтига. Балки манави тойчоқнинг бахтигадир ё Ботурнинг омадига. Бунинг учун ҳар кеча, ҳар саҳар қанча-қанча ҳамд айтмоқ лозим Аллоҳга! Шукrona жоиз. Шунда ҳамма мушкулларингизни осон этгай Ўзи, инша Аллоҳ.

— Айтганим бўлсин, узмаганим бўлсин, — деб шивирлади жувон кўзда ёш ила.

Шу баробар кўклам ҳавосидан яшнаб ётган ҳар бир битта барг, ҳар битта ўланни ўпиб-кучиб тоза ел эсиб ўтди. Терак барглари шовуллаб, кумуш капалаклардай қанот қоқиб қўяқолдилар-у, учиб кетмадилар. Балки у кумуш капалаклар ҳам эмас, манави жабрдийда муслиманинг чин юракдан чиққан тилагига омин айтиётган фаришталарга ҳам ўхшаб кетар эдилар.

## 9. ЭГИЗХОН ЁХУД ФАВҚУЛОДДА МАРДОНА БИР

## ТАШРИФ Муаллифагина аён тарих давомига

Улар сафарлари қариб, хўшлашиб чиқишишмоқда эди. Той бола — Ёдгормурод аяжонисидан ажралолмай ҳали у-ҳали бу тарафидан ёпишиб бориб, бир нималарни ижикилаб-сўроклаб ётар, булар эса, оловрангга мойил ойнадек ялтироқ мармар устилаб, бир амаллаб, зинадан тушиб келишишмоқда эди.

— Шошманг, ҳазир бўлинг, Ҳозиқ бува. Қиррасига оёқ қўя қўрманг, — деб юргилаб келиб, қўлтиғидан олган жонсарак эшикбон жувон ўша бўйи жовуллар эди, — расм бўлмай кетсин, шу охонтошлари, оёқ тагига вовси<sup>11</sup> бўлмаскан, шир этиб қорми-нима ёғворса денг, тайёр яхмалак-а! Қиши келди дегунча менинг жоним ҳалак: эски палосми — бир нималар ташлаганим-ташлаган.

— Аллоҳ ажрини берсин, — деди қария унинг кўмагида пастга тушиб олганидан бир енгил тортиб. — Тўғри қиласиз...

Шу асно ёнгиналарида кимдир баралла:

— Ассалому алайкум, тўра бува! — дея тиник Фарғона шевасида салом бериб, тавоғ этгали кела бош-лади.

— Ваалайкум... — дея тараддулланиб қолди қария. Қархисида чақмоқдай кийинган қиличдай йигитлар турар эдилар. Таний олмади дафъатан.

Лекин улар Ҳизрни учратган каби бир ҳолатга тушган эдилар. Бири ҳатто қўшқўллаб кўришмак ҳаракатига-да тушган, бошқаси ийманиб турар эди. Фақат юзлари-ю ўзлари киши адаштириб қўйгудек бир ўхшашки... Ҳасан-Ҳусан дейсиз. Валлоҳ, ким бўлди бу қиличдай йигитлар?

Қарияни тараддулга солган нарса уларнинг бир томчи сувдек ўхшашлигидан ҳам бурун соғ фарғонача кийиниб олганлари эди. Ҳозир учоқдан тушишгану рўпара бўлишаётгандек. Эгниларидағи йилт янги қора лас чопону белдаги белбоғ, бошдаги сатта анжаннусха дўппиларидан — тамоми ҳаммасидан водий нафаси уфуриб турарди!

Йигитнинг сазаси ўлгунча қўчкорнинг шохи қир-қилсан! Ҳозиқ тўрам иқи суйиб жилмайди ва изн берган каби қўлини чўзди:

— Келингиз, қаерлардан сўраймиз...

Тавоғ этишга илҳақ йигит юргилаб келиб, қўлини олди:

— Танийсиз, тўра бува? Мен Иномалиман.

Иномали-Иномали, водийга сочилган қайси хешу ақрабосининг тирноғи экан? Ва улар таниб, биз танимай кетган, валлоҳи аълам?

Эслолмади.

— Узр, қаричилик.

Қўлини қўймай, кафт устларинио билакларини силаб-сийпашга тушган йигит тавозуланди:

— Биз ҳов Сафедбилолданбиз. «Қиличмозор» томонлардан! Эсладизми? Саҳобаларнинг қабртошларидағи ёзувларни ўқигани боргандингиз.

— Дарвоқе-дарвоқе... Сизлар ўша тарафданми? Азизлар ўтган жойлардан-а?

— Худди ўша Сафедбилолдан.

— Эй, уни қаранг-а, ўша табаррук зиёратгоҳдан-а? — У ўша қўп қадим ва табаррук мозоротни, у ерда гоҳ кўтарилиб, гоҳ пастлаб тургувчи сирли оқтошни зиёрат этгандарини, Қуръон тиловатлар этиб, йиглаб дуои хайлар қилганини эслаб кетди: воҳ, қани энди, у жойларни яна тавоғ этиш насиб этса!

— Вақтнинг ўтуви, умрнинг кетувини қаранг-а, уч йил бўлдимикан, валлоҳи аълам?! —

<sup>11</sup> Шевага айланиб кетган ўрисча сўз, умуман, демоқчи (*Муаллиф*).

деди мутаассирланиб.

— Ўша сафарги борганингизга-я? Бултур эмасмиди, Имомали? — деди йигит қўшоғига ўтирилиб.

— Йўқ, бурноғи йилнинг ёзи эди, — деди ийманчоқ қўшоғи, шу давада келиб кўришиб, — билқиллаган кўча тупроғини сатилда қориб, битикларга суртишаётган эди-ку.

— Ҳа, баракалла, тошдаги ёзувларни шунакқиб ўқиганмиз. Рост-рост, — деди қария ҳам.

— Ҳа-ҳа, тошга лой суртган сариз битиклар бўртиб чиқаётуб эди...

Энди улар икки кишилашиб тавоф этишар, мисоли имом Ҳасан, имом Ҳусан каби бўй етган йигитлар, унинг ўша сафарини эслаб, бир ерга этишар эди.

— Начора, шусиз ўқиб бўлмайдиган ҳолга етган экан, у ёдгор битиклар...

Ҳозиқ тўрам бўғизда қайноқ «тош», қўзда аччиқ нам ила қабртошда тирилиб-ажраб чиқаётган лойбитикларни ўқиётган кезларини эслаб, тили ўз-ўзидан дуога айлана бошлаган эди: «Аллоҳ раҳматига олсин, у розийаллоҳу анхумларни, Ислом туғини шу ерга қадар олиб келиб, «Қиличмозор»да қолганларни», дея шивирларди. Энди бу ёғига довон ошиб, бошқа диёрга ўтмоққа келганда орага низо тушиб, иккига ажралган саҳобалар тарихи-воқеаси ҳам ёдга туша қолган эди. Лекин мана бу Ҳасан-Ҳусандек йигитларни қай вақт учратган экан?

— Сиз эсланг-а, қоқ пешин эди. Бизнинг шалдироқ аравамиз, — деди эгизларнинг кичиги, — нақ рўпарангизга келганда ўқи шакқа узилиб тушиб, судралиб қолса, бўладими?!

— Қаний-қаний... — деди қария элас-элас хотирлай бошлаб.

— Кейин биз машиналарингизни сўраб бордик. Оғриб қолган эшонтамизни касалхонага етказиб олайлик деб.

— Э, ўшандами? Эсладим-эсладим. Дўхтир қолиб, уйга қайтарганимни айтасизлар-да? — деди қария йигитнинг елкасига қоқа-қоқа.

— Худди-худди. Биз эшонтамизни тезроқ олиб бора қолсак, деймиз. Сиз уйда хўroz топиладими, айни қичқирадигани керак, дейсиз. Тоза ғалати бўлган-да.

— Аллоҳнинг етказиши-да! Бекорга араванинг ўқи ўша ерга бориб синибдими! — деди қулиб қария.

— Кейин-чи, кейин? Топиб келган хўrozимизни ҳаллослатиб қувлатганиз-чи! — деди йигит.

— Бўлди-бўлди! Танидим! Аллоҳнинг учраштирган жойини қаранглар-а! — деди қария беҳад мутаассирланиб, — Эшон тоға қалайлар? Нафи бўлдими, ахир?

— Бўлганда-чи! Эшонтам сан кўр, ман кўр бўлиб кетганлар. Ўша хўrozшўрва эм бўлиб! Айт, Имомали!

Элакишиб қолган Имомали ҳам бош силкиди:

— Ҳали-ҳали дуо қиласидилар: Аллоҳ менга нақ Лукмони Ҳакимни етказган деб!

— Ё Ҳаллоқул ҳаким! Ҳечам қайталамадими? Озгина безовта этса керагийди, — деди Ҳозиқ бува суриштиришга тушиб.

— Рост айтдиз! — деб тасдиқлади Имомали. — Келаси кўклам қайталаб, безовта этиб эди... дўхтирга ҳам учрамай ўша дориззи тайёрлаттилар.

— Қайси дорум? Мен дору бермаб эдим шекилли,— деди Ҳозиқ тўра хайратга туша бошлаб.

— Йўқ, хўroz шўрвани айтамиз-да. Хуқна қилдирганизни айтамиз-да, — деди йигит.

— Ҳа-а, уми, хўш-хўш?

— Ўшандай хуқна қилдириб ташлаб эдилар, такқа тўхтади-кўйди оғрифи. Ўшандан бери отдеклар. Дўхтиrlар ҳам лол-ҳайрон: кўричакни ҳам тифсиз даволаса бўларканми деб?

Қария ҳакимлардек мийифида жилмайди:

— Тиф чиқмасдан бурун нима қилишибди?! Шундай даволаб келишган-да, болаларим. — Сўнг қайтиш тараддудига тушиб, қўшиб қўйди. — Биз нима, аввало Аллоҳ шифосини берсин! Мендан дуо дегайсизлар Эшон бувага.

— Бўлмасам-чи, бўлмасам-чи. Сизни кўрганимизни айтсак бошлари кўкка етади-ку.

— Ўзлариз-чи? — деди қария мулозамат лозимлигини эслаб. — Қандай шамоллар учуриб бу томонларга кепкөпсиз? Ҳовлига олиб кетай? Бир кеча қолиб, борарсизлар?

Имом Ҳасан, имом Ҳусандайин хусни хулқ әгаси бўлиб етишган йигитлар қўлларини кўксиласирига босдилар:

— Раҳмат, тўра бува, келаси сафар.

— Учратганимдан хурсандман, — деди қария.

— Биз ҳам. Албатта, Эшонтамларга етказамиз дуои саломингизни.

— Аллоҳнинг паноҳига, — деб қайта туриб қария тўхтади. — Дарвоҷе, бу ерда кимингиз?..

— Устоз-домламиз, шу кишини... — деди Иномали жиндек ҳижолатланиб. — Келаси гал, албатта, ўзларини топиб боргаймиз.

— Ҳисоб-ҳисоб. Фақат Эшон тоғаниям ола келасизлар-да. Бизни ҳовлини Севзор томондан сўрайсизлар, келишдикими?

— Келишдик.

— Хайр, Тангрим азза ва жалла ўзи қўллаб, хотиржамлик ато этсин. Хуш қолинглар.

— Хушвақт боринг.

Қария хўшлашиб, улови томон юраркан, йигитларнинг ўзими, бир вақтларгидек соғ қишлоқча ва ҳам чақмоқдай кийинишиларими — кўзига яна оловдек кўриниб, қайрилиб қараб кўйди.

Чиндан ҳам улар бўйсира ёшдан ўтиб, адл тортган, устига устак қўш сарвдек эгиз эдилар, ҳавасланмасдан, йигитлик чоғларни эсламасдан бўлмасди. Тасаввур этди! Айниқса, қора лас чопонларини бир уриб, пешоналарини танғисалару ўзларини эгар устига олсалар борми, кимларга ўхшаб кетмас эдилар!

Ҳов бир гал — худди шу тарз — кимлар келмаб эди, ахир?!

\* \* \*

У асрга ҳозирлик кўриб ёлғиз қавми — боғбонни кутиш баробарида вақтни ўтказмай тасбеҳотга берилган эди.

Ахийри бўлмади. Офтоб ҳовли-боғ ўртасидаги саданинг ярим белига қадар тушиб, бир тоғора чўғда-йин кўз қамаштира бошлаганини кўриб, ичидаги ғулғула қўпди. Корини нима ғафлат босди экан, кечикмасди-ку? Шайтон эса, висирлаб ёзғирап эди: «У ҳам бир тингчи-да, комил мусулмон қайдади?»

Қария оддий бир боғбон ҳақида гумонга борганидан уялди. Уялиб ўрнидан турди-да, бориб очиқ деразадан боғ оралаб келадирган йўлкага қараб кўйди. Назарида такбир тушириб, намозга ўтиши илаёқ бирор ҷаҳони келадигандек эди. Кейинги вақтда кўп нарсалар худди шу тарз — белги бераверадиган бўлиб қолди. Нега, нимадан — ҳеч тушунуксиз. Балки манави оқ уйга қамалиб олиб, узлатга чекинишга мажбур бўлганиданмикан? Яна ким билади.

У ихтимат ила жойнамозни қайта ёзиб улгурмаб эди ҳамки, эшик ҳалқачаси шиқирлаб, остоңада кутган кишиси кўринди.

— Узр, тўрам тақсир, бу ёқда ният қилиб, юргургилаб келаётганлар бор. — У остоңаданоқ маъзурланди,— нафс қурсин, алаҳсимайман дессанг ҳам алаҳсийсан.

Боғбон ҳовучида анжир баргига ўроғлиқ бир ни-ма — нега бир нима бўлсин! — сатта оқ ўрик кўтариб олган эди. Жонивор жаннатни мевасидек бирам бўлуғки, суқинг киради.

— Шумиди алаҳситган?— деди қария жилмайиб.— Оқариб улгурнибдими, қаранг-а?!

Абдуфаттоҳ қори қўлидагини хонтахта устига қўйиб чиқиб, йўлакай тушунтира кетди:

— Келаётсам, бир сайроқкуш ўрик тепасига қўнволиб, шу биёв-биёвляяпти, шу лақовлақовляяпти! Тўхтама-чи! Махлиё бўлиб қопман. Роса зингил солиб қарасам денг... оқ ўрик гавҳардайин товланиб ётибди! Жиндек териб туша қолдим. Омонлиқ-сомонлиқка-да, тўрам

тақсир.

Қариянинг хаёли қочди: қаранг-а, ёз келиб қопти-ку! Умрнинг ўтувини кўринг. Кечагида опкелишмаганмиди бу гўшага?!. Яхшиям ёлғиз қавми — шу боғбон бор. Бўлмаса, бундек ёзилиб гаплашадиган одам ҳам топмай нима қиласди? Шу боис тегишиброқ замзама қилди:

— Думбулдур ҳали? Оқара турсин эди, ўзингиздан бўлакни кўзи тушмаган экан.

— Қайда! — деди қори химарилган енгларини тушириб, такбирга шайланаркан. — Оқ ўрик оқарадио ётиб уйқу келадими?

— Кимни айтасиз?

— Каминанинг ўзлари ҳам-да, — деди қори уятлу кулиб, — кўз қурғур қачон тўйган?! Тўйганми ҳеч!

Унинг ўрикни теришга териб тушиб, энди ўзини «савалаши», нафсини оёқ остига олиб пийпалashi бир чиройлув эди...

Тўрам «ёлғиз қавми»ни суйиб кетди! (Тингчими деб гумон қилиб ўтирибди! Қани, шунақа тингчилардан юзтаси бўлса! Ҳаммаси ила қиёматли дўст тутинарди!)

— Бекорга кўздан нарироқ қўймадим денг?!

— Ҳа-да, ўртада шайтон бор, ҳар нарсаларни чиройлув кўрсатадурган. Намозни ҳам намоз қилмасин.

— Айта қолинг, бўлмаса, фаришталарни ҳам маҳтал қилмай, — деб у изн берди ҳам, қори камдан-кам кишиларга насиб этадурган бир ширали овозда такбир тушира кетди ҳам.

Сўнг намоздан фориғ бўлишлари ила қори хайр-маъзурга тушиб, кетишга изн сўради. Ўтадиган ери бор экан:

— Узр, шомда ёлғиз қолсангиз,— деди аллатовур хижолатга тушиб.— Етиб келолмайманми, деб қўрқаман.

— Хуфтонни ҳам насия этманг, — деб кулинди у.

— Худо асрасин. Қаерда бўлмайин, етиб келгайман. Бирга ўқигаймиз.

— Иниша Аллоҳ денг, — деди у.

— Худо хоҳласа, — деб чиқди боғбон.

Аллоҳнинг эрта ранг олиб, оқарган неъмати ёидан ҳам кўтарилиган экан. Бир муддат зикр айтиб ўтириб, китоб кўргиси келдию, ичкари қараб юрди ва хос меҳмонхона олдидан ўтаётиб, хонтахта устидаги ажаб оқ-сариқ гавҳарларга кўзи тушиб, нима бўлса экан, деб хаёлланди. Гавҳарларнинг ҳар бири зарғалдоқ қуш тухумидек бўлуғ ҳам жиндек сариқка мойил эди. Тагида шапалоқдек барг. Тўрам ўша баргдан таниди: дарвоҷе, жаннатдан тушган дарахт — анжир барги-ку. Қорим илингандарини нимага ўраб келибди?!

Бурилиб киришила аввал анжир баргинингми, унинг учидан оппоқ сутдек сизиб чиқиб колган ширасинингми ҳиди гуркираб, димоғига урилди.

Валлоҳ, у Каъба ифорларидан қолишмас, кишига аллақандай хуш ёқиб борар эди. Жаннатдан тушган деб аталмиш бир дарахтнинг ҳатто ёлғиз бир барги (узулганига қанча бўлганига қарамайин!) асл ватани — жаннат ҳидини уфуриб-гуркираб ётар, у одам боласига таниш, наинки таниш, азиз туйилиб бормоқда эди. Шунинг ўзи Аллоҳ ягона, Расул барҳақлигига, китоблари чин, жаннати — тайин эканига нишона эмасми? Бўлмаса, инсон бу ҳидни қаердан танирди, минглаб бўйлар, ифорлар орасидан ажратиб, жаннат ҳиди-я, дея оларди?! Ўша жудо бўлган асл ватаннинг бўйларини танишга-да қодир этганига шукр.

У ҳозир ўзи азиз билиб турган бўйни яхши фарқламоқ учун ҳам ёзниг тўнғич неъматларидан биттасини қўлига олиб, димоғига яқин келтирди. Оқ ўрик оқара бошлагани билан ҳали думбул эди, асал ислари гуркираб эмас, базўр келар, аллақандай нимтатир эди. Балки икки паллага бўлса, гуркираб кетар, ичидан етилиб келаётгандир? Омонлик-сомонлиқка арзир?!

У ўрикни иккига бўлаётган кезда пешайвон эшиги очилиб, оқсоқ Опой кўринди. У ўрик

бўйини туйиб улгурди, холос.

— Ишанта, Сиза келишкан икан. Кўнғироқ итиша,— деди остонадан ўтмаёқ.

У ажратиб улгурмаган ўрик палласини қайтиб ёпди: насиб этмаса шу-да! Сўроққа олиб кетишимаса гўрга эди. Ёз неъматини жойига қўйиб, бошини қўтарди:

— Ким, дейишадир? — деди атай ирим қилиб. Ўзи эса, нима дейишадир деб сўрамоқчи эди.

— Йў, ишанта, саҳиблар имас, зияратқа килишкан имиш. Қопқадан сўраша.

— Кўргани? Қаердан экан? — деганча чиқиб бора бошлади.

— Ата журттан, диемишлар. Анжанданму, қаердан имуш.

Ота юрт — Андижондан? Кимлар экан? Ёдига хов бир йилги узоқ меҳмонлар — ҳаждан қайтишибди, экан, деб зиёратга борган амакиваччалари келди. Ўшалармикан? Улар бўлмаса, уруғларидир.

Қариянинг юраги ўйнаб бормоқда эди. Валлоҳ-валлоҳ! Наҳот ўша узоқ аймоқлари топиб-суриштириб келишаётган бўлса? Яна ичига ғулу оралади: балки шундай ўрон билан кимдир кирмоқчи бўлар?

Изн бермай туриб суриштириши, сўнгтина рухсат этиши ҳам мумкин эди-ю, ёмон фол олгиси келмади: Номини атаб келишибдими, киритиш керак! Ким бўлишларидан қатъи назар.

— Айтинг, қўйвора қолишин.

Опой симнинг у бошида турганларга жавоб қилиб, меҳмонхонани тартибга сола бошларкан, оқ ўрикка кўнгли бир суст кетдию, лекин дамини чиқармайгина таглиги или тақсимчага солиб, юқорига олиб қўя бошлади.

Буни қўриб турган қария унинг покизалигидан ийиб:

— Олинг, биттасини, омонлиқ-сомонлиқ, қолгани меҳмонларга ҳам етади, — деди. Ичida эса, талбия айтарди: Фасубҳаналлоҳ, ўшаларга насиб этиб турган эканми?!

— Раҳмат, Ишанта, — деб Опой биттагинасини ола бошлаб эди, ярим палласи ажраб чиқди.

— Бутунини олинг, бутунини, — деди қария, ўша қўл ургани ўзига насиб этишидан умидвор бўлиб.

Опой уни тушунмади:

— Қайтага таварик икан. Розу бўлинг, ихлос эттум,— дея қолган палласини-да олиб, не ниятда хушланиб исқади.

Тавба, ана шундан кейин ҳам ризқ бергувчи Аллоҳ эканига, бировнинг насибасига бирор эга чиқолмаслигига ишонмаймизми? Ким ўйлабди, Абдуфаттоҳ қори омонлиқ-сомонлиққа териб тушган шу бир ховучгина неъмат қандин-қаёқдан келадиганларга аталган деб! Насиба тортиб келаётирлар, қараб туринг, деса ким ишонарди? Ва чиндан ҳам улар кимлар экан?

Тўрам пешайвонда эди. Теракзор таги билан келаётган сатта бир хил кийинган, қора чопон, чўнг дўппили кишиларни қўриб, ғалати бўлиб кетди. Чиндан қишлоқ томоннинг одамлари-ку! Ундей деса... чопонлари йилт янги. Ё шаҳар боряпмиз деб, сатта охорликларини кийиб чиқишиганми? Куёв ошига келаётган жўралар мисоли яна бозорликларини ҳам қўтариб олишибди! Ичida битталари ўрта ёшлик демаса, қолганлари — қиличдек йигитлар эди. Анжан томонларда бу тоифа қандай хешлари бўлса экан?

Қирққа бориб эси кирган анув амакиваччасимикан? Бир кун тушида эшон бува «Китоб қаерда биласанми, ўшани ол-да, ўқи, юрма бундай», деганмишлар. На хат, на китоб танийдиган одам эртасидан ўқиб кетганмиш Қуръонни. Ўшамикан? Амакилари раҳматли таги анжанлик эканликларини айтиб ўтиришар-у, хешу ақраболаридан оғиз очиши масди. Ўшалардан қай бирлари кўнгил сўраб келишмоқда экан? Ёхуд Тангритог томонларга ўтиб кетиб, жанг жадалларда бедарак йўқолган хешларини сўроқлаб юрганлар дарагини эшитиб, келишаётирми? Қора чопонлик беозор кишилар қиёфасида? Кошки тингчилар жим турса?

Уларнинг сатта бир хил кийиниб, қишлоқи одамлар қиёфасида ташриф буоришилари ғалати эди: «Эл-бурутдан кўнглига бунча ғашлик ораламаса? Жон эгамнинг қўлида-ку, ахир. Олар

бўлса, охуннинг қўли билан ҳам, анув олиб қочган учоққа етмасидан бурун ҳам олиб қўя қолар эди-ку. Куни битиб, қазоси етган бўлса, ўша алам-аччиқ устида Олампаноҳга хат битган куннинг кечасидаёқ олиб чиқиб, Бўрижарнинг қай бир ёқасида отиб ташлашмасмиди! Отмадиларми — энди нимадан қўрқади! Унинг кўз ўнгидан ўша оқ илон — Жамолохунни ҳайдаб чиқарган кездаги ҳолатию, алам-аччиқ устида хос хонасига кириб бориб, қофоз-қалам олганича туриб қолгани кетмасди.

Асташкируллоҳил азиму ва атувби илайхи!

Аллоҳ уни қайси иқлимнинг тупроғидан яратибди эканки, ҳақсизликни кўрган заҳоти қай ҳолга тушмаса! Бамисли у бир қават эт ташлаб, тақдирнинг ҳукмига кўнган асиран тамомила бошқа одамга — мужоҳидга айланиб улгурган эди. Вужудини айтинг! Ҳар битта тики бамисли бир қилич бўлиб, тикка бўлган эдилар!

Уни ким деб ўйлаган эканлар??

Тилсиз, забонсиз бир қурчоқ, мўмин-муте бир рикоб, бир хуфия дебми? Хизматини ўтаб бўлгач, ими-жимида гумдан этиб юборса бўлвергич? Эсиз, қурилган салтанатлар шарафи, тўкилган у қонлар жавобини ким бергай? Қолаверса, лафз қаерда қоляпти, субут қаерда қоляпти?! Аҳд-чи, унга садоқат-чи?!

Йўқ. Унинг кўзига жони кўрингани йўқ. Албатта, жон ширин. Лекин ўша дақиқада кўзига тамомила бош-қа нарса кўринди: шунча ишни қилиб, давлат қуриб, адолат ўрнатиб... охир-оқибат уй қамоғида бешараф бир ўлим топмоғи... кўриниб кетдию ичидан адолатли бир шуур бош кўтарди: ким ўзи одил?! Лафзида туриб, Тангритоғ ҳукуматини курган, у жабрдийда диёрга озодлик насимини олиб кирган уми ё вазифаси битди деб, бир кечада ўғирлаб келиб, уй қамоғига тиққанларми? Ким? Одили Замон ҳисобланмиш Олампаноҳнинг ўзи-чи? Бехабарми бу ишлардан? Унинг изнисиз тонг отгайми ўзи бу диёрда?

Ўша ҳолатда, қизигида унинг номига тик туриб, бир хат битди: «Э, воҳ, жаҳон айвонида адолат шевасида гаплашгучи зот қолмабдими экан?!

Меним билганим — адолатпаноҳ Амир Темур Кўрагонийдан сўнг, Шомилдан сўнг ёлгиз ўзингизми, дегувчи эдим! Бошқасини тан олмасдим! Ихтимат ҳам қўймагандим!

Энди билсам, бу топшириқлар қайдан келмоқдаю кимнинг изни билан адo этилмоқда экан, агар ўшал Адолат боргоҳидагилар тамоми бехабар бўлсалар?! Уларнинг номидан иш кўргувчилар, иши юритгувчилар хоҳлаган пайтлари бутун бошли халқлар, эллар, элатларни ишионган тоғларини ийқмоқлари, сорбонларини териб олмоқлари, ўзларини етим қолдирмоқлари мумкин экан-да?! Унда Сиз — Одили Замоннинг бурди қаерда қолди? Адолати қаерга етди? Эртага тарих олдида нима деб жавоб бергайсиз ва ким бўлиб қолгайсиз?..»

Нима деб ёзса ёзди, фақат шафқат тиламади. «Аллоҳнинг ёзугидан бўлаги — бўлмагай!» деб тутатди. Фақат хат қўлдан кетиб, аллақачон телеграф биланми, литер биланми, қайси йўл билан бўлсин — Олампаноҳга етиб бўлганида унга бор ҳақиқатни кўшмагани хотирга тушди. «Узр, каминадан ноқислик ўтибди. Қодири Эгам ёлгиз бир зотгагина адолат мезонида маҳкам турмогу, лафз қилса, лафзи устидан чиқмоқ фазлини берган, адолат шевасида гаплашмоқни насиб этган экан! У ҳам бўлса, бизнинг шафоатчи пайғамбаримиз Муҳаммад саллаллоҳу алайҳи вассалламурлар», деб қўшгиси келди. Аммо кеч эди. Кемтик, ноқис хатга ҳеч нарса қўшиб ҳам, уни қайтариб ҳам бўлмасди. Лекин хат ўша ҳолида ҳам нишонга бехато теккан эди.

Олампаноҳдан имдод бўлдими, бошқасиданми, эртасидан муносабат тамоми ўзгарди: аввало, неча қават соқчилар (ташқи дарвозадагисидан тортиб, оқ уй атрофидан жилмайдиганигача) бир кечада йўқолди. Галати бўларкан: оқ уй аллақандай салобатини йўқотгандай, хувиллаб қолгандай эди. Тунлари таҳоратга ҳам бехавотир чиқаётib эди, энди қандай бўларкан? Қолаверса, шунча машмашанинг сабабчиси (ўша панд бермаса, бу хат қайда эди!) анув шилпиккўз — нақ оқ илоннинг ўзи — Жамолохун ҳам кўринмай қолди. Суриштирса, (каранг-а, Опой ҳам билмас экан, бориб аниқлаб келди) — бўшаб кетганмиш. Ўрнига шу

маҳаллалик ўрта яшар жувон бир чиройли овқатлар пишираётганмиш.

Ё қудратингдан, қозон-товоқни шу ернинг одамига ишонса ҳам бўларкан-ку. Ҳаммасидан ғалатиси-индинига «қуда томон»дан (нақ Московдаги идорасидан!) одам учиб келди. Ўзиям сибирлик экан, бўй деган шифтга етади. Эшиқдан энгашиб кирди. Орқасидан йўл кўрсатиб келган киши унинг олдида ушоқ боладек эди.

Унинг таҳорат олиб келаётганини кўриб, ўша ҳақиқий Иван бу ёқдаги (унинг олдида ушоқдек) қозоқисини тўхтатиб:

— Кўятур, ўқийдиганини ўқиб олсин,— деганини эшитиб қолди,— Сенлар билмайсан,— дерди давом этиб у,— булар зўр халқ — мулла халқ. Қанчаси Сибирнинг лагерларида ўтиб кетди. Намозини ташламай. Ҳалиям ўқияптими — зўрлиги шу, — дерди.

Ол-а! У ҳам зўр экан, тошига яраша экан, сибирлик айиқнинг боласи. Ўша сибирлик (харқалай аждоди яқин — Энасойнинг сувини ичиб ўсган!) ҳалол экан! Бошлаб келган қозоқ-ўрисга ҳалоли гапни айтиб кетди:

— Бу киши бугундан эътиборан шу мамлакатнинг фуқароси. Бир фуқаро сифатида ҳамма хуқуқларидан фойдаланишга ҳақли. Фақат жой ажратилгунга қадар шу ерда яшаб туради, — деди.

Ўзига эса:

— Табиб экансиз, бемалол табибчилигинизни қилишингиз мумкин. Сизни қўргани келувчилар ҳеч истисносиз ҳузурингизга қўйилади. Фақат мамлакатчилик — одам йигмайсиз, хукуматга қарши чиқмайсиз. Бир фуқаро сифатида уй-жой қилиб яшашингиз таъминланади. Хоҳланг буни Московнинг инъоми деб тушунинг, хоҳланг, Худонинг марҳамати. Тангритоғингиздан айирганимиз учун бизни маъзур тутгайсиз. Сизни қайтиб безовта этмагайлар. Омон бўлинг, — деди.

У омонлик бериб кетганига неча кун бўла қопти? Ана, қаердан эшитишган — турнақатор бўлиб, қўргани келишяпти. Яна қаердан — ота юрти — Андижонданмиш.

Улар гулзор ёқалаб эмас, қоқ ўртадан кесиб тушган бетон йўлка ила аллақандай бегонасираб ва ҳам хушёр тортининқираб келишмоқда эди.

Балки чиндан бобокалонлари юртидан келишмоқдадир. Ўша тоғлар канораси орасидаги саҳобалар қадами етган водий-диёрдан. Бобуршоҳдек бир одам умр бўйи «не хатолик ўттиким» деб қўмсаб ўтган маъво — «анда жоним қолди»дан. Дарагини эшитиб, оқибат кўрсатиб, дуои саломлар келтиришмоқдами?

Тангритоғдан ўғирлаб кетишгани овозаси ўшоқларга-да етибдими, тавба? Овозаси-ку, етар, лекин бу ерда шоҳона уй қамоғида ўтиргани қайдан маълум бўла қолибди? Кишини ўнгайсиз ҳолга соладигани ана шу эди. Аммо дарагини эшитибоқ, суриштириб келишаётгани қўп улуғ иш. Алҳамдулиллоҳки, бу юртда оқибат, ҳамият деган нарсалар йўқолиб битмаган экан. Шунисига-да, шукр, ҳали ҳам ўзиникилар ўзлигини йўқотмаган экан.

Тўрам тақсир шу таскин-тасаллилар билан ичкари юраверди: Имомликка ўтганида эгнига илганини одмироғига алмаштириб кўрингани ҳам маъқул. Тағин Тўрам хукуматдан айрилгач, бу дунёдан этак силкиб, тоза такводор бўлиб оптилар, деб юришмасин...

У шундай хаёлларга боришга борди-ю, ўз истиҳоласидан ўзи уялди.

Тўғрироғи, Аллоҳдан уялди: Эгам ўзи кўриб турибди-ку, бутун ҳолу ҳолатини. Тақводан бўлак тўғри йўл қолмаганини англаш, барчасига этак силкиганини. Яна нимани яширади? Аллоҳдан яширмаганини нега бандасидан яширмоқ керак? Ўзи дин фаҳмини берибди, имонимизни ҳам ўзи басаломат этсин.

Имомлик либосини (ахир Абдуфаттоҳ қори билан аср ўқишигандан кияқолувди, ҳамиша кийиб юрибдими!) алмаштириш фикридан қайтганда йўлақдаги бўй баравар кўзгуда саллаю тўн ўзига чиндан ҳам бўлакча нуронийлик — ўзи хаёлга-да келтирмаган бир нури сафо баҳш этиб юборганини кўриб, меҳмонларга бундай кўринишдан рости, қисинди. Сипороқ кўринавергани

маъкул. Лекин энгил алмаштирар экан ҳам бояги суврати, тўкилиб турган нур кўз ўнгидан кетмасди. У нима бўлса экан? Ё ажаб, ўзи ҳам сал чўкиб, улға-йибдими? (Кўзига ўша мункиллаган ҳазрат суврати кўриниб кетди!) Ё Қодир Аллоҳ! Бу неси? Нима бу? Барча Астробод бўлғанларга хос ёзуқми? Ёлғиз асо етмаётир, холос. Астағириуллоҳ! Ҳазрат қайдаю биз қайда! Суврат ўхшагани билан (хов!) сийратга йўл бўлсин! У зотнинг олдида биз кимбиз?! Гуноҳларимиз тоғча, хатоларимиз соч толасидан кўп. Кечирса, ёлғиз Аллоҳ кечиргай, холос. Ичида беихтиёр илтижо айтди: Мурод дорам — умидим бор, ўзига осон, ўзи кечирсин!

Балки тақво деганлари шудир! (Ахир, ўзим дин нурини бераман дегани-ку). Бу фикрдан ичида бир қўрқувми — нима уйғониб, вужуди жимирлаб келди: тоғ қадар ёзуқлари туриб, Аллоҳим гуноҳларидан ўтибдими — қарами шунчалар кенг эканми унинг?! Мағфират этгани рост бўлсин, илоҳим, биз ожизу нотавонларни, адашиб улоқсанларни.

Тўрам одмироқ деб мовут чакмонию чорбурчак такя кулоҳини эгнига илган бўлса-да, қайтаётib кўзгуда оддий табибни эмас, негадир ҳазрат мир Алишерга яқин киши сувратини яна кўриб, ҳаялланди: йиллар шунчалиқ, оладиганини олиб кўйган эканми? Кўнгил қаъридан нималар ўтмасди: вақт ўз билганидан қолмасакан-да. Во дариғ, инсон ҳеч бир ўйлаганига етмасдан мўйсафидлар қаторига ўтиб турса. Яна камига мана бундай уй қамоқларига тушиб ўтирса. Унда ўша довондаёқ кўринган маҳлуқ тилка-пора этиб қўя қолмагани, йўл берганининг ҳикмати не эди?.. Ҳай, дариғ, не ниятлар ниятлигича қолдими?

У пешайвонга қайтиб чиққанида келаётган хешлари (танимагач шундай дейди-да!) ичкарига киришга кириб, далага киядурган сариқ кўн этикларини ечишни ҳам, ечмасни ҳам билмай, алағда турар эдилар.

— Ассалому алайкум, мозор босиб келган азизларим. Хуш келибсиз!

Тўрамнинг тақводор қарияларга хос илк саломи меҳмонларни бадтар гангитган, бунинг устига улар шунчалик тез ва осонлик ила бу зотнинг қабулига мушарраф бўлишларини ўйламаганларидан (рўбарўларида — ким-ким — тўрам тақсирнинг ўzlари, ўша Тангритоғда салтанат қурган давлатманд одам (!) турадилар, ахир!) шундан ҳайратга тушганча тушиб, тиллари алилла келмай қолган эди.

— Ассалом... — дейишди улар ҳам чала ярим, ўзларига кела бошлаб.

— Ие-ие, киравермайсизларми, жигаргўшаларим? Оёқларингиз гарди қайси диёрники эканки, тортинасиз! Тоғлар нафасини олиб келган қадамларингизга ҳасанот. Ўша ғубори — кўзларимизга тутиё бўлсин. Қани-қани, келинг-чи, бир бошдан кўришиб қўяйлик-чи, воҳ, — деб қучоқ очдию, яқингинасида турган кулча юз, патак соқолли киши довдир-совдир қадам ташлаб, илгаритдан танишдек, елкасини эгиброқ кела қолди. Сўнгги дақиқада тўрам унинг (қошларими, қовоқларими) аллақаери кимгадир жуда-жуда ўхшаб кетишини илғади-ю, лекин кимга — эслай олмади. Негадир унинг ҳам қабоқлари боя кўзгуда кўринган ҳазратнига ўхшаброқ кетарди, тавба.

Уни бағрига олдию, тўнига солинган янги пахта ислари хуш ёқиб, юзларини суйкай-суйкай қайта-қайта искаланди:

— Оҳ-оҳ, ота юрт ҳидларини ола келган сиз азизлардан ўргилай. Биз жигар бўлиб боролмагач, ўзингиз кепсиз, қадамларингизга ҳасанот.

Бодомқовоқ меҳмон патак соқолларини соқолилю юзига ишқаб, қулоқлари тагидан искаланааркан, иссиқ нафаси қулоқ юмшоқларига урилиб-урилиб:

— Танимадингиз-а, тақсир? — деб сирлидан сирли шивирлади.

Чиндан ҳам бу қора соқоли бодом қовоқларига унчалик ҳам ўтиришмаган меҳмон... ким бўлди? Киши кўзига бўлмасин тағин... бу соқол, бу энгил-бошлар?

Юраги шиф этди: унда ким бўлуви мумкин бу келганлар?..

Шу асно у қучоғидан бўшалиб-бўшалмай кейинги меҳмон хўшлашмоққа юзланди.

Буниси тепа лабининг устига қалдирғоч қанотидек нозик мўйлов қўйган йигит эди. Ипга

терилгандек бу мўйлов унга шундай ярашиб тушиб, юзини очворибдики... ўша юзидали, анави ўтли қора кўзларидами, кишини шоштириб қўядиган бир шахд-олов бор! Балки ҳаммаси қўшилиб, унга шундай алоҳида бир шижаат баҳш этаётгандир. Ишқилиб, буларнинг бошловчиси шу — ўнта бўлса, ўрни бўлак, қирқта йигитнинг ичидаги бек саналгудек мана шу азаматга ўхшар эди.

Фақат ўша нозик муртию — четлари аллақандай йилтираётган пешонасини танғиган қарғашойи қийигини демаса, кимгадир ўхшабам кетаёттир. Кимга экан — тўрам ҳеч эслай олмасди. Аммо тўнини бар уриб, ўзини эгарга олсами, нақ улоқчи!..

Ҳозир ана шу «улоқчи» бир ғалати энтиккан кўйи унинг кўксига сингиб кетгудек бўлиб, қулоқ таглари, мўйин бўйларини искаланиб тўймас эди. Ва шу кўйи мутаассир бир ҳолда сивирлар эди:

— Бормисиз, Хондода?! Биз ишонган тоғлардан кийиклар чиқмайин қўйди десак... Сиз бу ёқларда экансиз-ку, давлатпаноҳ?

Эвоҳ! Таниш сас, таниш овозлар-ку! Сўнгги қабулида бўлган ўқтам йигит — шу эмасми? Овози бунчалар таниш?..

Сўнгги фармонга имзо чекишдан аввал кимлар билан учрашиб, маслаҳатни бир жойга қўймаб эди?! Ўшалар-ку. Ўша вилоят вакилларидан бири-ку. (Фармонни сўзма-сўз эслади): «Лашкар, фармонимизга шай туриңг. Ҳали нажот кутиб ётган неча вилоят бор. У мазлумлар озод этилмагунча Тангритог озод эмас! Шундай кун яқин, кутинг!»

Афсус, иншааллоҳ дейилмаган экан. Худонинг хоҳлагани бундоқ чиқди!

Қариянинг ичи антар-тўнтар бўлиб келиб, ўзини ғалати беҳол сезди-ю, «Ботур, Сизми?» дейишга мажоли етмади.

— Кейин иним, кейин... — деди Ботурнинг қучогидан бўшалишга унналди.

Қолаверса, бу ер ўзни танитмоғу бағирни бағирга бериб, ўтган ишларга кўзёш тўқадирган жой ҳам эмасди, мавриди ҳам. Бу ерда деворнинг ҳам қулоғи бор. Овоз ютгич, гап узатгичлари, хос тингчилари қанча экан! Ҳеч ким меҳмон ўз оёғи билан келибди демайди. Ҳамонки жаҳд этиб, мозор босиб келишибдими, ичкари киравермоқ керак. Ҳар қанча гаплари, меҳрлари бўлса, ўша ер тузук. Нокасу ножинслардан панароқ, кўздан нарироқ.

Қиста-қистов, мулозаматлар билан ичкари кирдилар. Ўтирдилар. Мозор босиб келган меҳмонларнинг қадамлари шарафига дуои фотиха бўлиб, енгил сўрашиб олдилар. Тўрам бошламасига (Опой чой опкиргунча) тақсимчадаги бояги «омонлиқ-сомонлиқ»ни ўртага қўйдилар:

— Қани, меҳмонлар, ёзни олди неъматига қарангиз. Аллоҳ насибангизни қўшган экан. Ҳар кимга ҳам насиб этсин-чи. Қани, мана, мен бошладим.

Битта-битта олдилару ким хидлаганча, ким кафтига қўйганча Оллоҳнинг мўъжизасидан хушҳолланиб қолдилар.

— Воҳ, Тошкентнинг оқ ўриги-ку, — деди бояги бек йигит сархуш тортиб, — машҳури жаҳон, — деди у негадир ва қўшиб қўйди, — Биз унинг данагини ошпичоқ дердик. Фақат банди етишмасди.

— Кеча эслаб эдингиз-а, сарҳаддан ўтаётуб. Бугун етишиб турибсиз, хўжам, — деди қора соқолли ҳайратланиб. — Аллоҳ деган йигитсиз-да.

— Насиба чақирса шу: келар Шому Ироқдан деганлар. Олингиз, омонлиқ-сомонлиқ, — деди Тўрам ва ўзи ярим палласини бисмиллоҳ ила оғзига соларкан, чиндан бол таъмини тутгандай бўлди.

— Бизда ҳали ғўра-ку, жонивор бу ерда ҳол тортганини қаранг, — деди учинчи меҳмон. — Бу томонларга офтоб аввалроқ чиққайми, тавба?

— Кейинроқ чиқса-да, тўсгувчи музтоғлари йўқ, — деди бошқа шунқор йигит маъноли қилиб.

— Ҳа-ҳа, ҳаммаси ҳам аввал бу диёрда етилиб, сўнг у ёқда ҳол тортади, — деди Тўрам ҳам. Худди инқилоб каби демоқчи бўлди у.

Бек йигит уни тушуниб, гапини менгзаб кетди:

— Қизил аждару оқ аждарлари қўйиб берса агар... Тангритоғнинг ҳоли шу экан-ку.

Гапнинг бир учи ўзига қайтиб, теккан эди, Тўрам бир сўлиш олди-ю, сездирмади.

Мавриди келади, ҳали ҳаммасини тушуниб етгайлар. Барчаси ўз феълимиздан. Феълимизга қараб Худонинг ёзмиши бу, демоқчи бўлди-ю, айтмай ичига ютди. Ҳаммага ҳам тушунтириб бўлармиди: айбдор киму Худо нимани хоҳлаб турибди?!

Шу орада оқсоч дастурхонга бозорликларни опкириб, чой келтирди. У киши кўзига меҳмонларни қистади:

— Қани, олингиз, мозор босиб келган нарсалардан. Бу ёғи бизники бўлди. Манави, Анжанни лочирасими, жизза солиб ёпилган? — деди атай.

Қора соқолли уни тушуниб, (бу гап Опой учун эканини билиб):

— Шундоқ-шундоқ, хонадонда ёпилган, тақсир, — деб жавоб қилди.

Тўрам гапни улади:

— Ўзларидан сўрасак, у диёрнинг қаеридан бўлгайсизлар? Ва қайси узилишиб кетган хешларимиздан...

Келган меҳмонлар ундан-да сезгир эдилар, киши билмас кўз уриштириб қўйиб, жавоб қилдилар:

— Хешлик жойимиз шўттаки, — деди ўша қора соқоли бодомқовоқ юзига унчалик ўтиришиб тушмаган, аммо мулойим товушлик меҳмон, — биз ниҳояти сизнинг ихлюсмандларингиз.

Бўш патнисни кўтариб, Опой чиқа бошлади.

Хозиргина ота юртдан, хешларимиз деб турган кишиларнинг бу жавоби ғалати эди. Оқсоч ҳар хил хаёл-ларга бормасин, деб Тўрам сипоришилади:

— Ҳа-я, табибилигимиз важиданми?

— Шундай-шундай,— деб шунқор йигит уни қувватлади,— у ёқларда Сизнинг довруғингиз бўлакча, тақсир. Аммо етишмоқ, кўриб турибсиз, душвордан душвор.

Бу вақтда Опой узокиб, ҳатто шиппаги товушла-ри-да эшитилмай қолган эди. Шунда пойгакда ўтирган тўртинчи меҳмон бек йигитга маъноли қаради. У эса:

— Майли, ёпа қол, — деб қўшиб қўйди, — шу укамиз елвизак билан чиқишиб кетолмади-кетолмади-да, табиб бува. Давоси музни тешиб, бир чўмилмоқ десам, ҳеч ишонмайди. Айтинг Сиз...

Бу гаплар йўлига эканини ҳаммалари фаҳмлаб туришгани учун Тўрам кулиб қўяқолди:

— Музтоғда уч ой — қиш қолиб кетса, умрбод акса урмайди.

Улар бир-бирларига ялт этиб қараб олишди:

— Сиз... ўша тоғда қолиб кетганиз — чинданам ростми? — деб юборди пойгакдаги ушоқ йигит ҳайратини ичига сиғдиролмай.

— Йўқ, у довонда бир кеча тунаб қолганмиз, холос. Лекин ҳеч кимни — қиши билан қолиб кетгулик қилмасин,— деди Тўрам, сўнг тушунтириди,— камина у диёр-га ўша шарафли, машҳури жаҳон довон билан ўт-дим-у, қайтишим ўзим ҳам кутмагандан бундай... чиқди.

У дастурхон попугини ҳимарганча ўша қайтиш қанчалик аламли кечганини эсларкан (ундан ўша Музтоғда умрбод адашиб-улоқиб қолиб кетгани афзал эди! Аммо буни энди кимга айта оласан?!) рўбарўсида ўтирган бояги бек йигит чўқкалаб олаётуб, бошидан кийифиними, нимасини ечиб олди. Таранг сирилган бир нима читирлаб-да кетди. Тўрам бошини кўтариб, қархисида тамомила ўзга йигитларни кўрди.

Бек йигитнинг қарғашойи қийифи тиззасида ётар, ўзи дўпписини ажратиб киймоқда эди. Энди у ўша чаккасида алифдек чандифи бор (мўйлов-пўйлови ҳам йўқ!) чапани йигитга

айланган-қолган эди.

— Ие, Ботур, ўзизми?

— Ҳа, менман, Хондода. Хизматингизга етиб келдик, мана, — деди у ўзини қайта танитаётгандек қаддини ростлай бошлаб.

— Ё Қодир Аллоҳ! Айтувдим-а, қаердан таниш булар деб... — Тўрам ҳам тўлқинланиб тура бошлади. — Келинг, бундай кезда қайтиб кўришмоқ лозим, тавоф этмоқ лозим. Кутмагандим, кутмагандим...

Улар қайта топишган ота-боладек, пиру муршиддек қучоқлашиб кўришарканлар, Тўрам Ботурнинг куракларини силаб-сийпалар, бир оғиз сўзига илҳақу шай йигитларини эслаб, кўзлари намланиб кела бошлаган, ўзи мутаассирланиб:

— Ох, мани довқурларим, суюнган тоғларим, шу ергача топиб келдингизми? — деб шивирлару бўғзиларига нимадир тиқилиб, у ёғини айтольмас эдилар.

У эса, ўша довқурлиги — ушлаганини кесиб айтиши қолмабди, боягидек қулоқ тагларию энса бўйларини искаланаркан, бағридан бўшатмаёқ айтадиганини айтиб қўя қолмоқда эди:

— Топиб келдиккинамас, олиб кетгани ҳам келдик, Хондода.

Тўрам уни бағридан аста бўшатиб, юзларига термулди:

— Қандай, Ботур?

— Сиз хўп десангизоқ, бас, — деди Ботур ўзига ярашадиган бир қатъият ила у кишининг тирсакларидан тутиб. — Нима, улар қилган ишни биз қилолмаймизми?!

Унинг шахтидан Тўрамнинг юраги бир қалқди: қани эди, қанот чиқариб, учолса, у етим қолган диёрга! Учолмайди, қанотини таг-тагидан қирқиб ташлаганлар! У бизнинг қушимиз эди деб! Энди борган тақдирда ҳам кимга исботлай олади Озод қуш эканини?!

— Бир оғиз сўзингиз, Хондода, — деди Ботур қайтариб ва бўлди, деса, ҳозироқ ишга киришадигандек.

— Ботур, Сиз бегона юртдасиз, қолаверса, мен... — деди Тўрам ўтириб хотиржам гаплашмоқ лозимлигини англаш турса-да, ўтирмоққа-да сабри дош бермай. Аммо Ботур фикрини тугатмоққа қўймади.

— Нималар деяпсиз, Хондода? Бу менинг ўз юртим. Мен унинг ҳар тош, ҳар ўнгирини кезиб чиққанман. Бу диёрларга сифмай ўшал Тангритоғга чиқиб борганбиз.

— Уни қаранг, хижрат этибми? — деди Тўрам энди унинг кимлигини англай бориб, — Султонмурод деганлари Сизми ҳали?

— Мен-да, Хондода. У ёғини сўрасангиз, — деб қулоғига шивирлади, — шу тошканлик Абдураҳим эшон поччанинг ўғиллариман. Эшитган чиқарсиз балки.

— Қайси, Сибирга сургун этилганларданми? — дея олди у.

— Ҳа, — деди Ботур бўғзига келган сўзларни қулт ютиб, сўнг деди, — диёрига сифмаган кишиларнинг болаларимиз.

— Ўтилинг, Ботур. Улуғ одамларнинг фарзанди экансиз. Тик туриб сўрашмоқ ярашмайди бизга, — деди Тўрам ва қайтиб ўз ўринларига чўқдилар.

— Тақдирларини билолдингизми? — деди хийла ўзларига келишгач.

— Қаерда! — деди Ботур хўрсиниб. — Ўша Сибирдан ҳам, Туманли юртдан ҳам изларини тополмадим.

— Излаб бориб-а? — Тўрам ҳайратдан Ботурнинг юзларига суйиб тикилди: қани, ҳамма ҳам шундок ғарзанд ўстира олса!

Ботур очиғини айтишга қисиниб хижолатланди:

— Падар бўлгач, изларкансиз.

— Тушунарли-тушунарли, хижратингиз боиси ҳам, — деб қўйиб, уларнинг танишувларига турсалар туриб, ўтирсалар ўтириб жим қолган меҳмонларга юзланди. — Жилла қурса, Сизлар олишиб ўтилингиз, йўл босиб келгансиз, ахир.

— Хўп, Хондода, хўп, — деб улар пиёлаларга чой қўймоққа бошладилар. Кейин узатишиди. Тўрам пиёладаги чойни айлантирганча ўзига келмоққа уринаркан, буларнинг режасига беш кетиб-кетиб қўярди:

— Демак, ёлғиз эмассизлар? У ёқда... шерикларингиз ҳам бор?

— Бор, бор. Отларни тахт этиб туришибди. Бу ердан чиқиб борсагоқ... — деди Ботур бояги шаҳдамлиги қайтиб.

— Ҳали отликма-яёв довон ошиб келган жойингизми? Шундан шу ёққа-я?

— Бизнинг учоғимиз бўлмаса ҳам, учар отларимиз бор! Ишонаверинг!

— Сулаймон пайғамбар замонларида гидек-а??

— Шундай-шундай! Уларга икки дунё бир қадам!

— Бу ёғи-чи? — деди қария ичидан қайнай бошлаган ўтни босиб-босолмай, — бу ердан қандай чиқиб кетмоқчисизлар?

— Ундан осони йўқ, Хондода, — деди Ботур ҳалидан бери қараб қўймоқда бўлган қора соқолли шеригига химо қилиб, — танишиб қўясиз, бу акахонимиз сизнинг ўрнингизга ўриндошлика келганлар. Адаш дейсизми, қўшоқ дейсизми, ўзиз биласиз. Хуллас, эгизингизни топиб келганмиз. Кўрасизми?

— Қандай?! — деди Тўрам уларнинг ниятларини элас-элас англаётгандек.

— Марҳамат, — деди Ботур ёлғиз ўзлари тушунадиган бир имо билан.

Мехмон ярим илжайиб, ярим ийманиб юзидан ниқоб соқолини олиб эди... рўбарасида жуссасию юзи қуийб қўйгандек ўзига ўҳашаш хос табиби пайдо бўлиб, ҳайрон қолди.

— Ие, «Хозиқ тўрам»?! Хуш келгайсиз! — дея олдию қучоқ очиб кўриша кетдилар. Илгариги замоннинг подшолари ана шундай қиёфадош одам асраганликларини, қай бири хон, қай бири соя — ажратолмасликларини эшитган эди. Булар ҳам шунақасини қидириб, ўзининг хос табибини ола келишибдими?..

— Демак, алмаштириб кетасиз? — деди ниҳоят ниятларини фаҳмлаб.

— Қалай, арзийдими? — деди Ботур ўз режасининг пишиклигига қилча шубҳаланмай.

— Соҳтасини қолдириб, чинини ола кетасиз. Шундайми? — деди Тўрам.

— Шундай. Улар бизничув туширишганда биз туширолмаймизми?! Қалай, ярайдими?

— Ярайди, ярайди, лекин.. — деганча қўзлари чинакам намланиб келиб, овози ўзгарганча... нимага чал-фишини билмай ўрнидан тура бошлади Тўрам. Кейин туриб, негадир эшик томон юраркан, ичини ўртаб ётган сўзни айтольмай, қўли илиа юринг дегандек Ботурни имлади.

Ботур ҳам Тўрамнинг афт-ангоридан нима гаплигини сал англагандек бўлди-ю, ноилож эргашди. Улар пешайвонга чиқиб, ётоққами, хосхонагами олиб боргувчи йўлакка бурилдилар. Шу бир неча дақиқа ичидан неча ўн йилга қариб кетган Тўрам олдинда мункиллаган чолдек борару лаблари шивирлаб, тилидан бир дуони қўймас, Аллоҳим, ўзингга сифиниб, ўзингга таваккул этдим, ўзинг уялтирма, деб топингандан топинар эди.

Нега? Бу ҳам ёлғиз ўзигаю Аллоҳга аён эди.

Улар йўлак адогига етиб тўхтадилар.

Тўрам эшикни қия очиб, Ботурга ўтирилди:

— Мен кимманки, бунчалик жонни гаровга қўйиб келибсиз, — деди титроқ бир товушда. — Мен ўзим... — дедио у ёғини айтольмай ютинди ва кўзини олиб қочиб, — сизга чини керакми? Ана, ўзлари, ўшал зот, — дея олди.

Тўрам четланиб, Ботур бир қадам олдинга босдию хосхонада жойнамоз устида тасбех ўтириб ўтирган ажаб нуроний Тўрамни қўриб, ҳайратда ёқа ушлади.

Уларнинг қай бири ҳақиқий, қай бири қўшоқ — ажратиб бўлмасди. Фақат бунинг кўзлари ёшлими деса, уники-да, намлига ўхшар, ўхшайверар эди.

\* \* \*

Улар кўзда ёш ила хайрлашар эканлар:

— Бир оғиз... бир нима сўрасам, майлими, Хондода? — деди Ботур.

Тўрам, сўранг, дегандай бош силкидилар.

— Энди, тангритоғли биз етимларга не маслаҳат бергайсиз, устоз? — дея олди у.

— «Иннамал аъмалу биннияти». Ниятни пок қиласеринг. «Албатта, амаллар ниятга боғлиқдир». Балким, Форобий домланинг васиятлариға қараб боқарсиз. Ўшал зотдан бирон жўяли фикр чиқса, мумкиндир... — дедилар Тўрам тақсир.

Улар қайта кўриштироқни Аллоҳдан сўраб, қучоқлашиб хайрлашмоққа бошладилар. Ташқарида шом тушиб келмоқда эди.

## 10. ХЕШЛАР КИМНИ ИЗЛАЙДИЛАР?

**Яна Мақсаднинг ўзигагина маълум қиссадан.**

«Тўра бувамнинг илтимослари шундай бўлди...»

Бу мужда менга жиндек таскин берган бўлса-да, туриб-туриб яна юрагимга ғашлик ўрмалаб кира бошларди: «Тавба, бизникидан ҳам бехавотирроқ жой бораканми? Умуман, уни кимдан яширишяпти? Нега яширишяпти? Бу мусибатзадаларнинг боши устида яна қандай абри балолар айланиб қолибдики, Тўра бува аралашмасалар? Анави кемшиктойнинг йўқолиши ҳам бежизмасми? Уни бунга адаштиришганми ё буни унга?...» Ишқилиб, калаванинг учини топа олмасдим.

Анув Зоҳидхон деганимиз бозор-ўчар қилиб, Тарнов томонга чиқиб кетганмиш. Баҳаво жойда битта ошни қилиб, дам олиб келгани кетганми ё бирон танишининг зиёратигами — унисини айтмабди. Шу тобда унга телефон нумеримни бера қолмаганинг пушаймонлар қилдим. Ҳарқалай, Тўра буванинг илтимослари сабабини айтган бўларди-ку, ўзимга. Шунданми, ичимни аллақандай бир тушунуксиз ғашлик кемиргандан-кемириб ишга келсам, эрталабдан кимдир мени сўрабди.

— Бир жувон сизни уч қайта сўради-ёв. Яна чақиради экан.

— Ким, келинойимми?! — дедим ўтакам чиқиб.

Ҳамхонам елка қисди:

— Билмасам, айтмади.

Жойимга ўтиrolмайин ҳам қолдим: бўлак ким бўлса экан? Нима рўй бера қопти?

На ишга қўлим боради, на чиқиб кета оламан! Дераза олдида турволганча ҳали ёз келмасданоқ сув отакетган фавворага, унинг тўзонларини гоҳ мағрибу гоҳ машриққа тортқилаган еллар ўйинига алаҳсимоққа уринарканман, қўнғироқ овозидан чўчиб тушдим.

Устолига мук тушиб, «ҳаводан холва ясаш»га тушиб кетган (биз газетага тушадиган «лаббайка» мақолаларни шундай атаймиз) ҳамхоналаримдан бурун гўшакка ёпишдим:

— Алё, эшитаман.

Симнинг у ёғида маҳзун хўрсиниқ эшитилди.

— Яна менман, ҳалиям келмадиларми?

Ўша жувонлигини билиб турибман-у, ҳеч таний олмаяпман, ким бўлуви мумкин — калламга кела қолмайди!

— Келдим, келдим, мен — Мақсадман, — дедим ютоқиб.

— Вой, ўзингизми? — Аёл дафъатан каловланиб қолди. — Узр, танимабман.

— Кечирасиз, кимсиз? — дедим бирон бир танишимга ўхшатолмай.

— Мен Асал опангизман.

— Э, ҳа, сизми?.. Холамойим яхшимилар, яхши ўтирибсизларми? — Нечук, заҳар-заккумой мулојим-ҳалим бўлиб, қидириб қолибди?

— Худога шукр, дуои жонингизни қилиб ўтирибмиз, — деди у. Муомаласидан ҳайрон қолиб, сўрашишда давом этдим:

— Қалай, дарак борми улардан?

У ўзини тутолмай ютинди:

— Ўша... ўзиз билган хатдан бўлак... ҳеч гап йўқ. Ўтириббиза, эшикка қараб.

— Ҳалиям сўраганакансиз, — дедим. Айтавуринг, нима гап, дейишга тилим бормай.

— Ҳа, — деди у ийманиб, — Ойим сўраб эслари кетяпти. Бир кеб кетасизми?

— Тинчликми?

— Тинчлик. Сўрайдилар-қўядилар, сўрайдилар қўя-дилар, — деди у ойиси Ойтўра бувига куйинган каби. — Ўзизга гаплари бор шекилли. Вақт тополсангиз-да.

Унинг бу тарз куйингани (қаранг, ўша Асал ҳам куйинади экан!) менга хуш ёкиб, эрий бошлаган эдим.

— У киши сўраган бўлсалар, ҳозироқ етиб бораман, — дедим.

— Раҳмат, кутовуз, — деб у гаплашгични қўйди.

Тавба, кўхлик юзидан чак-чак заҳар томиб, бир ўрим сочи орқасида илондай тўлғонган Асал қаёқдаю бу Асал қаёқда эди. Кейинги воқеалар уни шунчалик мулойим-юввош қилиб қўйган бўлса-да, негадир кўз олдимдан кўчалари адоғидаги анув куйиб-корайиб тушган ёлғиз қора дарахт кетмасди. Қаранг-а, ўша Заққумой ҳам мулойим тортишни биларкан-а...

Борсам, Калковузнинг сувлари хийла тиник тортиб, зилолланиб қопти-ю, асовлиги ўша-ўша. Қирғоқдаги қатор толлар тагига шалоп-шулуп бош уриб келиб, қора илдизларини ўпиб, патак илдизларини ўйнаб, нафис-нафис тараб ётибди. Сувнинг бу эркалашидан толлар ҳам гуркираб, яшнаб кетганлар. Новдалари бир ажойиб чайқалиб, сулув-сулув тебранадилар. Уларга осилиб ҳалинчак учган-учаётган еллар ҳам шу Калковуз меҳмонига айланганлар. Ҳатто «ёшини яшаб, ошини ошаб бўлган» пахса девор устида униб, гулини тўкиб, уруғ боғлаб улгурган қизгалдоқ бир чиройлув чайқалади. Фақат анув қора дарахтгина қарғиш ургандек, ўша-ўша сўппайиб турибди. Сулаймон пайғамбарнинг қурт еб адо қилган асосидек бир кун ўзи чириб тушмаса, унгача шу туриши туриш, қайта кўклиши даргумон.

Остонаси тагига катта харсангтош ётқизилган (у чиқиладиган ўзига хос зина ҳам эди) якка тавақали эшикдан кириб боравердим. Юқоридаги болохонали уйнинг ҳовлисигача чўзилиб борган ишкомлар худди Каттабоғнинг ишкомларидек тагига бир ажойиб олачалпоқ соялар ташлаб, яшнаб ётар, гулини тўка бошлаган узум бошлари кўк марварид шодаларидек ток барглари орасидан мўралар эдилар. Ишком ичидан узум гулининг ислари гуркираб келар ва биз ичларида шаббохун уриб катта бўлган боғларимизни ёдга солар эди. Фарқи, бу ишкомлар ичи тизза бўйи ўт эмас, балки йўл эди. Шу йўлакдан тепа ҳовлига чиқиб борилар эди.

Мен ўзим кириб бораверишга ҳаддим сиғмай, ҳар эҳтимолга қарши овоз бердим:

— Чаман ака! Ҳов, Ёдгормурод!..

Улар йўқлигини жуда яхши биламан. Чаман акам қайтсаёқ қидириб топар эди. Ёдгорни эса қаердалигини айтиб ҳам беролмайман. Менга ҳам ишонмай, қаёқладир олдириб кетишибди. Тўрамнинг гаплари билан. Шундай бўлса-да, уларнинг отларини атаб чақирар эдим.

Юқоридаги сўриток тагига кимнингдир қораси кўриниб, ҳеч қанча ўтмай Асал опанинг ўзи ишком бошига чиқиб келди. У уйлик одми кўйлак кийиб, бошига рўмол ўраб олган, булар унга ярашиб, андиша-иболи аёллар нусхини берворган эди. Илгариги чарс аёлдан нишон ҳам кўринмасди.

У мени таниб, шошиб қолди:

— Вой, сизми, кириб келавурмайсизми? Бу ёқда биз эшик тиқ этса, термулиб ўтирибмиз-ку,

— деб рўмолини тўғрилаб, ўзи Ойтўра кампирнинг уйи томон юраверди. Бораётиб, «Келишибди, ойи», деб овоз бериб ҳам қўйди.

Мени эса кўзим Ёдгорлар туродиган (ҳозир ойнасига оқ мато тутуғлик) болохонага тушиб,

илгариғидек бир сир босиб кела бошлаган эди. Бу хонадоннинг шунақа бирорга айтиб бўлмас сирлари бор. Айниқса, шу болохонага чиқаверишдаги анув оқ-оппоқ кампирнинг даҳлизида, ўша зинада, тағин болохонасида. Бу сирнинг домига бир тушдингизми, чиқа олмайсиз ҳам, кутула олмайсиз ҳам менга ўхшаб...

— Ассалому алайкум, холамойи, — мен остона ҳатлаб, қўлим кўксимда, каравотларида ўша-ўша, оқ-оппоқ бўлиб, муштдек бўлиб ўтирган кампирга елкамни тутиб бордим. У киши ҳам оқ донасидаги қора хол-холли ёзувлари едирилиб кетаётган тасбеҳларини қўйиб, кифтимга қоқиб кўришарканлар, момикдан момик қўлларидан бир олам хузур топиб, эриб борардим, сўрабисташларига «раҳмат-раҳмат, юришибди, ўтиришибди»дан нарига ўтолмасдим.

— Бизнинг тойчоғимиз-чи, ичикиб қолмадими? Кетамизга тушиб, қийнаб қўймадими сизни? Опкелавурмабсиз-да?... — дердилар камига.

Мен қандай айта оларканман, тушунтира оларканман у Ёдгортой билан боғлиқ воқеаларни, Зоҳидхон келиб олиб кетганини? Оллоҳ ўзи кечирсин. «Тузук-тузук, юрибди»дан нари ўтолмасдим.

Ниҳоят, ҳали ҳам кўмилмаган сандал ёнига чўка қолдим. Асал опа қозиқдан олган дастурхонни хилвиратиб ёзиб, буви дуога қўл очдилар.

— Илоҳо, овмин, шу қутли қадамлариз билан биз соғинган кишиларни ҳам ўзи етказа қолсин. У ёқдан Чаманимизни бу ёқдан Саритойимиз, Ёдгормуродимизни, унинг дард кўриб рўшнолик кўрмаган аягинасини...

Мен яна ёлғонлашга мажбур бўлмайин-да, деб ич-этимни еб, дуога қўл очиб турибман-у, бувининг бетларига қарай олмаяпман. Аммо ич-ичимдан «Илоҳим, фаришталар ҳам омин деган бўлсинлар, Ойтўра бувининг дуолари мустажоб бўла қолсин. Ўша жабрдийдаю ситамзадалар қайтиб, буларнинг ҳам бағри тўла қолсин», деб таваллолар қилардим.

Ниҳоят, юзга фотиха тортилиб, тахмондаги кутидан бежоғлиқ талинкалар олина бошланди.

Мен «кераги йўқ-кераги йўқ» деганим билан кутидан каллак қанду майиз-ёнгоқлар чиқиб, шаҳарнинг энди расм бўлган чуррак нони ушатилди. Устида дамланган чойи билан потирлаб қайнаб турган митти самовар олиб кирилиб жойини топди-ю, мўъжаз хонага файз ҳам кира қолди. Асал опа лайлакоёққа ўхшаш бир ажойиб нозик гулли бир вақтларги чинакам чинни пиёлаларга аввал чойнакдан, сўнг самовардан бураб, чой қуяркан ва келинлардек назокат-ла узатаркан, мени хаёл опқочиб-опқочиб кетар эди: Қаранг-а, бир уйни яшнатиб ўтирадиган бинойи аёл экан-ку... Саритойи йўқолмасдан бурунги заҳар-закқумойни кўрингу ҳозир ўтиришини кўринг, дердим ичимда.

Беихтиёр Нусрат поччанинг гаплари айланиб-айланиб ёдимга тушиб кетар эди. У киши:

— Оллоҳга осон. Инсоф бераман деса, ҳар қандогини ўнглаб қўядики, қалби қандай мойил бўп қолганини ўзи сезмай қолади, — дейишни яхши кўрар эдилар. Шунга ўхшаб, бу ҳам Оллоҳнинг ишларимикан?

Нон ушатилиб, пиёла бир айланди. Мулозаматлар давом этар, уй эгалари мақсадга кўчишдан истихола этиб, сир беришмас эди. Ниҳоят, оёқларини узатганча бизга ёнламасига ўтирган Ойтўра буви:

— Узр, биз сизни чақиртириб, безовта этдук, айбга буюрмайсиз, — дедилар минг бир истихола ила.

— Безовтаси борми? Хабар олиш биздан лозим, — деб мен ҳам маъзурландим. Ичимда эса, нима гаплари боракан, деб интиқиб ётибман.

— Айтмоқчи, — Ойтўра буви қизларига ўгирилиб қарадилар, — бугун мухаррамнинг неchanчиси?

Асал опа бармоқларини букиб санай туриб адашиб кетди, яна қайта санаб, жавоб қилди:

— Йигирма тўрти экан, ойижон.

Нимага кун санашияпти — ҳеч ақлим ета қолмасди.

— Шунақами? — дедилар буви хаёлланиб. — У ёғи Зулхижжадан бир ҳафта қўшилса... ўн кун ҳам қолмабди-ку, айтган муддатига, — дедилар иchlари аллақандай сидирилиб. Камига — она-бала бир-бирларига ғалати қараб олишди ҳам.

— Ниманинг муддати, холамойи? — дедим ичим тоша бошлаб.

Буви ўша йифилмас оёқларини оқ чойшаб устидан ҳардамхаёл силар эканлар, бир алпоз тин олдилар:

— Чаманинг-да, мирзо болам, адо қилди-ку бу юришлари билан.— Шу тоб иchlаридан ўрлаб чиқдими ё самовар ичидан тушган чўғ чайниндида вишиллаб ўчдими — хонада бир тур дуд анқиб ўтди. У оловда куя бошлаган жигарга ҳам, сувга тушган чўғ ҳидига ҳам ўхшаб кетар эди. — Ўшани дардида кун санаб ўтирибмиз-да, биз-муштипарлар...

— Қачон келишлари керак эди? — дедим мен ҳам ичим сидирилиб. — Айтиб кетгандирлар, ахир?

— Айтган, мирзо болам, айтган, — дедилар буви, у ёғига кўча олмай.

— Айтган бўлсалар — келиб қоладилар. Биласиз-ку, Чаман акамни! Сўзларининг устидан чиқмай қолмаганлар.

— Чиқмай қолмаган, тўғри, — деб тасдиқладилар буви, лекин чиройлари очила қолмас, ниманидир айттолмай ўтирадилар.

— Қаёққа кетгандар ўзи? — дедим, зора айтган бўлсалар, деб.

— Ҳов-в, Чаман бўладию айтадими, — дедилар буви бир чуқур хўрсиниб.

Асал опа эса бир мўмин тортиб-бир мўмин тортиб, бош силкиб ўтирибди. Пиёла-сочик ҳалиям қўлидан тушгани йўқ: ёзиб-тахлайди, тахлаб-ёзади.

— Сизларга айтмаса, кимга айтади?

— Шу идорага кирибдики, шундай: айтмай кетади. Қоидаси шундайми?

— Ахир ушланиб қолиши бор, бу ёқда зарур бўп қолишлари бор.

— Бизам неча қайталаб айтганмиз, — деб гап қўшди Асал опа, — уйлансаям сил қиларди келинни.

У энди илгариги Асал опага ўхшаб-ўхшаб кетаётган эди.

— Йўғ-е,— дедим мен Чаман акамнинг ёнини олиб.

Ойтўра буви (билмабман, кўнгиллари бўشاшиб ўтирган экан), рўмолча излаб, қизаринқираган мижжаларига енгларини босдилар. Асал опа туриб киртокчадан рўмолчами — нима олиб келиб берди.

— Мани ўтиришим — бундок, унинг юриши — ундоқ. Нимаям қилайлик, ёзуғи шундок экан, — дедилар буви кўзлари яна ёшланиб кела бошлаб. — Билмадим, шунинг бошини иккита қилиб қўя қолсак, қутулармидик шу мажҳул юришларидан.

— Айтиб кетиптилар-ку, — дедим гап сиғмаса ҳам.

— Айтганиям бор бўлсин, ҳамма гап шунда-да.

Мен қолган чойимни хўплаб, ҳайрон қарадим:

— Тушунмадим...

Ойтўра буви ҳижолатланиб, юзимга бир қараб олдилар:

— Келавурмасам... кун санайсиз деб эди. Фаришталар овмин деган экан, айтганидай бўлди.

— Қандай-қандай?..

Буви айтишга қийналаётганларини қўриб, Асал опа энганиб қулоғимга шивирлади:

— Ҳали айтдим-ку, ўша — омонат гап.

Ҳамма нарсани кутсан ҳам, буни кутмаган эдим. Хушим учди:

— Менга тегишлими?

— Ҳа, мирзо болам, қирқ кундаям дарагим бўлмаса, Мақсудни чақиртирасизлар, деб эди.

— Йўғ-е?!— менинг ич-этим бўшашиб тушган эди.

Ойтўра буви бош тўлғадилар:

— Майли, ҳалиям бўлса, айтмай тура қолай. Ирим қилдим, майлимни, мирзо болам? — у киши илтижо-ла тикилдилар,— узр, олдиндан чақирганувзага.

— Унгача балки ўзи ҳам келиб қолар, — деди Асал опа.

Мен эсам, миям карахт тортиб, каллаварам одамга ўхшаб қолганманми, эпақали бир фикрга келолмасдим. Кошки билмасам, қаёққа кетганини! Лекин буларга айтиб бўладими! «Хов, Тибетдами, Тангритоғ деган мамлакатдами — қиёматли ошнаси бор. Менинг акам! Қанчадан бери — на хат, на хабари бор. Ўшанинг дараги чиқиб, (қандай аниқлаган — ёлғиз ўзи билади!) жўнаб кетган!» деб. Айтиб бўлармиди кампирнинг ўтакасини ёриб?!.

Барibir бояги гап ҳеч миямдан кетмаяпти: қирқ кунгача келмаса, мен нима қилишим керак экан? Бу нима дегани? Жуда ғалати-ку?..

— Ундан кўра, Сиз, мирзо болам, анави останамизга танда қўйволганларни билиб беринг. Айтгин, Асал, — дедилар буви биз томон ярим ўгирилиб.

Қизи у кишига чой қуйиб узатаркан, бош силкиди:

— Хўп, ойижон, хўп.

— Ким... танда қўяркан?

— Бир ижроқўмданмиз, деб келади, бир идорадан, деб... Ижикилаб бир нималарни сўрагани сўраган, — деб тушунтирган бўлди Асал опа.

Бир нарсани тушунсам, ўлсин агар:

— Нимани сўрайди?

Асал опа елка учирив, лабини бурди: (Ана, шунда у ўзим билган Асал опага ўхшаб кетдию, яна мулоийм қиёфасига қайтди)

— Билмасам. Ҳали дўмавойни титкилайди, ҳали ўзидаги рўйхатни. Яширманг, яна кимлар туради, деб тергайди.

— Болохонага чиқмадими, ишқилиб? — дедим ичим тўқилиб кела бошлаб.

— Қаёқда! Қўймадим! — деди у қошлари чимирилиб-тушиб.

«Бормисиз! — Мен ич-ичимдан уни ёқтириб қола бошлаган эдим. — Яхшиям сизга рўбарў бўпти».

— Киролмабдими, қўрқадиган жойи йўқ, — дедим дадилланиб. — Бу ёғини ўзимга қўйиб берасиз: ишхонадан битта қўнғироқ қилсан, нафаслари ўчиб кетади.

Ойтўра буви азза-базза дуо қилишга тушдилар:

— Вой, баракагина топинг, мирзо болам. Яхшиям чақирганимиз. Чаманий йўқлигини билинтирмай туринг. Шуни айтадилар-да, хар хонадоннинг эркаги бўл-син-у, Аллоҳ паноҳида асрасин, деб.

— Бўлди, ўзим тез-тез келиб тураман. Кейин... тортинмай қўнғироқ қилаверинг, чақираверинглар, — деб ваъдани қалаштириб, уларга таскин берарканман, қўнглимнинг бир чеккасида «У суриштириб келаётганлар ким ўзи? Кимни қидирадилар? Ёдгорними, кеннойимнimi?» деган иштибоҳ ғимирлаб-ғимирлаб қўяр, буни мана бу муштипарларга билдиримай қўяқолай, деб уни ичимга ютганим-ютган эди. Қолаверса, Чаман акам нима деб тайинлабди экан? Ҳеч тагига етолмай ўтирибман. Буви қирқ кун бўлмабди ҳали, деб ирим қилдилар. Шундан кейин қандай сўрай оласан?!

Гаплар ҳам поёнига етиб қолгандек эди, мен туришга хозирлана бошлаб, яна бир таскин бергим келди.

— У сўраб келгувчилардан жудаям қўрқманг. Назаримда, улар хешларини излашадир, — дедим.

— Кимлар?— дедилар Ойтўра буви хушёр тортиб.

— Ахир, Ёдгорнинг Тангритоғда қолган хешлари бор-ку. Ўшалар излаётган бўлишса керак-да нуридийдаларини...

Ойтўра буви ўтирган жойларида бир ерга етиб, ҳамду санога тушдилар:

— Оллоҳ-Оллоҳ! Ҳали шундоқ эдими! Чиндан Ўзининг карами чексиз, поёнсиз. Тўғри айтасиз, хешлари қараб туришармиди. Субҳаналлоҳи ва биҳамдиҳи, субҳаналлоҳил аъзийм. Ўзинг мушкулларини осон этгил,— деб дуо қилганча қиблага юзландилар.

Ё Мусаввири олам! Менинг кўз олдимда эса, Ойтўра бувининг юзларидек ёруғ бир нур туриб олган, қаёққа қарасам ўша ёққа кўчар, сув тубида ётган ёмбидай живирлаб кўзимни қамаштиргани-қамаштирган эди. Гоҳ сап-сариқ хандалакка айланади-қолади, гоҳ бир ўрам сариқ ипак тўпига. Баъзан эса, гўё юлдузлар туркумидай живирлашга тушиб берадиу ўз пошшосига эргашган асаларилар тўдасидек ғужфон ўйнай бошлайди. Нима экан, ҳеч билолмайман. Бу ҳолдан азбаройи тўлқинланиб бошимни кўтарсан, денг, ўша нур кўчиб бориб, Ойтўра бувининг бош томонларидаги анави жилдга қўндию мени ҳайратга солиб, унга сингдикетди, тавба.

Кўз олдимда жигарранг чийдухобадан тикилган жилду унинг ичидан бир энликкина чиқиб турган эски-қадим қитобгина қолди, холос. Унинг ёнида ўша девор қозиққа осиғлиқ бошқа бир — най бўлиб найга, сурнай бўлиб сурнайга ўхшамаган, лекин қадим бир матодан тикилган жилдга осиғлиқ нарса турибди. Мен уни ҳар гал бу хонадоннинг авлоддан-авлодга ўтиб келаётган шажара қофози бўлса керак, деб тахмин қиласман-у, бувидан сўрашга журъат эта олмайман. Бу гал ҳам тилим бормади. Мавриди эмасди.

Фақат жигиллаши гоҳ сусайиб-ўчиб, гоҳ яна қайтадан жонланаётган самовар ёнидаги Асал опа Саритойини ўйлаб кетганми, ўқсифини ичига ютиб, жимгина йиғлаб ўтирас, ора-чира ҳиқиллаб қўймаса, қўнгилни эзадиган нарса йўқдек эди гўё...

## 11. ҲИЖРОН ШЕВАСИДАГИ МАҲФУЗ ХАТЛАР

Дунёда бировнинг бировга аталган хатидан ғаройиброқ нарса йўқ. Яна улар айрилиқдаги келин-куёвларга тегишли бўлса!

Бу эса, устига-устак бошқа имлода эди. Фақат бировгагина ўқитиб, нималигини билиш мумкин. Қолаверса, бировнинг хатини эгасидан бир оғиз сўрамай бировга ўқитиш мумкинми? Ҳар қанча ғаройиб бўлган-да ҳам (асли акам ҳақида бирон мужда чиқиб қолармикан, деб ичим куриб ётибди!) бу мумкин эмасдек эди. Аввало бировники! Устига-устак омонат. Кенно-йим эшитса нима дейди?

Поччага олиб боргим келмади. Ия, Мақсадухўжа, кеннойингни дараги чиқибам бизга индамабсан-да, десалар нима деган одам бўламан! Ундан кўра, ўзига қайтариб бераман. Нима қилса қилсин. Хоҳласа асраб қўйсин, хоҳламаса, йиртиб ташласин. Нималар кечгани бир умр қоронғи қолсин! Муҳими, у акамни кутяпти-ку. Оз эмас, кўп эмас — неча йиллардан бери, бировларнинг эшигига сарсон-саргардонликда юриб ҳам, Оллоҳ юборган дардларни бир эҳсондек кутиб, чидаб келяпти-ку. Шунча сабр-бардошни қаердан топди экан? Чивиндек жони, аёл бошига? Сабил экан-еј тағин ҳам жони...

Ишқилиб, акам омон бўлсин, буларнинг баҳтига, шунча кутганига. Ахир, Чаман акам топгандир-ку? Қайтиб ҳам қолар-ку...

Шундай маҳзун хаёллар билан уйга кириб борсам, ойим отин ойиларидан ёдгор қолган қалин қизил гилам устида (кўрпачадан тушволиб) чордона қуриб, энкайиб ўтирибдилар. Ҳадеб тиззаларидағи кафтларининг орқасини силайдилар. Гоҳ унисини, гоҳ бунисини. Эшиклари қия очик, қуруқ якандоз ёпилган сандал ортида (мен ўзини кўрмаётирман) кимдир нимадир ўқияпти. Ойим тоза қулоқ осганлар. Мен келганимни сезмаганлари сезмаган, ора-чира бурунларини бир ғалати тортиб ҳам қўяяптилар. Худди ўксилари босиб-босиб келаётган каби.

Зинада оёғимдагини ечаётib қулоқ солсам, таниш овоз, ўқияпган келиниз!.. У ўқирди:

«... ҳомилам қун сайун билинуб бораду. Мен бояқшишига уни ичдан сириб ҳам, устимдан халату камзуллар кийиб ҳам яширолмасдум. Яшургандай бўламан-у, яна ҳамма менга

қараётгандек... бу баҳтиқаро қорнидагину қайдан топду, қаердан бўйуда бўла қолду, деяётгандек. Тушунинг, бош кўтаролмаотирман. Айтурга тилим йўқ. Бирор сизга уй берур, жой берур-да, яна маломатларга қолурму? Менинг кичигойум, сизнинг холамойингиз — у фариштадайин зотлар шундаюн маломатларга қолсунларму...»

Мен ниманидир англаётгандекман-у, тагига етолмаётирман. Нима бўлса экан? Ким бўлса экан? Наҳотки шундай сирларни бировга очиш мумкин, ёзиш мумкин?

Бир қадам босиб, айвонга чиқдим. Сайданинг нигоҳи менга тушиб:

— Вой, булар кептилар-ку! — деб сакраб тураётиб негадир лоладай қизариб кетди. Қўлидаги... унниқиб кетган дафтарни қаерга яшиарини билмай гарангсиди. Танидим! У ўша эски уйимизда қолиб кетган дафтарларга ўхшаб кетар эди. Наҳот ўша омонат хатлар?! Қаердан ола қолибди? Қолаверса, хотиним у эски имлодаги нарсани қандай ўқияпти?

— Нимага сўрамасдан... олдиз?

— Кечирасиз, — Саида ер чизиб қолди. Қимтилган лаблари қонталашиб бораради.

Менинг «бемаврид тергашим»дан ойим аста бошларини кўтариб, елкалари оша қараб қўйдилар. Ўзлари ўша-ўша гилам устида чордона куриб ўтирас, фақат кафтлари орқасини сийпашдан тўхтаган эдилар.

— Ҳа, Мақсадхўжам? Мен айтиб эдим, — дедилар.

Мен салом бериб, кириб боравердим. У киши алик олиб, тузукроқ ўгирилдилар:

— Шошма. Каердан топдинг бу нарсаларни? Ё боя-қишигинанинг дарагини топиб ҳам миқ этмай юрибсанми? Анув кунги болакайни ҳам... ким деб тушунтириб эдинг?

Ўзим кириб, ўзим мулзам бўлиб қолдим! Ростига кўчмай бўлмасди:

— Эски уйдан, ойи. Токча орасида экан.

— Бир оғиз индамадинг-ку?

Яширишнинг ҳожати қолмаган эди:

— Ойи, у киши илтимос қилиб эдилар. Ўзлари шу шаҳардалар. У кунги болакай ҳам шуларнинг Ёдгори,— дедим тилимнинг тушовлари ечила бориб.

— Дард эди! Гўр эди!.. — Ойим бетимга ёмон қараб, юз ўгириб олдилар. — Тилинг бор экан-ку! Айтсанг ўлиб қолармидинг??

Миқ этолмай қолдим. Энди кеннойим билан боғлиқ барча гапларни айтиб қутулмасам, қутулолмасдим.

— Хоҳласангиз, олиб бораман, ойи. У киши шифохонадалар. Сал тузалиб олсинлар.

— Вой, хали шифохоналарда ётибилю... бир оғиз айтмадингми? Бирров қўриб келишга ярамадикми? Эс-песинг жойидами, бола? Сени ким айтади газетада ишлайди, кўча кўрган, деб? Вой, Мақсадхўжам тушмагу-ур, халиям болалигинг, дўлворлигинг қолмабди-ку.

Мен ер чизиб қолган эдим. Ўтиришимни ҳам, нима деб узр сўрашимни ҳам билмасдим. У киши эса астойдил ҳафа бўлғанларидан мендан юз ўгириб олган, қараб ҳам қўймасдилар. Мен ҳатто эланиб, узр сўрашдан ҳам ҳайқиб турибман. Баттар гап эшитиб олишим мумкин. Негаки, айб ўзимда. Вақтида айтмаганман.

Ниҳоят, у киши юzlари ёришмай ўгирилдилар:

— Қачон чиқаркан, бояқишигина?

— Бир ҳафта-ўн кунларда жавоб тегиб қолар, — дедим шошибгина.

— Унгача оборасанми ё тағин уятли бўлиб қолавуровзами?

— Обoramан-обораман, ойи. Сизни обормай, кимни обораман, — дедим у кишини юмшатишга уриниб. Аммо ойим жаҳлларидан тушадиган кўринмасдилар:

— Жа, оборасан! Ман сани ўша ишхонангга тукқан эканман-да. Жужур эдим дейсан — кетасан, фалон ёққа дейсан — кетасан. Оқибатниям биласанми?

— Ойи, мана юрибман-ку, ўша келинайимнинг ташвиши билан.

— Юрганинг шуми? Бир оғиз айтиб қўймай? Сенлар Яхё бўлолмайсан. Шу томонга йўли

тушди дегунча кўргани киради. Борса-келса оқибат бўлади-да. Сенлар ўзингдан ортасанми?

Мен тиз чўкканимча миқ этмай қолган эдим. Нима деяётган бўлсалар — ҳаммаси тўғри. Биз Яхё тоғадек бўлолмаймиз. У киши ўн марта келиб кўрганларида биз бир марта боролмаймиз. Кўчиб кетишгач-ку, йилда бир марта борсак борамиз, бўлмаса йўқ. Аслида биз жиянмиз, бориб кўриш биздан лозим, кўзлари ожиз бўлиб ўтириб қолган холамларни кўриб қўйиш, дуоларини олиб қолиш биздан лозим. Қаёқдан ҳам Чаман акамнинг ўша (овоза қилма деган) гапига кириб, ичимга ютдим. Айта қолсам-ку, шу дашномлар йўқ эди.

Ойим секин қараб қўйдилар, мен бош кўтармасдим. Буни кўриб юмшадилар.

— Бояқишина, қаерларда жон сақлаган экан?

— Ўша хат ташлаб кетган одам — акамнинг жонажон оғайнисиникида, — дедим у ёғини очиб ўтиrmай.

— Ҳа, барака топсин. Манавини оқибат дейдилар. Шаҳарли бўлсаям, қай кўчаларда санғишиб топган бўлсаям, чин ўртоқ экан акангга. Ёмон кунида яраб-ди, — дедилар астойдил алқашга тушиб. — Кенно-йинг тузалиб чиқиши-ла бизни оборасан. Айтишмасин, булар қанақа оқибатсиз одамлар экан, деб. Майли, бор, ечиниб чиқа қол. Унгача биз эшитиб туривуз бу ёғини.

— Шу ҳижжалашида тонг отадими, — дедим чиқа туриб.

Хотиним бир қараб қўйди-ю, индамай қолаверди. Мен эсам, чиқишига чиқдим, ечинишга ечиниб, кийимларимни алмаштиридим, аммо қайтиб чиқишига энсам ёр бермасди. Недурки, дафтарларни сўрамасдан олгани етмай, уни ойимларга ўқиб бериб ўтиргани алам қилаётганди. У ўқимаса, мен шунча дашном эшитармидим?..

Гина, алам бир тараф, лекин ўзим ичим қуриб, китоб варақлаб ўтирибман-у, миямга бирон нарса кир-са — ўлсин агар! Фикри-зикрим ўша ёқда.

Ахийри бир маҳал Саида чиқди. Хатни қайнона-келин ўқишиб, тоза йиғлашган шекилли, қовоқлари шишиб кетибди. Лекин шунда ҳам сир бергиси йўқ.

— Адаси, мошхўрда солиб қўювдим. Гурунч ташласамоқ пишади. Ё бирон пиёла чой опкелиб турайми?

— Эн-дими?! — дедим боягиларнинг аламига ҳам.

— Кўрдингиз-ку, ойим нима дедилар, улардан ўтиб... — дея олди.

— Яхши, очдан ўлмасман ярим соатга.

У дафтарни секин жойига қўйиб, чиқа бошлаб эди, тўхтатдим:

— Шошманг... Буни ўқишини қачондан биласиз? — дедим дафтарга ишора этиб. — Мен кимга ўқитаримни билмай юрибман, бу ёқда сиз...

У гинаомуз қаради:

— Бир оғиз айтсангиз экан ўзингиздан ортиб...

— Ҳа, энди, ишимни биласан-ку, — деб баланд келдим.

У иссиқ жилмайди:

— Юрган экансиз-ку, кеннойингизнинг кетида, ишдан ҳам вақт топиб...

— Юрибман, — дедим тўғрисига кўчиб. — Бир мусофирининг кетида юриш — аввало, савоб, қолаверса, у жабрдийдалар кимни қора тортиб келиб, шу қўйга тушибди?

— Ҳа, шуни айтинг, тағинам фил эканлар, — деди Саида бўшашиб.

— Ҳаммасини ёзибдиларми?

— Ҳа, ҳеч кимга ёрилолмай шунга тўккан эканлар.

— Ўзимга қачон ўқиб берасиз? — дедим ичим қуриб.

— Ҳижжалашимга чидасангиз, — деди у кулиб.

...Мана, ўша эгасини топмаган мактублар. Бир вақт-лар бизнинг Каттабоғдаги эски ҳовлимизда ярим йилгина турган кеннойимнинг сардафтари. Ёлғиз акамга атаб ёзган, унгагина тўккан дарду ҳасратлари. Бу тарих тўла бўлсин учун мен уни сизга у кишидан берухсат бўлса-

да, (албатта, кейин бу қисса китоб бўлиб чиққунича изн сўраб қўярман, деб) илинмоқдаман.

### **Жудолуқ диёруда қолмииши кишиимизга тегсун, илоҳум**

Менким, ўз жуифту ҳалолунгиз, бир ҳафтағина эркала булар улгурган жамилангиздурман. Майли, бор жонум, оталар юртига, арвоҳлар ёр, руҳлар мададкор бўлсун— Оллоҳнинг паноҳига, изингдан етиб боргайман деган Маҳфузангизман.

Йўлларингизга термулуб кўзларум тўрт бўлду. Ўлтурубман: кечалари уйқум ўчиб. Тонгсаҳарларда дуои илтижолар этуб. Тиқ этса, Султониммасму, деб юракларум тошуб-ҳапруқуб.

Ой кетудан ой кетмоқда сувдай оқуб, кун кетудан кун ўтмоқда бағрум ёқуб... Аммо Сиз ўйқисиз. Ҳатто элчуларингиздан дарак ўйқ. Биламан, узоқнинг иши қи-йун. Лекин бир оғуз мужда юбориши шунчалар мушкул эдиму? Ё биздан кейун сарҳадлар беркулди-қолдуму? Биздай ожизнотавонлар ўтуб, сизлардаюн эранларну битталаб тердуларму? (Худо ўзи асрасун).

Шуларни ўйласам, мени ҳам Юсуф алайҳиссаломдек бир тубсиз чоҳқудуққа ташлаб кетушгандек, ҳалу беру ҳалоскорум келуб етмайдургондек туюлавераду-туюлавераду. Икки ракъат намоз ўқиб, Оллоҳга дуои илтижолар қилмагунумча ўзумга келолмасман. Сўнг «хуваллоҳуллазии»ни ёлғиз сизга атаб ўқугайман, зора нолаи зорумни ижобат этуб, Сизну балоқазолардан асрар қайтарса, деб. Ёлғуз орзум шу: Оллоҳ бизга-да хотиржамлик ато этсун, падарларумиздек тентиратуб қўймасун. Синасун, имтиҳон этсун — шу Ватандан жудо этмай, сарсон-саргардон этмай синасун.

Мен азбаройю кимга ёриларимну, дарду ҳасратларумну тўқаримну билмай, ахийри ўзингизга хатлар битмакка, жўнатмасам-да (ахир қандоқ ҳам жўнатай?! Ўртада сарҳад, қанча тоғдовонлар ётибду. Мен бояқишигинанинг битикларину ким ҳам Тангритогга етказгай?) шундай бўлса-да, ҳарна енгил тортарманму, деб ёзмоқни бошлидум. Шуни ўзум ихтиёр эттум. Худо хоҳласа, бир кун келиб ўқирсиз. Менинг азиз жамилам ота юртда шундай кунларга қолганмуди, бир ҳафталик келин боши ила шу кўргуликларга чидаганмуди, деб... ичингузда бир ҳислар уйғонса — шунинг ўзи менга кифоя.

Энду ўзумдан сўрасангуз, сарҳаддан омон-эсон ўтиб олдук. Оллоҳ отамларну бунданам азиз қилсан, топган маҳрамлари — чин мўмин экан. Еру кўкка ишонмай, пардаи исматдаги ўз қизидай кўруб, олиб ўтду бу ёқларга. Ҳар текширувчию гумонсираганга қалқон бўлуб, паранжию сачвонумни олдирмай-очтирмай. Дадам бу ёққа жўнатата туриб, қўшиган одамлари (Оҳ, қандайун ҳам одамбилар, одамтанур эканлар!) ўзу чиноқ, ўнг қулогининг юмишоги тамом ўйқ, устуга устак гаранг бир киши эди. Ўнта гапга битта жавоб бераду. Шунақа ҳокисорки, бирорвга ёмонлуқ согинолмайду. Ҳали-ҳозур ўшал қорасоқол — гаранг одамнинг ҳаққига саҳарларда дуолар қиласман. Оллоҳнинг фазлу марҳаматину сўрайман унга. Ўшал одам ўз етум қизидай мени эску-тускуларга ўраб, ёмон кўзлардан асрамаса, икки дунёда ўтолмасканман бу ёқларга.

Ойим бояқиши, мену еру кўкка ишонмас ойугинам худди қудалариникуга жўнатган кабу асл келунлик либосларумда, духоба паранжуларда йўлга чиқарган эканлар.

У киши ҳовлусига опкируб ҳиндуладай қора, эти устухонига ёпишиган (лекин кўзлари бирар мулойум) бир аёлга (хотину бўлса керак) буюрган эду, мену «вой, келинпошиша, айланай сиздан», деб ичкаруга бошлиб кетду. Бирпаста киртакларну кўтаруб, сандуқларну очуб, лозим эдиму, кўйлак эдиму, нимчаларни топиб олдумга қўйди-да, ўзу чиқаётib:

— Машиларни кийволақолинг, ирганманг, айланай, неча кийилган бўлса шунча ювилган,— деди. Кейун офтобда ўнгуб-ла кетган сидирга паранжсу кўтариб кирду.

— Машини ёпинуб оласиз, келинпошиша. Замон чоп-чоп, ашини кўтараду. Ўзиззикини бир бўйчага тугиб бераман, бемалол кетасиз, — деди.

Кейун: «Амакиззи раъйларига қарайсиз-да, қаттиқ-куруқ гапурсалар кўнглизга олмайсиз-да.

Юра қолинг. Илоҳим, ой бориб, омон етинглар. Оллоҳим ўз паноҳида арасин. Борган ерингиздагиларга дуои салом айтинглар. Насибамизни қўшиган бўлса, орқанглардан биз ҳам бориб қолармиз», деди.

Қандай боришиаду ё амаки жой топуб, кейин олуб кетадурларми — тушуна олмасдум.

Бу орада улар хайр-хўшилашиб, ортумиздан иримиға сувлар сепуб чиқа бошлишду. Ҳиндудек қора хотин чиноқ эрунинг елкаларини силаб, юзуга суртар, икки гапунинг бируда:

— Ҳой, дадаси, дадажониси, узоқиб кетманг-а, бизларни-да олиб кетадиган бўлиб келинг-а,— деб тайуналар эду.

Чиноқ амаку менунг энгул-бошум, паранжсу-сочвонларумга қараб:

— Ҳа, бу бошқа гап, қизим, — деб қўйду, — ҳали қаерлардан ўтмаймиз, кимларга рўбарў келмаймиз. Етволайлук — ҳар қанча орзу-ҳавас сиз билан...

Уялублар кетдум: шу ташвишларну илгаруроқ ўйласам, бўлмасму экан?

Мен йўқчилукдан опаларунинг эскуларину кийуб катта бўляпган, ҳалутдан паранжуга ўранволган қизалоққа ўхшаб қолган эдум. Бу жуда ажойиб эду, Мурод ака. Ўзумга ҳам ёқуб қолганду. Чиммат орасида ўзумну эмин-эркин, осудароқ сеза бошлаган эдум. Негаки, чиммат орасудан келатурган одамну билар даражада қараб олиши мумкун эду. Очиқда уяласан кишу. Ҳаё ҳам қўймайду. Чиммат орасида эркинсан. Лекун Сиз хаёлузга ҳам келтурманг. Шариат биз аёлларунг феълудан ҳам олунган, Мурод ака. Эсланг: аёлларузга айтунг. Кўзларину номаҳрамдан тийсунлар дейулган. Гуноҳ — кўз зиносига қараб кетадур... (Биз аёлларга Сиздек ёлгуз ўз никоҳудагиларга тўйуб-тўйуб тикилмоққа изн берилмиши. Ортумдан етуб келсангиз ману у баҳтга эриштиргайсиз. Билунг, менга Сиздан ўзгасу керак эмас! Фақат ўрни келгани учунгина айтдум.)

Шундай қилуб, кетдук: охирию поёну кўрунмаган, тугамайдурган йўллар билан — довон ошиуб, тоғ ошиуб. Қир ёқалаб, дашт оралаб. Йўлда бир мартагина кимнингдур шалдироқ аравасига тушубмиз. Ич-этум тўкилуబ битду, деб ўйладум. Оёқларум ором топгану билан ўзум тўкулуб тушгандай эдум.

Ҳеч ерда мен — эски-тускига, опасунингму — кимнунг паранжусига ўрануб олган кимсага қараб ҳам қўймас эдулар. Мен бир чеккада сизингдек мунгайиб турар, хужжатларну амаку кўрсатуб, мену кими деб тушунтирап — кейун қўйуб юборушар эду. Ҳар гал юзингну оч, деб қолушларудан зир-зир титраб турман, Оллоҳга дуо, илтижолар қиласан. Ўзинг мавломизсан, ўзинг асра, деб ёлбориб турман — ўзу ўнглайду. Кўнглуга соладуму, инсоф берадуму, энг баджасаҳлари-да, бир қараб қўядиру индамайдир.

Оллоҳ бор, Мурод ака, қўллайдурман деса, ҳар қандоқ ерда қўллайдур. Ман-ман деган чегарачи-назоратчуларну кўзини кўр этуб қўядурганам, эсину оғдирадурганам ўзу.

Ойум оятал курсийну ўқуб бор, у сенинг қўргонунг деб эдулар. Ўша сабаб бўлдиму, ишиклиуб бу катта шаҳаргача омон-эсон етуб олдук.

Аммо етдумиз деб бевақт хурсанд бўлган эканмуз! Эску Жўвадан биз қидурган одам аллақачон уйуни сотуб, кўчиб кетган, қаён бош олуб тўзуб кетгануни ҳеч ким билмасду. Амаку ману бир уй соясига ўтказуб қўйуб қаерларга боруб келмаду — биламан дейдурган одам топилмасду. Бу ёқда кун аввал асрдан ўтди, кейун шомга қараб кетту. Ичумизни ит таталайдур: қаердан бир бошпана топарканмуз, деб, тонг отдиарканмуз, деб. Ахийри ўша сиз қулогумга шивирлаб айтган манзил тилимга кела қолду:

— Шу Эску Жўвада Зарқайнар деб атамуши кўча бормуши, шу кўчада Нусрат почча демииш одам... — дедум амакига.

— Ким? — деду кафтуни қулогуга тутуб.

Мен қайтардум.

— Ким айтти? Ҳожимми? Бизнинг тутунгган акамизми? — деди (шундагина билибман, бизга тутунгган амаку эканини!)

Мен айттолмай ер сузаб қолдум.

— Э-ҳа, күёвга тегишилими, унда топса мумкин, ишонса мумкин, — деду.

Шунаққиб биз уларну топуб бордук.

— Вой, шунақами? Вой, ҳой, Санобар, суюнчилигни эшишт: Султонмуродингни олдидан келишибди! Мозор босиб келган меҳмонларга қара, катта уйга жой сол. Вой, ҳой, Миновар, самоварингга қара. Оёқларининг тагига қўй сўйса арзийдирган кишилар кепқопти, — деб шошиб қолишиду.

Тошканну асл одамларину шунда кўрдум; меҳмон деса, жонларину қўшиб берворишар экан. Сизну номингизну эшишибоқ багирларину очуб юборишиду. Ё улар чиндан ҳам шундай ҳалим одамлариди, ё Сизну уруғ-аймоқларуз ўзу шунақами — билолмасдум.

Кирдук. Кўярда-қўймай бошидан паранжую соч-вонумни олдиришидию... қотиб-ла қолишиду. На сиз кимсиз, деб сўрай олишаду, на қаердансуз дея олишаду. Тикилуб қолишиду. Ахийру холангизларга (уят бўлса-да) ўзимну танутдум:

— Мен... ўшиқлу келинизман, Маҳфузаман, — дея олдум.

— Вой, келинизман деган шириндан-шакар тилиздан, ўзим айланай, қани, бошқатдан кўришиб қўяйлик,— деб юзларудан нур ёғилуб қучоқ очарканлар, тепчук қозозлар ҳидиму, дўппу ипакларунинг ифор ҳидлариму гуркираб борарду. Ахийру катта қизларуга:

— Ҳой, Санобар, сандуқни оч, кўрманага бир кийим ипакли ол, чоп, — дедулар.

— Вой, қўйунг, холамойу, нима деяпсиз? — дейман ңуқул.

У ёқда эса, холамойунинг қизлари эслару оғуб бир-бирларига шивирлашаду:

— Вой, анувнинг ўзи-ку, қўйиб бичганми, бичиб қўйганми, Марғу-ку, — дейшишаду.

Марғуси ким экан, ўша сиз ҳам мену унга адаштирган келинму — билолмайман.

Ахийру икки кийимлук ипакли, бири қарғашиойи атлас, бири сариқ атлас кўтариб чиқиб, иримига бошумга қўйшиди. Муборак бўлсун қилишиди.

Мен ҳам бошумга рўмолумни келунлардек солиб, унинг икки четудан тутганча (Сиз ўша кечга тушунтиргандек) тошканчасуга келунсалом қилдум. Аввал жондан азиз холангизга, кейин Санобару Минавар опаларга.

— Кў-ўп яшанг, қўша қаринг, — деб дуо қилишиди.

Билсангуз, мендан баҳтли одам йўқ эду ўша тонда, Мурод ака.

Кейин бошқа уйга опкириб, бўхчамни ечдиришиуб, уйдан чиққанумдаги кийимларумну кийдируб чиқшиди-да, почча билан чиноқ амакунинг олдуга саломга олуб кишиди. Бир уялдум, бир уялдум. Ҳеч қачон бунчалук ҳолга тушмагандум. У шунақа ширин ҳам тотлу десамму, уятлу ҳам, кераклу десамму, бир юмуш эду. Ундан кейин одам ўзуни қўшидай енгил ҳис этарду.

— Кўп яшанг, келинпошиша, туп қўйиб, палак ёзинглар, кўркам-кўркам фарзандлар кўринглар. Оллоҳ ёмон кўзлардан ўзи паноҳида асрасин, илоҳим, — деб дуо қилдулар тез ҳансураб қоладурган поччангиз. Кейин қўйунларидан катмонларини олиб, нечтадур қизил ўн сўмлик узатдилар Санобар опага. — Бу машриқли келиннимизга мендан ёдгорлук бўлсун, битта тилла соат олиб бергайсизлар, удум шундай — қутли уйдан ҳадя.

Мен бошум гир-гир айлануб, зўрга чиқуб кетдум. Уларга чой қўйуб узатишни-да, унугтибман. Эсласам, ҳалу-ҳалу ёноқларум лов-лов ёнадур.

Шундай қилуб, ўшал — Сиз бир муддат умргузаронлук қилган кўп қадум хонадонга (йўлкаларию ковиандозлари мусулмон гиштдан териб ишиланган, вассажуфтли кенг-кенг, тахмон томонларуда ёзингиз неъ-матлару — беҳулардан тортуб нокларга қадар, узумлардан тортуб чилонжийда шохчаларига қадар осилган дор ёғочлари бор) уйларга келуб қолдум. Маҳрам амакум мени уларга ишонуб қолдириб кетдулар. Қайтуб кеттиму ё хешларину излаб кеттиму, билолмадум.

Бир ойчаму, қишига қадарлу шу холамойингизникуда қолдум. Мен ўшал сизга жондан азиз кишиларникуда умрбод Сизну кутушига розу эдум. Лекин бир кун... қўрқанум қошимга келду.

Билуб-бильмай қилган қайсу гуноҳларумга — ширун ошум заҳар бўлду; тинчлигумиз бузулду. Кимдур етказганму, нозир суришитируб келду. Эмушики, бу хонадонда сарҳаддан ўтуб келган одам яшайтурганмуши, рўйхатдан ўтмасам, бўлмасмуши, фалон жойга борсин эканмушман.

Холамоийи Нусрат почча билан маслаҳат қилган эканлар:

— Бекорларни айтибди, хомтама бўлмасин! Келса, менга учрасин. Дарвозани занжирлаб юринглар. Жуда қўймаса, дон ҳужрага киритиб, кейин очинглар, — дебдулар.

Ўша энг четдаги эшиги ҳамиша қулфлоғлиқ турадурган дон ҳужрада, кўрган бўлсангиз, тандурдан катта-тандурдек хумлар кўмуглиқ экан. Ўшалардан биттасуни артуб-суртуб ичига говрапўши тўшаб беришду. Бирор эшикдан қистаб-чақириб келса денг, мен боя-қиши — Сизнинг жуфтун ҳалолингиз ўшал ўрага тушуб оламан. Устумга эску-тускуларни ташлаб, ёпуб ташлашаду. Ана, шу гўрдан қоронгу ўрада жон ҳовучлаб ўлтуришиларимну кўрсангуз. Бир кунда неча марталаб тушиб чиқардум, ўлуб-қутулардум.

Бир гал денг шошганумдан ялангоёқ қочуб кирган эканман, балкум кавушум қаерлардадур тушиб қолгандур, ишиқилиб хумга тушуб бошумга гирдум патнусни тортуб, хум устини беркитганумнию чўнқайганимну биламан, товонимну бир нима жаз чақуб, жонум бошумдан чиқиб кетаётду. Ҳушим оғуб ўлтириб қолубман. Кейун билсан, жонҳолатда сапчуб кетганумда бошум гирдумга урилиб, эсум оғуб қолаётган экан.

Ҳайтовур, холангузлар югуриб келуб, тортиб олишиду. Қараиса, бошмалдоқдаюн чаён тушиб қолган экан. Кўз олдумда ўлдириб ташлаб, чаён чаққанданда ўқиладурган дуоларни ўқишиду, тўпиғум тенасидан сириб боғлаб, табиб кампирни чақириб чиқишиду. Оёгум лўқиллашию жонум оғришиудан ўтириб-ўтирилмайман, юруб-юролмайман. Хун-хун ииғлаб, шишиуб кетубман. Мусофирлук ўлсун, кўз олдумдан сиз, дадам, ойим ўтаверасизлар. Худди чақирсан эшиштадигандек жойда турибсизлар. Дадам Сизга нималарнуур тайинлаётурлар, уқдираётурлар. Ойим ора-чира кўз ёшлигину артуб, бир чеккада турубдулар. Нима бўлган, ё мени ўлду деб эшишишганму — мотамсаро маслаҳат қуришаду. Сиз ҳеч бошингизну кўтармайла, ердан кўзизну узмай-ла турибсуз. Бу нимадан белгу экан, деб қўрқуб кетяпман. Ойи, Султонмурод ака, деб бақирай дейман-у, овозум бўгзумдан чиқмайду. Хун-хун ииғлайверибму — овозум чиппа битган.

— Ана, бўлди, қўрқма, қизим, Худо хоҳласа, ана шу нарса заҳрини сугуриб ташлайди. Яхшиям товонга тўғри кепти, бошқа жойни чаққанданми, кўп овора қиласарди. Қўрқма, Худо асрабди. Оллоҳ ўзи ғамхўр, бу ёғига ҳам күшойиши бергай, — деб табиб кампир ихрай-сихрай чиқуб кетду.

Чиндан ҳам бир ухлаб турсам, сув-сув терлаб, енгил бўп қопман. Оёгумдаги бояги оғруқлар ҳам аллақаётқа чекилган. Фақат боя, сизлар кўзумга нега кўрундуңгиз — ҳеч тушунолмайман.

Шу-шу бирор эшикни ташлаб, хумга ўйлатмайдурган бўлишиду.

— Худо олсин, нозир-позирини. Раҳматуллахонга айтинг, ҳой Санобар, битта қўнгирок қиласа, йўламайди-қўяди. Қачонгача ўз келинувзани яшириб ўтиравуз, — дедилар холангуз.

Нозир келишину тўхтатгану билан орқасидан — қаердан эшишишган олдинма-кетин бир совчилар босишга тушибу. Бирини жўннатуб улгурмай, иккинчиси дарвоза қоқиб келаду.

Холангуз мену Муҳаббат кеннойининг уйига қочириб қўйуб, совчилар билан ўзлари муомала қиладилар. Вой, қизимиша ҳали бўй етмаган, ёши бола-ку, ақлини сал танисин айланайлар, дейдилар. Улар менинг довруғимну қаердан эшишишган, бир кўрмагунча кетгулариям, тургулариям келмайду. Ахийри холангуз бояқши, тепадаги уйда кизакка тепчиқ уриб ўтирган Минавархонну ойнадан кўришига ижозат этадулар ва:

— Бўйи етиб, жойи чиқса, узатмай қаёққа боравуз, айланайлар, шу ёлғиз қизимиз, — деб уларнинг тарвузларини қўлтуқларидан тушириб, чиқаруб юборадилар.

Чиқаруб юборадилар-да, почча келганларида юзлари ишакдайин майин тортиб, кула-кула айтиб берадилар.

Ана шундай қиши кунларининг бирида яна бир холангуз ўғилчаларину ёнларига олиб, даладан тушиб қолдулар. Ва мен бечоранинг жонига аро кирдишар.

Бу ҳақда келаси гал ёзарман. Негаки, мен Оллоҳнинг хоҳиишию мадади ила жаннатдек жойлар — оталаривуз юртига боруб қолган эдум, баҳт-иқболум тўлук бўлиши учун ёлгиз сиз етмасдингиз. Оллоҳдан сахарлардаю жойнамоз устларида ёлгиз сўраганум Сиз эдингиз. Сизну етказса, бир кун, бир соат бўлса-да, кўргазса бас эду. Келунг, яхиси, ундан кейингу воқеаларни бошқа куни бита қолай. Олди хўролар қичқира бошлидупар. Таҳажжудумни ўқиб ола қолай-да, мен ҳам ёта қолай. Тушларумга киармукаңсиз деб ирим қилуб, хайр демадум.

Завжаси жамилангиз — МАҲФУЗА

ДАРВОҚЕ: кечагида холангуз айтиб қолдулар.

Кимки жума кечаси таҳоратли ҳолда ётаётуб, севимли пайгамбар соллаллоҳу алайҳи вассаламни тушида кўриши ниятуда «Ла ҳавла вала қуввата, илла биллаҳил алиййул азиим» дуосини ўттиз уч марта ўқуса, албатта, кўраду эмуши.

Қандай яшиш!

Оллоҳ ўзи кечирсун, ўшал тобда хаёлумга Сиз келубсиз. Шундай дуо бўлсаки, уни минг марта ўқуб, суй-ган кишингни тушида кўрсанг, умрум бўйи ўқуган бўлур эдум.

Негадир тушларумга ҳам кирмай қўйдунгиз, уч ойлар бўладур шунга ҳам...

Турдум.

## 12. ГЎЗАЛ АЖР

(Маҳфуз хатлар давомига)

Қайданам ўша ботур бизну қўргонни қора тортуб келду? Сизну учратдум: Юсуф алайҳиссаломну кўриб, жону жаҳонуни унутган Зулайҳо янглуг бир ҳолга тушишум?!?

Қайданам Сизну деб кўз очуб кўрган диёрумизну ташлаб чиқтум? Дориломон бир юртга борарканмуз, деб, бошим осмонларга етди? Ойнинг ўша ёруғ ўн беши шунчалар қисқами эду?

«Инналлоҳ маъас-собирийн». Энду ёлгиз дуом — тилимдаги калима шую суянганум Оллоҳ. Гўзал ажрга умид тутуб, чиройлув сабр этмоқдан бўлак нимам қолду?

Шундай дейман-у, лекин жудоликнинг ўзу нимадан бошланиб эду? Наҳот баҳт ва баҳтиқаролик ёнма-ён, эгиз юргай? Айрулмоқ учун топишуб эдукму? Баҳтумиз кимга кўп кўринду? Нимамуз, қайсу амалимуз Оллоҳга хуши келмаду?

Аввал-боида қай сабабдан топиштириди-ю, яна не сабабдан айурду? Жудоликда имтиҳон этмоқ учунму?

Жону жаҳонум, топуб йўқотганум, қайларда қолдиз? Бизну бу ёқларга юборуб қўйуб, ўзиз қай диёр, қай сарҳадларда қолуб кетдиз? Юмушларингиз бутмаб эдиму? Бунданам зарил ишларингиз, олий юмуши — курашларингиз бормуди? Нега ҳеч мужда йўқ? Орқадошларингиз ташвиши ила юрган бўлсангиз, майлу-я, лекин ваъдаларингиз қандай — ота диёрга қайтуб осуда яшамоқ эди-ку! Яна нима бўлду, фикрингиздан қайтуб қолибсуз? Менга айтмолмаб эдингизму барча-барчасини? Нималар моне эканун?

Кишининг ич-ичида, юраккинаси туб-тубида нима бор — билавермас экансизму? Балки ушалмаган ниятларингиз бу томонга қўймасму, йўл бермасму? Мен ожиза не қилай — шу хаёлларга-да бораман. Шайтоннинг васвасалари, висир-висирларига учаман баъзан. Аммо у кунги воқеани қиёматга қадар, кўзим очиқ экан, танамда жонум бор экан, унутмам, унутолмам.

Ўша кеча не кечганини сиз билмайсиз. Чунки беҳуши эдингиз, эслаб қоладиган ҳолда эмасдингиз. (Худо ҳеч кимга қўрсатмасун, у ҳолга тушмоқну, чинданам ҳарб майдонуда оғир жароҳат еб йиқилиб қолган мужсоҳид—хийла узоқдаги бир қўргонда — бирорвнинг ертўласида пайдо бўлиб қолса, етти кун деганда ҳушига келса, қандок тушунмоқ керак уни? Ким шунча

жойдан бу ерга ортмоқлаб келдию, ўзи қайга йўқолду? Қолаверса, ким эди у? Қайси яхшилигиз эвазига қутқариб эду? Нима бу, тақдирда бориму ё Оллоҳнинг хоҳлаши?

Бари сизга қоронегу. Нима туфайлу, ким туфайлу шундай бўлду — Сиз унчалик ҳам билмайсиз. Лекин мен шоҳидман. Ўз кўзум билан кўрганман у ботурну. Шу боисдан ҳам Сизга маълум этиб қўймоқну лозим кўрдум, қолаверса, ўша воқеану эсласам, илоҳий бир башиоратдай туюлавераду. Кимга айтай? Сиздан бўлак кимим борки, айтсан, Султонмурод ака?

У сизга ким эдуки, бунча мардликлар қилду? Ўзини фидо этуб қутқармоққа урунди? Мен билмайман, балки, жон ўртогингиздур, биродарингиздур. Лекин түшишган жигарлар қилолмагай бу жон фидоликни қип-ти — у. Сиздан ҳам шу тарз фидоликлар кўрганмуди ё? Ким эду ўзи?

Шуни билмоқ умиудуда, қолаверса, Сиздек бир ботурни бизникига етишитирган, бизнинг топишувимизга-да сабаб бўлган одамни билгим келуб, битмакдадурман бу сўзларну. Токим Оллоҳ берган неъмат — муҳаббат неъматининг-да сабабчисину унутмайлук, дуоларимизда эслаб юрайлук.

Кўз ўнгимдадек турибду ўша кечасигу воқеа. Бизну титроққа солуб, бир олам қўрқув-ташибшилар олиб келган ўша кеча. Ҳожи дадамиз кечалари тахажжудга турадирган одатлари бор эду, турсалар боз эшик томондан ихрашму, инграшму — тушуниб бўлмас товушлар келаётир эмуш.

Субҳоналлоҳ, деб яқин борсалар — не кўз билан кўрсунларки, ертўла дарчаси тагида икки қора жон талашиб ётганмуши. Эсхоналари чиқуб, ҳой-хўй билан келуб қолдулар.

— Ҳой, чироқну ёқ! Ўзриму ким тушубди. Бўл! — дедилар. Қани биз туриб, гугуртни тополсак, чироқну ёқолсак.

— Вой, нега тушаду? Ташиқарудагилар-чи, қаёққа қарабду? — деб титраб-қақшайдилар ойум.

— Шомги отушма эсингдами, балки ўшалардан ким адашиб-улоқибдими. Ёқа қол, қарайлук, — дедилар дадам ахийри ўзларига кела бошлаб.

Чироқну ёқиб чиқуб борсалар, ўша аҳвол. Бири ҳушидан кетуб ётупту, ўлукму-тирик билмайсиз. Боиқасу кўксуни ушлаб гужсанак бўлуб олган. Инграб тебранаду у ёғи йўқ.

Одам чақирмайнам бир амаллаб, ертўлага жойлабмуз.

— Бирор билмай қўя қолсун,— деб Ҳожи дадам уна-мадулар.— Эрталабгача Аллоҳ ҳафиз, кейин Мирза бувани чақиравмиз, — дедулар.

Бираvigа тўрдаги эски сандуқнинг устидан жой очдук. Униси тўланинг токчасига ётқизилди. Бояқиши ютоқуб бир косагина сув ичиб эду, «во-оҳ, ўзингга шукр» деб туриб жсим бўлиб қолду, қўрқуб кетупмиз. Ўзи эса қора қонига беланганд, қўлтигудан қўлини олмасду.

— Вой худойим-а, мен буларни ким деб ўтирибман. Аниқ ўшалар-ку, Ботурнинг иигитларичу. Кечаги отишмада нима бўлибди, шунча жойдан этиб келишибди? Яна бу аҳволда? — дердулар Ҳожи дадам. Бу ёғига энди нима қилишину билмай гангуб қолган эдулар.

— Бўлди, чиқунлар. Чироқну ҳам опкет, — дедулар ахийри ва бизну ҳайдашга туштулар. — Чиқ, чиқ. Одам боласи чироқ-пирогингни кўрмай қўя қолсин. Шунча ердан этиб келган, эндијам ўлмайди. Аллоҳ, ўзи асрайди,— деб ертўлану қулфлаб бизни уйга киргиздилар-да, ўзлари табибга отландулар.

— Азон айтгунларича қайтиб келаман. Сизлар миқ этмай ўтиринглар. Аллоҳ кечирсин. Чолга ҳам қизимиз иситмалаб қолди, дея қоламан, — дедулар.

Нима бўлса, кечасу содур бўлмасун экан. Ҳеч титроғумиз қолмасду. Мужсоҳидларнинг ўзлари эса кўз олдумиздан кетмайди. Қай бири қай бирини ортмоқлаб келибду экан? Қора қонига беланганиму ё ҳушидан кетгани? Ақлимиз етмасду.

— Унисину кўрдизму, ойи. Чаккасига нима қилган, ёрилганму? — дердум ҳадеб. Кўз олдимдан ўша тиртиқдан оқуб тушиб, қулоқ юмиоғи томон бурилиб кетган қон кетмайду.

Худди бир гароюб белгу каби.

— Кўрдум, болам, кўрдум. Аллоҳ орқасини маҳкам этсин-у, бўздек оқаруб кетибду, бояқши. Табиб келгунча тортсин-да, — дейдилар ойум ачингандан ачинуб.

Мен ҳам чарсман. Бирор ачинса, ўшанинг қасдига дуо қилишига тушаман. Ҳозир ҳам ичимда ўша бояқши номидан «Ҳасбияллоҳи лаа илаҳа илаҳу алайҳи таваккалту»ни ўқир эдум. Шу дуони етти марта ўқилса, Оллоҳ ўзи бало-қазодан нари қиласадумуши.

Тавба, шу дуони ўқиганум сари кўз олдумдаги сувратингуз ўзгаруб борар эду: чин сўзим, қулоқ юмишоқларингиз томондан юз руҳларингиз томон бир қирмизи қизиллик юргурган эдуки, бунга сари ўзим ҳайратга тушардум. Тушардум-у, дуони тилимдан қўймасдум.

Бир вақт қарасам, биноий хуисурат ботур йигит... ҳалуги чаккасидаги — алиф шаклидаги ажаб чандуқ ҳам ўзига ярашиб турибду (Ботур чандиксиз бўларму, ахир! У ҳам кўрк инсонга!).

Кўз олдумдаги сувратдан эсум огуб қопту<sup>12</sup>. (Билмадум, Зулайҳо ҳолига ўшанда тушиб эдумми, ё кейинму — ҳеч эсимда йўқ. Балки кейун ҳам шу сувратда кўриб, ёқтируб қолгандурман).

Дарвоқе, ким тўғрисида ёзатиб эдум? Сизнинг халоскорингиз ҳақида эду-ку.

Бир маҳал ташқи дарвозамуз огур гийқуллаб, занжирими — бир нима шилдираду. Сўнг ичкару ҳовлумиздан гўнгир-гўнгир товушлар келуб бошлади. Биз жон ҳовучлаб ўтируб эдук.

— Чиқуб бок-чи, — дедилар ойум.

Остонага чиқишумла маҳалланинг тена масжидидан сўфи ота аzon чақируб юбордулар. Узоқ-яқиндагу хўролзар эса, унга ўз тилларида тасбех-қичқириқлару билан жсур бўлишар, тонг ёришимаган, ҳаммаёқну тун пардаси қоплаб ётар, у ҳали тонгги гира-шира билан алмасиниб улгурмаган, осмоннинг аллақандай тўқ кўкишидан ҳам қорароқ баҳмали юзига сочуб юборилган инжу юлдузлар кўк пойлоқчуси томонудан териб олунишига тушмаган эду. Тепадан бир жуфтмошак қушми, нима — учуб ўтар эду. Ўн қадам наридаги одамниям тануб бўлмас, тусмоллаш мумкун эду, холос. Айнуқса, юрганда энкаюб қўлларию жуссаси қалтираб-салтираб, аллақандай омонат — энтақ-сентак қадам ташлайдурган Мирзавой отани бир қарашдаёт ҳанимок мумкин эду. Афтидан Ҳожи дадам намозгача қолдирмай уни бошлаб келмоқда эдулар.

— Хой, опоқ қизим, чироқни олачиқ, — дедилар кўприкдан ўтаётуб.

Ҳовлумиздан бир ариқ сув айлануб ўтуб кетар, ҳар ерида панжарали кўпруклари бўлар эду. Улар ўшандан ўтуб омбор томон юрмоқда эдулар.

Чироқну опчиқуб борсак, бизни қайтаруб юборуб, ўзлари ертўлага тушуб кетишиду. Бизну ўйлатишмадијам. Аммо бир нарса сўраб қолишадиму деб қалтираб турубмуз.

Йўқ, сўрашмаду. Чироқ нури дарча тагидан силжисиб, гўнгир-гўнгир бирла қайта бошлашиди. Чиқиб айвонумизда икки ракъатдан намоз ўқишиди. Оллоҳга дуо-илтижолар қилиб туришигунча тонг ҳам отду. Қўлларини белларига ташлаб энкайиб юрадурган Мирзавой ота ўша айвоннинг ўртасига ўтироволиб: «Хой, пўточ қизим, мўмоч қизим, уни опке, муни опке» қилиб буйира кетдилар. Ҳовончамузни опкелиб бердим, ичида жисмит янчгичи билан. У киши оёқларину узатуб, ўтириб олганлар. Ҳали белбоғларину ёздирадилар, ҳали жиндек сув опкелтирадилар. Учуб бажаруб турибман. Қўнгир чакмонларининг ҳали у, ҳали бу чўнтағидан оғзи бўғма эски ҳалтачалар чиқариб, уни очуб бир нималар оладилар. Ҳовончага жиндек-жиндек солиб, тўқ-тўқ тую кетадилар. Мушк ҳидларими-ей, тоз ўтларининг исларими-ей гуркирайду ҳавончамуздан. Менга берақолинг десам, унамайдулар.

— Йўқ, мўмоч қизим, дуо олмаган кишиники эм бўлмайди. Аввал мендан дуо ол, ҳунаримни ол, кейин. Оласанми? — дейдилар бошлари, унга қўшилиб елкалари, бутун вужудлари титраб-қалтираб. Мен нима де-йишишумни билмай иймануб қоламан. Ўзумну аллақандай сир босаду.

<sup>12</sup> Хат эгасининг «Қопту, қолибду»лаши ғалати кўринмасин. Бу «қўч-қўч, қоч-қоч»ларда ўз диёри, эли-элатидан нари тушиб, бўлак диёрларда туғилиб ўсган авлод тили-лаҳжасига хос «йўқотиш»лар меваси бўлиб кўринди. Шу боис мактубларга тегинмадик. (Муаллиф.)

— Сир босмасун, мўмоч қизим, Аллоҳ юқтирса ҳеч гапмас,— деб ҳавончану тўқиллатишига тушадулар. — Биз кетяпмиз, Сизлар қоласиз. Опқолиши керак, қизим, опқолиши. Манавунача пайтларда асқотади.

Бир сўрагум келяпту, бир сўрагум келяпту, қани тилим айланса. Ахийри ботинуб-ботинмай:

— Улар туриб кета оладиму, бува,— дея олдум.

— Турмай нима, аввало, бувангни қўлини Аллоҳ енгил қилсин. Ўзи қўлласа, ҳеч гапмас,— дедулар у киши. Кейин ўша малҳам ийлаб ўтиришларуда қўшиб қўйдилар,— Аллоҳ бирини-бирига эши қилибдими, шунча жойдан ортмоқлатиб-сургаклаб кептими, бир ҳикматиям бор. Ўзига келмай, шаҳид кетадурган бўлса, ўша тоз тагидаям қолаверарди.

— Унису-чи? Қайси бири опкелган дейсуз, бува? — деб юборибман.

— Афтидан беригиси. Кўкси бундай... ё жон ҳалтида кучга кириб кетиб, ё тишни-тишига қўйиб етказиб келгану ётиб қолган. Марднинг ҳам марди экан. Ўзи бу аҳволдаю биродарини ҳарб майдонидан опчиқибди, — ҳар кимга ҳам насиб этсин-чи! Ўлаётуб ҳам бировга жон фидо қилиб кетиши дейилади буни, қизим.

Кўзларумдан тирқираб ёши чиқиб кетубду.

Кейин ҳар иккингизну ҳам ювуб-тараб, малҳам боғлаб кетшиду.

— Аллоҳнинг паноҳига!— дедилар бува,— асрдан кейин хабар оларман. Унгача бир гап бўлса, чақирасизлар.

Ўша куни тинч ўтди-ю, лекин тунда уйгонуб кетсан, ойум ўринларида йўқлар. Ичум ҳаприқуб, ҳовлига тушуб борсан, ертўлада чироқ кўринаду. Ойум ҳам, дадам ҳам ўшатта эканлар.

Ўша жон ҳалтида ётгани огурашиб қопту.

Эшикдан мўраласам, дадам кўзларида ёши, чироқ ушлаб турибдилар. Ойум унинг бошини тирсакларига олуб, сувми, нима тутяптулар:

— Ич, болам, ич, ҳоврингни олсин, — деб ялинадулар, ялпоглануб йиғлайдулар, — Нима, болагинам, танимадингму, менман-ку, онажонингман-ку. Санга нима бўла қолди? Шуни ич, енгил тортасан, темирга сув бергандай роҳат топасан, — деб ёлборадулар-у, кўзёшлиари билакларига, унга қўшиб, қўлларидағи сувга тома-ётгануни сезмайдулар.

Ахийру у тишлари такиллаб бир қултумгина ичдию:

— вооҳ, ўзингга шукр, — дея бўшашиб тушди.

Ойум бошини ёстиққа қўярканлар, дадам боруб қолган менуям кўрмай кўзда ёши била шивирлаб калима келтирап эдулар. Шунда ҳалиги ботур бетоқатлануб уларга аланглай бошладу, бир нималар дея бошладу. Ануқ эшиштум:

— Хайрият, етиб кепсиз. Кўрсатди рухсорингизни. Гуноҳларни ювгани келуб... қайтолмаган Чочол дарбадарингизни кечиринг, — деду базўр ютунуб. — Ният ўзи шундоқ эди, жисла қурса, шаҳидлик шаробини ичмоқ эди. Ичдим шекилли. Дуо қилинг, жаннатларда кўриштур-сун, Ла илоҳа... — дедиу шивирлаб бўлса-да, нозандек гапируб турган одам... бошини бир ёнга ташлаб, ўта қолду, тавба...

Ана, Худонинг ёзмиши!.. Бўлмаса, ким ўйлабду, шунча жойдан буродарини ортмоқлаб келган одам табибга етишгануда ўтаду деб?!

— Бояқиши, онагинасига интиқ бўлиб, узилолмай ётган экан, рози кетти. Илоҳим, раҳматига олган бўлсун. Руҳини яшил қушларга жойласун, — деб ойим юм-юм йиғлар эдулар Ўксиларини тутолмасдулар. Унинг оти ростдан ҳам Чочолмиди<sup>13</sup> ё бизга шундай эшиштилдими, билмасдум мен.

Ростуни айтсан, менинг ҳам эсхонам чиқиб кетган, ертўла токчасига суюнганча ўтириб

<sup>13</sup> Шу ўринда хатни эшишиб ўтирган Мақсад «Воҳ, Турғун чочол эканми ўша?! Акам билан бирга эканми?!» деб қўяр, хайратининг боисини хатни ўқимоқда бўлган хотинига ҳеч тушунтириб беролмасди. Тақдир ҳайдаб борса, шу эканми, дерди нуқул (Муаллиф).

қолган эдум. Кўлимдаги чироқ эса оғиб, тилигими, нимасу сўхта тортиб, чирсиллар, шишиасининг бир ёну тамом қораюб борар эду.

— Тур, чиқдик, қизим. Мирза бувани айтиб келасан, — дедулар ойум ниҳоят, — унисини ҳам худо кўп кўрмасун.

Шунда секин қаддумни кўтардум. Қарангки, чироқ фақат Сиз томонни ёритиб, бу ёқларга аллақандай хира соясуни ташлаган, беҳи ҳидлари гуркираган ер-тўла ичи галати ҳолга тушиган эду. Сиз эса, тўрдаги ўша синдуқ устуда (дадамнинг кўк тўнларига ўраб қўйилганча) миқ этмай ётибсиз. Юзлариз оппоқ бўзаруб кетган. Жон асари кўринмайдур. Гўё... ўз хаёлумдан ўзим қўрқиб кетаётган эдум.

Чиқсан, тонг бўзаруб қопту, уфқни улкан қўтосдек тўсиб ётган қоп-қора Тангритог теннасида ёлгиз юлдуз — чарақлайду. Уни яшилилк аломати ҳисоблаб, табибну айтиб келгани кета бошлаб эдум, дарвозамиз очилуб, у кишининг ўзлару кўриндулар. Табибни бизга Худонинг ўзи етказган эду.

Бу воқеани эшиштуб у киши секин чўқдилар-да, гилос тупига суянганча юзларига фотиҳа тортдулар. (Менинг эшиштганум шу бўлду):

— «Инна липлаҳи ва инна илайҳи рожиуన» — деб туриб, қўшиб қўйдулар, — Вазифаси шу экан, ўтаб, Аллоҳ даргоҳига қайтибди. Қайтганда ҳам гўзал ажр билан қайтибди, иниша Аллоҳ, — дедилар-да, негадир менга қараб, яна қўшидилар, — қўрқма, қизим, энди буниси узоқ яшайди.

Сиз бу воқеалардан бехабарсиз, Сизга оғиз очишмаган эду, Султонмурод ака. Уни ҳув кейин, мавриди би-лан айтиши менга буюрилганди. Мен ҳам улгурмадум. Узр. Энди очдум бу тарихни. Асли ўзи ким эду, у ботур?

Аддои Махфузангиз  
Каттабоғ. Асли она ўрнуда  
холажонунгиз — Саломхон  
кичигойум хонадонлари.

\* \* \*

Мен хатни эшишиб ўтириб хомуш тортиб кетган эканман, хотиним кўриб, шошиб қолди:

— Вой, адаси, нима бўлди?

— Йўқ, ўзим, — деб каловландим мен.

— Бирон жойи мундайроқ эканми?

Мен унга қандай тушунтиаримни билмай, ўнғайсизландим:

— Биласизми, ўша Чочол дегани, Худо раҳмат қилсин, аммамизнинг ўғиллари бўларди.

— Ўша биродарини кутқариб, ўзи шаҳид кетган киши-я? Сиз у кишини... билармидингиз?

— Билганда-чи, — дедим кўзим намланиб келиб. Бу тарихни бир оғиз сўз билан тушунтириб бўлмасди. Шунинг учун секин туриб токчадаги эсадалик нарсалар ичини титкилай кетдим. — Қаердадир унинг акамга ёзган хати бўлиши керак, асраб юрадим.

— Қайси акангиз? — деди хотиним ҳайрон қолиб.

— Қайси бўларди, Султонмурод акамга-да, — ундан бўлак кимимиз бор, демоқчи бўлардиму айтольмасдим. — Ҳатто ўша тангритоғлик кеннойимиз ҳам бу тарихларнинг бошини билмайди, — деб қўйдим.

— Шунақами?

— Шунақа. Ҳа, мана, турган экан. — Хатча ўша икки буқланганча сувратлар орасида эди. Олиб қайтдим. Ўзим ҳам ғалати мажхул ҳолга тушиб уни ўқи-моққа бошладим. Ўша Турғун чоғол ёзар эди...

«Мен ўша дардисарман, ўзинг извои топиб, Аррапояга етказиб келган. Раҳмат, ука. Танимаган-билмаган ганимингга шунча одамгарчилик қипсан? Кези келса, жигар жигарга бунча

яшишилек қилолмайди. Бир қориндан талашиб тушиганлар қўллай олмайди шунчалик! Сен қилибсан!

Аввало, номимни эшиштасалароқ дўхтирлари оёққа қалқадиган жойга етказиб кепсан. Боиқа жойда ўлиб кетсам, бирор билиб-биров билмасди. Бу ерда ҳарқалай Турғун чочал номим бор, бутун Бешогоч даҳа, у ёги Қоратош, бу ёги Ҳадра танийди. Мени оёққа тургазмай кимни тургазишисин. Қолавурса, Қоратошга суришириб бориб, волидаи меҳрибонимизга хабар бериб кетибсан. Эшишиб, кўп таъсирандим!

Мен ким эдимки, Худойим менинг ишимни сенга туширибди, марҳаматли одамларга йўлиқтирибди? Ахир, сендан бўлак бир кимсага рўпара қилса ҳам, им ўлимида ўлиб кетсам ҳам ҳақи бор эди. Нега асрар қолди? Паноҳ беряпти? Очигини айтсан, кейинги вақт-да шунақа гаройиб воқеалар бошимдан кечдики, нималар бўляпганига баъзан ақлим бовар қилмайди. Мен нима топшириқ билан орқангдан эргашиб чиқдим-у, ўзим нима бўлиб қайтдим? Ёргу кунда, куппа-кундузи сени қандай йўқотиб қўйдиму ўзим ўша қўргон атрофида гангуб-ўралашиб қолдим?

Калтакни еб-еб, кейин қутулиб кетишиим-чи? Қўргон эгаси, анув чолнинг Ҳизрдай етиб келиб, ажратиб олиши-чи?

Ҳаммаси тушига ўхшайди, бизнинг ақлимиз етмайдиган бир нарсаларга ўхшаб кетади. Худонинг ўзи ёрлақади шекилли, сен менинг чангалимдан қандай қутулиб кетдинг, мен эсам кўрга ўхшаб сени кўрмай қолавурдим? Ўзим қазган чоҳга ўзим қулаб, қонга беланиб ётганимда яна сенинг етиб келишинг-чи? Қандай тушунши керак?

Ростини айтсан, бу ёққа чиқарашмасидан сал бурунроқ гаройиб бир воқеа содир бўлди. Унга ҳам ҳалигача ақлим етмайди. Бизни ярим кечада уйготиб, ўлим камерасида ётган бир маҳбуснинг ёнига киритиб юбордилар. Ярим тун бўлгач, ўзинг тушуниб олавер. Бекорга киритмайдилар. Биламиз, ҳукм улардан, ижро биздан.

Кирдик. Эшик шарақлаб беркилиб, қадамлар узоқлашиб кетди ҳамки, ё тавба, мен жойимдан жисолмай, ўзимга келолмай турибман. Қотиб қолибман.

Қаршиимда бирор... нега бирор бўлсин, отам раҳматлининг ўзгинаси! Қиблага қараб намоз ўқиб ўтирибдилар. Бошларида ўша оқ тўр дўппилари, оқ оралаган соқолларидан, кулча юзларидан нур ёғиляптики, қўяверасан. Тағинам сал қия ўтирибдилар. Бир юзларинио кенг ягриналарини қўриб турибман. (У киши шунақа яқриндор эдилар.) Ўша-ўша басавлатлар, ҳеч чўқмабдилар. Ундаи десам, ўтганларига қанча замон бўляпти. Астаъфируллоҳ, одам одамга шунчалар ўхшарканми, деб ёқа ушлайман. «Кимни бизга рўпара қилиши-яти? Наҳот биз ўз отамизга ўхшаганларни?..» дедиму сесканиб кетиб, жон ҳолатда шеригимнинг тирсангидан ушладим.

— Ўтири, ўтири, овсар, бирор намоз ўқиётган пайтда тик турмайдилар.

Қаёқдан бу гап хаёлтимга келди, ўзим билмайман.

Чўқдик. Қари маҳбус эса, хотиржам намозини ўқияпти. Туаркан, эгиларкан, сажда қуларкан, шивирлар, ҳар «Аллоҳу акбар» дейишларидан мени сир босиб, сеҳр-ланиб бораётбман. Тавба, овозлари ҳам айни! Отам ҳам кўксиларидан чиқариб, шундай чиройли тақбиру тасбеҳ айтар эдилар... Балки кўпдан у ёқларга қайтмаганим, азбаройи уйдагиларни согинганимдан бу одам отам бўлиб қўринаётгандир? Овозлари ўхшаб кетаётгандир?

Бир маҳал шеригум ҳансираб, шипшиб қолди:

— Намозда тегинолмаслигимизни билиб, ўтиравуради шекилли?..

— Ў-чир! — дедим биқинига туртиб ва шу замони бир вақтлар эшиштганим Ҳазрати Алиниг қотили ҳақдаги ривоят ёдимга тушиб, сесканиб кетдим.

Во дариг, бу ривоятни болалигимда шу отамиз айтиб эдилар. Ёдимга тушиган маҳалини қара!

Ҳазрати Алиниг асрар олган ўғилчалари бўлган экан, деб айтиб ўтирас эдилар отам. У ҳеч

ёнларидаң жилемас, ҳатто намозга турғанларида ҳам құндоқдек бўлиб қаватларида ўтирад экан.

Ана шу бола бир куни:

«Ота-ота, сиздан кучлик кимса борми?» деб сўрабдимиши.

«Йўқ», дебдилар у зот.

«Нега?» дебди бола.

«Худойим мени шундай яратган. Шоҳи Мардон номим бор, биласан».

«Демак, қилич ҳам олмайди сизни?»

«Олмайди», дебдилар ҳазрат.

«Найза ҳам ўтмайди?».

«Ўтмайди, болам».

«Мумдай эримайсиз ҳеч?» дебди асрандилари.

«Эрийман баъзан», дебдилар Ҳазрати Али.

«Қачон, айтинг?»

«Намоз пайти, бўтам. Фақат намозда мумдай эриб ўтираман. Ундан бўлак вақт овора бўладилар...» деб жилемайиб қўйган эканлар.

Қараки, шу воқеадан қанча ўтиб, у кишининг душманлари хонақоҳда пичоқлаб кетишга муваффақ бўлишибди<sup>14</sup>. Шунга ўхшаб, биз ҳам бир мўминни намозда ўтирган кезида пичоқлаб, қотил қавмида кетарканмиз-да? Шу ўйдан, сенга ёлгон, Худога чин, мўйларим тикка бўлиб кетди!

Хуллас, у намозини тугатиб қўзгалди. Биз саломга шошилдик. Басавлат қария экан. Яқинимизга келиб ўтироди. Биз унга тиғ тугул, қўлимизни теккиза олмадик...

Эртасига эшиитсак, қўлига ҳукм қогозини тутқазиб, жавобини бериб юборишибди. Ҳалигача англаб етолмайман: бегуноҳдан бегуноҳ кимса ўлим хонасига қандай маҳбус бўлиб тушдию қандай осонгина қутулиб кетди? Шунинг орасида бизга отам қиёфасида кўриниб, лол қолганимиз-чи? Буни бирорвга қандай тушунтира оласан? Мен-ку орадан ярим-бир ой ўтиб, бу воқеани унутган ҳам эдим. Аммо кейинги ишлар бундан ҳам ўтиб тушди.

Бўлмаса, жисм ўтлаб юрган от... милтиқ отганини ким кўрган? Бир четда ётган қирқмани бехос босиб олса, кифоя экан-ку, мен қай ўнгирдан биқиниб отди, деб шердек сапчиб туриб кетибман! Йўқ, ўша Парпинг гуноҳкормас! У менинг номимни эшиитгандаёқ, ҳурматимни жойига қўйиб, отдан тушган, кейин биз тол соясида, чимда ёнбошлиб ўтирган эдик. Фалокат от түёги остида экан.

Ҳай, нима бўлса, пешонадагини кўрдим. Мухими, охир яхши чиқди. Ва мен бугун бу ерлардан бош олиб кетмоқдаман. Қолиб, айтганим-айтган, деганим-деган бўлиб, еганим олдимда, емаганим орқамда, кўзир бўлиб юришиим мумкин, лекин охир чироили чиқмаса, бунинг нима кераги бор?

Бу дунё ҳаёти ҳаммаси бир синов, бир имтиҳон шекилли. Тўғри йўлни топса — топди, топмаса — кейинивой?.. Ўша «вой»га қолмаслик учун ҳам бу «дўстларим»дан алоқани узиб, қўл етмас ерларга кетаётирман. Сендан илтижоим, гоҳ-гоҳ онамизни йўқлаб тур. Ўзимнинг шундай дўстлари бор экан, деб қўксилари ўссин. Хайр.

Дарвоқе, ёлгиз ўзингга гапим бор эди. Ҳатга қўшолмадим. Ҳар хачир от саналмаганидек, ҳар бегонадан дўст чиқмас. Афсус, бизнинг дўстлигимиз узокқа чўзилмади. Дуоларимизда унумайлик.

Турғун».

\* \* \*

<sup>14</sup> Ҳазрати Али хонақоҳда пичоқланиб эмас, захарланган қилич зарбидан шаҳид бўлганлар. Нақл қилишларича, душманлари ўша қиличга қирқ кун заҳар берган эканлар (*Муалиф*).

— Вой, уни қаранг, яна учрашган жойларини қаранг, — деди Саида таъсирланиб. — Ўша ботур шу одамми?

— Ҳар иш ниятга қараб-да. Ким ўйлабди, Оллоҳ буларни ўша ёқда топиштиради деб, — дедим мен ундан кам таъсирланмай.

— Бояқиши ажал ҳайдаб борган экан-да.

— Қаёқдаги гапни айтасиз? — дедим жаҳлим чиқа бошлаб. — Ҳар ким ҳам шунақа ўлим топиб, шаҳидлик мартабасига етсин-чи! Сиз унга ачиниб рухини ранжитманг. Унинг рухи дуода келгандай яшил қушларга жойланиб аллақачон жаннатларда юрибди. Сиз унга ниятига яраша имкон берилганидан ҳайратга тушинг, — дедим.

— Имкон дейсизми? — деди аёлим.

— Ҳа-да. Оллоҳ ёрлақаб, зўр имкон бергани шу-да. Бўлмаса, уларни ҳарб майдонида топиштиармиди?! Бўлмаса, акамни қутқариб, қарзини узиб, марднинг ишини қилиб, кета олармиди?! Бунақа жонфидолик ҳар кимнинг қўлидан келсин-чи! Келмайди.

— Унда... унда нимадан хомушланасиз?.. — деди хотиним.

— Хомушлигим, — дедим ичим сидирилиб, — бу хабарни энди аммага қандай етказамиз экан, деб. Ахир осонми, тиқ этса, йўлига термулиб ўтирган одамга бу хабарни етказиш! Юраклари тўкилиб тушади-ку.

— Шуни айтинг, — деди хотиним бўшашиб ҳам маҳзун тортиб.

Бу хабар билан Қоратошга ким ҳам бора оларди? Бир бўлса Нусрат почча ёки Султонмурод акагинамми? Ундан берига ким ҳам аммага ётиғли таскин бера оларди?..

Бунинг учун акам сарҳад ошиб келуви лозим. Аммо қачон келади, ёлғиз Оллоҳ билгай.

### 13. ОНАИЗОРНИНГ СЎНГГИ ИЛТИЖОСИ (Маҳфуз хатлар давомига)

Ассалому алайкум, тақдирда битилуб, Оллоҳ ўзи етказгану! Мени ўз диёrlарига жўнатуб қўйуб, ўзлару ўтарга имкон тополмаганум! Қачон келгайсуз? Бу айрулиқ Оллоҳдан бўлса, барчабарчасуга чидагайман-у, аммо бошқасига чидолмасман. Сабрум етмас деб қўрқаман.

Янгилук шуки, азиз қадамларингиз етган, бизнинг диёrlарга кетмасиздан аввал бир муддат яшаб турган жойлариз — Каттабоз томонларни қўриши, азиз холажонунгизнукига меҳмон бўлуб чиқши насиб этту. Нега меҳмон экан?! Келун бўлиб бориши (уларники бехавотирроқ деб жўнатишду), сиз турган катта уйларда туриб, у хонадоннинг ҳовлиларини супуриши, келинлук хизматларну ўташ тақдур этту. Оллоҳга минг шукрлар бўлсан. Дугоналарумга ўхшаб келунлик уйига эга бўлмадум, деб армонлар қиласар эдум. Узатилиб бормадум, ясатуелиқ уйларга тушишадум, келинсаломлар қилмадум деб куйган эдум. Армонумга етгандайман. Бир кўп, бир ажойиб холаларингиз (ҳаммаларунинг юзларудан нур ёғилади-я! Бой экансуз!), ҳайбатлу-ҳайбатлу тоғаларингиз, беназур почталарунгиз бор эканлар. Ҳў, ўз келунимиз экан, жигарумизнинг топгани, жиянумизнинг қўшоги, ҳурлардан-да афзал, париларга мензагулик экан, Марғубасидан қаери кам, чинакам Маҳфуз, Оллоҳ ҳифзу ҳимоясида асраган экан, деб бир ерларга етушиларину қўрсангиз. Алқашларину эшишиб, ҳеч ерга ишонмасликларину қўрсангиз эдуб!

Фақат ёнумда Сиз камсиз. Сиз ҳам бўлганунгизда билмадум, бу алқовлардан, бу баҳтдан ўзумни қаерларга қўяр эканман? Чинданам бундай хонадонларга келун бўлуб тушишмоқ, бундай иззатлу одамларга хизмат қилмоқ ўзи баҳт. Топилмайдурган жигарлариз боракан, Султонмурод ака! Сиз оғзингиздан бол томуб эслаганизча, қўмсаганизча бор экан. Тезроқ келунг, бундай баҳтни ҳеч ердан тополмагайсиз. Жаннатлардагина бу каби покиза кишиларга етушишмоқ мумкиндур. Согинтирманг жонум! Ҳаммалару ҳам соғинишган, тилдан қўймай

эслашади сизну. Сиз бу ёқларда қилган ишларни гапуриб, у адолатпешалигунгизни қўмсаб, бир ерлар етишаду. Нега узокуб кетду, қайтса бўларду деб дуолар қилишиади. Сиздай бир халоскор, тогдай бир суюнч лозим уларга. Шунинг учунам ҳар қандайин юмушларингизни, зарур ишларунгизни ташлаб, уларнинг олдуга, ота юртга қайтмогингиз лозум, Султонмурод ака. Сиз ўзунгизни унчалик билмассиз, лекин бу ердагуларга, қавмдошлиарунгизга қадрунгиз ўтибду. Ўзга юртларнинг қозису бўлгунча, ўз шаҳрунинг тозуси бўлган афзал деб ўтирубдишар Саломхон холангиз, ўша Сизга онадек қайшишувчи киши. (Ахир хола ҳам онадир дейилади-ку!) У кишиунинг сўзларини ерга ташламассуз, ахир?!

Мен бу хонадонга келуб қолишумнинг яна бир боиси, Салом холангузнинг кенжалари — менунг қайнум, Сизнинг укажонунгиз Мақсудхўжса муҳандисликка ўқишига кирган эканлар, дарсга етуб олуи учун худонинг берган куни тонг-саҳарлаб йўлга тушар эканлар. Ўша поччаникига тушишган куни «вой, қанча жой керак, ҳамма сигган бу сизмайдими», деб Мақсудхўжсани опқолушибди мени холажонингизга қўшиуб бу ёқларга жўнатишиду.

Оллоҳ ўзи чевар-да, бўлмаса, ким ўйлабду мену ишонуб жўнатишиган жой қолуб, сизникуларни топаман, Каттабоғларга чиқаман деб?

Вой, оламда шунаقا жойлар ҳам бораркан! Қишину кунида шундай! Қорну тагида кўмулуб ётганида шундай гўзал! Биласизму, менга у шунаقا тануши, шунаقا яқун, шунаقا жозибалуки, илгару-қачондур кўргандай, шу ерларда яшагандай, ёхуд бир ўтуб кетгандай бўлувураман, туюловераду, лекин қачон кўрганимну, ўтганимну эслай олмасдум. Гузардан ўтуб, Каттабоғга боравуришида, анҳор ёқалаб кетган йўл иккита тепаликну ошууб ўтар экан. Фақат ўша тепаликларга етгандагина ўша сув, ўша анҳор йўқолуб қолару тена пастлаши билан яна пайдо бўлуб олар эду.

Мезанали биринчу тепадан ўтганда унча билинмовду, аммо иккинчу тепадан ошишишимиз била у ёги пастлаб кетган сойлигу далалар бошлануб азбаройи тўхтаб қопман. Бу қорлик қишининг кунидаги бу бир тиниқлик-мусаффоликму узоқ-узоқларни ҳам шундай яқинга, қўл узатса етгудек жойга келтириб қўйган эду! Сойлару тепалар, ундан у ёгудаги далалар, қатор толу тутқаторлар, ишкомли боғлару ҳовлу-жойларгача олдунгизда турарду. Ҳаммаёқда, оламну қоплаган оқлук устуда офтоб нурлару ниману нимага кавшарлаяпту — кўзну қамаштиргувчи бир нурлар ўйнайду, ёнаду, ёлқунланаду. Кўзну қамаштираса-да, одамга хуши ёқаду.

Фақат қандай сой экан, икки беткайига келуб тўхтагану чўккан туюлар карвону устину қор босгандай ва шу турушида кунботарга қараб кетган сойлук ўртасудан бора-боргунча буз кўтарилиб ётибду. Сой суви парлануб ётубдуми, енгил туман чўзала тушганми — ажратолмайман. Каттабоғ дегану шунчалар гўзал эканму?

Қор босганину айтмасангиз, жаннатну давомидай кўринарду кўзумга. Балки сиз түгулуб ўсган, чотуб-чопқуллаб юрган жойлар бўлгани учун менга азиз туюлгандур, кўрингандур, Султонмурод ака. Лекин чин сўзум йўллариз шундай жаннатдай жойлардан айро тушуб, қай тоз ораларуда довон ошууб, ўнгур ошууб юрувингиздан ачиндум. Нима излаюрсиз? Ўшал излаган нарсангузни шу ерлардан топабилмасмудиз? Нима монелик қилду бунга? Балки менинг ожуз ақлум, қиз бола ақлум етмас. Сиз билган нарсаларну, ҳикматну чақуб ололмагандурман. Лекин баҳтну, албатта, узоқлардан изламоқ керакму? У чиндан қўл етмас тоглар ортида, Кўҳиқофи Тангритоғ томонларда қолганму? Нима қувган ўзи Сизну бу диёрлардан? Тақдир этуб, баҳт излаб борган бўлсангуз, мана, мен шу ёқларга келуб турубман-ку! Ўз оёгум ила топуб келуб турубман-ку! Тинч-хотуржам умргузаронлук қиламан деган одамга бундан ортуқ нимаям керак, Султонмурод ака? Ёлгуз одам оламну ўзгартира олармуди? Агар Оллоҳ изн бермаса, ўзи сабабчи этмаса? Ё сиз ўшандоқ бўлмоқну истармусиз?

Мақсудхўжаларнуки ўша тепадан тушиб, қайрулишидан ўтганда — катта нокзор олудуда экан. Колаверса, ўша тепадан тушиши билан боя йўқолуб қолган анҳор ҳам ўнг ёқдан чиқуб

келарди-да, кейун қўчани кесиб йўлнинг бу бетига ўтуб оларду. Ана шу анҳор бўйудан ҳар биттаси осмону-ҳафтумну тутган (тавба, қачон экулган экан, бири-бирудан қолишмайди, азумки азум!) ёнгоқлар қатори бошланиб кетган эду. Нокзорга етуб ҳам у ёнгоқлар тугамас эду. Саломхон холангузларнуки ана ўшатта экан. Тена томони кета-кетгунча деволдан ошуబ, қўчага мўралаган бир сурх новдали беҳуларки, беихтиёр кўз олдумга Салтанат холангузникида кўрганум — дордаги сап-саруқ беҳулар кепту. Мен унинг ҳидуни шу ерданоқ туюб тургандекман.

Ичи ишком-боғлар, ҳаммаси қорга ўрануб, бир чиройлу мудраб ётуб эди. Пастда кунга қаратуб солунган қатор тупроқ томлу уйлар — бир файзлу, бир саришта, бир кўзга яқун. Нега шундай, айтмолмасдум. Балку бу ҳовлу, бу хонадонда, кунга қарааб тушган бу уйлар, бу гўшада бир муддат сиз яшагануз, ўз уйингиздек кириб-чиқиб юрганингиз учундор, агар уйлантиришиса, келинни шу уйлардан бируга туширмоқчу бўлишганию, энду ўша уйлардан бирига (тақдурни қарангки!) мен — Сиз сўйган ва бу ёққа жўнатган жуфтингиз келаётганум ва эга чиқаётганум учундор. Ахир Сиз учун азиз нарсалар нега менга азиз бўлмасин?!

Ички кириб фотиҳа қилибмиз ҳамки, эшик очилуб Сиз салом беруб кириб келадигандексиз. Ҳатто ҳовлудан қорну гарч-гурч босиб келаётган оёқ товушлариз эшишилиб кетаётубду. Зинада оёқларунгизни тап-тап қоқишингизну, йўталиб қўйишингизну кутуб нафас ютмай қоламан.

Лекин эшик очилмайду, очила қолмайду. Демак, назарумда экан, менга шундай туюлган экан. Ўшандан бери шундайсиз: худди ҳозир билдурмайун кириб келадигандексиз. Бу туйгу илоҳим, мени ҳеч алдамасун, назарумдаги олдумга етуб кела қолсун! Шу уйларда бирга-бирга яшай қолайлук. Эй, худойум, бизну ҳам топиштур, келин-куёвлардек яшаш баҳтини бер, деб сўраганум-сўраган. Саҳарларда дуоларумга қўшиганум-қўшиган.

Султонмурод ака! Сизга жудаям қадрдон бу хонадонга келуб, биринчи кўрган тушумни айтайму? Жудаям гаройуб. Таъбирига лолман. Албатта, бу таъбири турав эмас, ўзум қилдум. Унга сиз нима дердунгиз? Чунки ёлгуз Сизгагина айтуси мумкин бўлган туш. Биравга, ҳатто Салом холангузларга-да айтмолмадум.

Эмушики... нега эмушики?.. Аниқ-таниқ кўрдим. Мен ўзумизнинг уйимиздамишиман. Сиз мени қайтаруб юборганмисиз. Уч кундан берлу тинмай ииғлармишиман. Кўзумга уйқу илинмасмиш. Ҳожси дадам ҳам, ойум ҳам тенамдан жислмай тонг оттиришибду. Икки кечаю бир қундуз тинмай ииғлабман. Ойум бунга бир нарса денг, дадаси, ииғлайвериб жигарлари эзилуб кетди-ку деб, менга қўшилишиб ииғлар эмишлар. Тенамда мижжса қоқмай ўтирган дадамнинг тасбеҳлари шиқирлашини ўзлари огур қўзғолуб қўйиганларинугина сезуб ётубман. Аммо ўзлару миқ этмайдилар. Сассиз тасбеҳот айтусида давом этяптулар.

Биламан, ҳар иккалаларига ҳам қийун. Қийун ҳам гапму, жуда оғур. Менинг қайтуб келушим, Сизнинг бунга изн берувингиз. Қайси ота, қайси она қизум қайтуб келсун, деб узатаду? Яна мендай маломатларга қолуб, қайтуб келуб турса... Мана бундай бош кўтармай ииғлаб ётса... улар қандай чидайду бу кўргилук, бу маломатларга? Мен эсам, шуну тушунуб туруб ҳам ич-ичумдан босуб келатурган хўрлук, аламларну, қайтаруб юборулиши систамларуну тўхтатолмаяпман, ичумга ютолмаютман. Шу асно салом беруб Сиз кируб келдунгиз. Аммо мен сезуб турган бўлсан-да, бош кўтармадум. Маломат алами шунчалук эканму, тавба! Эрум, жуфту ҳалолум, Сиз келасиз-у мен турмасам?.. Бош кўтаруб қарааб қўймайсам?.. (Бу қандоқ ҳол бўлду?..)

Ул дилпоралар Сизну кутуб олишиди. Шундай ёнумга, тена томонумга жой солуб ўтказушди. Ваҳолангки, у бўхтон гапларни эшиштуб ёнумга йўламай қўйигандунгиз. Гапурмай ҳам юрадунгиз. Энду келубсиз.

Бунга сару хўрлигум тутуб, ич-ичумдан ишгу босуб келяпту, келяпту, адоги йўқ. Бошумни ёстукқа буркабам қутулолмаютман ундан, бу ииғудан... Аммо ўзум, бутун вужудум қулоққа

айлануб, Сизнунг овозунгизну, сўзингизну кутяпман. Ва шунда Сиз дадамларга:

«Мен келдум, ота. Бир оғуз айтсун, ўз оғзи ила айтсун, у гаплар ҳаммаси бўҳтон десун, опкетмаган номард, мусулмон эмас! Маломатга қўйганларни нима қилсам, ўзум билгайман. Қилмасам, Султонмурод отумни бошқа қўйинг», дедингиз.

Шу сўзну эшиштуб, у хўрлук, у алам, у кўзёшлиар таққа тўхтаб, тина қолдию ўзум сапчуб туруб, ойумнинг бағирларига ўзумну отдум. Ва шу баробар... уйгонуб кеттум. Нима дедим, нима бўлду эслай олмайман, эслай олмаётирман. У қандай бўҳтон эдию кимлар маломат этду, бунусини-да билмайман...

Шундан берлу шу тушумну эсласам ичум тўкиладур. Таъбурига ожузман. Ҳалу ўзунгиз келмай туруб мену қайтаруб юборушигиз... ҳеч тушунолмайман. Нима бу? Кароматму, башиоратму ёхуд шунчаки туши?

Шунча айрилук-кўргиликлар каммики, келажакда... Айтушига-да, тилга олушга-да қўрқаман, Султонмурод ака. Ёнумда бўлсангуз ҳам майлу эду. Суянчум, суянадиганум бор-ку дердум. Қўрқмасдум. Энду эсласам, шу тушим ёдумга тушса, танамга муз югурдуган бўп қопту. Тезроқ кела қолсангуз эду, Султонмурод ака. Сизсиз қанчалук қийналяпганумизну билсангуз эду. Ҳамманинг ҳам бошууда бир эркаги бўлсун экан. Тоғдек ҳимоячуси бўлмаган аёл-аёл эмаскан.

Мену кечиринг. Узр. Баъзан шунақа хомуши тортуб, тушкунлукларга тушуб кетаманки, чивиндек жонумга шунча ташвиши, қўлум қаерга ҳам етарду деб ҳамма аламумни ийгидан олушга тушиб кетаман. Тағинам холангуз бораканлар, улардан уялганимдан ҳам кўп нарсаларну ичумга ютуб келадурман. У киши Худонинг берган куни кечаси алламаҳалга довур шиғиллатуб машина тикканлари-тиккан. Мен ҳам уларга қўшилуб, кизак тикаман, тепчиқ тепчийман, тилта ураман хом дўйтига. Ҳар ҳафта Мақсудхўжса уни опкетиб, ўрнуга Ойпошиша холангуздан иши олиб келадулар. Шунаққиб овуниб ўтирибмиз. Аммо ора-орада боягу тушум ёдумга тушиб, хаёлум қочуб-қочуб кетаду: бу нимадан белгу? Ё Оллоҳ, мендек ожуз, саргардон бандангга яна қандай синоатларунг бор, деб ишгайман, аёл бошум билан (шу ёлгуз ҳолумга) у синовларга доши берга оларму эканман?

— Маҳфузахон, келинношиша?

Хаёлпаришон ўтирган эканман, холангузнинг овозларудан чўчуб тушдум.

— Ҳа, кичигойу?

— Эсимда борида айтуб қўяй, кейин шошиб қолиб ўтирганг.

— Жонум билан.

— Эртага бир етга ўтиб келсангиз, Мақсудхўжам билан.

— Майлун. Қаерга экан? — дедум ичим гурмислаб. (Мени зерикуб қолди, келин бояқии, деб ўйлаяптилар шекиллу.)

У кишу кўзойнаклари тепасудан маънолу қараబ қўйдилар.

— Савоб бўлади, чиқмаган жондан умид-да, болам. Шунга ўтиб қўйсангиз.

— Тушунмадум. Дору холтамну кўриб айтаяпсизму?.. — дедум хаёлум табибчиликка кетуб. У дору ўтларни Мирза ота ҳар эҳтимолга қарши тутқазуб эдулар бу ёққа жўнашумизда. Ўша Сизга қараганумда озгина ўргатганлари демаса, нима билардум.

— Ҳар эҳтимолга қарши олволинг. Табиб бўлиб борганиз ҳам тузук. Сизни кўриб, зора бери қайтса...

— Мени кўриб?.. Ким?

Кичикойум кўзойнакларину олуб, машинани суриб қўйдилар. Ўзлари орқароқ сурилуб, этакларидағи қий-қиндишларни терар эдулар:

— Сиз эшиштмагансиз бу тарихни. Узун жуда, — дедилар аллақандай истиҳолаларга тушуб.— Султонмуродимиз бу ёқлардан бош олиб кетаётганда... унинг қизи ҳам бир кечада... тўй кечаси гойиб бўлган... Бояқии, ўшанинг дардида куйиб, адди тамом бўлди, шу ҳолга тушди, бир чеккаси. Энди ўсал ётибди экан. Одам таниб-танимай... Ҳар замон отини атаб чақирав

қўярмиш. Савоб бўларди.

Мен энду англаб етгандай эдум.

— Вой, Сизлар Марғуба атаётган... шўрликкинанинг кими, онасиму?

— Ҳа, ўша баҳти қора... шу бояқишининг қизгинаси эди. Ҳали кутади...

Бу тарихдан ичум сидирилублар кетди.

— Сиз айтасизу нега бормайин, — дедум, — Фақат...

Кичигойум ялт этуб, юзумга боқдилар:

— Қандай бўларкин, дейсизми?

Мен боши силкидум.

— Қўрқманг. Таомили шундай. Бу дунёдан кетаётган одамга хуши келган нарса, илоҳим, Оллоҳга ҳам хуши келгай... — дедилар у киши.

— Илоҳум, — дедум мен ҳам...

Дарвозахона йўлагидан бирор чакирар эди:

— Саида кеннойи?..

Хотиним дафтарни қолдириб, ноилож ўрнидан турди:

— Қўшниларуз, шекилли.

У чиқиб, менинг хаёлим ўша қиши-қировли кунларга қочган, янги кеннойим билан бошлашиб Сайларникига борганларимиз ёдимга тушиб кетган, ўша янги келган кезларидағи сувратлари кўз олдимда туради. Бўлмаса, унақа ясанмаганлар. Фақат сал оҳорлироқ кўйлакларини кийиб отланиб чиқибдилар. Кўлларида сидирға паранжилари. Эгниларида эса, боя айтганимдек, қора атлас устидан қизил духоба нимчаю унинг ҳам устидан биз томонларда расм бўлмаган олди очиқ, ёлғиз тугмачалик аллақандай узун (халат десамми, қабо десамми) ёпишиб, бир ярашиб тургувчи энгил кийиб олганлар. У қирмизи рангда бўлиб, бошларига тивит рўмол ташлаб ўранган эдилар. Мен шундайин оқ юзли парирухсор кеннойимиз борлигидан эсим оғиброқ турарканман, паранжини бошларига солдилару сочвонни қўлларига ғижимлаб:

— Дору халтани олдингизму? — дедилар.

— Олдим, — дедим.

Юрдукму, дегандай им қоқдилар.

— Юрдик, — дедим ва ичкарига овоз бериб жилавердик. — Ойи, биз кетдик.

— Майли, Оллоҳнинг паноҳига, — деб ичкаридан кўриниш бердилар ойим. — Кечга қолиб кетманг-лар-а, мени хавотир олдириб?..

— Хўп.

Кўчага чиқсак, бирров кўриниш берган офтобда кунгай томондаги қатқалоқ жойлар пилчирай бошлабди.

Чилп-чилпда юриб бўлармиди, биз изғирин ялаган йўлга ўтиб ола қолдик-да, анҳор ёқалаб юриб кетдик. Кўзимнинг қири билан кўриб турибман: кеннойим сачвонни тушириб, паранжига ўраниброқ олдилар. Энди у кишини Каттабоғдаги ҳар битта воқеадан хабар топадиган Анвар кеннойидан бўлак кимса ўлақолса таний олмасди. Анвар кеннойига эса нотаниш паранжи йўқ. У киши бир кўрсалар, бас, кейин Ҳиротда бўлса-да, таниб, сўрашгани бораверадилар. Нимасидан таниб оладилар, бандагиданми, гули, йўлиданми, билолмайман.

Ҳозир фақат ўзимгина бу паранжи, бу сачвон ортида қандай ойжамол кеннойим борлигини тасаввур эта-эта, ортимга қарашга-да ботинмай, йўл бошлаб борарканман, қаёққа кетаётганимизни эслаганим сари хаёл опқочиб-опқочиб кетар эди мени.

Тавба, бу қандоқ синоат? Биз ҳозир борадурган қизил тарам олмали хонадоннинг узатган қизгинаси никоҳ кечаси йўқолиб, биринчи никоҳидаги кишиси Баҳриддин акамни топиб борадиу худди шу яхшилиги эвазига акам ундан бир туки кам бўлмаган манави парирухсорга эришибди? Эришиб, бу ёққа жўнатибди. У эса келиб-келиб, энди кимга йўлиқмоқда? Қизининг

йўлларига қўз тута-тута адои тамом бўлган онаизоргами? Бу нима, Оллоҳнинг марҳаматими ё ҳайётнинг бевафолиги? Қандай тушунмок керак?

Бошим гангиблар кетди. Қарасам, Сайнаби домланинг кўча юзидағи ўрикзоридан ўтиб, Нуриддинларнинг боғи этагидаги шоввага яқинлашиб қолибмиз. Анҳордаги муз остидан чиқсан сув тўғондан ошиб, бир ажойиб шарқираб, ярқиради. Ёзда анҳорга ҳам сиғмай гувиллаб ётадиган шовва ҳозир тўғоннинг ҳар чеккаларига муз марジョンларини сочиб, музтўқмоғу музқиличларини ясаб ётар ва яна ноилождан-ноилож муз остига кириб йўқолар эди. У озодликка чиқмоқ учун муз қиличлару тўқмоқларини ясаб қўйган-у, бир бошлаб кетадирган мардмаддкор топа олмай яна тутқунликка маҳкум бўлиб, муз-қалқон остига кириб кетаётгандек эди.

— Вой, бу иккинчи тепаму? Шундан ўтиб бурилавузаму? — дедилар кеннойим.

— Йўқ, бу Тепамасжид. Уйимизга ўқдек эшитилиб турадиган аzon маши ердан айтилади, — дедим чечанлигим тутиб. Кейин гапимиз гапимизга қовушиб кела қолди. У киши сўрадилар, мен жавоб қиласдим.

— Кечагида йўлда кўргануз-чи? У ҳам масжидму?

— Унисида ҳайитнамозлар ўқилади, зиёратга боришади, — дедим.

— Шунақа қадамжому? — дедилар кеннойим ҳайратланиб.

— Чўлпон ота пирим қўйилган эканлар. Ойимни айтишларича, катта буваю бувиларимиз ҳам ўшатда ётишади.

— Ўзи раҳматига олсин ҳаммаларину, — деб у киши сачвонлари остида юзларига фотиҳа тортдилар. Кейин сўрадилар. — Дадангизлар ҳамму?

Мен бош чайқадим:

— У киши мен бола пайтимда ўтиб, Каънғлига қўйилган эканлар. Кейин тоғаларимиз бизни кўчириб келишган.

— Шунақаму? — деб ярим ўгирилдилар, — Султонмурод акангизнинг дадалари-чи? У кишуга нима бўлган? — дедилар истиҳола аралаш.

Мен чинига кўчдим:

— Ойим яхшироқ биладилар бу тарихларни. У кишини олиб кетишганда... биз ёш бола эканмиз.

— Акангиз ҳамму? — дедилар тўхтаб қолаёзиб. Кеннойум бу хабарларни сачвонларини кўтариб ютоқиб тингларканлар, мен пандавақи орқа-кетини ўйламай жавоб қиласдим:

— Ҳа, ҳа, Олим акам бизницида, у киши шаҳарда, холамгиларникида катта бўлишган. Бу ёқларга кейин келганлар.

— Шунақаму, уни қаранг-а?..

Сезиб турибман, у киши яна нималарнидир сўрашга илҳақ, гапни шунга келтираётирлар-у, айттолмаяптилар. Нималигини ҳам англаб тургандекман. Марғу кеннойим ҳақда, акам билан ўрталарида ўтган нарсаларни сўрамоқчилар шекилли-ку хаёми — нима қўймаётir.

Мен ҳам тушунтириб бўлмайдирган у гапларни очгим йўқ, акамни ёхуд Марғу кеннойимни ёмонотлик қилиб қўйишдан қўрқиб, тилимни тишлаб бораётирман. Чиндан ҳам биз нима биламиш?! Махфуз кенно-йимнинг ўзи биздан ҳам кўпроқ нарсани биларкан-ку. Акамнинг «васияти»ни ҳам, уни биринчи никоҳидаги кишисиага етказишганини ҳам. Бошқа гапга не ҳожат?

Бу орада икки чеккаси пахса деворли кўча ҳам, гир атрофини қари қора толлар ўраган, ҳозир усти музлаб-тош қотиб ётган ҳовуз ҳам орқада қолиб, ёнғоқзордан ўтибмиз. Ўртада кичкина тавақа — болачаси бор таниш дарвозага етиб келибмиз. Уни кўрган заҳотим юрагим тўрга тушган беданадек потирлай бошлаган эди. Шунча ўзимни босаман дейман, қани босолсам!..

Ичкарида тиқ этган товуш йўқ. Арслон отли ўша «дев» ҳам қай кунжакда ёхуд сомонхонада ётган бўлса эҳтимол — кўринмаяпти. Лекин отхонадан опчиқиб, кунгай жойга боғлаб қўйилган

қари тарғил сигир «эшак ўлдирадиган офтоб»да шумшайиб турибди. Пинакка кетганми, кавш ҳам қайтармайди, охурга ёпирилиб талончиликка тушган чумчуқларга қараб ҳам қўймайди. Рўза тутгандек тек қотган.

Очиқ эшиқдан мўралаб-чақириб туриш ўнгайсиз эди, эшиқ болачасини ўзимга тортиб, зулфинни тақиллата бошладим.

Ичкаридан «ҳозир» деган овоз келдию эшиқ тир-қишида бирор кўринди. Сай экан. У ўша-ўша калта-қўнғир пальтосида, йўлакай рўмолини қайта ўраб келарди.

— Кираверинг, очик, — деди у ўша ёқданоқ.

Мен кеннойимга йўл бўшатдим:

— Мана шўт, мен кута тураман.

Кеннойим сачвонни бошларига ташлаб эландилар:

— Вой, одамну уялтурманг, Мақсадхўжа?

Рости, юзларидан ўтолмадам. Ичимда эса, учиб-қўниб турибман: Сай демаганлар ўз опажонисига ўхшаган кеннойимни кўриб, қай аҳволга тушади экан? Айниқса, ўсал ётган онаси? Туриб кетса-я...

Шу вақт кеннойим ўгирилдилар ҳам... эшиқ очилиб, Сай кўриндию «Вой!», деганча қотиб қолаёзди. У икки қўлинни икки бетига босганча Маҳфуз кеннойимга тикилиб қолган, ўзини унга отарини ҳам, отмасини ҳам билмас эди.

— Сиз, сиз... — дерди-ю, у ёғини айта олмасди.

— Ҳа, мен, Салом опоқиз айтган табибман, ўша. Аянгиз тузукмулар? Ўзлариз яхши ўтирибсизларму? — деди кеннойим кўришгани бора бошлаб.

Шундагина Сай ўзига келиб, кўз пирпиратдию ноилож елкасини тутиб берди:

— Келингиз, киравуринг

Аммо ўзи кўришяпти-ю, кўзига ишонмайди, опаси «Вой, мани пучуғим, сингилжоним», деб қучоқлаб оладигандек, алағда. Аллақандай каловланиб қолган.

Мен «Бошла, бошлай қол», дегандек им қоқдим. Сай ўзининг аҳволидан ўзи хижолатларга тушиб, қизариндию шоша-пиша ортига чекилди:

— Вой, чинданам, опоқим айтиб кетувдила-я? Кела қолинглар. Юра қолинглар, мана бу ёққа.

Биз ўн қадам юрибмидик-йўқми, кеннойим бошларидан паранжиларини олиб улгурган эдилар ҳамки, айвон охиридаги кичик уйнинг ўша айвонга қараган эшиги очилиб, елкасига тўнининг бир енгини кия-кия кимдир чиқа бошлади, ялт этиб бизга кўзи тушиб, оstonада турганча қолди. Сўнг:

— Ия, Марғу?! Ўзингмисан?! — деганича оёғига бир нималар илишга уриниб, каловланди. Ва ўша ернинг ўзида икки айланиб, ўша бир нимани топди ва ўзини пастга ташлашга чоғланган жойда чиққан эшигини ҳовлиқиб очиб, ичкарига овоз берди:

— Ойи, унис кепти, ўз оёғи билан кепти!

Қайтиб бояги важоҳатида ҳовлига тушиб кела бошлаб зинанинг ярмига етганда... устунни яrim қучганча тўхтаб қолди. Худди шу вақтда у «синглим» деб атаган кимса шарт қайрилиб, паранжисини бошига илиб улгурган ва апил-тапил сачвонини туширмоқда эди.

Сай бўлса, гангид қолган акаси томон чопган, шивирлаб:

— Вой, қанақасиз, ўзиз?! Нималар деяпсиз?! Булар Саломхон опоқининг келинлари-ку, табиб-ку. Ҳушингизни йифинг, ака, — деб койиб-куйинар, тирсагидан тортқилаб, орқаларини силаб «эсингизни йифинг, қочинг»лаб, йўлдан ҳайдар эди.

Лекин урушдан қайтибоқ анув воқеаларни эшитиб, Султонмурод акамни яниб юрган акаси қани эсини йифиб, четга бурилса!

— Нега бирор... бўлади? Опанг-ку?!. — деди у ахийри синглисининг бетига қараб.

У туташқош, юзи-кўзи Сайнини сингари кўхлик, аммо ўзи қарчиғайдек йигит эди. Эгнидаги

дўппию тўн ҳали қовушиб-қовушмай — аскарликдан янги қайт-гани шундайгина билиниб турарди.

— Адашяпсиз, ака. Ўхшатяпсиз, холос. Булар аям учун келишган, қочинг,— дерди Саи ҳамон шивирлаб, ўзи эса акасининг қилифидан уятларга ботиб борар эди.

— Астъфируллоҳ, астъфируллоҳ, — деганича нари кетаркан, у ҳамон гумонсираб-гумонсираб қараб қўяр эди.

Мен зора чалғиса деб, яқин бориб салом бера қолдим.

Аммо у алиқ ўрнига ҳам афтимга анқовсираб тикилди. Танимагани аниқ эди, ўзимни танита бошладим:

— Биз пастдаги мактаб олдида турамиз. Саломхон машиначи...

У кенойимга орқа ўгириб тураг эди, қайтариб сўради:

— Илгари-чи?

Мен кўчуб келганимизни тушунтиргунча кенойим Саига эргашиб, ўзларини зинага, ундан айвонга урдилар. У шу пилдираб боришида ҳазилакам ҳаяжонга тушмаган эди.

Улар кириб кетишиб, биз ҳовлида қолдик. Сайнинг акаси ўгирилиб, кенойимнинг кавшига қараб кўйдию қошларини кериб, менга бошдан-оёқ тикилди:

— Шошма-шошма, киммиз дединг?

Мен қайтадан тушунтира бошлаб эдим, у жерикиб берди:

— Роса чўздинг-ку, Султонмурод ким бўлади сенга?

— Акам, — дедим тўрсайиб ҳам калта қилиб.

У лабини буриб, бурнини жийирди: гўё «шу жипириқнинг акаси...» дегандек. Ғашим келиб, энсам қотди:

— Сизга нима?!

— Ўх-у! Жаҳлинг ҳам бурнингни учида-ку! — Гапим нашъа қилиб, аччиқ кулди у ва кутилмагандага елкамга чайирдан чайир қўлини ташлаб, асабий силкиди, — Тўғрисини айт, ҳов. Туғишганми, ким?..

Мен гўё шақилдоқдек турган еримда неча бор бориб-келдим. Умуртқамми, қай бир суюкларим шиқирлаб кетиб, аламим қайнади.

— Туғишган бўлса нима?! — дедим қайсарлигим тутиб.

У ҳайратланиб, сўнг жилмайди:

— Ну, қойил! Шу кетишинг бўлса, аканғданам ўтасан.

— Акамга нима қипти? — дедим силкиниб.

Унинг юзи тундлашиб келиб, ўзи қулоғимга энгашди:

— Ўша нима қиптисини... кўрсатиб қўяман мен унга! — деди аламли шивирлаб. Кейин қаддини ростлаб, кўзини лўқ қилиб қаради. — Ҳозир қай гўрдалар? Гадой топмас бир жойларда қочиб юрибдиларми?

Менга ҳаммадан шу кесатиги ўтиб тушган эди.

— Жуда билибсиз-да! — дедим тўнғиллаб. Қарасам, дору ҳалта қўлимда, ким билан пачакилашиб турибман, тўғри зинага қараб юравердим.

У ортимдан икки қадам ташлаб, вишиллади:

— Ҳов, мишиқи?! Бўлмаса, нима экан? Бировнинг пардаи исматдаги синглисини авраб опкетадилар-у, яна оппоқ эканларми? Шошмай турсин ҳали! — деди камига айвон устунига шаппалаб.

Мен тепага чақволганман, оёғимдагини ечишниям, эшикни очиб кириб бораверишниям билмайман. У эса, қори қуралиб, пилчирай бошлаган ҳовлида лойга ҳам қарамай алам билан нари бориб, бери келяпти, Ора-чира қўл силкиб, сўкиниб қўяди:

— Мен шундай қолдиракманми?! Индамай кетарканманми?! Шошмай турсин! Буларни мана шу куйларга солгани учун ҳам тинч қўймайман! Ернинг тагидан бўлса, топиб келаман!

«Не-не кекирдаги узунлар нима қила олиб эди, Сизнинг қўлингиз қаерга етарди!» демоқчи бўлдим-у, айтиб ўтирмадим. Қолаверса, у ҳали нимани билади. Сўнг дору халтани кутиб қолишди деб ўйлаб, улар кириб кетишган эшикни шартта очдим.

Ё тавба, Махфуз кенномийим, ҳа-ҳа, бошидан паранжисини олиб қаергадир ташлаган Махфуз кенномийим тўрдаги — оёғи танчага қаратиб солинган ўринда йўқдек бўлиб ётган аёл ёнгинасига тиз буқкану унинг кўксига бош қўйиб, юз босганча қолган эди. Ўша ётган кимса эса қоқсуяқ, озғин қўллари ила кенномиймнинг бошини, бошига қўшиб соchlарини оҳиста-оҳиста силар, усиз ҳам киртайиб кетган кўzlари юмуқ ҳолда бир нималар деб шивирлар эдию, мижжаларидан сизиб чиқаётган ёш икки чеккасидан қулоқлари юмшоғи томон чопқиллагандан-чопқиллар эдилар. Гўё «Розиман, мингдан минг розиман, она қизим», деб пичирлар-у, негадир мен овозини эшитмаётгандек эдим. Титраб кетдим! Бу ёқда аскар ўғли ҳовлида шилп-шилп юриб, нари бориб-бери келяпти, у ёқда муштдек бўлиб, онасининг бош томонида ўтирган Саи ўқраб юборгудек аҳволда — икки юзини чангллаганча қолган. Ўзим эсам, нима бўлганини ҳеч англаб ета олмасдим...

...Хотиним қайтиб кириб, хатни яна қўлига олди:

«...Султонмурод ака! Қанчалук ўнгайсиз бўлмасун, уларнукига бордум. Холангузнинг сўзларини ерга ташлай олмадум.

Худонинг хоҳлашуни қарангки, Сизни қора тортуб, ўзиниям, бу ёқдагиларниям не маломатларга қолдируб кетган ва Сиз биринчи никоҳидаги кишиисига етказдурган баҳт соҳибасиникига унинг қиёфасида кириб боришиумни, уларникудагилар мени кўриб қай аҳволга тушганларини бир кўрсангиз эду.

Савоб деб бордим-у, лекин гунг одам ҳам чидолмасду бу ташрифга. Аскарликдан қайтган ақагинасининг мени бехос кўриб қолуб, уйни бошига қўтарганларини, ойи, униз кепту, ўз оёғу билан кепту деб жар солуб, бир ерга етганларини, сўнг мен у эмаслигимни билиб қолуб қай ҳолга тушганларуни кўрсангиз эду! Паранжисига ўрануб кириб боряпман-у, дувиллаб келган ёидан на йўл, на зина кўринаду қўзумга. Яхшиям толчивиқдек синглиси боракан, ўша бошлиб кириб кетду.

Кирсам, қизининг дарду фироқида озуб-чўп бўлиб қолган онаизор ўрунда эриб битган шамдек ётипту. Аскарликдан қайтган ўглиниг бояги шовқуни — «униз кепту»сини эшитган шекилли, ўзи алағдаю кўzlари жавдираиди. Менгинани кўриб:

— Марғу... Вой, менинг бебаҳтгинам! — деб бошини тўрт энликкина қўтарди-ю, бошқасига ҳоли ҳам, мажсоли ҳам келмай, чўзила қолду.

Учиб бориб, ёнларига тиззаладуму ҳамма истиҳола, андишаларни йигиштируб, кўксиларига бош уриб, юз босганча қолдум. Паранжумни қачон бошимдан олдум, у киши қай аҳволда кўрдилар, билмайман. Аммо у киши ҳам мену қизлари ўрнида кўрган, мени у деб билган эдулар. Лаблари шивирлабму Оллоҳга шукрлар айтарди. Мен у кишину ноумид қилолмасдум, бошқаман дея олмасдум. Тилум айланмасду бундай сўзларга. Бунинг ўрнигаям ич-ичумдан бир йиғи, бир ўқсуг босуб келяпту — ўзумни тутолмайман, тилумдан бир сўзлар оқуб келяпти — айтуб адо қилолмайман. Ўзум чиндан ҳам шу муштипар онаизорнинг дуосини олиб қолгум бор, бир марта юзларумга қарашига, бир оғиз эшиштируб бир нима дейшишига интиқман, зорман.

Ниҳоят, момиқдан момиқ, майин бир кафт, қизалоқ қўлларидан ҳам енгил бир қўл бошим аралаши соchlарумни силай бошлиганини сезиб, энтикублар кеттум ва бағирларига сингиб кетгудек бўлуб, юзларумни босдум. Аммо у қўлнинг ҳоли йўқ эду. Бошумни қучиб қўйиб:

— Бахтингда кўпайгин, илоҳим, — дедилару жисм қолдилар. Қўллари елкамдан сиргалиб тушиб кетти.

Бошимни қўтарганумда очуқ кўzlарининг нури икки томчи ёши бўлиб, мижжаларидан оқиб тушимоқда эду. «Инна липлаҳи ва инна илайҳи рожсиун» — чиндан ҳаммамиз бир куни унинг

даргоҳига қайтгувчи эканмиз.

Оллоҳ раҳматига олган бўлсун. Қизларидан розу кеттилар.

Имкони бўлса, бир энлик хат ила у мушфиқага хабар бермак лозимдур. Руҳи покларига бир калима Қуръон тиловат қилиб юборса ҳам савоб. Қолаверса, Оллоҳнинг уйига яқин жойларда, пайғамбар саллолоҳу алайҳи вассалам юртларида яшаётган Марғубаларидан лозим бу.

Аддои Махфузангиз.

Ўша ўзингизга тануш азиз манзил-мавозеларда яшаб тургувчи хасму завжангиз».

## 14. ҚАЙРАГОЧЗОРЛИ ЁЛҒИЗ МОЗОР СИРИ ёхуд Мақсуд қиссангўйга қоронғу — муаллифга аён тарих

Ўша қоқсуяқ, жимит чол — Миртўхта амаки қўлида бир ҳовуч гилосми — нима, ўпиб, кўзига суртганча омонлиқ-сомонлиқ қилар ва бир донагинасини тишсиз, нуқул милқдан иборат оғзига солиб, ёнидаги пакана, ғулабир одамга бир нималар деб ғўлдирап эди.

Олим унинг кулоққа аллақандай хуш ёқувчи овозини қўмсаб, машинасини йўл чеккасидағи каллакланган толлар тагига олақолди. Қарангки, гузардаги бу толлар каллакланиб, қатор дўйонлару расталар ёпилиб қолганиданми, у аллақандай файзсиз кўринар, толлар эса эндигина кўклаб келар, янги навдалари хали қингир-қийшиқ бутоқларини энлаб улгурмаган эди. Ҳатто Миртўхта амакининг чойхонасига кираверишдаги ҳайҳотдек тутнинг шохларини ҳам шипшийдам қилиб кесиб кетишган, у қуриган дараҳтдек шўппайиб қолган эди. Тагидаги ёғоч сўрилар ҳам ҳувиллаб ётибди. Ҳамма ёққа ит теккани-теккан, шуни кесишмаса, нима қилибди экан, гузару чойхонадан файзни кетказиб?..

У ичи ачишиб, ўша томонга қараб юраверди. Миртўхта амаки уни машинасидан танибми, путури кетган ёғоч зинасидан тартақайлаб тушиб кела бошлади:

— Ия-ия, эшон бола, яна қандоқ шамоллар учирив? Келинг-келинг, қадамларизга ҳасанот.— У ғўлдираб келиб, қўлини олди ва кейингиси билан елкаларини силаб тавоф эта кетди. Сўнг кўк халатининг чўнтағидаги гилосдан илинди. — Олинг, эшон бола, Чўлпон отанинг қора гилосидан. Тотиниб қолинг, шу охирги ҳосили. Ҳадемай улар ҳам кундаков бўлиб кетади.

Гилос — гилосмисан-гилос эди, ҳар донаси бошмалдоқдек келар, ҳалитдан чаросдек ранг олиб, қорая бошлаган эди.

Олим беихтиёр ўзи болаликда шаббоҳун уриб юргувчи Яккабоғ боғларини эслади. Айниқса, Иноғом тоғанинг ташқисидаги ўрта деворга ёнбошлаб тарвақайлаган азamat гилоснинг қўшалоқ-қўшалоқ, терган билан, еган билан адo бўлмагувчи мевалари кўз олдидан ўтар эди. Ана шундай бошмалдоқдай гилосларни Қаш-карда кўриб эди, қайтиб мана энди қўлга олиши. Ҳадемай буларни ҳам адo этишади, ҳамма ёққа қирон кепти. Қайси гуноҳларига шундай бўпти? Шаҳар куришаркан, бошқа ер — қирми, тақирми, қуриб қолган эканми?

— Олинг, эшон бола, омонлиқ-сомонлиқ, — деб қистарди Миртўхта амаки.

Олим ўзига қолса, шу қўшалоғини машинасининг ойнасига, нақ қўзининг рўбарўсига илиб қўйгуси келди.

— Ўз боғизданми, амаки? — деди.

— Қайда! Бизни боғ қоптими, аллазамонда суриб ташлашган. Бу Мукаррам эшонни боғидан. Ана, ўзи, илиниб опчиқкан экан. Шунаقا илиниб юради, қассоб акангиз.

Ҳамма меҳри кўзларига балқиб чиқа қолган бу калтабақай одам ўлақолса қассобга ўхшамасди. Ҳарқалай Олим уни қўлига тиф ушлаган ҳолда ҳеч тасаввур этолмади. Шунинг учун ҳам у билан самимий кўриша туриб, янглишганини сезди. Унинг қўли бамисоли қайроқтошдек қаттиқ эди.

— Ҳовлига кирамиз, меҳмон. Қулинг ўргулсун хасип солдиряпман. Таъми оғизизда қолса,

кеп турасиз,— деб илжайди Мукаррам ака.

— Раҳмат, ака, бошқа гал,— деб қўлини қўксига қўйди Олим,— Бир ерга ўтадиган эдим, сал кечикдим. Сутчи амакига ваъдам...

— Э, у кишими? Аллақачон қайтиб, битта чойни майдалаб ўтириб эди. Яккабоғдан қидириб келиб, опкетиб қолишди,— деди Миртўхта амаки узундан-узун қўлининг орқаси билан қотган белини силаб қўйиб.— Қандай топиб борасиз, бу абжағи чиққан йўллар билан? Фиротингиз увол-да, увол. Кута қолинг.

Қассобга жон битди:

— Шуни айтинг, айни отамлашадиган мавриди экан. Қолинг, хасип тобида. Йўқ, деманг.

— Қанийди, отамлашганга нима етсин. Лекин тушунасиз-ку, ўртада лафз бор. Бир эски мозорот йўлга тушаётган экан. Ўшанга ўтмоқчийдик.

Буни эшишиб Миртўхта амаки ҳовлиқди:

— Дарвоқе, ўшалар келиб опкетишиди. Сандуқли отадан сандуқлар чиққанмиш.

— Очишибдими?— деб юборди Олим бир нима бўғзига тиқилиб келиб.

— Билмасам, билмасам,— деб ғўлдиради чойхоначи,— сутчини «чумчук сўйса ҳам қассоб сўйисин,» деб опкетишиди. Эски китобларга ундан бўлак кимнинг тиши ўтарди?— Кейин камига уни таърифлай кетди.— Муллага тараф йўқ, тараф. Чўлпон отанинг имоми ҳам ип эшолмайди унинг олдида, сут бонка орқалаб юрганига ишонманг.

— Эски уйларнинг синчлари орасию тоқилари тепасидан чиқаётган китобларни шу киши сотиб олаётганмиш,— деб қўйди қассоб ҳам.

Олимга шу кифоя эди, ичи қуриб, хайр-маъзурга тушиб қолди:

— Узр-узр, мен бормасам бўлмаскан. Айбга буюрмайсизлар.

— Эсиз, машина, бу чалчиқ йўлларга,— деди Миртўхта амаки ичи ачиб.

Аммо меҳмон парво қиласидан ахволда эмасди.

— Шундай топилдиклар хабари чиққанда жин урадими бу терсакка!— дедио хайр-хўш билан ўша қора кийикига ўтириб, тупроқ йўлдан кун оғиб бораётган томонга суриб кетди.

Бирпастдан кейин у ҳар турли оғир машиналар ўтавериб ўйдим-чуқур бўлиб кетган йўлдан кўш ғилдирак изи билан бир амаллаб илгарилаб бораркан, ботиб қолари ёхуд бирон ариққа тушиб кетаридан ҳавф-сираб, тўхтаб-тўхтаб қолар эди.

Ана шунда кўз ўнгидан наматга ўралган сандиқлару уни кўплашиб қўтаришиб олаётган одамлар кетмай қолиб, болалигида эшифтганлари ёдига тушиб-тушиб келаверарди. Эмишки, раҳматли дадаси бир куни қўлларида илм олаётган шогирдлари билан ҳамма китоблару қозилик хужжатларини сандуқларга жойлаб, сандуқларни эса наматлару мол терлари билан ўраб-чирмаб, ярим кечада аллақаерга ташлаб келишибди-да, сўнг ошни еб, муридларга оқ фотиха берганмишлар. Эрталаб эса ўзларини олиб кетгани одам келганмиш.

У ёқда эканида шунча оғиз жуфтлаб, маврид кутди, лекин сўрашга журъят топганида у киши (Оллоҳ раҳмат қилсин) тилдан қолиб, бир сиким сариқ ипакдек бўлиб ётар эдилар. Яхшиям илгарироқ сутчига бир нималар деган эканлар.

Сал ўтиб, бинойи тошйўл бошланди. Энди кўрқмаса ҳам бўларди. Курувчилар юқ машиналари чалчиққа ботиб қолавериб, тоза адабларини ейишган шекилли, илгариги (тупроғи ёзда тўпиққа чиқиб, кузда балчиққа айланадиган) катта кўчага шағал ётқизишган, унинг дала йўли сиёхи қолмаган эди. Фақат йўлнинг икки чеккасидаги йўлкалар ўша-ўша, гоҳ катта йўлдан одам бўйи тепага чиқиб, гоҳ Иззага яқинлашганда бараварлашиб қолар эди. Ўша бир вақтлар— улар эсларини танимасдан бурун тепаларни кесиб ўтиб, тўғри Аччига қараб тушган йўл ҳали ҳам омон турар, ундан бўлак ҳамма нарсага—боғлару сойлару қўргонларгача, барчасига текис кирон келган, кўзга ярқ этиб оловдек ташланадиган нарсанинг ўзи қолмаган, ўрнидан уфқларни кенгликларни тўсиб, баландқават темир уйлар қад ростлаб келар, маҳобатини айтмаса, дунё кўрган Олимга ҳам аллақандай ўтиришмаётир эди. Балки одам боласининг

табиати шунақадир: кўз очиб кўрган нарсаларидан ажрашни истамас. Ҳар бир ўзгаришни ички ғашлик билан, оғриниб қабул қилас. Ҳозир ҳам шунча оро бериб қурилган, меъморчиликнинг оврупо намуналаридан қолишмайдиган иморатлар қолиб, йўл чеккасидами, осмони-ҳафтим бинолар ўртасидаги ҳовли-майдондами адашиб-қирқилмай қолган яккаш тутми-ёнгоқ туплари кўзига оловдай кўриниб кетар эди. Ўзи эса худди эски танишини учратган одамдек бир ерларга етар эди.

Яккабоғнинг Иззасига етганда чидаб туролмади. Машинасини четга олиб, кўча ёқасига тушиб бордию кунботарга қараб чўзилиб кетган ва қурилишлар орасида ҳозирча омон турган чимзор-сойликка болаларча энтикиб, тикилиб қолди. Ҳайрият, ҳайрият, дея шивирлар, ватаннинг бир парчаси бўлса ҳам омон қолган экан-ку! Болалигимизда сигир бокиб, сойларида чўмилиб, чимзорларида гурпаклашиб юрган кунларимизни ёдга соладиган нарсаям бор экан-ку! Оталаримиз, оналаримиз юртидан ёдгор бўлиб шугина қолибдими? Қолган ҳаммаси йитиб кетибдими, дея шивирлардию кўнгли бузилиб бораради. Кўнгли бўшалиб, ичи сим-сим симиллаб кетаётган бўлса-да, сойликнинг ўртасида қора илондек тўлғониб ётган Изза сувидан, унинг икки беткайида ястаниб, то кунботарга қадар чўзилиб кетган ям-яшил чимзорлардан кўз узолмасди. Бу ернинг ҳавоси ҳам бир бўлакча, кўксига майдек оқиб кирав, Изза бўйларидағи ялпизларнингми, сув ўтларинингми омухта хидлари анқиб турар, хидлаб тўймасди. Ҳозир ўша булоқ сувларидан ҳовучлаб-ҳовучлаб ичгиси, ўша чимзорларга чўзилаб, тубсиз осмонга тикилиб ётгиси келарди. Билмасдики, сал нарида, ҳов қари толлар тагидаги вайронга тегирмондан у ёғида сойнинг икки ёқасига узала тушган азалий тепалар, минглаб қушлару кўк каптарларга ватан бўлиб, ин бўлиб, ҳаммасини ўз бағрига ола биладиган, чуғур-чуғурларидан жангиллаб акс-садо бериб ётадиган тик жарлар аллақачон йўқлиқка кўчган, ҳозир борса, уларни тополмасди. Қадим Иззаю унинг икки беткайидағи юзлаб булоқлар ўша тепалар тагида қолиб кета бошлаганини у ҳали билмасди. Ҳозир кўз олдида турган, ҳали сивилизациянинг қадами етмаган бир қисм сойлик — чимзорларгагина маҳлиё бўлиб турар, шунга ҳам шукр қиларди. У ёқдаги остин-устинни кўрса, нима қиларкан, ўтириб олиб, пиқ-пиқ йифлармиди экан?!

Омон қолган чимзорлардан кўнгил узолмай, кетса-қайтиб кўролмайдигандек бир ҳолга тушиб, яна бир муддат турди. Аммо кун кетиб бора, офтоб оқпошонинг қизил тангасидек қизариб минора краннинг учига осилиб турар, сойдан кечки бир салқинлик уфура бошлаган эди. Олим шошмаса бўлмасди, ёлғиз мозоротдан топилган сандиқлар таркана бўлиб кетмасидан етиб боргани маъқул эди. Қолаверса, у сандуклардаги нарсалар кимники экан? Уларни ким жойлаб, ким кўмибди экан? Шундай кунда етиб бормаса, бир умр армонда қолмайдими!

Чимзорда шудринг тушиб, ой чиққунга қадар ўтиргиси, болалиги кечган диёр билан видолашгиси келса-да, ортиқ қола олмасди.

Худди шундай бир ҳис Яккабоғнинг гузарчасидаги ҳайхотдек ёлғиз садақайрағочни кўрганда (бу ниманинг аломати экан — шундай азамат қайрағоч қуриб қолган, шу ҳолида ҳам уни тинмагур чумчуклар ватан тутиб, ин қуриб, чуғурлашиб ётар эдилар!), Муржимондан ўтгандаги занжир солиб ҳам қўпориб ташлаша олмаган катта қари тошнокка кўзи тушганда ичидан тошиб келган хўрликни зўрға боса олди.

У кўзлаган манзилига етиб қолган эди. Отасининг халоскори, собиқ ҳамкасбига кўзлари қизарган ҳолда кўрингиси келмади. Тўғри, инсон жудоликларга кўника билиши керак. Туғилгандан то қабргача нималардан жудо бўлмайди у?! (Бу ўша сутчининг гапи!) Лекин одам ҳар нарсага чидаса ҳам кўзи тиригиде ўзи яйраб ўсан, ялангоёқ турпоқ кечган, сўқмоқ ошган, чимзорларида шудрингдан сўнг яшил изларини қолдириб чопган, булоқ сувларини ичган, неъматларидан тотган бир ватан — бир диёрдан қандай айрила олади? Бу айрилиқقا қандай чидайди? Қаердан таскин топади? Қайси гуноҳларига Оллоҳ уларнинг ўрнига тамомила янги қавмни келтириб қўймокда — ўйлаб уйининг тагига етолмасди. Инсон хом сут эмганки, ўзининг гуноҳи қолиб, бошқаларнигини ҳисоблашга тушиб кетади. Ўзим-чи, ўзимиздан нима

ўтиб эди, деб кўймайди. Тоғдек гуноҳи борлигини билса ҳам билмаганга олмоқчи бўлади. Ўзичи, ўзи оппоқми? Шу кунларни яқинлаштириб берганларнинг ичидаги ўзи йўқми? Эндики кўзёшидан, алам-ситамлардан нима фойда?! Кеч очилган кўз пушмон йигиларидан қуриб, сўқирга айланса нима?! Сабру бардош ва тавбадан бошқа нима қопти? Ўшандаги ҳам агар Оллоҳ ёрла-қаса...

Унинг мижжаларига гоҳ аччиқ ёш қалқиб чиқиб, кўз олдини туманга ўхшаш бир нима қоплаб ола бошлар, гоҳ ўша ёлғиз чирқ-чирқ чумчуқларгагина ватан бўлиб қолган (ҳали саратонга бориб улар ҳам буни ташлаб кетадилар!) ҳайхотдек садақайрағоч кетмай қолар эди. Шундай сада турган ерида қуриб қолса-я! Бу ниманинг аломати? Олим ўйлаб ўйининг тагига етолмас, ҳикмати нима билолмасди. Чиндан ҳам у билмайди, бу бир вақтлар (ҳатто бундан ўн етти-ўн саккиз йиллар муқаддам ҳам машхур, гуркираган, ҳамманинг оғзига тушган сада бўлганини!.. Ҳамма гап шундаки, ўша сада гуркираган паллада унинг рўбарўсидаги хонадонда бир гаройиб чақалоқ (ўғил бўлиб ўғил эмас, қиз бўлиб қиз!) дунёга келган эди.

Бу ниманинг аломати эди, охирзамон — қиёматнингми ёхуд бирон касру касофатнинг, ота ҳам, она ҳам билишолмади. Яхшилаб таналарига ўйлаб қўришса-ку, тонг-саҳарларда Оллоҳга ёлвориб тавбалар қилишса-ку, ёлғиз ўзидан мадад сўрашса-ку — ҳикматини англашармиди! Оллоҳ ҳам гуноҳларидан ўтарди. Йўқ, бир-икки кун қўрқиб юриб, кейин қўрқмай ҳам кўйишиди. Негаки бола қош-кўзи жойида, ўзи попукдай эди ҳалитдан. Ўғилдан кўра қиз болага тортиб кетарди чиройи. Худонинг ўзи ғамхўр, вақт ажратади деб ўзларига таскин бериб қўя қолишиди. Қусурига эътибор қилишмади, шуни ҳам Худодан қўришиди. (Оллоҳ эса уни беҳикмат яратмаган эди!..) Бора-бора ҳалиги болакай... аввал соchlари ўсиб, елкасига тушди, сўнг орқаси билан битта жамалак сочли қизалоққа айланди. Оқ юз, қуралай кўз бир кўхлик қиз бўлдию сўнг ҳеч ким ўйламаган бир пайтда, айни оналар «вой фалончиям бўйи етиб, ойдай қиз бўптими» деб кўз остига ола бошлаган кезларида қизи тушмагур бир кечада «растасидан бузилиб» овози дўриллаб чиқди! Ўзи ҳам неча кун уйдан чиқолмай, қамалиб ўтирдию кейин «бо, худо олсин» деб дугоналари орасига чиқиб кетди (Онаси зора овози юмшаса деб отадан бекитиқча, жиндек сурма ичириб ҳам кўрди, кўкнор эзив берди ҳам, бўлмади). Шу-шу эркакшода бўлиб қолди. Мактабни ташлаб, далага чиқиб кетди. У ёқда эса удли-шулдиккина экан, бир ўзи қирқта қизга бош бўлгудек деб, чопиқчи қизларга бошчи қилиб қўйишиди.

Қолаверса, қўли анча ерга етадиган, катталар ҳам ҳисоблашиб, ҳайиқиб турадиган тоғаси бор эди. У ҳақда «Худодан қўрқмагандан қўрқ», дейишарди. Султонмуродлар уйини ёқиб, Каттабоғдан бадарға этишганида кўчини ортиб кетатуриб, алам-аччиқда отни қистаб-қамчилаган экан: от олиб қочиб, ундан учиб кетганча оқсоқ бўлиб қолган дейишади, шу-шу Ақмал ўрис номи Ақмал чўлоққа айланган. Илгариги мовут кепка кийиб юрган маҳаллари ҳам бир баҳарнав экан, энди ундан жizzаки, ундан аламзада одам топилмасди бу депарада. Ақмал чўлоқ кевотти деса, ҳар ким ҳар ёққа — ким чорбокқа, ким ишком ичига уриб кетар, у касофатга йўлиқдинг — балога йўлиқдинг эди. Шунақа Худонинг ғазаби эди. Колхозда ҳам унинг айтгани айт-ган, дегани деган эди. Кетмон чопиқда бас бойлашса, бир ўзи тўртта эркакни қочириб, чангиди қолдириб кетадиган, баъзан кураш тушса, ўзи тенги йигитларни ҳам чирпирак қилиб отгудек важоҳати бор жияни Кумриниса (шундай тоғаси бўлатуриб!) оддий кетмончи бўлиб қолармиди! Тез орада қирқ қизларга бош — звеновой бўлиб кетди. Неча йил бедапоя бўлиб ётган, кафтдек текис кунгай ер уларга ажратилиб, отхонанинг тоғ бўлиб кетган гўнглари шу ёққа ташилди. Қирқ арава чиқдими, ундан кўпроқми, ҳеч ким ҳисобини олгани ҳам, сўрагани ҳам йўқ. Қолаверса, лавлаги уруғнинг сархили шуларга тегди. Қизларга эса, бир номчиқарга ишлайсизлар, мукофотига бош-оёқ сарупою камига Муқимий театрусига олиб тушиш, деб ваъда қилишиди.

Хов, ер хоҳлаб қолса, қанд лавлаги дегани ёмон бўлиб берар экан. Ҳар лавлагилар бўлдики, унинг олдида ўғирдаста — ингичка эди. Қизлар қазиб, аравалар омборга ташиб

улгуришолмасди. Ана шу номчиқарга қилинган ишга Акмал чўлоқнинг ўзи шахсан бош бўлдию жияни учун туриб берди. Қизларга ваъда қилинган бош-оёқ сарупони ҳам топдириб келтириди, Муқимий театрусига шахсан ўзи олиб тушиб, ярим кечада уй-уйларга ташлатиб қўйди. Қизлар шунга маҳлиё эдилар, хурсандликдан таналариға сифмасдилар. Бу ҳақда аллавақтга довур гапириб юришди ҳам.

Эркакшода жиян эса, бу депарада кўз кўриб, қулоқ эшитмаган обрўга эга бўлиб, шухратнинг тагида қолиб кетди. Унинг суврату портретлари қишлоқнинг гузару мактаблари, дўкону шийлонларига осиб ташланиб, ўзи депутатликка кўрсатилди. Энди унинг номи ҳамманинг оғзида эди. Қумриниса Қанғлининг қўл етмас юлдузига айланган эди. Одамларнинг «Қайси, кимнинг қизи?» деган саволларига:

— Анув, Қумриниса-чи, Акмал чўлоқнинг жияни,— деб таниширишар, жудаям тушунмаганларга Яккабоғдаги садақайрағочни эслатиб: — Ана ўша катта кўча юзидағи қайрағочни биласиз-а, худди ўшанинг рўбарўсидаги эшикда туришади. Акмал чўлоқнинг синглиси ўшатга тушган. Шуларнинг қизи. Кўрсайиз танийсиз. Эркакшодагина эди, шу ёқдан баҳти очилибди, — деб у ёғини айтмай қўя қолишарди.

Олим кейинги беш-үн йилда қайси юртда юрса — юрган, бу қирқ қизлар тарихидану Қанғлидан чиққан биринчи депутат довруғидан бехабар, эшитмаган ҳам чиқар балки. Лекин тагига тангадек ҳам офтоб туширмай гуркираб ётган садақайрағочни яхши эслайди. Чўлпон отанинг гузаридан қайтган бозорчи борки, тагига бирпас тўхтаб, гир-ғир шабадада ором топмай кетмас эди. Қолаверса, шарқираб оққан сув бўйида, устига-устак сада соясида ўлтириш гаштига нима етсин. Уни кун тифига қолган йўловчидан бўлак ким ҳам биларди.

Энди ўша ариқ ҳам йўқ, қай бир ерлари тўлиб, қай бир жойлари кўмилиб ётиби. Садақайрағоч-ку бу аҳвол: биронта шохи омон қолмай, текис қуриган! Ниманинг касофатига, ёлғиз Оллоҳ билади. Ва энг ёмони ўша касофатнинг касри бир дарахтнинг ўзига урса майли экан, йўл ёқасидаги барча хонадонларни ҳам ҳароб этиб кетди. У ёқда бир-биридан маҳобатли иморатлар ким ўзарга қуриб ётилибдиу бу ёқда эгаси кўчиб кетган ҳовлилар, томи очиб ташланган валонгар уйлар, наҳрали деворларнинг адоги йўқ. Бу ниманинг аломати? Бир гуллаган жойнинг бир ҳароб бўлиши-ми, ўзимиз билиб-бilmaganга олиб кетган аллақайси гуноҳларимизнинг жавоби-қайтимими? Қайтар дунё деганлари, бу дунёдаёқ кўрсатилаётгани балки шудир?!

Олим маҳзун тортиб қолган эди. У касофатнинг сувратиу изларини аниқ-таниқ кўриб турарди. Адоқсиз ҳаробатлар ниманинг касри, қайси айнишларнинг қайтими — билолмай боряпти. У йўғида бу ёқларда Оллоҳга хуш келмайдиган қандай ишлар бўлиб кетибдики, ўшанинг жадига жаннатдай жойлар ҳароб бўпти, ҳаробага айланибди? Ҳой, кўзингизни очинг, қаёққа қарайпсиз, деб қайтарадиган бир зот қолмабдимикан? Ёки унақалар аллақачон акасига ўхшаб бу диёрдан бош олиб чиқиб кетишган эканми? Отаси айтмоқчи, иймонлилар иймонини лахча чўғдек кафтида тутиб, бир тоғларга чиқиб кетганда, бу ёқда сатта иймонини ютганлар қолган эканми? Яна отаси айтардиларки, уламолар бир хил гуноҳ ишларни кўриб-кўрмаганга олмасинларким, бало келса, ому хосга баравар келгай. Булар ўшанинг мисолимикан ё?

Ҳар нарсага ақли етган Олим буни ҳам тушунгандай бўларди-ю, тагига етолмасди. Нимадир монеълик қиларди. Нима экан ўша? Балки ўзининг ҳам жиндек гуноҳи борлиги... йўл кўймаётгандир. Ахир, ким адашмабди, қоқилмабди? Билиб-бilmай ҳатою гуноҳлар кўчасига кирмабди? Муҳими, ўша ҳатою гуноҳларни англашда, афсусланишда эмасми? Сидқидилдан тавба эшигини топиб борса, қоқса, қарами кенг зот нечук кечирмасин. Мана, кеч бўлса ҳам чопиб юрибди-ку. Жиндек бўлса ҳам фойдам тегиб қолармикан, деб! Жигаримнинг жигарларини топармиканман, деб. Улар қандай ўрама-гирдобга ташланган эканларки, бутун бошли хонадон шундай тўзиб кетса, ҳали-ҳануз йиғиб бўлмаса, ҳар томонга сочилиб кетган у жигаргўшаларни?

Биз ўзи киммиз, недурки, киндик қонимиз тўкилган ота юртда бир бошпана, бир ватан тиклаб, волиду волидаларимизнинг чироқларини ёқиб ўтиромасак? Ўтирамиз деб келгандан сен таниган, билган, излаган у маконнинг ўзи йўқ бўлса? У диёрни ёдга соладиган нима ҳам қопти? У Иzzанинг бир бўлагиyo анати турган ерида қуриб битган садами? Ёхуд кела келгунча ҳам тутгамаётган адоксиз — ҳали суриб ташлаб улгурилмаган харобатларми? У диёр йўқлиққа кўчиб бўпти-ку!

У жилла курса, бир вақтлар ўзлари чўмилиб-тупроққа ётиб, яна сувга калла ташлаб чарчамайдиган ўша Муржимоннинг анҳориyo қўприги омон қолгандир, ҳовлимизнинг ўрнини ўшандан таниса бўлар, деб келятувди. Ҳов, у айқириб оқсан анҳор сувини унутиб бўларканми? Ҳатто довюракроқ болалар сувда оқиб бориб, кўпприк остига кириб йўқ бўлиб кетишарди-да, яна бир муддат ўтиб, бояги-боягидай чалқанча оқиб чиқиб келишар (ана қаҳрамонлигу мана қаҳрамонлик!), кейин ўраб олган болаларнинг:

— Ҳечам қўрқмадингми?

— Зифирчаям-а? — деган саволларига бош чайқаб туриб олишар, ҳамма бирдан «Ву-уй» деб юборар эди! Энди унақа ўйинларни топиб кўр-чи! Анҳор ҳам йўқ, кўпприк ҳам...

Чиндан ҳам у кўпприкни пайқамай ўтиб кетган, Муржимон қаёқда қолибди, деб эсини йиғиб олганда, анча ерга бориб қолган, олдинда бир тўп одамлар йўл чеккасидаги юқ машинасига ниманидир кўплашиб ортишмоқда эди.

Олим аввалига кўч шекилли деб ўйлаб эди. Лекин якин бориб, устига чириган намат ташлаб кўйилган сандукни кўриб, юраги ҳаприқаёзди.

— Ие, айтишганидек-ку! Наматга ўраб қўмилган экан-ку!

Юқ машина атрофида кўйманишётган кишилар орасида баланд бўйлук ва аллақандай ҳайбатлук сутчини кўриб, юраги тошиб, ўзи шошди. Якин бориб, машинасини бир четга бурди.

Сутчидан бўлак ҳамма сергак тортиб, турган ерларида туриб қолиши. Баъзи бирлари ҳатто ўзаро шивир-шивирга тушган эдилар.

Алоҳол Сутчи уни кўриб, ёнидагиларга бир нима деб эди, улар енгил тортиши.

— Аввалроқ айтмайсизми! Ўтакамиз ёрила ёзди-ку,— деди бирови баралла.

Олимнинг хаёлидан эса, «қизиқ, Сутчи ниманинг ҳисобидан буларни хурсанд этади экан?» деган гап кечарди. Бир ёнда олди билан тупроқ суриб, орқаси билан ер ковлагич ўти ўчмай турибди. Сандиқларни ковлаб олгунча ҳазилакам унналишмаган кўринади. Қолаверса, давлатни иши бўлса, аллақачон ташлаб, жўнаб қолишар эди. Тушунарли: Сутчини бугун кўришаётгани йўқ. Унинг ширикномасига мазахўрак бўлмаган одам бу ерда ўралашиб нима қиласди?! Олим уларни чўчитгиси келмади:

— Ҳорманглар, яхшилар.

— Бор бўлинг.

— Келинг, меҳмон, — деди Сутчи кўришгани чиқиб. — Узр, кутолмадим.

Олим бош силкиди:

— Яхшиям Миртўхта амакидан сўраганим...

— Ха, у кишими? Кўриб эдилар, хабарлари бор эди. Амаки нимаю Ўзбекистон радиоси нима!

Кейин азза-базза энганиб, қулоғига шивирлади:

— Заб пайтида келдиз. Булар нима, биласизми? — Сўнг унинг бошини ўзига тортиб, қўшиб кўйди: — Эшон поччамнинг хазиналари. Она сутидан ҳалол экан. Қилт этмабди. Айниқса, анув мол терисига ўралгани...

Олимнинг боши айланиблар кетди, ўзи унинг юзидан қўзларини узолмай, ғудранди:

— Сиз... Сиз қаердан билақолдингиз? Ё ўзлари... айтиб эдиларми?..

Сутчи унинг елкасидан қучиб, бу кафти билан юзини сийпади.

— Кейин-кейин, тарихи узун бунинг, — дедиу, тушунтирган бўлди. — Мухими, топиб

кетяпмиз-ку. Васиятлари ҳам шундай эди ўзи.

— Қандай?.. — деб юборди Олим ич-ичидан бир ҳовур кўтарилиб.

Сутчи ҳар қачонгидан хотиржам тортиб эшон буванинг сўзларини қайтарди:

— «Китобинг Каломуллоҳни қиёматга довур асрарни ўз зиммангга олибсан, ўшал сандиқлардаги шариатингта дахлдор нарсаларни-да асра, ўз эгаларига етказ, илоҳим. Қайтиб мутолаа қилинишига, илму раббонийингдан фойдаланиб, мўмин бандаларинг хидоят топишларига эриштир. Бирорларнинг қўлига тушиб, хор бўлишига қўйма», деб дуо қилар эдилар. Ниятлари мустажоб бўлгани шу, инша Аллоҳ.

Бояги ҳаяжон неча томчи ёшга айланиб, мижжаларига қалқиб чиқдию Олим илгари кўрилмаган бир енгиллик туйди. Нимага унга индамадилар, ҳеч оғиз очмадилар деса, гап бу ёқда экан-да. Ўз халоскорларига аллақачон тайинлаб қўйган эканлар-да. (Албатта, унга ҳам тайинлаган гаплари — осонликча адо қилиб бўлмайдиган топшириклари бор. «Акангни топ. Ўша билан бирга бўл. Фалончининг чирокларимиз десангиз, бир-бирингизга суюниб яшанглар. Зинҳор-базинҳор Оллоҳнинг ҳадларидан чиқманг. Сўз бер, акамни топаман, суюнчи йўқ бўлса, суюнч бўламан, таянчи йўқ бўлса, таянч бўламан де. Диёрга қайтиб, қолган умримизни дуода, тоат-ибодатда ўтказамиз де. Кимнинг зур-ёди эканингизни, палагингизни унутманг. Бўлмаса, қиёматда менга йўлиқишингизни ўйланг. Сўз бер, болам. Акам билан, қариндошлар билан ўртани яхшилайман, силаи-раҳм қиласман деб». Шундан бери нимага чопиб юрибди? Ўшанга-да ҳаммаси. Дунёда у кирмаган битта шу кўча — силаи-раҳм кўчаси қолган экан, шукр, кирди унга ҳам!)

— Қаерга обормоқчисиз? Мендан нима хизмат? Балки, буларни рози қилиш... керакдир? — деди Олим сидқидилдан киссасига қўл юбориб.

Сутчи раҳмат айтган каби елкасига қоқиб қўйди.

— Ўзим рози қилиб қўйганман. Фақат бориб, туширишиб олсак, бўлди. Сиз қисинманг. Хали кўп ёрдамингиз тегади. Келишдикми? — деди самимий.

Олим рози бўлишдан бўлак чораси йўқ эди:

— Келишдик.

Курувчилар бу орада иккинчи сандиқни ҳам машина олдига суреб боришган, энди кўплашиб ёпишишган эди. Сўнг «бир-икки-уч, олдик» билан юқорига кўтаришдию енгил нафас олишди.

Олим қайрағочзорли ёлғиз мозоротнинг ёнгинасидаги ҳали кўмиб улгурилмаган ҳандак олдига ўтаркан, нам тупроқ иси аралаш аллатовур бир таниш ҳид гуркираб кетдию беихтиёр шу боғ ва қаровсиз бу ёлғиз мозорот атрофларини ҳар кўклам босиб кет-гувчи, сўнг узун бош чиқариб, тўқ зангор тусда гуллаб ётгувчи сассик-саримсоқзор кўз олдига кела қолди.

Хозир ўша саримсоқлар лола тупидек барг ёзгану оёқ остида топталиб, тупроққа коришиб ётар эдилар.

Ҳадемай манави ёлғиз мозорот ҳам кусар топади. Унга қайси авлиё қўйилган, нега у ёлғиз эди, деб ўтиришмайди.

Уларнинг хоки-туробларини кўчириш ёхуд асраб-ўраб қолдириш — кимдан лозим, ўзи?

Олим умрида биринчи марта шундай нарсалар ҳақда ўйламоқда эди.

## 15. АРҒАМЧИСИДАН АЖРАБ ҚОЛГАН ТУРНАЛАР

ёхуд қиссагўйга қоронғу, муаллифга  
аён тарих давомига

Боғ адогидаги ноклар тагида қувалашган қораشاқлаҳар ҳам ахийри девор ошиб, анҳор бўйига тушиб кетдилар. Гулларини сочқидек сочиб бўлиб, энди қайчибаргларига зўр бераётган нок туплари устида асаларилар илгаригидек ғужғон ўйнамас, ҳов пастандаги букир жийдалар

томонга оғиб кетишган, ўша ёқдан ҳар замонда бол ҳидига монанд ўткир бир бўй таратиб, шабада эсиб ўтар, Олим демаганлар ҳали ҳажга отланмаган жийдагулининг бир шохчасини синдириб келишга интиқиб, ўша тарафга қараб-қараб қўяр-ди.

Лекин ўчиқдаги олов кутмаганда гуриллаб кетиб, қозон тагидаги ёлғиз томчи жизиллаб-қайнаб ўзини ҳар ён ура бошлади. Шу тобда майда тўғралган думбани сола қолгани билан ёнидан жилиб бўлмайди. Жиззаси куйиб кетиши мумкин. Куйгани-куйган, кошки тахири ёғга уриб кетмаса. Кейин ошнинг таъми ҳам қўнгилдагидек чиқмаслиги тайин. Ўзи не умид билан бозор қила чиқди. Гўштни қовуриб, зира-мурчию савзисини бостириб қўйса, устига жиндек туз сепилган жizzадан totинганча қариянинг суҳбатини олишга нима етсин!

Китобларни бугун сандиқдан битталаб олиб, токчага териб чиқишгунча ҳам пешиндан ўтиб қопти вақт. Сутчи камсуқум, камбағалгина бўлгани билан ҳамма бойлиги ўша тепадаги болохонада экан. Аввалбошда тақводоргина, бор бисоти эгнидаги узун чакмонию кунграси мўйнали анави жуббасигина бўлиб кўринган қария анойилардан эмаскан. Суриштириб юриб, бир болохона китоб йиғиб қўйибди. Ҳаммаси сатта қалин саҳтиён муқовали китоблар. Кечаги сандиқларнинг ичидан ҳам юзга яқин катта-кичик, авлоддан авлодга ўтиб келаётган, четлари ўнгиб кетса-да, ичига гард юқмаган, хатлари бир тиниқ китоблар чиқди. Айни раҳматли дадасининг кўз нурини тўкиб шогирдларига дарс берган, еру қўкка ишонмайдиган китоблари. Ўшалар орасидан Фаззолийнинг «Иҳёи улум» асари чиқиб, Сутчи бир муддат мутаассир туриб қолди. Кейин кўзларига суртиб, муқовасидан ўпаркан:

— Дин илмини тирилтириб, жойига қўйиб кетган бу зотнинг шу китоби ҳақда кўп эшитгандим-у, ўзини кўришга муяссар бўлмагандим. Оллоҳга шукр, отангиз туфайли шунга-да, эришиб турибман. Бу китоб ҳар кимда бўлавермаган ва ҳар ким мутолаа қилавермаган уни, шундай, — деди.

Олим унинг бу тарз гапларидан ғалати тортиб кетди: падари бузрукворининг мусофиричиликда, «диёрнинг бир сиким тупроғи насиб этмай ўтиб кетяпмиз, илоҳим, бизлар кўрган жудоликни сизлар кўрманг», дея қилган дуолари ёдига тушиб, кўзлари намланиб келди. Сўнг пайғамбар сийратлари сирасидаги неча адад (ўқилавериб титилаёзган) асарлар чиқди. Уларнинг биттаси «Сийратун набавия» аталса, бошқаси «Сийратул ҳабибия» эди.

Бу китобларнинг номиёқ отасининг қандай уламо зот ўтганидан дарак бермоқда эди. Аввалига, қаранг-а, шундай китобларни ўқишидан, варақлашдан бебаҳра қолган эканмизми, деган таассуф уйғонган бўлса, иккинчи сандиқни бўшатишга тушишлари билан наинки Сутчидан, ўзидан ўзи уялиб, вужудини бир хижолатпазлик қамраб келабошладио:

— Мен ҳозир, — деганча пастга тушиб, қозон-товорқقا уннаб кетақолди.

Ўчоққа олов қаларкан, ич-этини бир нарса ўртаб келардики, у ёғи йўқ. Гўё ўзи қозондаги анув жizzага қўшиб, юрак-бағрини ҳам доғлаётгандек, доғлаб ола-ётгандек эди.

«Уста экан булар, уста! Мана, уни ўша ўқишилардан нимага ҳайдаб солишмади экан! Чаённи боласи — чаён дейишмади экан! Аввал ўз акамнинг қаватига ташлаб, сўнг изидан Тангритоғга жўнатишмади экан! Фақат улар жанубга тушиб, биз шимолга ташланиб, Худо асрабди. Йўқ-йўқ, кимнинг ҳам сахарларда қилган нолай-дуоси ижобат бўлиб, бу киши отамизни қўшиб кутқариб, бизни ўшаёқларда учраштирибди. Тағинам Оллоҳ раҳм қилибди, биримизнинг пайимизни бошқамизнинг қўлимиз билан қирқишига қўймабди. Ўрнига ҳам падари бузрукворимизга йўлиқтирибди. Хўп, отамизни кутқариб, сарҳаддан чиқариб қўйишиларининг ҳикмати шу экан, акам-акагинамнинг аёlinи бу ёққа юбориб қўйиб, Ўзи у диёrlарда қолиб кетувининг ҳикмати нима? Қандай тушунмоқ керак?» — Олим доғ бўлаётган ёғда қизариб-қўйишига-да келган жizzаларни капкир билан териб олишга улгурмас, уни адоксиз ўйлар ўз гирдобига тортгандан-тортар эдилар.

Нимага келди, сутчини нимага тавоф этиб юрибди, кетидан қолмай? Фақат отасининг халоскори бўлгани учунми? Оллоҳ розилигини истаб шу ишга қўл ургани — маҳбуслар

орасидан ўз одамига қўшиб олиб чиқиб, сарҳаддан ўтказиб қўйгани ва дим-дим кетгани учунми? Қолаверса, бу дунёнинг ҳою хавасларидан этак силкиб, ёлғиздан-ёлғиз, кимларнинг ташқисида тургани, фақат оқлик сотиб, сутчилик билан кун кўраётгани учунми? Отаси — Эшон бува ҳам бекорга иложини қилсанг, ўша одамни топ — кўп покиза одам, демаган эканлар.

Болохонанинг эшиги ғийқ очилиб, тепада сутчи кўринди. У ҳозир ҳамма билган, чаккасини кийиқ ила танғиб, узундан-узун чакмонининг барларини белбоғига енгил қистирганча бир гала бўш бонкаларни обкашига қўшиб орқалаб юрадиган индамас сутчига ҳечам ўхшамас, ёқасиз оқ кўйлак-оқ иштонда, камига бошига жубба, энглига жун нимча илган эди. Эски китоб-лардан бош кўтармайдиган мулладан қаери кам?!

У лопиллаган ёғоч зинадан тутқични ушлай-ушлай, битта-битта тушиб келаркан, ярмидан ошганда майин жилмайди:

— Ниманинг ҳиди десам — жizzаникими? — деди чолларга хос бош тўлғаб, беш кетиб, — жиндеккина туз сепворинг-а, тотига tot қўшилсин.

— Сепдим, сепдим. Шу ерга жой қила қолайми? — деди Олим.

— Майлин, жизза сели билан, деганлар. Ўшанда-да, ҳамма маза! Сўнг асрни ўқирмиз, — деб қўйди.

Олим столга газета ёзиб юбориб, ўртага тақсимчадаги жizzанинг қўйди, сутчига устални ҳозирлаб, ўзи неча қишини кўрган ёнғоқ тўнкасига ўтирди.

— Қани, бисмиллоҳ билан мен бошладим, — қария жizzанинг бир донагинасини оғзига солиб, сел бўлганча, бош тўлғади. — Имм, бай-бай, бу дунёни бўлмабди-ку, туз билан йиғлаб кўришибди-ку. Олинг, ўзингиз ҳам.

— Оляпман, оляпман. Чойхона паловнинг гашти шу-да, — деди Олим қариянинг кўнглини топаётганидан ийиб.

— Нимасини айтасиз. Бу дунёнинг неъматлари ичидаги унга етадигани йўқ, — деди қария нон тишлаб. — Лекин ёмони шундаки, кейин нафсни ўлдиромай қийналасиз, ҳар куни ёғлик нарсани тилайверади бу иткоски, — деб қариялардек ширин кулди.

— Нафсни ўлдиришдан муддао ош эмасми? — деди Олим унга қўшилишиб кулиб.

— Йўқ, бутам, ошдан муддао — шукр, шукрдан мақсад — нафсни ўлдириш. Ҳамма ҳикмат шунда, валлоҳи аълам.

Ана, холос! Мана, нима учун у тарки дунё қилган одамдек бир чеккага чиқиб олиб, сутчилик қилиб юрган экан. Энди у юмушни ҳам ташлаб, бузилаётган жойлардан китоб излаб, китоб териб қопти! Билмаган одам нима қиласди, гўрига орқалаб кетадими, деб ўйлайди! У бўлса, аслида булар қилиши керак бўлган нарсага — эшон оталаридан қолган китобларни топиб саранжомлашга югуриб юрибди, кишини уялтириб.

Олим қариянинг ҳайбатими, салобатими босиб, хижолатга тушиб бора бошлаган эди. Буни сездирмаслик учун ҳам у ўрнидан туриб, ўчоқнинг оловига алаҳсиди. Сўнг яна жizzага қистади:

— Олинг, тақсир, совумасин.

— Раҳмат, олдим. Етказганига шукр, жудаям тотли бўпти. Энди асрга тайёрланада қолай, — деб юзига фотиха тортиб, тура бошлади ва обдастага сув олиб, ҳовлининг паст томонига юраверди.

Олим мутаассирланди. Бу одам падарига қилган яхшиликлар, у зотнинг ҳар намозда унинг отини дуога қўшишлари ёдига тушиб кетди. Тўғри, унинг даргоҳида қолиб, этагини тутиб, ўн йил хизматини қилганда ҳам ўша бир яхшиликни ё қайтара олади, ё қайтара олмайди. У ҳовли адогида оқ-оппоқ бўлиб, бир ихтимат, бир дуолар ила шошилмай, муқаммал таҳорат олаётган сутчидан кўз узолмай қолган, наҳот шу одам бизнинг идораларда қалтисдан-қалтис, нозикдан-нозик топшириқларни адо этиб юрган, деган хаёлларга толиб кетган эди.

Очиғи, Олим бу одамга қай тарафдан ёндошишни билмасди. Айтсинми, айтмасинми?

— Агар умрим бўйи савобга даҳлдор ва Оллоҳга хуш келадирган битта иш қилган бўлсам,

ёлғиз ўшадир, отангизни чегарадан ўтказиб қўйиб келганимдир, шўронинг жабрхонасидан қутқариб, чиқариб юборганимдир. Бошқа тарозу босадирган амалимни билмайман... — деганига ишонса, айтаверса мумкиндири. Маслаҳат солса, бўлар... Лекин худди ўша «иши»дан куйиб қолган, тагинам озгина инсоф қилиб, пенсага чиқариб юборишган бўлса-чи? Тилидан илиниб ўтирасмикан ўзи? У шундай хаёлларга боришига бордию ичкарида худди минг йилдан бери ибодат қиласиган одамдек ихтимат ила намоз ўқиётганини кўриб, ўз хаёлидан ўзи уялиблар кетди.

Ниҳоят, қария намозини тугатиб, ҳовлига тушиб келди.

— Ассалому алайкум ва роҳматуллоҳи ва барокотух...

Олим бу гал ҳам доғда қолди. Саломга улгургунча... у киши биринчи бўлиб саломга оғиз очди. Ё ростданам у шундай яхши қарияпти, ё...

Олим хижолат аралаш ялт этиб, унинг юзига қаради: йўқ, унинг ҳалимдан ҳалим, нурли юзида гидр аломатининг ўзи кўринмасди. Демак, сутчи Пайғамбардан қолган суннат тариқасида саломга ошиққан, холос.

Улар нок соясидаги ҳалигина савзи тўғралган устолнинг икки чеккасига, рўпарама-рўпара чўқдилар. Бирлари ўнгид кетган эски устулга, бошқалари алмисоқдан қолган тўнка устига. Унгача Олим чой дамлаб келди, уни икки-уч қайтариб, устига сочиқ ёпди. Сўнг Сутчини чойга қистади:

— Олинг, устоз. Жизза чанқатгандир. Чиндан қора кўчкорники экан. Қассоб алдамабди.

Ўчоқда олов тез ҳам эмас, секинлаб ҳам қолмаган, қозонда савзи бир текис қайнар, қўлиданми қайдан, зира ҳиди анқир эди.

— Алдамаса, рози бўлиб берса, қандай яхши. Пайғамбаримиз соллаллоҳу алайҳи вассаллам шундай тижорат-савдонинг зўри, киши нақд охиратини топади, деганлар. Қараб турасиз, у қозонга ҳам баракаю тот киргизиб юборади. Зўр чиқади ошиз ҳам, — деди Сутчи бир нарсадан шунча ҳикмат чиқариб.

— Оби-оташ, уялтирасин ишқилиб, — деди Олим.

— Ҳаммадан ҳам кеча Эшон поччанинг мана бу хазиналари топилган қунда етиб келганизчи! Руҳлари беҳад шод бўладиган бўлди.

— Оллоҳ ўзи дилга солади, шекилли, туриб-туриб ваъдам эсимга тушиб кетаверди, — деди Олим бирдан Сутчини топгиси, топиб отамлашгиси, аллақанча нарсаларни сўрагиси келаверганини эслаб.

— Дилга солганда-чи! Агар тириклар белги бериб соғинтираверса, зиёрат қилмоқ лозим. Ўтганлар тушга кираверса, тиловат афзал. Бу дунё шундай қурилган. Бирида топилган савоб, иккинчисида асқотгай. Елкада тоғдай гуноҳлар билан ўтиб кетишдан Оллоҳнинг ўзи асрасин.

Олим бир дона жizzани чайнаган жойида оғзи какра тортиб, ютишини ҳам, ютмасини ҳам билмай бўғзида туриб қолди. Қолаверса, у нимага кепти? Қария худди билгандай ўша эзиг ётган тоғдай гуноҳлардан сўз оча-ётган эди. У ўша аччиқ нарсани (намак ҳам шунчалар тахир бўларми?!) зўр билан қулт ютиб эди, азбаройи мижжаларидан тирқираб ёш чиқиб кетди. Қарияга сездирмайгина у ёшни кафти-ла сидираркан, кўкрагининг таги симиллаб сирқиради. Кошки бу елкадан эзиг ётган нарсани дабдурустдан бировга айтиб бўлса!.. Айтганда ҳам тушунтириб бўлса! Ўзлари бир қориндан талашиб тушган — икки жигар, холос. Падари бузрукворларидан кейин суюнадиган кимлари қолди? Лекин уларнинг юришлари... бу ахвол. Тўзигандан тўзиб... Бирлари иккинчиларига бир ҳамият қилолмай... Йифинолмай... ҳар қайсилари ҳар диёрларда...

Олим чой қуятуриб, сергак тортди:

— Узр, устоз, сўрамай қора чой дамлайверибман, ичаверармидингиз? — деди қариянинг раъийга қараб.

— Ҳечқиси йўқ, — деди Сутчи, енгил бош силкиб. У ҳозир кенг оқ яктак устидан енгил

нимча кийган, бошида ҳам кўклам ҳавосига монанд духоба тақия бор эди. Шу ўтиришида тақводор намозхондан қўра илм ахлига кўпроқ ўхшаб кетарди. — Жиндек кўкчой ташлаб юборинг, омухта бўлади-қўяди. Бу фаслда омухтаси маъкул.

— Яхши айтдиз, — Олим кўрган токчасидан куруқ чой олиб чиқиб, камига қайнаган сув буради. — Шунинг устига жиндек кийик ўти бўлгандами, — деди назарида ўша ўт ҳиди гуркираб кетгандай бўлиб.

— Оҳ-оҳ, жониворни ичганиз сайин тан роҳатланади бир, — деди Сутчи худди ўша роҳатни туйган каби, — энди гузар бу аҳвол, ким ҳам Чорсуга тушарди битта шу нарса учун. Ўзи тоғда битса.

— Шуни айтинг. Аммо ўзи жуда беор нарса экан, бутун-бутун майдонларни тутиб кетган-а, териб адо қилиб бўлмайди.

— Қаерда кўрдиз? Тангритоғ томонлардами?

— Ҳа-да, ҳатто бир куни қишида қор тагидан териб кепмиз жониворни. Куруқ чўпи қопти-ю, шунда ҳам оч ўсма рангда дам еб, гуркираб чикса денг.

— Оллоҳ ўзи маҳфуз. Энг ноёб, энг нодир нарсаларини ўша ёқларга сочиб, ўша тоғларда сақлаган. Ҳатто динию иймонини кафтида лахча чўғдай тутиб қочтан бандаларига ҳам ўша томонлардан паноҳ берган Оллоҳ. Кўргандирсиз, ахир? — деди Сутчи энди омухта чойдан лаззатлана-лаззатлана ҳўпларкан.

— Кўрдим-кўрдим, — деди Олим шошиб ҳам аллақандай ўнгайсизланиб, — шу ёқдан бош олиб кетган алла қанча кишиларни. Суриштирса, балки ҳаммалари мусофири чиқар...

— Албатта, у ерни ҳам бу дунёning соғинч диёри деб бўлмайди. Орзу қилма ҳар ерни, ҳар ерда бордир тош-тарозу, деганлар. Ўша жойда ҳам зулм уруғини сочгувчилар билан бу ҳаётнинг таҳир сувларини ичгучи мазлумлар истаганча топилади. Шунақа. Бу имтиҳон дунёсида ҳеч ким синовдан қочиб қутулолмайди. Ва одам боласи бирон ерда ўзига жаннат қуролмаган, қуролмайди ҳам.

Олим ялт этиб сухбатдошининг юзига қаради. У бу гапни жуда хотиржам, ҳеч писандасиз, ҳатто ишонч-ла айтмоқда эди. У ҳайратда қолиб:

— Дориломон замон, дорул диёр деган гаплар-чи, устоз? Ҳаммаси бехудами?.. — дея олди.

Сутчи майин жилмайди:

— Орзуга айб йўқ. Не-не салтанат сўраган хукмдорлар ўтди. Ҳорун ар Рашиддай, Искандардай. Не-не ислоҳотчилар келиб кетди, ҳар дориломон жамиятларнинг тузугини тузиб. Лекин ким зулмни илдизи билан йўқотолди? Ҳамма teng, ҳамма баҳтиёр, одил бир жамият қуролди? Негаки инсоннинг ўзи аввалбошда қусурли яратилган. Ўзи қусурли бўла туриб қандай комил жамият қурсин?..

— Бу гапиздан, — деди Олим ғалати тортиб, — бу гапиздан олдингию кейинги барча уринишлар бехуда, барчаси бесамар, дейсизми?

Унинг кўз ўнгидан ўз жигари, диёрига сифмай мусофири юртларда дарбадар кезишга мажбур бўлган туғишгани ўтиб, мижжалари намланиб келди. Ичи сидирилди. Унинг юраги бўғзига довур ачишиб келган эди.

— Албатта, инсон борки, одил бир жамият истайверади. Ўзига ўхшаганларни орқасидан эргаштираверади. Курашаверади, тинмайди. Лекин бу дегани қура олади, қўлидан келади, дегани эмас.— Қария ҳамсухбатига ширин боқди, — Орзумга етдим, қурдим, мана бундай бўлади, дегани борми? Ҳамма билмаса ҳам Сиз биласиз.

Олим беихтиёр бош силкиганини ўзи сезмай қолди:

— Тўғри, қўйишимади.

— Кўйишимасди ҳам, — деди Сутчи совуб қолган чойини ҳўплаб. Олим унинг чойини янгилаб, оғзига тикилди. — Жиндек чегарадан чиқсан эдиларки, нима қилишди?!

— Сўнгги фармойишларни айтаяпсизми? — Олим саволдан ўзини тия олмади.

— «Тангритоғ ёлғиз вилоят, эмас. Лашкар тайёр турсин... Сўнг Дориломон диёр бўлиб яшагаймиз»дан кейин неча кун ўта қолди?

— Демак, бир бемаврид фармон деб...

— Биз шундай таъбир этаверамиз: ҳаддан ошмасалар эди... чегарадан чиқмасалар эди... Йўқ, булар бари бизнинг нокус фикрларимиз, холос. Аслида тақдир ёзуғи, Худонинг хоҳлаши — шундай. Тамом, вассалом,— деди қария ҳаммасини бир тутум, бир қолипга сола қолиб.

— Шунча ҳаракат, уринишлар-чи? Уларнинг зое кетиши-чи! Бу ҳам бир имтиҳон, бир синов, холосми?— деди Олим қариянинг мушоҳадасидан ҳайратга тушиб.

— Шу. Синовдан бўлак нарса эмас.

— Унда... инқилобдан мурод, шунча мўмин-мусулмон, ботурларнинг саъий-ҳаракатлари пучга кетишининг ҳикмати нима? Ўша инсон боласининг бехуда уринишларига бориб тақалаверадими яна?

Қария мийигида кулибгина кўя қолди. Бошқа томондан ёндошиб деди:

— Мана, Сиз ўша вақтда шу воқеаларнинг ичидаги юрган одамсиз. Хўп, тўрамни ўлжангиз кўп, қурол олмайсизми, сотиладиган яроғ бор дебми, бошқа нарса дебми, ишқилиб авраб ўғирлаб кетишилти. Лекин нега шунча ботурлар, доруломончилар ичидан у кишининг йўлини давом эттириб кета оладиган бир муробит чиқмади? Чиққанида ҳам тинч қўйишармиди?

Олим ўзи ҳам у мамлакатга нимага ташланганини эслаб, сўнишиб қолди. Дарвоҷе, кўз-кулоқ бўлиб турган, ичидаги юрган, топшириқ олган маҳсус одамлар, маҳсус хизматчилар қанча эди. Уларнинг вазифаси аниқ эди-ку.

— Ўша етим қолган ҳукумат бутун таркиби билан музокарага бориб, нимага эришди, нима топди? Мендан кўра яхшироқ биласиз.

Олим ялт этиб, сухбатдошининг кўзига қаради. Ўзи билмаган нарсаларни бу қария миридан-сиригача биладигандек тикилди.

— Ўша ҳукумат аъзолари тушган учоқ қисмати ҳақидаги гаплар қанчалик ҳақ, устоз? У чиндан тоққа урилиб кетганми, ё?..

— Ёлғиз Оллоҳ билади, бандасининг тахминлари фолбиннинг фолидай гап, бўтам.

Олим унинг нима демоқчилигини тушунди:

— Бу нарса ҳали-вери очилмай — сирлигича қолгайми?

Қария бош ирғади:

— Сир пардасини кўтаргучи куч ҳали-вери саҳнага чиқмагай. Расмий ахборотлар берилмаганидан билаверинг.

— Мен бир нарсага тушунмадим, — деди Олим ростига кўчиб. — Нима, ҳалқ ғалаён кўтаришини кутиш керакмиди? Таъзия бериб кўя қолсалар осон эмасмиди, миш-мишлар ёйгунч?..

Сутчи «саддасиз, содда», деган каби мийигида кулиб, энсасини силади. Саволига савол ила:

— Миш-мишдан кучли нима бор?! У ўз мевасини бердими ишқилиб? — деди.

— Қандай?

— Улар ўлигини бўлса-да, талаб қилишди, булар олиб бориб қутулишди. Шундай бўлдими, ахир?

— Шундай.

— Мен-ку бу ёқдаги одам, воқеанинг мантиғидан чиқиб, айтяпман, — деди қария ўша-ўша босиқлик билан. — Лекин Сиз... ичидаги одам у ғалаён, у кўтарилиш, у мотам кунларининг бутун даҳшатини кўрган бўлсангиз керак?

Олим мутаассирланиб, бош силкиди:

— Темир тобутлар борган кунни айтасизми?.. Ҳеч қавмнинг бошига солмасин, кўрсатмасин у кунни, — деди тин олиб, — бутун юрт, бутун Тангритоғ аза тутди.

— Тушунаман. Тасаввур этяпман. Эндиғина озодлик нашъасини тотган, елкасига офтоб

теккан халқ... етим бўтадек бўзлаб қолаверса, қийин-да.

— Нимасини айтасиз, менинг ўша кўрганим бир умрга етади, — деди Олим яна тўлика бошлаб.

Сутчи совуб қолган чойини симириб, худди темирга сув берилгандек туйди ўзини. Орқасига суяниб, тепаларида кўклам елларининг подасидай тўзиб юрган ўркач-ўркач булутларга тикилиб қолди-да, яна кўзини тушириди.

— Сизлар ўша кунлари ўша ҳайитнамозлик майдонида бўлгансизлар-да?

— Ҳа, топшириқ билан, битта қўймай ўша ерга чақириб олишди. Бориб, халқ орасида турғанмиз.

— Эшон бувам-чи? — деди қария кутилмаганда сухбат асносини бу ёққа буриб.

Олим бош тўлғади:

— Йўқ, чиқа оладиган ҳолда эмасдилар. Мен хабарларини топиб борганимдаёқ жуда мункиллаб қолган эканлар. Лекин намозни канда қилмасдилар. Таҳоратсиз ўтиrolmas, зикру санодан бўшамасдилар. У ёқни кўрган одам — жуда ҳилвираб қолган эканлар. Кўпга бормадилар.

— Тағинам кўриб, дуоларини олиб қолибсиз, — деди қария таскин бериб. — Бу ҳам катта давлат.

Олим кўнгли бузилиб, қаншари аралаш энсасини сийпаб қўйди:

— Оллоҳнинг меҳрибончилигию асраши, деяверинг! Даракларини топмасам, кўрмасам — нима қиларканман?! Тип-тиклигимча қоларканманми! Эсласам, юрагим орқага тортиб кетади ҳозир ҳам.

Қария унга синчков қараб қўйди. Бу гаплардан жиндек шубҳаланди ҳам. Аммо нима бўлганда ҳам рўбарў-сида эшон бувамнинг зурёдлари ўтирап, ундан шубҳаланиш — шаккокликка ўхшаб кетар эди. Ўлдими! Ким бўлганда ҳам падарибузрукворига бўлишган одамга ёмонлик соғинадими? Истаган тақдирда ҳам Оллоҳ изн берса қилади-да. Изн бўлмаса, ким бир дона мўйига тегина оладикан?

Танларни яиратиб шамол ҳувиллаб ўтди. Нок гулларининг қолган-кутганларини ҳам учириб-тушириб, ҳовли юзида чирпирак қилиб ўйнади-ўйнади-да, уй тагларию остона осталарига тўдалаб, ташлаб кетди.

— Ҳавои-жаҳон чиндан айниди шекилли, — деди қария боягидек осмоннинг булат тошиб, текис эгаллаб бораётган буржларига назар ташлаб. У аллақачон офтобни ўз қора пардасига ўраб бўлган, унинг ботиб кетмаганини ҳов бир чеккадаги, ҳали қора булатлар тўдаси етиб бормаган жойдаги капитар қонига бўялгандек яккам-дуккам паға булатлардан билса мумкин эди.

— Қозонни ошхонага кўчирамиз шекилли. Ё гурунчни солиб юборсам, дам еб улгурадимикин-а? — Олим оловга ўтин ташлашини ҳам, ташламасини ҳам билмай кўкка аланглади. — Кунботар томонлар ҳали тинч шекилли?

Сутчи ўша ёқларга зингил ташлаб, фикрига қўшилди:

— Тинч-тинч. Ёғиб бошласа, тим қўрғошин тусга киради. Гурунчни солиб юбораверинг. Ҳали ўтиратурамиз. Энди гаштли бўляпти.

Олим аввало ўчоқдаги ўтни қўтарди. Гурунчни ювиб келиб, бир текис бостириди. Суви камроқ кўриниб, капитир устидан бир чўмичгина қайнаган сув қўйган бўлди. Қайнаб чиқа бошлагач, ёғоч қошиқ билан гурунч орасини ёриб, қайта ағдарди. Тобига келгач, яна гумбаз қилиб йиғди. Ўчоқ остидан ортиқча чўғу чалаларни тушириб, бояги тоғорача билан дамлашга тутинди.

Хаёлга толиб кетган қария ҳийла дунё қўрган, киришимли ҳамкасбини ўйлаб кетган, ҳар нарса қўлидан келишию топқирлигига ҳавасланиб ўтирап эди.

Айниқса, унинг фикрлаши, туриб-туриб мутаассирланиб кетиши ёхуд гуноҳкор одамдай сўнишиб қолиши қизиқ туюлмоқда эди. Бу тоифа одамлар ичидан камдан-кам учрайдиган ҳол. У

билан нима содир бўла қолибди эканки...

Олим қўлини чайиб келиб, артинаркан:

— Чойни янгилайми, устоз? — деб тараддудланди.

Қария бош тўлғади:

— Кейин, ҳозир айни ўтириши ҳаво бўляпти. Афсуски, супамиз йўқ. Бўлмаса, ёнбошлаб ўтган-кетгандан сухбат қуришга нима етсин эди.

— Ҳали ҳам кеч эмас. Ҳов, дарвозахонанинг бу бурчагига жой қилворайми? Битта шолча, иккита кўрпача бўлса, бас-да, — деди Олим кафтини кафтига ишқаб.

Қария унамади:

— Кўйинг, ҳозир кўчсак, жириш бузилади. Ундан кўра борига барака, ўтиринг, — деб мулозамат қилди у сухбатни келган жойидан улаб. — Боядан бери бир нарсани сўрамоқчи бўламан. Сизлар Эшон поччамдан неча ўғилсизлар? Икки ўғил, холосми?

Олим жойига ўтираётиб, қариянинг бетига қараб қўйди. Шубҳаланса-да, жавобдан қочолмади:

— Иккиталикка иккита, нима эди?

— Кенжам, тўнғичим деб, кўп гапирадилар-да.

— Ҳа-а, — деди, бироз енгил тортиб.

— Айниқса, Сиздан кўп ташвишланардилар. Ҳали эсини таниб улгурмаб эди, кимларнинг эшигига қолдикан, деб кўзларига ёш олганлари-олган эди.

— Акамни-чи? — деб юборди Олим ўзи ҳам кутмаган бир тарзда.

— Султонмуродними? У тегирмонга тушса, бутун чиқади, ундан қўрқмайман. Лекин буниси, суяги қотиб улгурмаб эди, дердилар.

Олимнинг юзига шу гап чиндан соя солиб, ўзи сўнишиб қолди. Сўнг юзини ишқаб:

— Лекин менга тамомила бўлак васиятлар қилдилар, — деди.

— Қандай? — деб ҳайратланди қария.

— Акангни топ. Иложи бўлса, қанотинг остига ол. Энди мендан ёлғиз сизлар қоляпсизлар. Гўримда тинч ётишимни истасангиз — ўртани яхшилайсиз. Жигар-гўшалардек бир-бирингизга суяниб яшайсиз. Ислом мана шу. Ота рози — Оллоҳ рози. Биздан кейин бўлиниб кетсангиз — у дунё бу дунё рози эмасман. Қиёматда менга рўбарў келишингизни ўйланг, дердилар.

— Худо раҳматига олсин. У кишидан бўлак одамдан чиқмагай бу хил гаплар, — деди қария мутаассирланиб, — Ҳар сўzlари тиллага teng у кишини эндијам топинглар-чи, тополмайсиз. Демак, васиятларини қулоқ қоқмай адo этишга мажбурсиз.

Олим ер остидан қарияга қараб қўйиб, ямланди:

— Келишимнинг боиси ҳам шу...

— Хўш-хўш? — деб шошиб қолди қария. — Мендан нима лозим?

— Ёрдамингиз...

— Бажонидил. Тортинмай айтаверинг. — Қария кафтини унинг қўли устига ташлади. — Одамдан қоладигани шу-ку...

Олим киприклари намланиб, у кишига қаради:

— Биламан, — деди аллақандай тўлиқиб. — Бу хусусда сиздан бўлак кимга ҳам оғиз оча олардим. Раҳматли дадам, энди билсам, жуда оғир вазифа юклаб кетган эканлар. Акамни қандай топдиму қандай олиб ўтдим. Бир йўлинни кўрсатингки, сих ҳам куймасин, кабоб ҳам. Қиёматда ҳам ёруғ юз билан бора олайлук падарибузрукворимиз олдиларига.

— Султонмурод ўзи қай диёрда? — деди қария бу гаплардан хабарсиздек.

— Гап шундаки, акам биздан анча олдин бу ёқлардан бош олиб чиқиб кетган экан. Қаёққа — билмасдик. Кейин эшитсам, улар тўрамга қўшилолмай қолишган экан.

Сутчи ялт этиб, унинг юзига қаради:

— Тўрамнинг сўнгги фармонлари шуларга тегишли эканми?

— Шундай. Афтидан улар ўша ёқда алоҳида кўшин тузиб, буйруқ кутиб турганлар. Буйруқ келиши-ла ичдан ёриб чиқиб, Озодлик армиясига қўшилмоқчи бўлганлар. Натижани биласиз. Тўрамни ўртадан кўтариш билан ҳаммасига барҳам берилди. — Олим ҳеч кимга айтилмайдиган, оғиз очсаёқ бош кетиши мумкин бўлган хабарларни Сутчига айтиб қўйиб, ўзи унинг кўзига қарай олмай қолганди. (Гуноҳи камми ўзининг ҳам? Хоҳласин-хоҳламасин, яширсин-яширмасин, бедодликларга шерик, ахир.)

— Хў-ў-ўй, қўриб-билатуриб илдизи бир, шажараси бир, каъбаси битта халқа шунчалар жабр! — деб юборди қария ва жойида ўтиrolмай туриб кетди.— Оллоҳ кечирсин. Ҳаммамиз гуноҳкормиз: томошабин бўлиб турганлардан ичидаги юрганларгача. Ўзи кечирмаса, ким ҳам кечиролгай.

Ўнғайсизланиб, Олим ҳам туриб олди. Қария ҳуши ўзида йўқ, нари бориб, бери келару бош тўлғаб, қўл силкишини қўймас, қарғанарми, ингранарми, Оллоҳдан ўзига тавфиқ сўрарми, билиб бўлмасди. Жазавага тушган авлиёлар каби, дарвешлар каби жавраб-жавраниб:

— Ҳай, тағинам ер ютқизмайсан, тағинам осмон тоқини бир варақ қофоздек ўраб, йиғишириб қўя қолмайсан. Тағинам раҳмдилсан, ўзинг Раҳмонсан, — дея истиғфорлар айтар, мағфиратлар тилар, ора-орада ому хосни ўзинг асра, деб қўярди.

У қариянинг тинчишини, ўзига келиб, ҳовуридан тушишини миқ этмай кутаркан, шу тоб узокдан, ўркач-ўркач булутлар тuya карвонидек кўчган кўкнинг бир аллақайси буржидан жуда таниш ҳам оҳанрабодай ўзига жалб этгувчи бир сас, бир садо кела бошлаб, бу ўзига қайта жон бағишлигандек, ўша овоз, ўша сасларга маҳлиё тикилиб қолди. Улар осмон тоқида, булутлар орасига аргамчи ташлаб, бир-бирларини чорлашиб, «кур-еъ, курей»лашиб келар эдилар.

— Қаранг, устоз, кечиккан турналар-ку. Борар манзилларини йўқотиб, сарсон қолган жониворларнинг келувини қаранг, — деб юборди ўзи сезмаган ҳолда. — Турналар келиб бўлмаганмидилар?

— Йўқ, айни мавриди, — деди ўзига келиб қолган қария кафтини пешонасига қўя бошлаб. — Фақат бу йил кўкламнинг ўзи эрта келди. Энди булар қанотлари остида чинакам саддипокни олиб келмоқдалар. — Кейин хотиржам жойига қайтиб, қўшиб қўйди. — У биз — назаримизда эрта келиб, эрта кетаётгандек бу дунёдан кўнгил узолмаймиз. Аслида эса биз ҳам шу турналардек ҳар биримиз ўз мавридимизда бу синов дунёсига келиб кетгаймиз. Мангуси у ёқда.

Олим бу дунёнинг жуда кўп сир-синоатларига ақли етадиган бу қарияга нима деярини-да, билмай туриб-туриб, у ҳам жойига чўқди ва унинг ўзи бир нима дейишини кутиб, жим қолди.

Қария уни кўп ҳам кутдирмади. Юзига бир қур қараб олиб:

— Аммо-лекин Эшон бувамнинг билганлари билган. Қанчалик оғир бўлмасин, арвоҳларини рози қиласиз. Ундан берига бу диёрларда туп қўйиб, палак ёза олмагайсиз. Султонмуродни топинг, — деди у.

— Топарман ҳам, кўндиарман ҳам. Лекин кейин бу диёрга қандай қайтгаймиз? Қўйгаймилар? — дея олди Олим ичидан тошиб келаётган хисларини жиловлай олмай. — Қандай қил, дейсиз?

Сутчи кутилмаганда унга суйиб тикилди. Юзидами, сўзидами (балки юрагининг туб-тубидадир) довқур одамларга хос бир аломат, бир белги қўриб, ногоҳ шавқи келди:

— Балки Оллоҳга таваккал қиласиз; «Ҳасбуналлоҳу ва неъмал вакил», деб?! Мушкулларни осон этгувчи Ўзи бор-ку, ахир?! — деди қария юзи аллатовур ёшариб ҳам нурланиб кела бошлаб.

Ана шу нур ортида нажот бордек Олим ҳам ундан кўз узолмай қолган эди: «шояд, шояд, шояд Ўзи қўлласа».

## 16. ҲУСНИ БАЛОЛИҚ КУНЛАР (Маҳфуз хатлар давомига)

Айбга буюрмагайсуз, Султонмурод ака, шу ҳолда (кўзим ёшлук, қалбум дозглук) хат бошладум. Не қилайки, ичумга чироқ ёқса — ёримас, бу хўрлук, бу ситамлардан тинмаюр ҳеч кўз ёшларум.

Яхшиям тун бор, бир уйга кируб кетуб туйгунча йиғламоқ-сиқтамоқ мумкун, ўз ўксунгга ўзунг қонмоқ мумкун.

Яхшиям ёстук бор, бир тамони ҳўл бўлуб кетса, бошқа тарафин ўнгармоқ мумкун. Яхши нијат ярим мол. Зора тушиларим ҳам ўнгудан кела бошлиласалар...

Яхшиям қогоз бор, қалам бор, оғиз очуб бўлмас дард-ларингни, аламларингни унга тўкмоқ мумкун, тоз кўтаролмагай дардларну у кўтаргай.

Яхшиям Сиз борсуз, бу дунёнинг би-ир чеккасидаги ёргу юлдуздек, шу борлугингизга, бир кун кируб келарингизга ишонуб, тишишни тишишга босгайман, чидагайман. Ахир кечанинг ҳам сўнгги бор, алам-ангиз кунларнинг ҳам ниҳояси. Бошқа нимагаям умид тутгайман, мен бояқшишигина?

Хозур... зора енгил тортсам деб ҳасрат дафтаримни очдум Сизга. Биласизму, назарумда рўпарамда ўлтиргандексиз. Ҳа-ҳа, ўлтируб олурсиз-да, (сувратизмас, ийқ ўзиз ўлтиргандексиз) ҳатто, баъзан аччиғланиб, ўпкаланиб, бир сўзлар айтиворсам, гуноҳкор кишиидай бош силкиб қўя қолурсиз.

Айтинг, чин сўзингизни айтиңг менга. Мени бу диёр-ларга жўнатиб қўйуб, ўзиз қай ерларда қолдиз? Фақат ҳар оқшом мана шундай меҳмоним бўлуб ўлтирурсиз. Шунга-да шукр. Қаршиимда жум ўлтирувингизга-да шукр, аччиқ-тирсиқ сўзларимни, гиналарумни тинглаганингизга шукр. Шу баҳона ичумдагиларну қогоз бетига тўкиб, сал бўлса-да, ёзилуб олурман. Бўлмаса, бирағада айтишига уятлу. Шундай кунларга қолмиишман, «кун деса кун, ой деса ой жамилангиз». Қай диёрларга бош олуп кетуп топган Маҳфузангиз. (У сўзларунгиз, эркалашиларунгиз қулоқларум остидан кетарму! Кетмас қиёматга довур).

Сиз-ку Оллоҳнинг инояту ила менга етишиуб эдингиз, мен-чи бу айрилуқларга чидаб, Сизга етишиарманму? Ёлгуз Оллоҳдан сўраганум шу. Тонг саҳарлардаю дуолар ижобат соатларда ичикиб-ичикиб, таваллолар этуб сўраганум, илтижсоларумнинг бошию адоги шу.

Сизну деб келуб эдум, Сизсиз бу диёр менга не керак? Фақат ёдга солувгами, ичлармну тирнаб, хун-хун йиғлатургаму? Сарҳад ошиши шунчалар қийин бўлубдиму? Рухсат олиш шунчалар узун, шунчалар мушкул эканму? Қанча молчи чўпонлар соқчуларнинг кўзларину шамгалат этуб келишганида Сиздай ёвқурлар ўтолмасангуз! Эмди қачон келгайсиз экан, биз мусофириларну хурсанд этуб? Қўли қисқа, ноласи ҳеч ерга етмас муштипарлар ҳимоятуга?

Қанийди бир имдод, бир хавар берсангиз-бердирсангиз. Яхуд бир чиройлу кечада Ойдан тушгандай кириб келсангиз. Тогдай ҳимоячумиз бўлиб, суюнчумиз бўлуб. Суянчиқсиз, ҳимоячисиз қолдиқ-ку биз, Султонмурод акажон.

Кечагида кичигойимнинг ёлгуз ўғиллари, Сизнинг пакана парийингиз, менинг вақт-бемаҳал ишионган ҳимоячум — қайнужоним Мақсудхўжамиз шаҳардаги ўқишиларудан оғруб келуб, роса қўрқитивордула, ўтакамиз ёрилуб, эсхонамиз чиқту. Кеч тушганда қайерга югуруб, кимга бораримизни-да, қай ердан табиб топаримизну билмай қолдук.

Тагинам-да, Оллоҳ ҳафиз: яхшиям Сиз бизникуга тушганда ўша Мирзабува қирқ кун мени ёнларуга олуб, Сизни қараган эканлар. Ўша бувадан эшишганларум фойда берду, асқотту.

Мияларину қаттиқ шамоллатуб, бошлируни-да кўтаролмай қолуб эдула. Кўзларину очмай алаҳлар эдуларки, қўрқупла кеттук. Бунақа маҳал бош оғруққа йалгуз даво — шакурлаб қайнавотқан сув била дока, чала сиқиб ўраб қўймоқ, деб эшиштуп эдум. Шуни босаверуб, сув-сув терлатаверуб, уч кун деганда бери қаратуб олубмиз. Кегин келган дўхтур ҳам Худо бир асрарту, ўзлариз зўр табиб экансиз, деп кетту.

Кичигойум бугун Оқтепа деган жойга, Ҳожи дўхтирга оборуб келдула. Кўп айтувли табиб

экан, Мақсұд-хұжсаны ўқишилардан озод этуб, қозоз ёзуб беруббду. Қайнум:

— Ву-үй, бир үйл ўқишидан қолуб кетаманму, — деган эканлар, кичигойим:

— Бир үйл сандан айлансын, мен ўнта болани ерга бериб-бериб, сени топганман. Мани десанг — бормайсан, — деб туриб олдила.

Кишидан чиқдик деганимизда сүйган укайиз шунақа хасталук — мия оғруққа учраб ўтируббула. Оллох шифосини берсіну чаккаларида оғриқ туриб, юзлари бўзаруб кела боиласа қўрқиб-ла кетавурамиз. Қўлимиздан ҳеч нима келмасини ўйлаб, ичларум эзилуб кетавураду нега Мирзабувадан ижсикилаб сўраб олмаганумга, ҳаммасину билуб олмаганумга. Ҳазина топуб, тилла ўрага тушуб — ҳич нимасиз чиққанумга. Қадри ўтту табиб буванинг.

Бу кўргулуклар ҳам биз бечораларга ҳолва экан. Дўппи тепчишуб, кизак тикишуб юруб эдум. Қўклам келуб кичигойумни ғалвага қўйуб кетишди. Қаерданам келган эканман буларнукига. Мўндига ўхшамиш бир маймоқ адам отқа қийишук минун келуб қилду тўполонну, қилду тўполонну.

— Ўзиз далага чиқмаганиз-чиқмаган, кимни опкеб ўтирибсиз? Йо ишга чиқади, йо жўнаторасиз келган жойига! — деб туриб олса денг.

— Чиқсан чиқай, кичигойу, айтишиманг шуларминан, — дедум.

Қаёқда! Кичигойум бўши келмасдула:

— Сен атай келгансан. Султонмуродга ўчакишиб келгансан! Лекин билиб қўй, эрта-бириси кун ўзи келса, шундоқ қолдирмайди. Келиннимизга қилган зуғумларингни кечиrub кетади деб ўйлайсанми? Бурнингдан булоқ қилиб чиқаради ҳали. Бу оёққинангни ҳам соғ қўймайди. Ақлинг борида эсингни йиғ. Мен буни, биравнинг қизини яшириб ўтирганим йўқ. Ўз келинумдай гап. Унинг ўрнигаям ўзим чиқаман. Шунча үйл далага чиқиб ўлмаган жоним, энди ўлмас! — деб туриб олдила.

Зўр эканлар кичигойум, биравга ҳақлариниям, сўзлариниям бермасканлар.

Аммо мен унамадум.

— Ёши нарса мен ўтируб, Сиз чиқасизму, ҳич қачон, мени кет десангиз чиқасиз! — дедум.

Шу ўртада яна бир воқеа ўтти, уни ёзмасам ҳамма нарса Сизга тушунисиз қоладиму деб қўрқаман. Улар (кичигойум, қайнум) ўша Ҳожи дўхтурга кетишганича-кетишвотуб эду. Тушга яқин ташқарида бирав чақираду. Чиқсан, Саида қиз. Марғубангизнинг сингилчасу. Мунгайиб турибду.

— Вой, кесунла, оманмусиз-эсанмусиз, — деб учубла бордум.

Айлануб-ўргулсам-да, кишига унамасду.

— Кичигойумларму, кепқолишауду, Киринг, — дедум. Қайди.

— Бизга ўзиз кераксиз. Сизга келганмиз, — дейдию айтмолмайду гапини, ер сўзаду фақат.

Ортида ким боракан деб қарасам,вой ўлайки, ўша аскар акаси, номаҳрам одам. Чекинуб, титрабла кеттум. Нима деяримну билмасдум.

— Вой, сиз қўрқманг. Акамни икки оғиз гаплари бор экан. Йўқ деманг фақат, — деб мени қучоқлаб, юпатуб турупти қизгина.

Мен ортимга юрийвердим. Нуқул титраб-қақшайман. Иқбор атин — уларнинг оналари ўтгандан бери, ўзумну койиганим-койиган, нимагаям бордум, нимагаям кўриндум қизи сияқида деб. Мен сабабчи бўлуб қолдум деб. Ҳозир ҳам... Бўлмаса, нимага келаду?..

— Йўқ-йўқ, фақат бу ердамас, фақат бугунамас. Ҳозир ҳеч ким йўқ, эшииткан, кўрган нима дейду... — деб унамасдум.

Саидаси ортимдан қолмас, ялинуб-ёлворарду:

— Эшик ортидан бўлса-да, гаплашинг. Ўзиз икки оғиз бир нарса денг. Ўзиздан эшиитсинлар, опам ҳақда.

Ниману эшитаду, бўлган иш бўлуб ўтганда, бўёғи ўтганда?

Алоҳал қўймаду.

— Майлин, фақат тез кетасизлар. Бирав кўруб, мени уятга қолдирмайсизлар, — деб қайтдум.

Мен эшик ортида туриппан, титроқларум сўнмай, тирқишиданам кўринуб қолмайин деб. Қочубгина, ергами, деволгами сингуб кетгудек бўлуб, мушттек бўлуб. Бу аҳволумдан, ичкаруда — парда ортида гаплашганум афзалмиди деб. Нима керагакан у кишига? Ниману гаплашмоқчу?

Саида кўча эшикни қия очуб ўртада, останада турибду. Аскар акаси у томонда, энтикиб, пишиллашлари, бетоқат ютинишлари эшишиладу, холос. Мен бояқши, тирқишидан қорасуни кўруб-да, қўрқуб кетяпман, титроқ босуб, ичимдаги қушчалар (улар худди қамалуб қолишган!) потирлайдулар. Гапирса-гапирақолмайдуми, кетишиса кета қолмайдуми!

— У кишидан, ўз оғизларидан эшиштганум — Баҳридинга етказинглар деб буюрган эканлар, — дедум.

— Синглилизни Сиз кўрмаганмусиз? — деди у ҳайрон қолиб.

— Қайда, — дедум ўзим ҳам ўксинуб. — Фақат тарихларини эшиштум, холос.

— Ўзи-чи, ўзи қайдা эмиш ҳозир?

— Макка тарафларда деб айтишиду. Оллоҳ азиз қилган, пайғамбар ўтган юртларда эмишилар.

— Баҳридин... куёвимиз у ёқларга қандай бориб қолибди? Қандай ўта олибди, ҳамма қирғин-барот, ўлим майдонларида жон олиб жон бериб юрган бир пайтда? Қочган эканми? — деди у аллақандай асабийлашуб, ҳам жаҳли қўзий бошлаб.

— Мен билмасам, — дедим, лекин беҳуда газабалаётганларину эслатуб қўйгим келди, — Лекин Сиз тушиунинг. Ҳар нарса Оллоҳдан. Ўша азиз юртда топиштирмоқчи экан, топиштирубди, никоҳларидаги кишига қўшибту, суюнмак керак. Дадамизнинг суюниб бир ерга етганларину Сиз билмайсиз. Нима деганларину эшиштмагансиз...

— Нима деб... эдилар? — у шахтидан тушиб, жисм қолду.

— У диёрларга ким етди, ким етолмай кетти. Мўминларнинг Маккаси, Каъбасида топишибдими? Одам Атомиз жуфти ҳалолларини топган жойларда-я, Арафоту Муздалифаларда-я? Қандай баҳтли никоҳ бўпту. Қанглиниг Яккабогида бошланиб, пайғамбар юртида кўриштирса! Ла илаҳа иллаллоҳ! Чиндан ўзи Хува ъалло кулли шайин қодирдор! деб эдилар. Сиз суюнинг, — дедим мен.

У жисм қолган, эшик кесакисуни қучиб олган синглиси кўзларину билагига босиб, ҳиқ-ҳиқ ииғлар, мен уни юпатгим келару, яқинлашолмасдум. Номаҳрам кишига кўринуб қолишидан қўрқиб қимирлолмасдум.

— Мени ишонтиридингиз, раҳмат, — деди у бир маҳал чукур тин олиб. — Кўнглим тинч топди синглиминг тақдиридан. Мен қўрқкан нарса рўй бермапти, шунгаям шукр. Энди айбга буюрмасангиз, унга бу яхшиликни раво кўрган одам ҳақда — Султонмурод ҳақда сўрасам. У қаерда? Кўрса бўладими ўзини?

Мен ҳаммасидан ҳам шундан қўрқуб эдум. Ўша кунги янишларину эшиштуб, товонумдан сочумнинг таг-ларига довур бир титроқ кируб эду. «Икки қўлим у дунё — бу дунё ёқасида!» деган сўзлари... қулоқларум тагида жсангиллар эду! Ҳозир нима, авравотирму?

Ростига кўчдим:

— У киши... ўтсалароқ келар эдилар. Дараклари йўқ.

Саида қизнинг акаси ҳайронланиб, жисм қолди.

— Қизиқ, у гаплар-чи, дараги йўқ бўлса, қаердан чиқибди? — деди синглисигаму, менгаму.

— Қайсу, қандай гаплар? — дедим мен хавотирга тушиб ҳам ичим сидирилуб.

— Ҳали... бехабармисиз, эшиштмадингизларми?

Мени баттар титроқ босду:

— Нимадан, нима бўпту?

— Ахир ҳаммаёқда дув-дув гап-ку.

— Нима деб?.. — дея олдим нафасум ичимга тушуб.

— У қайтиб келганмиш-ку, зўрларнинг адабини бераётганиши-ку, ахир. Мен киргандир деб эдим.

Ичимда: қанийди, қанийди! Эй, худо, қанийди келган бўлсалар!.. девотибман-ку, ташимда товшим чиқмайду.

— Кирмадулар, келсалароқ кирап эдулар. Бошқа биравдир.

— Алҳазар, унда ким унинг номидан иши кўришига журъат этади?! Йўқ, Сиз кутинг. У кирмаса ҳам хабар бериб қолади. Албатта, хабар беради. Негаки, одамлар бу унинг иши, Султонмуроднинг иши дейшишмоқда.

Мени ўз-ўзидан ииғу босиб келяпти, назарумда ҳаммаёқ чарогон бўлиб, ич-ичимдан офтоб чиқиб келяптиму, бу севинч ёшлариму ажратолмийман, тавба. Келган бўлсалар, нега кирмайдилар? Хаёлларга банди бўлиб, бир дақиқа Саидани ҳам, акасини ҳам унугибман. Унинг овозидан чўчиб, ўзимга келдум.

— Келин, Сиздан илтимос, ундан хабар бўлиб қолса, менинг омонат гапимни етказсангиз. Сизнинг товкангизга қўшилишига ҳамиша шай бир одам боракан, деб айтинг. Ким деб сўраса, ўша жафокаси Марғубанинг акаси денг. У узулган никоҳ ришталарини қайта улагани ҳаққи-хурмати, бизнинг авлод устидан бир умр-лик тавқи лаънат тамгасини олиб ташлатгани учун умрбод қарздормиз ундан. Шундай деб айтинг, келин. Қачон менинг ёрдамим керак бўлса, мана, Саида бор, бир оғиз имдод бердирсангиз кифоя. Айтган заҳотингиз етиб келгайман. Хайр, омон бўлинг, ўша мард биродаримизга салом айтинг.

Мана шундан кейин халоватум йўқолду. Тиқ этса, юрагим ўйнаб, эшикка қарайман. Сиз кируб келяпсизму, деб. Кичигойумларга айтмай, косада емаклар оп-қўйиб кутаман. Вақт-бемаҳал келуб қолсайиз деб. Кечалари уйқум қочуб, кўзларим тўрт бўлуб, ўтирганим-ўтирган. Ҳақ деб. Баъзан туруб-да таҳажжусуд намозлар ўқуб, Оллоҳимдан сўрайман. Йиғлаб-йиғлаб ўзига илтижолар этаман. Соғ-омон кўрсат шиқилиб деб... Аммо Оллоҳ синаваттиму, синаб қийнаваттиму ёлгиз Ўзига аён.

\* \* \*

Саида шу ерга келганда жимиб қолди. У дафтарнинг дам у варафини, дам бу варафини ўқиб кўрар, келган жойини топиб, улаб кетолмасди.

— Ҳа, аяси, нима бўпти, нимасини тополмаяпсиз? — дедим ичим ғурмишлаб.

— Шу ерда узилиб қоляпти, давоми қайси дафтарда бўлса экан? — деди у ҳамон излаганини тополмай.

— Акамга тегишли жойини изланг, ўшани сўраятувди-ку, — дедим мен. Бунга сари ичим тошиб боряпти: «Демак, ўша гаплар чин эканми? Султон акам келгани-я?», деган хаёлларгача бормоқдаман.

— Ҳа, мана экан-ку, — деди Саида ва ютақиб яна ўқий кетди:

«Узр, Султонмурод ака, ўзимуз билан ўзимуз андармон бўлуб, хатга ҳам қўлум бормай қолуб эди. Ўрта токчану тагида бир ёруқ бор эду. Пахсани ёруғи десам, ичи қачонги қовоқару ину экан — ўшатга тушуб кетубти. Ололмай юруб, бошлолмай юруб, ҳийла вақт ўтуб кетубти. Бу ёгу қиши чиқуб баҳор бошлануб кетуб эду. Бошқа дафтар топуб, Мақсудхўжанинг дафтарларидан эскусини олуб (у кишину ўқишидан озод этишиду. Худо бир қайтаруб берду. Иззада сигир бокуб юрубдилар) ўшанга ёза қолдум давомину.

Сиз келгандан кейин (тавба, ҳалига довур ишонмайман: ростдан келуб эдунгизми? Ўша кечаги одам сизму эдунгиз?) анча хотиржам тортуб қолуб эдум. Лекин кейин...»

— И-и, шошманг, шу ерини қайтариб ўқинг. Кимни айтяпти? Ким келгандан кейин дейди? — деб ҳовлиқдим мен. Азбаройи ўрнимдан туриб кетишига етган эдим.

Саида қайтариб ўқиб кўриб, бошини кўтарди:

—... Сиз деяпти-ку, демак, акангиз бўлади-да. Бош-қа бирорга ёзмаяпти-ку, хатни.

Мен ҳайрон-хайрон қолган эдим:

— Унда... унда нимага бизга миқ этмабди? Бўлиши мумкинмас.

— Аёл киши... ҳар нарсани ҳар кимга айтавермайди, адаси, — деди хотиним.

— Балким, — дедим ҳеч ўзимга келолмай. Ахир, кимсан Султонмурод акам келади-ю, биз билмай қолсак! Алам қилмайдими? Келганда ҳам бир марта келмагандур-ку. — Унда... унда ўша келганини эмас, нега бошқа нарсани ёзяпти? — дедим дабдурустдан.

— Сиз эшитинг аввал, униси ҳам чиқар, — деди хотиним жилмайиб, сўнг келган жойидан ўқишида давом этди.

«Лекин кейун, қайтам бир ишлар бўлуб кетту — эсласам, хўрлигим тутиб келавурад. Сиз бўлсангиз тегинишолмасду. Уч кунлаб уйдан чиқолмай, ўтирудум қамалуб олуб. Ер йорилмаду ерга кириб кетсан! Жувон ўлгур ўша қора мўнди — маймоқнинг жияну экан! Мен уну қиз бола десам — қандай бало экан, эрдай, эркакдай ёпишаду одамга!), ўша ўлгур қучоқлаб олуб, қўйивормайду. Ўпавериб тишлаб ташлапту, ҳамма ёгумни моматалоқ қилуб-кўкартуб ташлапту. Қиз десам, эр кишидан бадтар экан. Ҳирсину қаранг, уятсизну! Техиму менман шундай қўришиб турасан, тогамга тушсанг, у сўратватти дейду. Курибла кетгур.

Энду ўлсамам чиқмийман ишларига. Курибла кетсин даласиям, ўзиям! Аёл бўлуб аёл эмас, эр бўлуб эр тугилмаган, у уятсиз! Айтишга-да оғиз бормайду, ёзишга-да қогоз куйгай! Худо нима учун яратмиш экан бундай аёлну, билмадум. Тезроқ келинг, Султонмурод ака! Сиз бўлсангиз — мундай хўрлай олмасдулар, тегинолмасдулар. Кимларга ишонуб, жўнатуб эдингиз менгинану?

Бу уйдан бир ёқларга кетсан-да, даласига чиқмасман, ишлару қурсин, бету қурсин! Эшиятсизму, Султонмурод ака, бу ёқларда шунчалар айнишубду, ҳатто кичигойумдан қўрқмайин, Сиздан қўрқмайин шундай қилишиса! Тағинам Худо осмондан бало юбормайду устиларига!

Султонмурод акажон, бу ёқни одамлару ҳам айнушига, ёмон айнушига бошлабдулар! Каломуллоҳну унутганмулар, билмайдулармуки, айнусалар балону кутаверсинглар, қўрқмасмулар — худонинг қаҳрудан?! (Эслаб қолунг. Қумруниса эду, аёл бўлуб аёл эмас, у яшишамагур)...

Эвоҳ, шу балоликларга чидолмаган эканми, кеннойим? Биз қаёқча бош олиб кетдилар, деб юрибмиз?! Мен аламангиз ҳолда муштимни тишлаб қолган, ўша дамларда унга бир ҳимоячи бўла олмаганимдан ерга киргудек бир ҳолга тушиб борар эдим.

(Аллоҳнинг мадади ила асарнинг бу қисми ҳам ниҳоясига етди. Навбат — «Жазо, рижо ва ҳидоят» қисмига.)

## У ч и н ч и б ў л и м

### ЖАЗО, РИЖО ВА ҲИДОЯТ

#### 1. АЖИБ САОДАТ

ёхуд

#### БИР КЕЧАЛИК МЕҲМОН

**Махфуз хатлар давомига.**

**Жиндек қиссагўй изоҳи ила.**

Қай вақт бўлиб кетган эди, билмайман. Алламаҳалда ишдан келиб, диванда хаёлпаришон ўтириб эдим. Кейин секин узаниб, ёнбошлаганим эсимда. Шу ҳолда ширин бир туйғу қамраб келиб, парку қанотларига индириди аллалай бошлади. Афтидан, уйқу элитиб, кўзим илинганди шекилли, ажойиб туш кўра бошладим. Бунақаси илгари, болалик кезларим содир бўларди: кўзимни юмардиму ажабтовур — худди эртакнамо тушлар кўра бошлардим. Ҳозир ҳам ўшандай тиникдан тиник, сирлидан сирли, аммо қай бир ерлари ўзимга таниш диёрда кезиб юрасиб эдим. Чор тараф, бутун атроф-жавониб оппоқ ойдинмиш-да, ўзим эски уйларимиз томонда юрганмишман. Ойнинг ердаги олачалпоқ нурларидан маълумки, эшигимизнинг рўпарасидаги анҳор бўйида, ёнгоқзорда туриб, ой нурига чўмиб ётган тупроқ томли уйларимиздан, ишкомли боғларимиздан кўз узолмайман. Улар бағазларни аллатовур бир кумушрангга бўяб-жилвалантириб, лойсувоқ томларимизга оқ жужун матоли ярқироқ бир нарсалар ёйиб, тарновларни девор сархокларини қиров кўнгандай оқартириб-ярқиратиб, ерга, бўғотлар остига ажабтовур ўсма-соялар тортиб, бутун ҳовлимизни сир-синоатларга кўмиб ташланганки, у ҳов бир вақтлар — акам Бўзсув бўйларини қароргоҳ тутиб юрган кезлардагига ўхшаб кетганди. Мен уни соғинган кезларим, ярим кечалари туриб, ана шундай анҳор бўйларига чиқиб олар, йўлларини пойлаб ўтириб қолар эдим. Назаримда, тоғамгиларнинг ҳов муюлишидан мана ҳозир сўлигини шўлқиллатиб, бир оту отлиқ чиқиб келаётгандек бўлаверар эди...

Ҳозир эса (тушга ҳеч тараф йўқ) ичкаридаги зинамизда ёлғиздан ёлғиз, аллақачон азим ёнфоқлардан ошиб ўтиб, бир кенгликка чиқиб олган ва ҳамма ёққа беармон ёғду сочиб ётган тўлиндан тўлин ойга, унинг гоҳ думалоқ кўзгудек, гоҳ осмоннинг у ёғига очилган оқ бир даричадек кўринишига маҳлиё бўлиб ўтиарканман, унинг сатҳи-кўзгусида кўринаётган бир нарсалар хаёлимни ўғирлаган эди. Чиндан ҳам осмонда сузиб юрган тўлин ой — ой эмас, афсонавий бир оина ёхуд Жамшиднинг оппоқ жомию унинг юзида шу вақт-шу соатнинг ўзида қай бир ерда кечиб турган воқеа(!) аксланиб турган каби эди.

Ой юзига яхшилаб тикилган киши уни кўрмай иложи йўқ эди!

Ана, Ойнинг сутга чайилгандай тип-тиник юзи — сатҳида бизнинг Тегирмондан то Кўшилишга қадар чўзилган Иззаю унинг икки беткайига ястанган ерлар худди очиқ улуғ китобнинг икки бетига ўхшаб, аллақандай кумушранг нукра сепилгандай ярқирааб кўринардилар. Унданам ажабланарли жойи ўша сувратда иззалик — сойлик, яъниким улуғ китобнинг ўрта-си Ойни қоқ иккига бўлиб турибди. Гўё ойим бир вақт айтганлариdek, яъниким у пайғамбаримиз замонларидан қолган эмиш. У кишидан мўъжиза кўрсатишни сўрашганида Ойни қоқ иккига бўлиб юборган эканлар. Бу доғ — у қора чизиқ ўшандан қолганмиш.

Ҳозир эса худди ўша чизиқ ёқалаб гўё бир отлиқ қир ошиб-ошиқиб келар, бу нимадан белги — ақлим етмас, етмаса-да, бу гўзал кечанинг сирли оиласида аксланган нарсага сехрланиб

қолгандим.

У нима, чиндан тушми ё ўнг? Туш бўлса, бунчалар аниқ-таниқ? Ўнгим десам, нега сархушман? Гўё ақлим тўнгиб қолгандай, қаердалигимни тўла англай олма-ётирман?

Ундай десам, нега юрагим аллақандай ҳаприқиб бор-япти, гўё ичимга бир гала қуш қамалиб қолгандек? Улар гурра-гурра учиб кўтаришганлари сари нимадир бўғзимга тиқилиб-тиқилиб келади! Шу билан бир вақт-да мен турган зинанинг ўнг ёғидаги ярим очиқ деразанинг ортидан (катта уйда шекилли) бирор, нега бирор бўлсин, аёл киши пиқ-пиқ йифлаб, кўрпаними, нимани устига тортиб, хўрлигини ютишга уринади, ҳиқиллайди. Аммо овози ё қудратингдан, шунчалар танишки... отини атаб чақиргудекман. Кенномай, деворгудекман...

Ўйғониб кетиб, ёнбошлаган жойимдан қаддимни кўтарсан, хонтахтанинг у бошида бирор шишиасига қофоз кийдирилган лампачироқ ёруғида ҳиқ-ҳиқ йифлаб ўтирибди. Тиззасида ўша унниқкан сариқ дафтар, дам-бадам бурнини тортиб, кўзёшларини артиб қўяди. Қора дуҳоба нимчасидан танидим. Хотиним. Мени ухлатиб қўйиб, ўзи давомини ўқиётган эканми?

— Саида, ўзизми? — дедим ҳайратланиб, — ўқирканси, уйғотмайсизми?

— Бирпас мизғий қолинг, деб ўқий қолсан... бунақа экан.

— Қанақа?..

Саида ичдан чуқур тин олди:

— Аёл кишини нуқул мусибатга яратган экан: бечора кенномингиз!..

— Нима бўлган экан? — дедим юрагим тошиб келиб. Энди туриб ўтириб олган эдим.

— Ўқий қолайми? — деди у.

— Майли, ўқинг, — дедим интиқиб.

У бошлади.

«...Кичигойумлар вақт алламаҳал бўп кетибди деб ичкару уйга киритиб юборган эдилар, шу кўлимдагуни тепчуб қўяй деб ўтириб қолубман.

*Бир маҳал лампачироқ ўз-ўзидан ёришиб кетиб, олов тили ичига тушиб бора бошлидади. Нима бўлту, деб пилигини кўтаруб кўрдум, қирқиб кўрдум — қани жсо-йига келса. Мойи тугаб битган экан, ахийри ўчду-қолду. На иложе, шашепчларимни токчага олиб қўйиб, ўгирилсан денг... деразадан шундай бир нур тўкилуб турибди! Шунақа оппоқ, шунақа шаффофки, ўн тўрт кунлук ойнинг ҳам энг ярим кечадагиси, энг тиккага келгану. Уйқуларим ҳам қочуб, ёши боладай дераза тагига келволибман.*

Чинданам ташқару сутдай ойдин эду. Ҳовлуда игна тушса кўринар, ишкомлар ҳарир говрапўши ёпулган бешиклардай нурга белануб ётар, боғдаги дараҳтлар қийгос гуллаб юборганга ўхшардулар.

Юлдузлари хира тортиб кетган кўк тоқида эса ёлғуз ой янги тушган келинчакдек жилмайиб турар, унинг юзуга қараб тўйуб бўлмасди. Гўё чирогингни мойи тугамаса — қарамайсанми, ўтири бирпас, ҳолу қолайлук, дардлашайлук, демоқчи бўладу. Гиналар қилиб, жилмаяду. Имолар қиласи ҳам ўзига ярашган.

Тавба, бу не ҳол? Ҳеч маҳал ой ҳам ишвалар қиласиду одамга? Турланиб-тусланадиму? Ҳозиргуна чимилдиқдан чиқкан келинчакдек иболу-иболу боқмоқда эду. Энди ўша келинчакнинг кунгира кўзгусига айлануб қопту. Унинг ичиди бўлса, аломат-аломат нарсалар ой нурига чўмуб ётубдулар. У кумуш далалар, сойлар нимаси биландур жуда таниши. Қолаверса, бир отлук ўша сой ёқалаб, илдамлаб келаётгандек. Тавба, бу қанақаси? Ой ҳам ҳеч маҳал кўзгуга айланадими? Ердаги нарсаларни акслантирадиму?

Манум эсум оғуб боряпту. Гўё жинми, фаришталар ақлумни олиб қўйгандеклар. Аммо ажабтовор нарсалардан (ой бўлиб ой эмас, кўзгу бўлиб кўзгу, тавба) кўзимни узолмайман. Унда кўринган нарсага сеҳрлануб қолубман...»

— Шошманг-шошманг, — мен қулоқларимга ишонмай у ўқиётган нарсанинг устига

кафтимни ташладим.— Нима дейди? Нима кўринди дейдилар?

Саида чўчиб тушган эди:

— Ўзизми, адаси? Нимаси тушунарсиз?

— Отлук кўринди дейдиларму? — Мен ҳайратимни яшиrolмасдим.

— Шунақа ёзибдилар, нимасига... ишонмайсиз?

— Биласизми, ўша отлук, ўша ойда кўринган нарсалар, менинг тушимга кириб юрибди. Хали-ҳозир, энди эса, сиз ўқиб турибсиз.

— Субҳоналлох, — деди Саида ва кўксига туф-туфлади. — Шунақаси ҳам... бўлади эканми?

— Бўлар экан-ку, ўқийверинг-чи, — дедим давомига интиқиб.

Саида кимга ишонарини билмай, дафтарни ўзига яқинроқ сурди.

«...Хаёлумда ўзиз. Чегарадан ўтолмай қаёқларда қолдиз экан? Тангритогда инқилоб бўғилган, сарбони ўғурлаб кетилиб, лашкар тарқатуб юборилган, ҳалқ етум бўтадай бўзлаб қолган бўлса. Ботурлар тозларга тўзиб, ҳар ким ўз жонину асрашга тушган бўлса. Сиз мусофирилар қайга бош уриб бордингиз, қай диёrlарни ошиён тутдингиз экан?

Озодлик нашъу намоси шунчалар қисқа, Оллоҳимнинг инояти муваққат эканмики, Тангритог томонлардан хабар келмайин қўйди. Қочган қочди, тўзган тўзди, ҳатто Сиз Ботурлардан бир мужда йўқ. Қай ўнгир, қай қояларда, қай довон, қай қўл етмас музликларда қолдиз экан? Ё ҳали озод бўлмаган вилоятларда юрибсизларму? Нега бирон хабар йўқ, мужда юбормассиз? Ахир шу умидда бу диёrlарга жўнатубму эдунгиз? Ризолук берган, Оллоҳининг омонатини то абад сақлагайман деб, аҳлу аёлумни, шариатумни ҳар нарсадан устун тутгайман деб онтлар ичган ким эду? Қайларда қолдиз, Ботурмуродум? Мен истамасман сиз қасамхўр бўлиб қолувингизни. Оллоҳимнинг олдида гуноҳкор бўлиб турувингизни.

Ана шу топда, Ой нури узала тушган ўрnumга ўтириб улгурмаб эдумки, дераза чертилуб, қия очилган тавақасидан Ойнинг ўзи кириб-ла келмоққа бошладу. Ё Аришул азим, бу неси? Шу мўралаб турган Ойнинг-да ишиму, бошқанинг?

Нафасум ичимга тушуб қалтираблар кеттум!.. Не ҳол юз бермоқда, англаб олмоққа ожуз эдум. Жонум, унга қўшилиб жон қушум бўғезумда турар эду. Қўрқиб кетганум шунчалик!..

Шунда... деразанинг иккинчи тавақаси-да очилуб, мен согинган, орзуқиб кутган кимсанинг ўзи кўринуб (азбаройи Худо, ҳалиги қўрқув, титроқ қаёққа кетту?) юракум дукурлаб берса денг — бўғезумга иссиқ бир нарса тиқилуп, кўзларимга аччиқ ёши қўйилуб келибду. Ўзум «у киши, у киши-ку!» дейман-у, сира овоз битмайду.

Ниҳоят, Сиз-ўзиз:

— Маҳфуз, мен келдум. Онтимни устидан чиққали келдум, — дедингизу бир ҳатлаб деразадан ошууб ўта қолдингиз.

Оймўмада юрган отлиқ, кўзгуда кўринган киши — ўзингиз кириб келган эдингиз!

Ё, Қодир Оллоҳ! Ўзинг меҳрибонларнинг меҳрибонисан. Карамингга ҳам, синовларингга ҳам тараф йўқ! Бояги белгулар чин экан. Чин чиқди, эй Оллоҳим! Бу ҳам бўлса, сенинг инояting, карамингдир. Мен Оллоҳ етказган кишиимнинг қучогида ўзимни унутуб, йўқотуб йиғлардум. Шунча сабрларумнинг мевасига етишиуб турардум.

Қачон дераза тавақаларину ёпуб қўйдук, мен мусофиригинанинг юпқа ўрнуда қанча сўйлашуб-гиналашиб ўтирудук, аразларимузни тўқишидук, таскинлар олдук, билмайман, кейин шунча жудоликдан сўнг топишган шаръян никоҳдаги кишиларга пайғамбаримиз буюрганлариdek қанча суҳбат қурдик, ёлгиз Ой гувоҳ эду. кейин у ҳам ҳаё қилиб, мағрибгами — қаёққа оғуб кетди, мўраламай қўйди. Фақат аёқ тамонумизда, деразанинг таккинасида намат устида қизил тулки терусидай бир нарса чўзала тушган эду, холос.

Кейин билсам, бизнинг ишумиздан хижсолатларга тушуб, аллақандай қизаруб ботаётган ой экан. Ўзи учрашитируб, ўзу хижсолатларга тушса-я...

Уни кўриб, Сиз шошиб қолдингиз.

— Сувингни олиб кела қол, вақтим битибди, — деб шивирлардунгиз.

Бу гапдан менинг хушум огаёзди:

— Қанақа вақт, Султонмурод ака? Қаёққа боргайсиз эндијам?

— Ака демагил, бундай буюршмаган, — дедингиз Сиз ирим қилиб. — Яхши ният қил, адаси, адажониси демоқ лозим, — деб шивирладунгиз қулогимга. Мену юпатармудингиз, аврармудингиз — билолмасдум. Лекин гаплариз мойдек ёқиб тушимоқдайди.

Бўйнунгизга осилуб эркаландум:

— Қаён боргайсиз, қўйуб юбормасман бу гал. Эндијам алдаб кетолмассиз. Айтасиз, қанақа вақт?

— Мұхлатим битадур, Маҳфуз, тушиун, — дедиз соchlарумни силаб.

— Қанақа мұхлат? Ким қўядур уну? Кўруб-билиб туриб?.. — Мен хўрлигум тутуб ииғеламоққа бошладум. Бўйнунгизга баттарроқ осилуб олганмидум, юзларимни қўксингизга босуб қўйвормасмидум Сизну — ўзум билмасдум.

Шунда қулогимга иссиқ нафасингиз урулиб, шивирладунгиз:

— Ҳой, Маҳфуз — аяси, шундай туравергаймизми, фаришталардан уялмай? Тонг отиб боряпти.

Кўлларим ўз-ўзидан бўшашибулар. Сиз ҳақ эдунгиз. Бу туришимиз Оллоҳга ҳам хуши келмас эдую...

— Мен ҳозир. Фақат Сиз миқ этмай тургайсиз. Хўп, — дедим-да, деразадан енгил тушиуб, оёқ учуда оишонага юриндум. Сув чеълак, тогоралар ўша ёқдайди...

Ювинуб-тарангунимизча Ой ҳам бўзариг бозг пастидаги катта тут ортига ўтуб турди. Олди хўрзлар қичқуруб, чақирмоққа бошладулар. Анҳор ёқалаб кетган қўчамуздан олди бозорчи араванинг қитирлаб ўтувига оз қолмоқдайди. Кўк тоқидан юмалаб бориб ҳалиги тут тагида кўрининган Ой томлару фақат дараҳт тепаларига ўз укпарларини қадар, ҳали кўринмай турган юлдузлар энди бараварига чарақлаб, кўпайишиб кетган эдулар. Балки менинг ўзумга шундай кўринмоқдадур, туюлмоқдадур. Сиз борлигингизданму, негадур қушдай енгилман. Атрофингизда учуб-қўнуб, гиргиттон бўлиб-да юрибман. Агар кетадургон бўлсангизам ортингиздан қолмасам керак. Фариштадай учуб кетсам-да мумкун. Бу ерда қолмаслигинги зиҳони ҳеч-ҳеч тушиуномайман. Тушунгим-да келмайди. Ахир қанча вақтда — энди етишдум. Етишганда айрилиш...

— Энди менга жавоб берасан, Маҳфуз. Шошмасам бўлмайди, шерикларимни ортиқ куттирилмайман хатарга қолдириб. Тушун, — дедиз.

Қани тилим айланса, термуламан, холос. Бўй-бастларингизни кўз қорачиқларимга муҳр-лаб-жойлаб олмоқчи бўламан. Тикиламану миқ этолмайман. Ич-ичимдан бир нималар тошиб келутти, биламан, түгён, аччиқ тақдиримизга қарши исён, лекин бу ёзугимиз Оллоҳдан экануни, бу бизга синов экануни англаб турганум учун ҳам унга шак келтируб қўйушдан ўзумни тиймоқдаман. Лабларимни маҳкам қимтиб олганман, тишлаб олганман. Ўкраб юборишга қўйма-ётурман. Агар бир оғиз юпатишга бошласангизму қутулолмасдингиз, мени йигидан тўхтатолмасдингиз.

Шу тоб қўчамуздан гирчиллаб биринчи бозорчи арава ўта бошладиу бедапоя томонда аллақандай сергак от уни сезиб, кишинаб юборду. Ва сиз шошилишга тушдингиз:

— Фақат сендан илтимос, мен келганимни ичингга ютасан. Хўп?!

— Хўп, — дедим мен йигимни-да, ичимга ютуб.

— Холамгиларга-да, айтмагайсан. Тушундинг?

— Тушун-дум, — деб бош силкиган эдум, кўз ёшларум билагумга дув тўкилдулар.

— Бизни эсон-омон етиб олсин дессанг — ичингга ютасан, кейин ииғлаб эмас, қулиб кузат мени. Қайтишиум осон бўлгай, — дедиз қулогимга шивирлаб. Елкамдан қучганча дераза олдига

қадар бағрингизда олиб бордингиз. Ўзингиз шошиб турибсиз-у, яна бир нималарну тайинламоқчи бўласиз.

— Эшишдинг-а, бу диёрларга қайтишишни истасанг, йиғламай кузатасан. Бўзламайсан фақат. — кейун шошиб тайинлай бошлидингиз. — Узоқни иши қи-йин, агар бир гап бўлиб, узоқиб кетсан, қийналиб кетсанг, эслаб қол, бу диёрларда ёлғиз қиёматли бир дўстим бор. Ўшани топиб бор. Хасти Имомдан ўтганда Калковуз суви бор. Ўша тарафдан сўроқлайсан. «Ойтўра бувининг ўғли Чаман аканики қайда?» дегайсан, кўрсатиб беришади. Оғир кунга қолсанг, ўшани топ.— Сиз шошганданму, менинг йиғлаб бериб, ҳамману уйғотуб юборарумдан кўрққанданму, деразага оёқ қўйиб олгандингиз. Бир ҳатлаша ҳовлига тушиб олгудек эдунгиз.

Мен эсам, Сизнинг ўз диёрингиздан бундай ўғрунча чиқиб борувингизни истамасдум. Ботурларнинг аёлудай отингизни ёнуда узангунгизни ушлаб, кузатуб борарумни, буни бутун Каттабоз, барча-барча қариндошлигиниз кўриб турувини истардум. Аммо на қилай, ихтиёр менда эмасду, Худонинг хоҳлаши шундай бўлмоқдайди, чидардум.

Сиз ҳовлига енгил сакрамоққа шайланган кезда бир нимани эслаб, енгил қайрилдингиз:

— Ҳа, дарвоқе. Оллоҳ бугунги кечамизни хуши кўриб, илтижоларимизни эшишиб, ўғилми-нима ато этган бўлса... отини ўзинг билиб, Ёдгормурод қўйгайсан.

— Султонмурод ака, нега ундаи демоқдасиз? — дедим ўқраб юборишдан ўзумни зўрга тийиб. — Ҳали-вери...

Қани у ёгини айта олсам, сўрай олсам. Оловдай куйдирмоқлайди у сўз юрак-базумни. Айтаман десамам айта олмасдум.

— Билмадум, Маҳфуз. Ҳаммаси Оллоҳдан. У дилимга солди — айтдим, қолганини ҳам ўзи ўнглагай истаса. Сен дуодан қолма.

— Қолмагайман, қолмагайман... Яхии боринг фақат.

— Яхии қол, — дедизу мен Сизни ўйқотуб, ҳувиллаганча қолавердум. Энди ўзумни қаргайманки, у ёғи йўқ: топганумда нега қўйиб юбордум, деб!

Нега ўқраб йиғлаб, кичигойимгиларни ѫаммани уйғотиб юбормадум!

Нега жисла қурса, иншиаллоҳ демадум!

Шундай десам, бу кунларга, бу маломатларга қолмасмидум. Ҳамма келадигани ортда экан. Сиз кетдизу мен ҳеч ерга сиғмай қолдум.

Икки ойгина яйраб юрганларум, ўша кечани эслаб бир ерга етганларум ҳаммаси бурнумдан булоқ бўлиб чиқа бошлиду. Касални яширсанг, исистмаси ошкор қилганидай, Сизнинг у ташрифингизни бўйимда бўл-ган нарса ошкор этиб борарду. Уни сириб ҳам, ҳалфиллаган кенг кўйлаклар кийибам яширолмасдум. Зингилли кўзлар, синовчан нигоҳлардан қочуб қутулолмасдум.

Ахийри остона ҳатлаб чиқолмай қолдум, Каттабоғга гап тарқаб кетупти: анув кўҳлик келин бўйида бўп қопти, деб! Қани, тушунтириб бўлса Сиз келганингизни... бу ишлар шаръян эканини. Ҳатто кичиг-ойумларга айтмагандум, энди қандай оғиз очаман? Қолаверса, Сизга ваъдам бор, берган сўзим бор. Энди қайси тил билан очаман у ташрифингизни? Нега бу ёгини ўйламаган эканмуз?

Бошимга қопму — нима кийдирилган одамга ўхшайман. Дунё шунчалар зими斯顿, эртам шунчалар қорон-гу. Оллоҳ ўзи йўл кўрсатмаса, билмам, ундан қандай қутуларман? Нажот кўринмайду ҳеч. Ё ўзингиз келиб қутқариб қоласиз, ё нолам Оллоҳга етуб, Ўзи кушийиши бергай — бошиқа йўл йўқ!

Фақат эсумни еб қўйиб, Оллоҳ изн бермаган ишларга қўл уриб, раҳмимда кўтариб юрганум — Ёдгормуродингизнинг онасимас, қотиласи бўлиб қолувимдан кўрқаман. Кейин нима қиламан? Оллоҳнинг қошида нима деб жавоб бергайман?! Унинг қошида хижолат бўлгандан бу дунёнинг ҳар нечук азоблари афзал! Шу андиишами — нима, мену бу дунёда тутиб турибду, ушлаб турибду. Қолган барчаси — кечиб юборгулик! У маломатлар олдида ўтиб юборгулик! Бу ёгу

нимадан бўладу, билмайман. Мисоли улкан чоҳ — сўнгсиз қоронгулик бир жар рўпарасидаман. Мени унинг ёқасидан ким ҳам қутқаргай? Кимга оғиз оча олгайман? Ахир, ўзингиз тайинлагансиз. Йўл кўрсатинг, бир имдод беринг, Султонмурод ака? Маҳфузам омон бўлсун, Ёдгормуродим тирик қолсун десангиз — жисла қурса, Оллоҳга илтижолар этинг. Ўзи йўл кўрсатсун, кушийиши берсун. Боши-қа кимдан мадад тилай?! Излай, қидирай?..

Эй, Парвардигорим! Ўзингга иймон келтирганман. Ўзинг ёрлача ва бир йўл кўрсатгил. Ўзинг сабру жамиил ато эт ё шу мусулмонлик ҳолумда бу омонатингни ол. Ўзинг қўлла»...

\* \* \*

Эндиам ишонмайинми, Султонмурод аканг кепти, деган гапларга? У тушларимгача бундайин кириб юрса?

... У нимадан белги, имдод беряпти? Энди қайтишиданми? Қачон қайтади экан? Чаман акам биланми? Буни ҳам билмасдим...

Кутамиз, интиқиб-интиқиб кутаверамиз.

## 2 ИЛОН ҚАЧОН ПЎСТ ТАШЛАЙДИ ёхуд «ҚЎҚ ТЎНЛИ» НИМАДАН ОГОҲ ЭТМОҚЧИ? Яна ҳикоячига маълум тарихлар давомига.

Каттабоғимизда бошим бориб-оёғим келганча сандироқлаб юрган кезларим эди.

Мен сойма-сой кезиб, бедапояма-бедапоя ошиб, Эргаш чўлоққами, бошқагами тўр судрашиб юрсан ҳам, болалар билан кечгача Иззада қолиб кетиб, балиқ тутсам ҳам ҳеч ким ҳеч нарса демасди. Чунки биз — пакана пари Мақсадхўжа жанобларига Ҳожи дўхтирдан шунаقا рухсат теккан: тепаларда варрак учирив, кўзиқорин териб, Бўзсувларда ёввойи капитарларнинг потирлаб учишига маҳлиё бўлиб, жарма-жар, тепама-тепа ошиб, қамишзорлардан ўрдагу мошак-кушларни қувиб юриб, бош оғриғимни ўша жару журларга, қамишзорларга ташлаб келишим керак.

Лекин бугун уйда қолган, супамизнинг тепасидаги катта қари толга чиқволиб, тоққайчи билан истак тераётиб эдим. Гоҳо-гоҳо ёнгинамдаги қўшнининг деворидан ошиб ўтиб, қизил маржондек бўртиган ўрик шохларига, унинг энди, онда-сонда лаб очган оқ-пушти гуллари устида парвона бўлиб ғувиллаётган асал-ариларга маҳлиё бўлиб қоламан-да, яна истар-истамас истак теришга тушаман.

Бугун ойимлар билан токларни кўтариб боғламоқчимиз. Тол устига чиқиб ўтирмай Иззадан шунаقا ток боғлайдиган ўт (у ботқокда ўсади, совуқ ҳам урмайди, факат моллардан омон қолганми-йўқми?) ўшани ўриб келсам ҳам бўларди, эриндим. Тол хивич-истакда боғлашни ойим қотирадилар, баҳонада ўзим ҳам қараб туриб, ўрганиб оламан.

Қолаверса, тол очилиб қучини ходаларига берса, келаси йил ишкомга ҳам, бағазларга ҳам ярайди. Шу боис супа юзи тол чивикларга тўлиб кетган бўлса-да, мен тушишни ўйламай истак тераётиб эдим, шу вақт эшигимизга бир отлиқ келиб, эгардан туша бошлади. Мен унинг қизил шапкасини кўрганимдаёқ этим жимиirlаб, дамим ичимга тушиб кетди. Тол устига беркиниш мумкиндек, секин пусиб ўтириб қопман. Унинг юзи жуда таниш қўринар-у, эслай олмасдим. Милиса бекорга ташриф буюрмаслигини билсам-да, (балки билганим учундир!) хавотирга тушиб, ич-ичимдан қириндими — нима ўтиб борар, зўр бериб, «Нимага кепти экан, бу гўрсўхта?» деяр эдим.

Бу орада у отини деворга ёнбошлаб ўсган букри жийдамизга боғлаб, бу қишдан хийла тоб

ташлаб чиқсан якка тавақали эшигимизни итарди. Эшик чиндан анча оғирлашиб қолган шекилли, ғижирлаб зўрға очилди. Келган одам унга сиғмай яна итариб эди, эшик кесакисига қўшилиб, усти лопиллади. Бу ҳам етмагандек, шувиллаб сархоки тўкилган эди, у елкасини қисиб, ярим қадам чекинди ва оstonада туриб, зулфинни қоқди:

— Ҳой, ким бор? — Гўё қочадиган ҳеч ким йўқми дегандек у томоқ қириб, йўталиб қўйди.

Мен анг-танг қопман: милисанинг бунақасини энди қўриб турардим! Анув шаҳарликка ўхшатиб адашибман шекилли! Тавба, бировнинг ичкарисига кўз қирини ташлашдан тийилиб-тортинадиган одам... қандоқ бу фўрмани кийиб опти?

Аммо қай кўз билан кўрайки, у ижозатсиз остона ҳаттай олмай турар эди. Мен ўтирган еримдан қаддимни кўтариб, овоз беришга шайланган жойимда... отхона ортидаги жийда тагида ойимнинг қоралари кўринди. У киши пахсани бузиб опамларниги очилган йўлдан чиқиб келар эдилар.

— Ҳозир-ҳозир... — Ойим шундай деб овоз берганча, орқаларидағи Махфуз кенномимга «кетинг-кетинг»лаб жийда тагидан ҳовлига чиқиб келдилар.

Остонадаги одам ойимнинг қўл силкишлари ўрта йўлкадаги кенномимни кўрдими-йўқми, билмайман, ойимнинг овозларини эшитиб, қайтди. Ўша ёқда туриб, жавоб-муомала қиладиган одамдек эшикни ўзига тортиб эди, у боягидек ғижирлаб яна сархоки тўкилди.

Ойим супадан ўтиб, рўмолларининг бир учини тишлаганча ярим ўгирилиб тўхтадилар.

— Айтавурнинг, нима ишингиз бор эди, кимсиз?

Ойим танишларнинг олдига чиқиб бораверар эдилар, қочмасдилар, бунинг овозидан бегонасирадиларми — ярим йўлда — овоз эшитиладиган жойда тўхтаган эдилар.

— Холамойи, менман, Зокиржон участковойиз: танийсиз. Гапим бор эди, Султон ошнамизга тегишли.

Ойимлардан олдин менинг тепа сочим тикка бўлди: бу доғули нималар деяпти? Ойимларни авраб, нимани билиб кетмоқчи?

— Ойи, — дедим ўтирган жойимдан шипшиб.

Аммо ойим акамнинг номни эшиганде ўзларини йўқотиб, кўча эшикка чиқиб бора бошладилар:

— Вой, шунақами? Киравуринг, нимага қараб турибсиз? Шундан шу ёққа келасиз-у, кирмай кетасизми?

Ҳай-й, эсиз, ўзим чиқиб бормайманми, дарвозадан қайтариб юбормайманми!.. Ойим ҳам қизиқлар, кенномимни опамларниги чиқариб юборганлари нимаю, буни «киринг»лаб қисташлари нимаси? Милиса зотига ишониб бўларканми! Аммо энди кеч эди. У ичкарига кириб бўлган, энгашиб — ойимларга елкасини тутиб турар эди. Сўнг қаддини кўтариб, камига шангиллади:

— Танидизми, холамойи. Мен ўша Зокирман, ҳозир бу ёққа ўтганман. Шу ёқлар ҳаммаси менга қарайди, тинчлигини мендан сўрашади. Шундай-шундай. Анув куниям келган эдим. Қўшнизниги келганларни опкетгани...

О-ла, мақтанчоқ! Аҳад акалар тутиб, хабар бергунча қаерда эдингиз? Тайёрига келдингиз-ку!

Мен ғашим келиб, азбаройи четга қараб, чирт тупурдим: худди ўзи кўргандек оғзини тўлдириб мақтанганига ўласизми?

— Умригинангиздан барака топинглар, яхшиям сизлар боракансиз, бўлмаса, қўшнингинамни нақ туёқлай деб турган сигирини гум қилиб кетишар экан, — дедилар ойим алқаб.

— Сигир ҳам гапми?!— деди меҳмон сирли қилиб,— уларнинг ниятини ҳеч ким билмайди, ха.

— Шунақами?— дедилар ойим уни ичкари бошлаб.

— Ҳа-да. Аммо-лекин бировга айтадиган гапмас! Йўлига шундай келиб, текшир-текшир

қилиб ўтиришган. Амакини суриштирган киши бўлиб, меҳмондорчиликни қуюқ қилиб... мақсадлари эса бошқа...

— Вой, киши кўзига эканми?

Ойим тезроқ бориб, зинадаги сув челагу жомни йўлдан ола бошладилар. Мен эсам, бу изқувар ипи-рисқига (холамларнида суриштиравериб энсаларимни қотиргани ҳали ёдимда турибди!) кўрингим йўқ, тол тепасида миқ этмай ўтирибман. Кўзи тушмай ўтиб кетсаю — кутила қолсам...

Аммо ҳамманинг кўзини шамғалат қилиш мумкиндири-у, милисанинг назаридан қутулиш қийин. Супаю ҳовли юзи билан бўлиб ётган чивиқларга кўзи тушган замониёқ менга қаради ва эски қочқоқ «дўсти»ни кўриб ишшайди:

— Ия, истудент, бугунги дарс нима бўлди, тол тепасига чиқиб опсиз?

Мен тушунтириш бергим келмайинқираб, толдан деворга ўтиш ҳаракатига тушабошлаган эдим, ойим зинадан жавоб қилдилар.

— Бу дамда, акажониси.

— Дам? — Милиса шубҳаланиб, бир менга, бир ойимларга қаради, — ҳамма болалар ўқиб ётибди-ку?

Мен ҳамон жавоб беришни ўзимга эп кўрмай тушишга имиллардим.

— Бир йилга чиқди, акажониси, Ҳожи дўхтири қофоз қилиб берди, — дедилар ойим.

У ҳам роса қовоқ-миялардан экан:

— Қофоз? Қанақа қофоз? — деди ойимнинг орқаларидан эргашиб.

Менинг ғижиним келиб турибди. Ҳожи дўхтири дегандан кейин ҳаммаси тушунарли-ку! Ижикилашига бало борми?!

Ойимлар-ку, менга нима бўлганини айтиб, унинг раҳмини келтириш билан оворалар:

— Вой, Худо бир қайтиб берди-ку. Шамоллаб дэнг, кўзини очмай эсхонамизни чиқарворди-ку...

— Шунақами? Мен билмапман, узр-узр.

У менга ачиниб қараган маҳал опамларнинг йўлаги томондан отилиб чиққан Бўйноғимиз ўқдек учиб кела бошлади. Милиса чиндан ҳушёр экан, Бўйноқ ириллаш у ёқда турсин, дамини ҳам чиқармай учиб кела-ётган, шу келишида унинг тўпифидан олиши тайин эди. Аммо Зокир милиса қай кўзи билан кўриб, қай сезгиси билан билди, кучук зинага этмай ўгирилиб, кесак олаётган каби ерга энгашиб улгурди:

— Ёт, эси йўқ! — деб пўписа қилди камига.

Бунинг устига ойим кўриб қолдилар:

— Қайт, Бўйноқ!

Ит ириллаганича тўхтадию, аммо ойимнинг раъйларидан ўтолмай ғазабини ичига ютиб,nochор орқасига қайрилди.

Бир талаб, ўтакасини ёрса, тоза хурсанд бўлар, ўша тирғалганларнинг армонидан чиқар эдим-ку, афсус, ит итлигини қилмаган эди.

Зокир милиса ранги ўзига келиб, зўрма-зўраки илжайди:

— Итинг ёмон-ку, а?

Ёмонга ёмон дегим келди-ю, ойимлардан ҳайиқдим.

У шунда ҳам итдан кўзини ўзмай (чалғисаёқ оёғига ташланиб қолишидан ҳайиқиб) зинага кўтарилиди. Сўнг иккала оёғини баравар тапиллатиб эди, қайтиб кета-ётган ит ириллаб ташланмоқка ҳезланди.

— Бўйноқ, қайт! Эсингни едингми?! — деб уришиб бердим.

Зокир милиса гуржи кучугимизга ишшайиб қаради.

— Ўзи зигирдек экан-ку, бунда эс нима қиласди?!

— Шу гапиз эсингизда турсин, қайтишда кўрасиз,— дедим.

— Ие, шунақами? Узр-узр, мен ёмонламоқчи эмасдим, — деб у ҳам қулди.

Бўйнок бунга жавобан ириллаб, тишини кўрсатиб қўйди-ю, ноилож нари кетди.

Мен ошхона устунидан сирғалиб тушиб, зинада кутиб турган «эски танишим» билан йўлига кўришиб қўйиб, ишимга қайтавердим. Уйга одам келганда шунча истак ҳовли билан битта бўлиб ётса, яхшимасдир? Ойим кўрпача ёзиб бўлдилар шекилли:

— Келинг, оповси, кираверинг, тортинманг, — деб чақирдилар.

Улар ўтириб, дуои фотиха қилишган, ҳол-ахвол сўрашган бўлишди. Ойим ҳамма қолиб, шаҳардаги опаларини, поччани, уларни дагиларни сўраб-сурештирасидилар. Худди бу у ерга ҳар куни кирадигандек.

Ўрик бўртиқчаларини бўртириб, ғунчачаларини анор доначаларидек қизартириб юборган кўклам офтоби асалариларга ҳам жон баҳш этиб юборган, улар чор-атрофни тутиб, — ғувиллаб визиллашар, шоҳдан шоҳга қўниб, кўз ёра бошлаган ғунчалар устида намоз ўқишар, ўрик гулларини жойнамоз этмоқчи бўлишар эди. Биз ҳам бугун уйнинг қиши билан ўтириб қолган заҳлари, моғору қўмир ҳидлари кўтарилисинг деб эшик-деразаларни очворган эдик. Шунинг учун даҳлиздаги барча гап-сўзлар менга жангиллаб эшитилиб турагар, кирмаганимдан пушмонда эмасдим. Нимага кепти экан бу гўрсўхта, деб ичим қизиб турган бўлса-да, қўлим ишда — ўзим истак териш билан бандман-у, қулоғим динг, ўша ёқда эди. Ҳеч бир гапни қолдирмай сувдек симириб турибман. Зокир милиса бўладию бекорга келадими, у кув!

Аммо ойим шундан шу ёқка келган меҳмонни бир пиёла чою қаймоқ билан сийламай жўнатгилари йўқ эди. Танчадаги чой, чамбаракдаги қаймоқ билан қониқмай ичкари уйнинг тўсинидан чўпга илиб узум олиб чиқдилар, пакирдаги сувда чайиб олдига қўйдилар. Уни ҳам кам билиб, ёнгоқ чақиб опкирдилар. Сўнг чуррак нон ушатиб, катта токчадан дурда олиб қўйдилар.

— Олинг, қишлоқнинг неъматлари. Насибангиз қўшилганакан, тортинманг.

Ойим унинг қайси бир сўзига ийиб кетақолдилар, ҳеч ақлим етмай турибди. Милиса зотини кўрсалар тепа соchlари тикка бўладиган одам буни опаларининг ўғлидек қўриб, айланиб-ўргилар эдилар. Султонга тегишли деган бир оғиз сўзига шунчалик эриб, ийиб кетибдиларми, тавба. Ё юз-қўзидан бир нарсани сезиб сипоришлияптиларми? Буларга ишониб бўларканми? Ҳеч бирорни аяганми булар? Авраса мумкин, лекин ўла қолса, сир бермас.

— Олинг, айланай, қаердан келгансиз! Ҳар қанча нонуштангиз бўлса, яrim йўлда тушиб қолган. Олинг, оповси, ош бўлсин, — деб ора-чира қистаб, чой узатардилар ойим.

У эса Худо бериб, аввал қаймоқни паққос туширди. Кейин дурда билан узумни.

— Вой, холамойи-ей, аммо-лекин дурдани қотирибсиз. Манман деганларам бунақа дурда қилолмайди! Маска бўп кетипти, маска! Ҳов-в, сигир кўп яхши нарса-да! — дерди у. Нихоят, у кекириб орқасига ястанди. Шу ястанган куйи чой хўплайтуриб, мен томонга кўз қирини ташлаб қўйди. Мени супада истак териш билан овора эканимни қўриб, ўзича хотиржам тортиб, узоқдан гап бошлади:

— Хўш, Каттабоғда нима гаплар, холамойи?

— Нима гап бўларди, тинчлик, — унинг муддаосини англамайнқираб жавоб қилдилар ойим. Зокир-кув гапни миш-мишларга бурди:

— Султон қайтипти, яна анувларнинг хўб адабини беряптишиш, деган гаплар-чи? Шамол бўлмаса, дараҳтнинг учи қимириламас?

Ойим, қўл силкидилар:

— Ҳаммаси бекорчи гаплар! Келадию қорасини кўрсатмайдими? Шунга ишониб ўтирибсизларми?

— Бўлмаса, ким... ўғриларнинг додини бераётган? Бир эмас, қанчаси адабини еб, пусиб кетди-ку, ахир. Ё нотўғрими? — деди у. Синаяптими-ростдан сўрайптими, билиб бўлмасди.

— Йўқ, — дедилар ойим қатъий қилиб, — Султон бўлса, қўрқиб-нетиб ўтирмасди, киарди.

— Демак, унинг номидан бирор... шундайми? — деди милиса.

— Шундан бўллагамас. Уни бу ёқлардан излаб овора бўлмай қўя қолинглар. У сизлардан кўрқмасди, биласизлар-ку.

— Биламиз, лекин... — Зокир милиса овозини паст-латди, мен қўлтиғим тагидан унинг ойим томонга энганиш бир нималар деяётганини қўрдим, — лекин Сиз кечагилар бекорга келган деб ўйламанг.

— Уларни атай... юборишганми?.. — дедилар ойим.

— Буям... киши кўзига, — деди у овозини яна ҳам пастлатиб.

— Вой, тузоқмиди?

— Ҳа-да.

— Вой, ўлмасам, — Ойим юзларини чанглладилар,— Ҳали шунаққибам тутадиларми?

— Тутадилар, — деди у.

— Бояқиши жигаримиз. Ўз юртига қайтишга ҳам рухсат йўқми?

— Сиз нима деб ўйловдингиз, гуноҳлари кечирилганмас, — деди у ўша-ўша паст овозда нимадандир ҳадиксираган қуий. Ора-чира ҳовлига кўз ташлаб қўяди. Менданми, кимдан ҳадиксираяпти.

— Вой, худойим, тутсалароқ қамайдиларми? — дедилар ойим ўтакалари ёрилиб.

— Қамаш ҳам гапми, омонлик йўқ унга. Шунинг учун, — деди у яна овозини боягидек пастлатиб, — эси борида...

Ойим ҳайрон қолдилар:

— Нима, эси борида?... Ўзи йўқ одам қандай этагини ёпди? Унга биз қандай етказар эканмиз бу гапни? — деб тикилдилар.Ҳатто мен бир қучоқ истак қўлтиғимда ерга чўккалаганимча қолган эдим: наҳот унинг келгани рост? Биз билмаган нарсани булар қайдан билақолибди?!

Милиса томоқ қириб, мен томонга аланглаб олди. Бунга сари мен ҳеч нарсадан хабари йўқ одамдек ишга машғулман.

У боягидек шипшиди:

— Сиз менга ишонинг. У чегарадан ўтди деган гаплар бор. Бўлак одам бўлса келиб юрмасдим, ичим ҳам ачимасди. Шунча мардликлар қилиб юрган одам... бекорга тузоққа тушиб юрмасин. Билиб олинг: бу гапни мендан эшитмадиз! Умуман, мен бу ерга келганимам-кирганимам йўқ. Қорамни ҳам кўрмадиз. Хўп? Анув ўғилчангиз ҳам... эшитдиз-а?

Ойим аллақандай гарангсиб, шошқич бош силкидилар:

— Хўп, оповси, хўп. Шу гап шу ерда қолди.

— Хўп бўлмаса, мен турдим. Мехмондорчилигинги учун раҳмат.Қаймоғу дурдаларингиз эсдан чиқмайди. Соғинсам келавераман, майлими?

— Вой, майлиси нимаси? Қаймоқ сиздан айлансин, эшигимиз ҳамиша очиқ.

У аллақандай ошиқиб, ойимнинг дуои фотиҳала-рига ҳам қарамай ўрнидан тура бошлади.

— Раҳмат, энди орқамдан чиқиб юрманг, — деди у бошқа гапга ўрин қолдирмай. — Мен текширгани келган одамман. Ҳар ким ҳар хил тушуниб юрмасин.

Ойим ночор даҳлиз ўртасидаёқ тўхтадилар.

— Хайр, Оллоҳнинг паноҳига, — дедилар хижолатланиб.

— Хайр, — деб у зинамизга чиқиб келди. Тўхтаб ўша ердан кенг ҳовлимизга, очиб қўйилган-у, токлари кўтарилимаган ишкомларимизга, девор билан бўй талашиб ўсган беҳиларимизу яна бу ёқда бўртиб ётган эртанги гилосимизу говмиччадек қизариб, ғунчалаб келаётган ўрикка суқланиб-ҳавасланиб қолди. Негадир қўзини юмиб, (хузурланибдир балки) юзини ишқаб қўйди.

Ва мен — кучоғимда бир даста истак, уни кўксимга босганча ҳайратланиб турганимни кўриб, иссиқ жилмайди. Ва шу иссиқ жилмайшида ўзимга жудаям таниш-бошқа бирорга

ўхшаб кетиб, мени яна ҳам ҳайратда қолдирди. Субҳаналлоҳ! Кўз олдимда тамомила бошқа бирор — бизга яхшилик соғиниб келган қўк тўнли, бўйдор одам турар, у акамнинг қай бир йигитларидан бирига жуда-жуда ўхшаб кетар эди. Бундай хушқад, истараси иссиқ кишини қачон, қаерда кўрган эканман?

Эсладим.

У нимаси биландир раҳматли Ҳайбат акамга жуда-жуда ўхшаб кетган эди. Тавба. Қандай қариндошлиги бор экан уларнинг? Балки ҳамма мард, танти йигитлар ҳам вақти келиб, шундай кўркам, хушқад тортиб кетармиканлар? Юзидан нур ёғилишини кўринг буни. Ким айтади уни Зокир милиса деб, ҳеч кимга эл бўлмайди, деб? Боя келгандагисини кўрингу ҳозиргисини кўринг. Ўзи нима воқеа юз бера қолди?

Хушим ўзимга кела қолмасди.

Ва шунда бирдан кўзимга нима кўриниб кетди денг?!

Мол боққани тушганимизда тепаларнинг ёнбағирларида, эски чалдеворлар кавакларининг шундай таккинасида пиёз пўстидан ҳам юпқа, лекин бор бўйича ярқироқ этини ташлаб кетган — илон пўстини кўриб, «воҳ, буни қара»лаб юборар эдик. Ҳозир шу кўз олдимга келиб кетса-я, тавба. Нега, тушунолмасдим: илон-ку пўст ташлаши мумкин, лекин одам ҳам... ўзгариб қола олар эканми?

### 3. САБРУ ЖАМИИЛ

(Маҳфуз хатлар давомига)

Кунларнинг сувдек оқуб ўтушини кўрунг. Кеча Мақсудхўжса қайнум илиниб, бир ҳовуч оқ ўрикнинг гўрасину териб кептилар. Жонивор думбул бўлиб қолипту денг. Вой, қаюттан топдийз, қаютта оқарибту, — деб қувонуб кеттим. Халутдан бир ажойиб оқара бошлиб, данак қорайтубди. Кичигойумлар билан омонлуқ-сомонлуқ қилдук. Кейун ҳовлудагу голосну уздук. Ҳузурини қуши кўргунча биравларнинг оғзига тегсун, дедилар. Ўзи иккинчи йил гуллаши экан-у, муши-мушиакон қипту, баргидан мевасу кўп. Оллоҳ баракасину ёғдурса, шунақа бўлармуши, Кичигойум айтсалар, оғзум очилуб қолупту. Мақсудхўжса эринмай голосниям, баргиниям санаб эдулар — кўп чиқди. Еганимуз, қўшинига чиқарганимуздан ташқару яна бир пақур бозорлуқ чиқди. Бир чиройлу ўтириб эдук, қаердан келди бало эрталабдан?...

Улар бозорга кетишган, мен ҳовлу супураг эдум. Ҳали кун ёйилуб, ҳовлуни ўпмай туриб, ким кўчадан чақиrub келаверду:

— Ҳов, Саломта?! Ким вар?! Бир жсан варму?!

Бирор эшик зулфуну узгудек тақуллатса, жонум товонумга тушуб кетупту. Овозидан дала қоровули — анув чулчутга ўхшарду. (Уватга яқинлашган молну думини кесуб, ўзини отхонага ҳайдаб кетадурган). Хоҳолму, чунчутму, шиқилуб Худонинг бошли-кўзлу бир балоси. Нега келибду, зўр беруб кичигойумларни чақиrub ётибду? Ақлум етмасдуду...

— Варму жавап, йўқму жавап?! — Эшикну итарса денг, сархоклари дув тўқилду-тушиду. — Қани у ишига чиқадуган келун?

Вой, ҳалу шунга эканму, деб қалтураб кеттум.

— Апкеттум малину!

Оёқ-қўлим бўшашиб ток тагига ўтируб қопман. Қалт-қалт титрайман фақат. Мену деб буларга шунча зугум! Қаёқданам келдум?

Ҳой, тўхтанг, деб орқасудан чопгум бору... қани овозум чиқа қолса, ўрнумдан тура олсам!..

Худонинг газаби экан-ку, булариз. Ҳажжожси золум нимаю булар нима!

— Шошуманг, опкетуманг, — деб чопган жойимда... қўшини девор раҳнасидан Рихси опоқи кўринуб, жсовуллаб бердилар:

— Ҳой, ноинсоф, ҳой, яшишамагур! Молга тегма, эгаси келмасдан тегма! Бир муштипарга

кучинг етдими санларни! Торт, ҳаром қўлингни! Ҳой, Умар, қаранг анави чулчутга. Етаклаб кетяпти, яшишамагур.

«Вой, ману деб онкетяптиму, нимага онкетаду»лаб югургилаб чиқсан, у ёқдан Ислом амаку, бу ёқдан бош-қа қўшинилар етуб келишибду. Кўрқмаскан-а! Молну ташлаб, кетишуниям, кетмасуниям билмайду! Шунинг устига паст кўчанинг қайришиидан бошқа бир отлук чиқуб кела бошладу. Уну эгарда қийшиш ўтиришидан тануб (У ўша қораялоқ — чўлоқ одам эду!) ичум сидирилуб, бир хил бўлуб кетубман! Сизга ёлғон, Худога чин, назарумда у мана бу чулчутни юбориб қўйиб, орқасудан ўзи келмоқдайди. Ичум шувуллаблар кетду. Ўлубмиз, сигирдан ажрабмуз, мену деб олиб кетишаду, уларни шу кунга қолдиришиаду дейман-у, нима қиласаримну, нима деяримну билмайман. Бир қалтироқ босуб, кичкина тортуб кетяпман.

Йўқ, у етиб келдию... (вой, нега осмон узулиб туша қолмаду, нега ер ёрулуб, ерга кируб кета қолмадум! Кўрмасдумам, куймасдумам!) шунча одамнинг ичидаги уятларга қолдириуб, бизни ҳимоямизга ўзи юборган чулчутни сўка кетса денг! Сўкканда ҳам бўралаб сўкар, ҳаммадан уятлуси — атрофдагилар, қўни-қўшинулар уни нимага сўкаётганини англаб, ҳеч нарса билмагандек жисим-жисим, бурилуб кетмоқдайдилар, тарқаб кетмоқдайдилар.

У эса, қораялоқ эса:

— Ҳов, им чулчут! Сенга ким буюрди, бир бева, бир бояқишини зор қақшат, молини етаклаб кет деб?! Ҳаром бурнингни суқмаган шуларники қолувдими! — деб устига от солиб, қамчулаб кетгудек бўлар эду.

Чулчут бўлса, хуши учуб серрайуб қопту. Қани тили айланса, ким буюрганину айти олса. Ўзи буюриб ўзи сўкарини қайдан билсин. Ахийри бир нималар деб гўлдираб эду.

— Э, «вар»ламай кет! Йўқол! — деб сўкуб ташладу.

Кўшинулар олдида нима деган одам бўлдум? Мену деб, ўзича нималарну ўйлаб, шу ергача кепту? Ўртага тушиб юрупту. Кўрганлар энду нима дейду? Кичигойум нима деб ўйлайдулар? Келсангиз кела қолмайсизму, Султонмурод акажон? Қандай кунларга қолдум?! Шуларнуям пардаи исматдаги қизу, келину бормукан? Юзини сидириуб ташлаб келаверадуму?

Қандай шармисорлик?! Жияну орқали сўратгани камдай, ўзину хомий кўрсатуб, орага тушуб кепту. Ер қандай кўтараду бундайларну?

Ичкару кириб кетуб, йиғладум-сиқтадум, ўзумдан ўтгануни ўзим билдум. Қани бош уруб бораудурган бир ерим, бир суюнчуқларум бўлса, бир кун ҳам турмасдум бу ёқларда. Иложисизман, бенаво-беватанман, қаерга ҳам борардум? Ёки Оллоҳ шундай синаяптиму?

Ойум айтардилар, чиройлу сабр этганларга чиройлу ажер бор, деб. Иложум қанча! Сизга етшишмоқнинг бошқа йўлини тополмаотурман. Тишумни тишумга босуб, сабр этсамгина Сиз кириб келадигандексиз. Унгача барчаси имтиҳонга, менинг сабрум, номус-орумни синашига ўхшайду. Ҳаммасини Оллоҳ қўриб-билиб тургандур. Поклигумниям, содиқлигумниям, барча хўрликларга миқ эттмайун, чидаб ўтирганумниям.

Кичигойумгилар кун ёйилганда келишиди. Йўлда бир учини эшишибдиларму:

— Нима бўлди, нимага кепти, Оллоҳнинг қаҳригинасига йўлиққур? — дедилар.

Тўлиб турган эдум, қучоқлаб олуб, шу йиғлаб бердум, шу йиғлаб бердум. Негалигину айттолмай: «Менга жавоб бера қолинг, кичигойужсон, кета қолай, қорамни ўчира қолай шуларнинг кўзидан. Сизларам тинчигайсиз, менам» дердум. «Жон кичигойужсон, шаҳаргаму, бир ёқларга жўнатинг. Касрум урмасун, жадумга қолмангиз», деб уввало ялинардум, ўтинардум.

Аммо у киши мену силтаб ташлаб, уришиб бердилар:

— Қанақа касриз, қанақа жадиз?! Сизда каср нима қилсин, келинпошиша? Қаёқдаги гапларни гапиряпсиз? Мен сизни хўрлатиб қўярканманми! Яна бир марта оёгини боссин шу ёқларга, ўзини қаерда кўраркин! Султонмурод кетиб, босар-тусарини билмай қоптими! Шошмай турсин ҳали.

— Кўйинг, кичигойужсон, ўшаларга teng келманг. Ўчакишиманг. Жавр сотуб олуб, жадумга

қолманг, — деб ялинардум мен.

— Қанақа жавр?! — дедилар у киши, — ҳеч ёққа кетмайсиз. Султонмурод келгунча қумтошдек ўтирасиз шу уйда. Даласига ҳам чиқмайсиз, шишигаям бормайсиз! Ордоналар қолсин даласи! Келса, мана мен турибман, менга учрасин. Боринг, уйизга киринг. Беҳуда хаёлларни бошиздан чиқариб ташланг. Битта келинимни асраб ўтиrolмасам, мен кимман?

Тилла холангуз бораканлар. Ақлу ҳушиимни жойуга келтируб қўйдулар. Ростданам шуларга учрамаганумда ҳолим нима кечарду экан?

— Келинг, чой ичовуз. Мақсудхўжам билан зўр чуррак нонлар опкељганвуз. Унутинг ҳаммасини. Орқага ташламаса, бу дунёда яшаб бўларканми, — деда қўярда-қўймай чойга олиб чиқдулар-да, чойдан кейин эса Мақсудхўжага бир иш буюруб, холи олуб қолдулар.

— Айтмоқчи, анув намоз нима бўляпти? Туряпсизми? — деб сўраб қолдилар.

— Қайсу? — дедум дабдурустдан англаб етмай.

— Ярим тундаги-чи?..

— Униму, қодир қилганча... ўқияпман, — дедим уялуб.

— Йўқ, сиз узмай, бўлмай ўқинг. Ҳар кеча ўқинг. Сизга эрингиз керакми — ўқийсиз! Йиғлаб сўрайсиз ўзидан. Бир кеча эмас, ўн кечамас, қўрқ кеча туриб сўрайсиз. Ўз оёги билан кириб келмаса — айтинг! Оллоҳ бўлади-ю, йиғлаб сўрайсиз-у, етказмайдими?!

Шу гаплару билан ўша намозга турадурган бўлдум. Ярим кечадан ўтганда таҳоратлар қилуб, ўзумну тайёрлаб, саккиз ракъат намоз ўқийман-да, жойнамоз устуда Оллоҳумга муножотлар қила кетаман. Қаерда бўлсангиз ҳам ҳифзу ҳимоясига олишууную кўнглингизга юрт согинчиную бизларнинг согинчимузну солуб, бу ёқларга отлантиришину, азиз бошингизни тошдан этуб, омон-эсон етказишину сўрай бошлайману йиғи ҳам ич-ичумдан тошуб келавураду, тошуб келавураду. Тепамасжиддан аzon чақиргунларучча шу ўтиришиум — ўтириши. Шу йиғум — йиғи.

Кейин туриб, юз-кўзларумни чайуб, қайта таҳорат олуб, кичигойумлар билан бомдод ўқиймиз.

Шундай кунларнинг бирида яна эрталаб, яна улар бозорга кетушган маҳал эшигуимизну бир паранжали хотин чақириб келду. Ичкари кириб бошидан паранжусину олуб эду, жудаям кўҳлик, келишган жувон экан. Биздан улугроғ-у, лекин ясан-тусани жойида, айнуқса, духоба нимчаси қаргашиб кўйлаги билан йиғлаб кўришган эду.

— Келунг, опажон, — дедум.

— Яхшимисуз, оповси, — деди у ҳам елкамга қоқиб-кўришиуб, — сиз адашмасам, Салом холамларни келинлари бўласиз, шундайми?

— Шундай, — дедим ийманиб-тортинуб.

— Ташибчиликдан хабариз боракан, — деди у ўша-ўша тусмоллаб.

— Бироз... Лекин мен бу ишину бўйнумга олган эмасман, опажон, — дедим ростига кўчуб.

— Майли-да, келинпошиша, сўрадим-да, — деди таскинми-тасаллуми бериб, сўнг яна қайтаруб. — Айбга буюрмайсиз, қаердан бўласиз, — деду.

Мен айтуб эдум, тўғри топиб кепман, рост айтишган экан, деб қўйду. Нимага бундай деяпту, ким юборган, сўрашга тил қану, лекин ичум тошуб кетмоқда. Назарумда, биз учун бир суюнчилуғ хабарлар, чиройлу музжалалар олуб келгандай.

— Адашмасам. Иқбор отинникига Маргу қизининг сувратида борган ҳам ўзиз, шундайми? — деди у ҳамон ширин жилмайшишину қўймай.

— Илтимос қилишиуб эду. Мен бу ишлардан бехабар боруб қолубман, — дедум.

— Қайтага савобга қопсиз, келинпошиша, — деду ўзину яқун олуб.

— Келунг, — дедум ниятуни билгум келуб. У боягудек ширин жилмайду.

— Сизга бир юмуши чиқиб қолди, келинпошиша, — деду ҳалигудан ҳам ўзину яқун олуб. Иложуни тонса, қулогумга айтса. Мен ҳам уни ёқтируб қолган эдум:

— Зарур бўлса, жонум била, — дедум.

— Борасизу қайтасиз.

— Қаерга, узоқму, — дедум.

— Йўқ, шу ерда, шу тепанинг орқасида. Ҳовлимизга ўтавузаю ўзим опкеб қўяман.

Тавба, нимагадур ичум тушиб, боргум келуб турибди.

Чиндан ўзиз чақиртирган бўлсангуз-чи? Ё чопар юборубсизмukan? Қани, сўрай олсам?!?

Олдинма-кетин бораяпмиз икки паранжилув. Жувон олдинда, мен эргашуб. Кўчада зоз йўқ.

У сочвонини бир чиройлув орқага ташлаб олган. Ўзи ҳам юзи очиққина, жилмайсаёқ кулгичлари ўйнаб бир чиройлув тортуб кетадикан. Бир кўргандәёқ ёқтирууб қолубман, ҳам ишонуб эргашуб бораётганумни айтинг. Мен унга мафтун, у менга мафтун. Ҳар қадамда ўгирилиб:

— Келипсизми, келинпошиша? — деб қўяду, бу ҳам етмагандай ширин жилмайуб, тасаллулар бераду, — ҳозир етовуз. Боравузаю қайтовуз. Ўзим опкеб қўяман.

Айтгандай, Тепамасжиддан ошуб, пастга кетган ёнгоқзор кўчага бурулдук. Қачон экилган экан, ҳар ён-гоқларки, осмону ҳафтумда ишкомдай туташуб кетган. Бу ёнгоқларни қандай қоқиб олишаду — ақл бовар қилмайду. Уларнинг устида заргалдоқлар бир чиройлув биёв-биёвлаб сайрашууб ётишибди. Боз ҳовлупарнинг этагидаму, қайсибир чакалакда булбул чаҳ-чаҳлаб қўяду. Күшлар шунақа эмин-эркин, боғлар шунақа соя-салқин. Жаннатму бу ер, дейсиз.

— Етдук, келақолинг, — деб йўл бошловчум якка тавақали пастак эшик остонасида бошидан паранжусини олду.

Юракум бир орзиқдию яна ўзумни босиб олдум: нимага юзини очяпту, сизлардан қочмайдуму? Ким бўлса экан у Сизга? Хаёл қургур ҳар ёқларга олиб қочаду. Ахир Сизга тегишлув бўлмаслиги ҳам мумкин-ку. Бу кўҳлук жувон мену авраб олуб келутган жисн бўлуви ҳам мумкун-ку. Мен лақма лаққа тушуб келуб ўтирубманму?

Юракум така-пука бўлуб, яна бир қадам боссам бўйра ташланган чоҳга тушуб кетадугандекман. Ор-қага қочуб-қочолмайман, учуб-учуб кетолмайман.

— Вой, ўз уйиздай киравуринг, қўрқманг. Сиздан икки оғизгина гап сўрашади, холос. Кейин ўзим обориб қўяман, тортинманг, — деб қистарди жувон.

Мен эсам, ким сўрайду, нима сўрайду, билсам ўлай, бошум говлаб, эсум оғуб боряпту. Бир ками сўроқ берушим қолган эканму! Кимга, нега — билсам ўлақолсун агар.

— Келавуринг, тортинманг ҳеч, — деб тасаллулар бериб, жувонгина мени айвонга бошлиб кетётпу. Куракларумни силаб, елкамга қоқуб қўяду, далдалар бераду, — юзизни очмасангиз ҳам майлига. Шундай, эшик олдида турсангиз, бас. У киши ичкарида, парда ортидалар. Юзизниям, ўзизниям қўрмайдилар. Фақат икки оғиз ўзингиздан эшишмоқчилар. Журақолинг.

Ниҳоят зинадан кўтарилуб, айтулган эшик олдида тўхтадук. Мен паранжусуга ўрануб, сачвонумну тушуриб олганман. Бирор кўриб, тануб қоладигандек бандагимну тортуб, жуфтлаганум-жуфтлаган.

Жувон эшикну қия очуб, остонаяда турганча ичкарига овоз берди. Мен шифт баробар тортилган оқ сурпдан бўлак ҳеч нарса кўрмасдум. Парда ортида ким бор — уни ҳам билмасдум.

— Адаси, биз келдук. Сўрайдиганиззи сўрай қолинг.

Бу гапни эшиштуб ҳушиим учди: Кимнинг аёли экан бу жувон? Ҳали эрининг топшируги билан борган эканму?

Ичкарудан қироатлу овоз келди:

— Яхшиимисиз, янга? Узр, безовта этуб қўйдук.

Бегона эркак овозидан капалагум учуб, сапчуб тушдум. Худди у киши мену кўриб тургандек эди, эшикдан нари тисарилубам кеттум.

Жувон далда бўлсин дебму, мен томонга чиқуб келаркан:

— Вой, адаси, келинимиз ҳали ёш, попувдек эканлар, келинпошиша деяверинг,— деб

тушунтириши берган бўлду.

— Узр-узр, минг бор узр. Сўранг-чи, Султонмурод ошнамиздан қандай хабарлар бор экан? Билганларини айтсунлар, хотиржам тортмайлук, — деди у.

Мен Сиз ҳақингизда бирон мужда эшиштартманму ё бирон чопариз бораканму деб ўпкамну қўлтуқлаб келуб эдум. Бу киши мендан сўраётгануни эшиштуб, тарвузум қўлтуғумдан тушибу. Ва шу заҳоту унинг гапларидан боиқа ҳикмат, боиқа таскин топгандай бўлдум. Ошнамиз деялти, бегона эмаскан-ку. Оқибати борки, ҳамият қилуб чақирибду. Одам юборибду. Шунисига-да, шукур.

— Айтинг, айтаверинг. Сизни кўп ушламайдилар. Эски танишиликлари ҳаққи сўраяптилар, — деб тушунтирас, шивирлар эду аёли.

— Нимаям дей? Келушлари керак эду — сарҳадлар беркилуб ўтолмай қолдуларму, — дея олдум.

— Оллоҳ ҳар кишининг мушкулини ўзи осон этсин. Ошнамизнинг йўлларини ҳам очсин, илоҳим, — деб дуо қилди аввалига. Дуосидан жуда мутаассирландум. Сўнг деди: — Келин, Сиз кўпам ғам еманг, у тегирмонга туиса бутун чиқадиганлар хилидан, худо хоҳласа, келибам қолади.

Кўпдан ҳеч кимдан бундай ширин сўз эшиштмаган эдум, кўнглум бўшашибу:

— Раҳмат, мулла ака. Фаришталар омин деган бўлсунлар, илоҳим, — дедум.

Ўртадаги бегоналик кўтарилуб, қаёққадур чекилган эду. У киши оталарча меҳрибонлик кўрсатуб бир нималарну сўрар, мен баҳолу қудрат жавоб қилас, илоҳим, — дедум. Назарумда парда ортида оқ соқолли, юзларидан нур ёғилган бир мўйсафид ўтиргандек эди. Фақат тушунмасдум: нега мени бошлиб келган бу кўхлик жувон адаси демоқда, чолга тушган эканму дейман. Балки отасидур чалкаш эшиштандурман. Яна иштибоҳга тушаман: Унда нега ошнамуз демоқда Сизну? Ҳеч тушунуксиз. Парда ортида қай ҳолатда ўтирубду ё турибду — унисиниям билолмайман. Фақат қироатлув овозидан ўша сувратда — мўйсафид сувратида кўз олдумда турибду.

— Саломхон холаникида экансиз. Ишончли жойда. Қалай ўтирибсизлар? Хола бардаммилар, ҳалиям машиначилик қиляптиларми? — деди у.

— Қиляптилар. Ўтириблумуз бир нави, — дедум. Ниману сўраркан — ҳеч ақлум етмайду.

— Оллоҳнинг паноҳига. У кишининг қаватига келиб, яхши қипсиз. Фақат, — деди у томоқ қириб, сўз қидириниб, — фақат, қулогимизга чалинаётган баъзи узунқулоқ гаплар... айбга буюрмайсиз, келин, ўзингиздан сўраб-суриштирмоқча, аниқлаштирмоқча мажбур этаётир. Бизга Худони ўртага қўйиб, лиллоҳ сўзни айтаверинг, келин. Нималар бўляпти? Ким Сизни, сизларни хафа қилмоқда?

Шунча воқеалар кечуб, ҳечкум бундай ўртага тушишмаган, сўраб-суриштирмаган, ҳолинг не кечяпти демаган эду. Билмайман, тўлуб турган эканману, ё қайсибир сўзи юракумнинг ингичка ерларига тегуб кетганмиду бир хўрлук босуб келуб, ўзумни тутолмай қолдум.

Назарумда парда ортида боиқа бирор эмасу, дадам ўтиргандек эдулар. У диёрдан етуб келишига келуб, топуб келишига келуб, фақат юраккинасишу ёрвормайин дебму парда ортида боиқа киши номидан ҳол сураб турар эдулар. Энди топдум. Қироатлув овозлари ҳам жуда-жуда ўхшаб кетар эду.

— «Дадажон, ўзиз-ку. Бу мен Маҳфузангизман, баҳтиқароингузман», — деб ўшаёққа отилгум келар-у, отилолмасдум.

Фақат, ийгумни тутолмадум. Босолмасдум. Ич-ичумдан бир титроқ билан, қалтироқ билан бир хўрлик босуб келдию чақириб борган жувонни қучоқлаб олуб, бир ииғлаб бердум, бир ииғлаб бердум.

«...Дадажон, шунинг учун мену бу ёқларга жўнатуб эдизму? Шу кўргиликларнум-да кўр, пешонангга ёзилгани шу, девдингизму? Кўнглингиз бўлмай энди ўзиз қидириб келдизму? Шунча

ердан топуб келдузму? Олуб кетинг, бу ёгига чидолмайман. Ўз диёрумизга олуб кетинг. Бир кунам туролмайман бу ёқларда!» — деб бўзлардум. Овозум чиқяптиму, ё нуқул ииғи битганму, у ёгини билмасдум. Жувонга ёпушиб олгандум.

У эса:

— Ҳой, келинпошиша, ўзиззи тутинг, ўзиззи босинг. Уят бўладу. Сўраганларини ҳаммасини айтмасангзам бир оғиз тасдиқласангиз бўлди, у ёги булярнинг иши. Сиз у ёгини ўйламанг,— деб овутармуди, юпатармуди, елкаларумни, бошларумни силаб, бағрига босармуди — мен ўзумга келолмасдум.

Шунинг орасида ҳалиги одам бир ғалату овозини кўттаруб:

— Бону, Бону дейман! — деб қолду.

— Лаббай, адаси, ҳозир, — деб мен билан ҳаяллади жувон, — мана, ҳозир.

Қистама, ўзига қўйиб бер, дейдиму деб ўйлаб эдум. Аммо парда ортидан унинг шошқич ҳам ҳолсиз овози келарду:

— Бўла қол, Бону. Бир тиёлагина...

У сувми, нимадир сўрар эду.

— Кетяпман, — жувон эрининг ҳолини ўзи билади шекилли, ичкарига чопду ва шу асно оқ пардани юлқиб очуб, пақирдаги сувдан косалаб оларкан, кўзум ўзум ҳозиргина гаплашган одамга тушуб, тоши қоттум. Парда тушуб бўлган, жувон эрига сув тутар, «Мана, адаси, ича қолинг», деб жонсарак бўлар-у, менинг кўз олдумдан танча ёнида ёстуқларга кўмилуб ўтирган жажи десамму, жажмон десамму, яримта одам кетмасду!

Ишонасизму, ўзи жисмитдек, аммо соч-соқоли оппоқ одам... (бу қандай ҳол?) хумдек бошини тиззалари орасига солунитируб ўтириар эду. Тиззалири, қўллари росмана, тавба.

Мен кимну кўрдум, ниману кўрдум, у жисниди, инсимиди, ҳалу-ҳануз ажратолмасдум.

Кўрганум — кўраётганум, мен турган бу айвонлар, пастдаги ҳовлию анув азим тут — барчасу бир рўё десам, ичкарудаги ўша оқ парда ортудан жувоннинг таниши-жонсарак овозу келуб турар эду:

— Ичинг адаси, ичинг, губориззи олади муздек сув. Бу тарновни суви — Оллоҳнинг раҳмати, — дерди у.

— Ичдим, Бону. Ўтди, ўтиб кетди шекилли, Бону. Яхшиям сен боракансан. Кўкнинг, булоқнинг сувларидан опкеб қўйганакансан. Худди замзам ичгандек бўлдим. Дардларим ариди-еий. Буям бўлса, Худонинг гамхўрлиги. Йўғингда тутса, нима қиласар эдим.

— Тутмайди, адаси, Оллоҳ ҳафиз — бардам бўлинг.

— Инишааллоҳ де.

— Инишааллоҳ. Бирдан-бир сўраганим шу-ку, адаси. Шунчалик умр бериб қўйибди, ўзининг зикри, шукри, ибодатига машғул қилиб қўйибди, бу ёгига ҳам ўзи асрайди, адаси.

— Бу дунёning ишларига аралашиб, манавиндай қозивозликлар қилиб ўтиришиим баъзан...

— Үндай деманг, қаҳри келгай Оллоҳнинг. Бундай чиройли амални ҳамма ҳам топсин-чи, қилсин-чи! Кўйинг, тилингизга олманг қайтиб, Худо билсин — ўзингиз билинг...

— Аввалги гуноҳларимнинг каффоротига ўтса, бас, менга шуни ўзи кифоя, Бону, кечирса, бас.

— Шуни билсангиз — қайтманг. Оллоҳнинг шари-атини баланд тутшии Сизнинг зиммангизга тушган экан, қайтманг.

Улар мени-да унутуб, бир-бирларига таскин беришар, ўзунинг шу аҳволи-шу алпозигаadolatчи бўлиб ўртага тушганига мен ҳайрону лол эдум, ўзуни зўрга эплаб ўтирган одам қандай ўртага тушяпти, ҳеч ақлум бовар қилмасду. У ким ўзу, ўзуга енг бўлгунча бировга эн бўлишига жазм этган? Бу ишларни кимга ишонуб қилмоқда?

Ёлгиз Оллоҳгаму?..»

#### 4. ЎТАҒАСИНИНГ ЎРДАСИ ёхуд қиссагүйга номаълум, муаллифга аён тариҳлардан яна бири

— «Алҳамдуиллаҳи лакал ҳамд, алҳамдуиллаҳи лакал шукр, алҳамдуиллаҳи неъмати фаҳма дин». Ўзингга беадад шукрлар, — деб шивирларди у муштдек бўлиб, болишларга кўмилиб ўтирганича.

Яна бир тун чекилиб, кеча кундуз билан алмашинмоқда эди. Алмашинмаса, нима қила олар эди инсон? Ҳоли не кечар эди? Тун қоронғулигига сургалиб-тентираб ўтказармиди умр? Хайриятки, Зоти аввал — Ҳаййул Қоййум раҳм этди: кеча ўз ўрнини тонгга бўшатди.

У чилла пардалари кўтарилиб, шифтга тортиб қўйилган уйда ҳар кунгидек танча тўрида қиблага юзланганча бир амаллаб ўтирас экан, ўша ёлғиз ишонгани — суюнганига тонгги ҳамд айтмоқда эди. У ҳамд айтмай ким айтсин! Қайси гуноҳлари эвазига оёқларидан жону мадорни олиб, ўзини бир бурда — яримта жонга айлантирган Оллоҳ унинг ўрнига тўрт мучаси соғ ҳар одамлар етишолмайдиган бир ҳидоятга, бир нури таскин — кўнгил ёруғлигига мушарраф этиб қўйибди, ахир.

— Алҳамдуиллаҳи неъмати ислом, — деб шивирларкан, ташқаридан ҳам тонг шовурлари кела бошлаган эди.

Энг аввалига бўғот остидан бир жуфт қушча париллаб учиб чиқди. Сўнг боғ адогиданми, қай ердан қораشاқшақ овози келди. Сўнг ғуррак ғуриллаб, чумчуқлар чирқиллашга тушдилар. Сўнг ҳар кунгидек ҳовлидаги ёлғиз тутнинг устида саъва чив-чивламоққа, қўшни томондами — ундан нарида қарқуноқ қив-қивламоққа бошлади қай қуш қаерда сайраётганини ҳам ажратиб бўлмай қолди. Олам уларнинг чуғур-чуғури, тасбехотларига тўлиб бормоқда эди. Фақат ораорада жаннат қушларининг овози каби бир сайроқ — ҳаққу, ҳаққу, ҳаққу овозлари эшитилиб қоларди.

Ўзи-ку, ярим жон — ўтириб қолган одам. Бу ёқ умри сўнгги нафасига довур фойдага қолган. Лекин ҳар битта шовур, ҳар битта овоз минг ҳикматга бурканиб, қулоқларига етиб келаверади. Ўзи эса бу дунё ҳаётидан боқий дунё аломатларини қидирмоққа, топмоққа, шундан таскин-тасаллулар олмоққа маҳкум. Бу ерда ўтириб ҳаёли олам кезади, шу ўрдасидан чиқмай Каттабоғу Яккабоғда, ундан нари — Қаънғлию Чалада кечган-кечайдан воқеаларни элакдан ўтказади. Ўша мавзелардан келган ҳар битта хабарни ютоқиб эшитиб, шу элакка ташлайди. Бу «элак» эса ҳар битта ситамгарга қандай жазо тайинлашу жабрдийдани қай тариқа рағбатлантиришни ҳам унутмайди. Бу ишни ёлғиз Оллоҳ ризолиги учун қилаётганини яширмаса-да, ўзини танитгиси йўқ. Барча-барчаси риёга айланиб кетувидан қўрқади. Илло, унинг нияти ҳам охират сандуқларини савоб ила тўлатиб олиш. Жон эса омонат. Эгаси қачон ҳузурига чорласа, лаббайка ва саъдайка айтиб, борувга ҳозир. Унга довур ҳарқалай чиройли амаллар қилиб қолмоқ мумкин.

Тақир гилам устига бир ҳовуч нур тушиб, Бону киргани билинди. Ўша нур шуъласида минг-миллиард зарралар ғужгон ўйнаб, тилла гардлар гоҳ тўзонланиб, гоҳ ҳолсизланиб ҳалланар эдилар.

— Ассому алайкум, адаси. Санолариз тугаган бўлса, нонуштани ҳозирлайверсан, девдим?  
— Аёли бир четдаги жойнамозини олиб, қозиққа ила бошлади.

— Вазири аъламдан дарак йўқ. Ҳаялладими бу-гун?

— Кун ёйилгунча келиб қолар, чойни нима қилай?

У аёлининг юзига узроҳ термулди:

— Қаёққа ҳам шошаман, Бону. Жиндек қутайлик.

— Толиқиб қолманг.

— Сен опкирсан ҳам, лекин усиз чой ичимга тушармикан? — деди у жилмайишга уриниб.

— Тинчликдир, адаси. Бўлмаса, аллақачон етиб келишарди-ку.

— Гапинг тўғри-ю, тун қандай кечганини билмагунча еган-ичганим ичимга тушмайдиган бўп қолиби.

— Майли, ўзизга қаранг, — Бону уй юзини йиғишириб чиқди ҳам, бояги ҳалланиб ғужғон ўйнаган тўзон ҳам сўнди-қолди. Ортидан эшик беркилган эди.

Шу маҳал атроф-жавонибни жангиллатиб, ўрикзор ичида от кишнади. Токчалардаги патнислару ханик четидаги жомга қадар жаранглаб кетган эди. Таниди. Бу ўша-ўзларининг саман тойи. Ҳўб отмисан — от чиқяпти-да. Шунинг учун ҳам вазирга бериб қўйибди. Холис, сидқидил хизмати учун. Колаверса, ўзи от минармиди. От миниш, улоқ чопиш муҳаббатларидан бир йўла мосуво бўлган, кечган. Яхшиям, шундай бўлган экан. Оллоҳ дунё муҳаббатини олиб, ўрнига бошқасини берди. Бермаса, ўша кўйи қолдириб юборса, нима қиласди? Худди Фиръавнга дард бермаганидек.

Ҳозир-чи? Оёқ бараварига кетган. Баъзан жиндек увишиб, жимиirlаб қўйишини айтмаса, сонидан пастлари йўқ ҳисоб. Қўл билан тортиб олмагунча ҳам ўнгарилиш амри маҳол. Жусса бу аҳвол. Жимит торта-торта шу аҳволга келди. Тағинам Оллоҳ ҳафиз-ақлинни олгани йўқ. Фаросатини олиб қўя қолса, нима қиласди? Яна ўзига шукр, қўкси бутун, қўксисда ўша ҳидоятини дариг тутмаган зотга чексиз, андуҳсиз муҳаббати бор. Балки уни бу дунёда тутиб турган ҳам ўша муҳаббатдур. Унинг қошига, хузурига қуруқ қўл биланмас, охират сандуқларини хуш амаллар билан тўлатиб боришга орзумандлик, ошиқиши, шошиш тутиб тургандур. Бўлмаса, шу ҳолига илгариги товкасидагиларни ёнига йиғиш, ўшалар билан Оллоҳга хуш келадургон бир нималар қилишга уриниб ётиш — кимга зарур эди?

Шу маҳал боғ эшик ортида ёғоч кўприк дўпирлаб, от пишқирди. Сўнг от боғлангунча вақт кечиб, эшик зулфини шикирлади ва:

— Ҳой, пўшт, биз келяпмиз, — деганча кутган одами ҳовлига кириб кела бошлади. Туни билан изғиган одамнинг бир қоп ёнғоқ каби шалдур-шулдурлигию вағирлаб келиши қизиқ эди. Тавба, қачон мизғиб улгуради бу одам, ё қуш уйқусига эгардагиси ҳам етарлимни — ҳеч билиб бўлмасди.

Болажонликда вазирга тараф йўқ. Мана, ҳозир ҳам у қучоқни кенг очиб, чўққайганича Кокилтойни чақирмоққа тушган эди:

— Қани, қани, той бола, тойчоқ бола, кела қолсинла. Ваалайкум, ваалайкум. Катто йигит бўлинг, мулло йигит бўлинг, тўйлариззи гули ўзим бўлай. Ўрталарни ўзим қизитай. Қани, қани, бир ачомлашуп қўйяйлик. Куракларни силашуп қўйяйлик. Ҳа-а, ана шундай. Ана энди бўйнумни бир сиқиб ташласинлар-чи, синдириб ташласинлар-чи. Ҳай-ҳай-ҳай, зўрайуб кетганакансиз-ку, билмаганаканмиз-ку. Нафасни ичга туширвордин-ку. Балли, балли. Ие, қўлиздаги нима? Тузоқни ипи? Воҳ, зўр-ку! Ҳали саъва тутопсизми? Вах-вах-вах, элакни зўрини топибсиз-ку. Ҳар куни ўнта саъва тутса мумкин-ку, фақат чўпни калтароқ, ипни узунроқ қилинг-да, той бола. Дон чўқилаб кириши-ла тортасиз, саъва сизники. Билдиз?

Унинг бундай тиллашишидан саъва тугул, барча қушлар кирадиган жойига кириб кетиб бўлса-да, тунқотарлар вазири Кокилтойни эркалашдан тўхтамас, бу манзиратлар йўлига, қочадиганлар қочиб, йўлни очиб қўйишилари учунгина эканини ҳамма тушуниб турар, илгари учига чиқкан ўғрининг бу тарз юришларига ҳайрон қолмай мумкин эмас эди.

Шу асно у кафтига йўтала-йўтала тойни эргаштириб, хузурига саломга келаркан, боягидан сал пастроқ тушиб, ижикилар эди:

— Адангиз — ҳазратим қалайлар? Яхши ётиб-турдиларми? Биз жанобларини хутбага солғанлари йўқми? Агар лозим бўлиб қолса, гуноҳимиззи ўзиз сўраб оласиз-да, а, той бола?

Бу орада улар айвон четига етдилар. Ва шунда бирдан болакайдан нос сўрамагани эсига тушиб, ия, дея азза-базза чўнқая бошлади:

— Гапга чалғиб, хуморбостидан сўрамабмиз-ку, — деб Кокилтойдан «насибасини» қистай

кетди. — Қани, қани, қўлни қайтармай, носдан жиндек узатворинг-чи, саломдан олдин бир хапшириб ташлайлик-чи!

Кокилтой қиқирлаб кулиб, қочди. Бунга сари у оёгини тапиллатиб, «Ушла-чи, ушла»лаб кетидан юргурган, тиззасига шаппалаган бўлди, кетидан аразлабам кўйди:

— Вой-бў, ялинибам қоларсиз, хандалаклар чиқиб қолсин...

Бу ҳам ўтирган жойида болажон вазирининг қилиқларидан хузурланиб кулди. Қани, ўзининг ҳам тўрт мучаси соғ бўлса, ундан қолишмай тегишган, бир олам ҳузур олган бўларди. У факат ёнига чақириб олиб, шунда ҳам бағрига ярим-ёрти тортиб, бошинию кокилини силашга ярайди кўли. Ундан у ёгини Худойим кўп кўрган: ҳамма қатори на тиззасига ола билади, на елкасига миндириб от бўла олади. Ўша бошини силай олганига ҳам шукр, силай олмаса, нима қиласди? Ўксик фарзанд қолдирамиди орқасида?

— Мумкинми, ўтағаси?.. — Эшикнинг битта тавақаси очилиб, валломатнинг аввал бир елкаси, сўнг ўзи кўринди. У давангирдай одам эшиқдан қиямалаб зўрга кирдио ковшандозга тушибоқ кўл қовуштириди:

— Ассалому алайкум, хўжайин, кечирас, ўтағаси.

Қўл қовуштиргани майли, лекин ковшандоздан ўтмаёқ тақир гиламга тиз букиб, чўккалапи нимаси?

— Ваалайкум ассалом ва роҳматуллоҳи ва барокотух, — деди атай. Зора, қаерда ўтиргани, қайси товкага мансублиги ёдига тушса.

Қори «барокотух, барокотух» дея қизил этигининг ковушини ечдио энкайиб келиб, унинг қўлини олди.

— Яхши ётиб турдизми, ўтағаси? Бир қошиқ қонимиздан кечасиз бугун, ҳаяллаб қолдик.

— Оллоҳга шукр, тупроқдан ташқари, — деди у, сўнг жой кўрсатиб қўшди. — Ўзларида ҳеч ўзгариш йўқ-ку, қорим?

— Қандай ўзгариш, хўжайин? — деди валломат вазир рўбарўсидаги кўрпачага сурилиб. Муддаога тушунолмаган эди у.

— Ўша-ўша «ўтағаси», ўша-ўша «хўжайин»...

— Ҳа-а, узр, узр, хўжайин, азбаройи ўрганиш... Ўрганиш-да, ўтағаси. — У қўлини кўксига кўйиб, сал эгилди.

— Ахир, айтиб эдим-ку, жоҳилиятдаги одатларни ташлайсиз, бу ёғи тамом: бошқа ҳаёт, бошқа товка, деб...

У қисиниб тасдиқлади:

— Айтгансиз, айтгансиз.

— Қолаверса, ўртада қасам бор... Қуръон бор, тўғрими?

— Бўлганда-чи... Шунга биноан вазир этиб сайланганмиз.— У қўл қовуштириб, бош эгди.— Чизган чизигингиз бизга қонун. Факат бугун бир қошиқ қондан кечасиз, хўжайин. Жиндек эркалик қип кўйдик.

Ўтағаси сергак тортди: кўнгли бехуда ғашланмаган экан! Қўша-қўша ёстиклар орасидан қаддини сал кўтариб, қайтариб сўради:

— Яна қандай эркалик?

— Тунги воқеани айтаман-да, ўтағаси.

— Тушунмадим, ҳеч қандай хабар...

— Ҳа, биратўла ситамгарни аниқлаб келмоқчи эдик.

— Хўш?

— Аниқлагунча сахар бўп кетди. Ўзиям, ўтағаси, етти ухлаб тушга кирмайдиган нарса.

— Нарса нимаси? Ё кимни ким тунаб кетибдими?

— Қай бошидан айтишниям билмайсан киши, — деди тунқоровуллар вазири лабини йиғиширолмай.— Бунақасини умризда эшитмагансиз. Сазонинг ҳам антиқаси чиқибди!

— Жазоми, сазоми? — деб қайтариб сўради ўтағаси. — Маҳобатсиз айтавуинг, қори. Вазир яна ерга қараб кулди.

— Маҳобатсиз айтсан, қотириб кетибди.

— Ким? Оти борми ўша илвирснинг?! — Ўтағаси ёстиқни қўлтиғига тортиб, қаддини тиклаган бўлди.

Вазир боягиндек лабининг четида кулди:

— Илвирс бўлса, жон дердиз, қасоскорнинг антиқаси!

— Қасоскор?.. Шу ўз даҳамидан-а? Ким?

— Кимдан бурун кимни денг?!

— Хўш, кимни?.. — деди унинг раъйига қараб.

— Гап шундаки, — деб вазир бир бошдан тушунтиришга ўтди, — етти хуфтонга яқин Тепамасжид олдидан ўтиб бораяпсак, ичкаридан увлаб йиғлагандек бир овоз келяпти, бир овоз келяпти: одам бўлиб одам эмас, бўри бўлиб бўри. Тавба, қанаққиб кириб қопти, энди чиқиб кетолмай увлаяптимикан, деб яқин бор-сак — одам! Дилдирабу, хувлаб шу йиғляяптики, қўяверасиз. Эшикларни очиб, кириб борсак, қўринг томошани. Бирор бир одамни қув ечинтириб, ғассол тахтага тортиб кетибди! Тишлари такиллаб, шу қалтирайдики, қўяверасиз. Чироқни ёқсак, ким денг?..

— Ким экан?

Вазир ёйилиб ишшайди:

— Анув мўнди!

— Қайси?

— Шу... ўзимизнинг янги бўлган маймоқ-чи, анув отинг қурғур-чи!

— Ана шунақасиз-да, қорим. Бирор ўламан деса, сиз куласиз.

— Йўқ, устод. Сиз ўзингиз кўрганингизда эди. «Ўл, бу кунингдан баттар бўл, қотирибди» дер эдиз. Тоза жазосини берибди, шоввоз,— деб ҳовлиқиб-кўпирди вазир.

— Хўш, ким экан ўша баттар бўлгур?

— Ким бўларди, айтиб турибман-ку, Акмал чўлоқ деб.

— Ие, ўшами? Акмал ўрис-а?

Вазир қўл силтади:

— Ўша, илгариям чулчут эди, оёқдан ажрабам одам бўлгани йўқ.

— Хўш, шоввоз-чи? — деди устод юзи тундлашиб келиб. — Ким экан?

Вазир бу ёғини яшириб ўтирамади:

— Шу... гумонимиз биттасидан-у, учратолмай доғда қолдик.

— Олинг-а, қорим. Кўпиришингиз оламни бузади, гумондан нари ўтмабсиз-ку.

— Изидан етиб боргунимизча шаҳарга сурворибди, қаранг, — деб афсусланди вазир.

Кетидан кўпириб ҳам қўйди: — Караб турасиз, бу ўша аскар боланинг иши. Ундан бўлак эмас!

— У ким, кимнинг ҳимоячиси? — «Биз таниймизми», демоқчи бўлди ўтағаси жонсиз оёқларини уқалаб.

— Танийсиз. Анув япон урушини ҳам кусар қилиб келган йигит-чи! Самурайидан кўрқмаган, Акмал дўқайидан ҳайқадими! — деб тушунтирган бўлди вазир, кейин қўшди: — Эсингизда бўлса, никоҳ куни Султонмурод олиб қочган келин бор эди-ку.

— Хўш-хўш?!

— Ана ўшанинг акаси. Ҳали унгаям кўрсатаман, деб юрганмиш.

Ўтағаси ичida «воҳ!», деб қўйди-ю, ташига чиқармади:

— Султонмуроднинг қароргоҳини суриштираётган ҳам ўша чиқмасин?

— Ҳали шундай хабарларам борми, устод?

— Бор-бор.

— Куда томон суриштиряптими, десам, у эканми? — деди вазир шалдур-шулдурлигига

бориб.

— Ҳар иккиси ҳам, — деди устод, — лекин биз сир бермаслигимиз керак. Йигитлар оғизларига маҳкам бўлишсин. Бир нарса бўлса, ҳамма ўз чиллахонасига кириб кетгай, тушундингиз-а?

— Тушундим.

— Энди тунги воқеага келсак, — деди у сариқ ипак нусхи ура бошлаган нозик қўлини хонтахта устига қўйиб, — у нобакорнинг ўзини бу кеча хузуримизга олиб келасиз. Сўрайдиганларимиз бор.

Вазир бироз тушунмай ҳайратланди:

— Ситамгар аскарни айтасизми, ўтафаси?

У бош чайқади:

— Йўқ, катта ситамгарни. Ёлғизлик қиласман десангиз, аскар болани ёнингизга олинг.

Бу вазирнинг ҳамиятига тегиб, сапчиб тушди:

— Э, хўжайнин, аскарсизниям диконглатиб келишга қурбимиз етади.

— Шундай дeng-да, бўлмаса, — деди устод енгил кулимсираб.

Шу топ эшик қитирлаб, аввал Кокилтойнинг укпару қўзмунчоқларга бой дўппили боши, сўнг офтобаю обдаста кўтарган ўзи кўринди. Аёли эрталабки нонуштага ҳозирлик кўриб кўйганини билдириб, ўғлини киритмоқда эди.

— Э, той бола, келсинлар-келсинлар, хали қўл ҳам чаямизми? Оҳ-оҳ-оҳ, сувдек сероб бўлсинлар, гўшангаларга куёв бўлсинлар, — валломат алқаган сари той бола уялиб-қисинар, адажонисидан ҳайиқиб, обдастани ташлаб кетолмасди.

Ниҳоят, устод ҳам қўлларини чайиб, у офтобани олиб чиқиб кетдию дам ўтмай патнис кўтариб кира бошлади. Патнисда иккита ёпган нону косада қаймоқ, пиёлада мураббо бор эди. Қиягина очиқ эшик тирқишида ёлғиз қўл кўриниб, текисроқ жойга чойнак, орқасидан каллакқанд солинган тақсимча қўйилди. Валломат ҳовлиқди.

— Ҳов, кунимиз туғибди-ку, жуда!

— Хабарга яраша-да, қорим, — деди устод, у алқаган кезлари шундай атаб қўяр, валломат бу номни ёлғиз «Ихлос» сурасини ёд олиб, ундан у ёғига ўтолмаганига шама эди.

— Унда Акмал маймоқ демаганлар ҳар куни фассолнинг тахтасига тортилсин-а! — деб хандон ташлаб кулди у.

Сўнг устод-шогирд олинг-олинг ила бир чиройли манзиратлар билан қаймоқхўрликка киришдилар. Ўтафаси қайсию чопари қайси — ажратиш энди мушкул эмасди.

## 5. САЗОЙИ ЖОН Яна ўша муаллифга аён тарихлардан

От туёклари гоҳ илдамлаб, гоҳ атак-чечакка тушиб қолар эди. Улар қаерда кетишияпти экан, гоҳ тепага чиқиб, гоҳ пастга тушиб бораётганга ўхшар эдилар. Мана, ҳозир ҳам от жонивор олдинги оёқларини битталаб авайлаб босиб, пастликка энар эди. Қайси сойликка тушиб боришияпти экан? Ундей деса, на Иzzанинг шовуллаши, на чимзорлардаги чирилдоқларнинг жўр овози эшитилади. Остиларидаги от текис юра кетиб, орқада бир нима пўп-пўп тушиб, тезак ҳиди анқиб кетди. Шунчалар сокин, зим-зиё кеча эди.

Аллақаерда сув шалдирайди: анҳор шекилли. Неча тун қоровулларидан ўтишди. Ўрда деганига етилгани йўқ. Қаёқка обкетяпти бу валдирвос тушмагур. Ўзи кимсану, қўл-оёғини куллаклаб, кўзигача ўраб-чирмаб ташлагани қизиқ. Кеча шарманда бўлишдан қутқаргани нимасию бугун отга ўнгариб олиб кетаётгани нимаси? Кечагисини мурувват дейлик, бугунгисичи? У бир хилда — боши боғлик, қўллари тўлғаниб бораркан, терга туша бошлаган отнинг сағрисидан анқиётган ачимсиқ ҳиддан кўнгли ағдарилиб-ағдарилиб келар эди. Устига-устак,

боя ичган мусалласи ичида шўлқиллаб, бўғзига қайтиб-қайтиб келмоқда. Қаёқданам ича қолган экан. Алам бости энди ўзини олиб бориб, олиб келмоқда эди. Ташласа қутулармиди. Ўлганининг кунидан восвосга эланишга тушди:

— Вой, ҳой, инсон, ўнгариб олиб бормасанг, ўрнига ўтмайдими?

— Ўтмайди. Эшитмаганмисан, бераҳм буванинг невараси эканимиззи? — деб кикиллаб кулди валломат. Камига отини қистади. — Чу, жонивор, акамизанинг кўнгиллари ағдарилаётган эмиш.

Акмал чўлоқ гардани қотиб тўнғиллади:

— Бирор ўламан, деса, булар куламан, дейди, сенам шошмай тур...

Унинг яниши валломатга хуш ёкиб, хиринглади:

— Ўзи кимнинг чангалида-ю, янишингга ўлайми? Аввал омон чик.

— Чиқмаганда нима?! Осиб юборармидиларинг, жа?

Вазир чиқарилгувчи ҳукмни ўзича тасаввур этди:

— Осишга осмасмиз-у, лекин осгандан баттар қилсалар ҳам керак.

Акмалнинг ёдига анув Султонмурод демаганларнинг Парпи бебахтга қилган муомаласи тушиб, ичига титроқ югорди:

— Нима, сизларам?..

— Нима, бизларам?.. — деди отини этигининг пош-наси ила нуқиб, қисташга тушган валломат.

— Парпи бебахтга ўхшатиб... туюқопга тиқмоқчимисизлар?

Валломат вазир унинг фирт омилигидан кулди. Оми бўлмаса, кимнинг қўлига тушганини ўйлаб боқмайдими? Бу ҳам Султонмурод қайтиби, деган гапларга паққос ишониб юрибди, шекилли.

— Мунча қалтирамасанг, эрқакмисан?! — деди энсаси қотиб. — Қўйни ҳам, эчкини ҳам ўз оёғидан осадилар — борсанг кўрасан.

Акмал чўлоқ ғудранди:

— Нафасингни ел олсин. Сен совуққа қуним қолишини билсан...

Иложи қанча, бошини кўтариб кўтаролмайди, қўл-оёқлар чирмаб ташланган, устига-устак куллакланган қўйдек отга ўнгариб опти. Ўғриниям чапдасти экан-е!

Вазир қамчисининг учи ила биқинига нуқиб қўйди:

— Кеча мойдек ёқувди шекилли, ғассолнинг тахтасидан ечиб олганим? Энди ғудраниб қоптила?!

Акмал чўлоқ бу валдирвос билан ўчакишиш бефойдалигини англаб, анча тушган эди, гиналанди.

— Тўғриликча борсак ҳам бўлаверарди.

Валломат «Вой, тавба-ей, анойини кўринг», дегандек кулди:

— Ўша... бўлмасди-да.

— Нега? — деди куллакланган кимса бошини ўнгариб қарашга унналиб.

— Қоидада йўқ, — деди отлик қалта қилиб.

— Нима йўқ?

— Бизнинг ўрдага ҳар ким тўғриликча кириб боравурмайди.

— Эргашиб ҳамми?

— Эргаштириб ҳам.

— Албатта, қўзини боғлаб, отга ўнгариш шарт де-йилганми?

— Шундай. Уни бегона қўз қўриши мумкинмас. Ҳайдаламиз нақ.

— Унда... ўронсизам ўтиб бўлмаскан-да?

— Ўронсизлар тушини сувга айтсин. Ҳўв, хомтамалар-ей!

— Ҳеч ким хомтамалик қиляпгани йўқ. Сўрадим-да.

— Сўрамаям! Яххиси, унингни ют. Пўстга яқин-лашаяпмиз. Устингдан қулиб юришмасин, — вазир шундай деди-да, кўча бошида ҳайхотдек бўлиб қаққайган қора дарвоза томон отни қистади.

От дўпир-дўпир билан аллақандай кўприкдан ўта бошлади. Шу баробар йўл четидан кимдир томоқ қирди:

— Тўхта. Сўроқсиз-истоқсиз қаёқка борасан?

— Усмон? Ўзингмисан? — деди отлик овоз бериб.

— Усмон бўлганимда сенга нима? Ўронни айт. Саломни қоидали қил, — деди овоз берган кимса.

— «Ла ҳавла вала қуввата»... Чўчитвординг-ку, жуда. Сал эви билан-да.

— Салом-чи? Қанақа бесалом қашқатаёқсан ўзинг? — деб туриб бирдан овозидан таниб қолиб бўшашди қоровул. — Ие, ассалому алайкум, вазир жаноблари, ўzlари шекилли, бир бошга бир ўлим, деб юрган?

— Ваалайкум салом тунқатор<sup>15</sup> жаноблари. Узр, узр, ўzlари пўстда эканлар, — деб тегишиди у.

— Ха, бу бўлак гап. Қайси эси киравли-чиқарли ё кеккайиб кетган, дебман. Ўзиз топшириқни қотириб келяпсиз шекилли?!

— Мендек топшириқни қотириб юрсанг, жон-жон дердинг. Топдинг, ўринлатганимдан мастман.

— Ўлжангизам зўр шекилли, тилингиз бир қарич?

— Кўрмаяпсанми, ўнгариғлиқ нарсани? Кўзингга ҳол тушганми, нима бало?!

— Молми, нима у? — деди тунқоровул, — отизам бўлари бўпти, қора терга тушиб?

Вазир қих-қихлаб кулди:

— Адо бўпсан, одамни молдан ажратолмасанг, Усмон! Ҳар ўнгарилган нарса мол бўлаверибдими?

— Мустаҳиқлардан денг?

— Оч дарвозангни. Кейин эшитиб олаверасан.

— Кейин бўлса, кейин-да, ака. Билдик, омадлари чопган экан, — деб улкан дарвозани ғийтиллатиб ланг оча бошлади тунқоровул.

Пишқириб, бош силкиб турган от эҳтиёткорлик билан дарвоза остонасидан ошиб ўта бошларкан, тақаси остона темиригами — нимага тегиб, шарақлаган овоз тун сокинлигига қараб учди. От ҳуркиб, буларни кўтариб ташлашига бир баҳя қолди. Акмал чўлоқнинг ичидағи бўғзига тиқилиб, сўқиб бергиси келди-ю, яна жаҳлини қулт ютди: Бир ками тунқоровулга кулги бўлиши қолувди.

Орқасидан дарвоза оғир ғижирлаб ёпила бошлади.

«Қай кўчанинг боши экан бу ер? Ёки манави валдирвос айтмоқчи, у билмайдиган ўрданинг дарвозасими?» Кўзи боғлоқ Акмал чўлоқ тасаввур қилишга уринарди. Кўчабоши дарвозаси деса, бунақаси ёлғиз Абдулла тегирмончининг кўрғони рўпарасидагина омон қолган. Бошқалари ҳар ёққа кўчириб кетилиб бўлди. Ўзиникидаги ҳам ўшалардан биттаси-да. Бу-чи, қаер бўлди экан? Кўприкдан ўтилдию кирилди. Потсовнийга кираверишдагимикан? Ҳали булар шу ерни ўрда тутган эканларми? Акмал чўлоқ бу жойларни таниб-таний олмас, тасаввур этиб — этолмасди. Тушдагидек бир ғалати жойлардан ўтиб борар эдилар. Султонмуроднинг қароргоҳидан ҳам ўтиб тушди буларники. Униси — Бўзсув бўйида, тепаларнинг бағрида дейишарди. Буларники кимнинг ташқисида экан, ҳеч англаб бўлмасди.

Шу тоб қай тарафдандир ит ҳуриб чиқиб, от ҳуркиганча ўзини бир ёнга ташлади. Чўлоқ бир қоп ундеқ оғабошлаб, жон ҳолатда отнинг сағрисига ёпишди. Агар шу кетишада валдирвоснинг

<sup>15</sup> қоровул демоқчи

тиззасидан ошиб кетганида борми, калласи билан тушарди! Ҳайтовур, сўнгги дақиқада у орқа ёқасидан чанглаб, жиловни тортиб қолди. Сўнг отини эркалаб, кулиб қўйди:

— Сенгамас-ку, жонивор, жонинг чиқмаса. Олапар манави ўлжамиздан бегонасираяпти, холос.

Чўлоқнинг ғижини келди: «Ўлжа, дейдими, тозачув туширган экан-да, бу! Анув ҳазилкашларингни топдик, деб». Ичидан қиринди ўтди. Бекорга қўл-оёғини боғлаб, куллакламаган экан-да?

Кимдир наридан итни чақирди:

— Олапар, ёт. Вазир жанобларини танимасанг, қанақа итсан! Эшакдай ҳайбатинг билан тариқдай фаросатинг йўғ-а, — деб кулиб қўйди.

Ит бурилиб кетиб, от пишқирганча сўлиқ чайнади.

Отлик ҳалиги овоз берган кишини ёрдамга чақирди:

— Жудаям ерга урворманг унисзи, Азлар. У менгамас, бегонага қиляпти итлигини. Кела қолинг.

— Шунақами ҳали? Кечирадилар, олапарвой, биз адашибиз, — деб итига гапириниб кела бошлади ҳалиги одам. Кейин биргалашиб «ўлжа»ни тушириб олдилар-да, тикка қилдилар. Оёқ курғур (бутуни ҳам) ёғоч бўлиб қолган экан, ҳадеганда жон кира қолмас, суяб турмаса, бир боғ жўхорипоядек оғиб бораверар эди.

— Ия, куллаклаб ташлабсан-ку, буни? Нима, шу ҳолида опкирмоқчимисан? Жилла курса, тиззасидагини еч, ўз оёғида кирсин ҳазратнинг олдига, — деди у тўхтамай гапириниб. Бу орада валдирвос вазир отини қай бир дараҳтга боғлаб қайтди.

— Ечинг-у, лекин қўли билан кўзини бўшата кўрманг. Бу инсоф-пинсофни билмайдиган хилидан. Ҳазир бўласиз, Азлар.

«Ол-а, жуда опқочди-ку, бу восвос. Шошмай тур, доғули!» Акмал чўлоқ тишини тишига босди. Қариянинг олдида паст кетиб, танилиб қолишга ор қилди. Оёғини бўшатганига ҳам шукр: бўлмаса, ғўла нима, у нима эди!

Исмоил вазир валенеъматига хабар бергани кетди шекилли, уни ҳам, қадам товуши ҳам учиб, Азлар чол деганлари чўнқайиб, унинг оёғидаги тизимчани ечаркан, худди ўзи жабр кўргандай, унга ачиниб, жавранаар, ҳатто оёқларидағи арқон изларини сийпаб қўяр эди. Бунга сари унинг кўзларига ўз-ўзидан ёш қалқиб, ўқси юмшаб бормоқда эди.

Акмал чўлоқ ҳайрон қолди: ўқси шунчалар бўш эканми? Ҳаммага ҳайқириб, бақириб юрган одам... чинакам бандилигини сезгач, (ўша восвоснинг макрига учеб ўтириби-я! Шошмай турсин ҳали!) қай бир қилмиши учун сўроқ бергани олиб келинганини бу кazzобларнинг кўлидан осонлиқча қутулиб чиқа олмаслигини элас-элас англақ олаётгандек эди.

Азлар дегани шопдай найнов одам экан, ўрнидан туриб, кутилмаганда елкасига қоқиб, курагини силай бошладио кутилмаганда кулоғига шипшиб-шивирлашга тушди. (Ундан туркираб келаётган тамакининг ачимсик ҳидига чидаш амри маҳол эди, шунақа кашандаси экан!).

— Укам, бу қийғирнинг чангалига қандай тушиб ўтирибсан? Бўкиб ичғанмидинг, нима бало? Отига ўнгаргунчаям билмабсан? — сўнг елкаларини ушлаб қўриб, тусмоллади. — Бегонамас, ўзимизнинг тарафни одамисан шекилли. Айтовор, Азлар тоғангга, уй-пуйдагиларга етказиб қўядиган гап-папинг бўлса. Қисинма.

Акмални чинакам ваҳима босди: Қўлию кўзини ечтирмаётганидан маълум. Ҳали неча кун қамаб қўядилар, десанг-чи.

Шу давада эланиб пайпасланди. Қўли боғлиғу Азлар тоғанинг тирсакларини топиб, тутмоқ бўларди:

— Нима, авахтага тикишадими ҳали? — деди ютоқиб-ҳовлиқиб.

— Ия, Акмал, ўзингмисан? — деди тоға овозини бирор эшишиб қолади ҳам демай.

Бунга сари Ақмал бөглоқ қўллари билан бунинг елкаларини силаб, эланишга уринди:

— Жон тоға, улар мени нима қилишмоқчи? Нега опкелишди?

— Билганингда нима қила олардинг. Ерга кирсанг, бошингдан, осмонга учсанг, оёғингдан тортиб олишади. Топшириқ шунақа.

Ақмалнинг ичини бир нима тифдай тирнаб, ўтдай куйдириб ўтди.

— Йўғ-е? — деди эси оғиб.

— Худо уриб қўйибди-ку, сени, жиян. Эсинг қаерда эди? Гуноҳингни биласанми? — деди боягидек шипшиб. Ўзи ҳам бир қадам тисарилган эди гўё ундан ҳазар қилгандек.

Ақмал чўлоқ бир нарсанинг хунук оқибатини сезгандек, ёмон бўлиб кетди:

— Ўлимдан хабарим бор, ундан ишдан... хабарсизман. Нима ўзи?

— Опкиришганда эшитасан энди, жиян. Биз кичкина одаммиз бу ерда. Келдингми, ўзингни эркақдай тут. Етти қолиб, бир туғишганимиз бўлганингда ҳам ёрдам қилолмаймиз. Сени сўроққа опкелишдими, Оллоҳ ҳукмидан нариси бўлмайди. Ундан кўра, одамга ўхшаб кир олдиларига.

Бу гаплар аввалига Ақмал чўлоқнинг қулоғига ўқдай қуишлиб, қўрғошиндай жойлашиб бораётган бўлса-да, сўнгги лаҳзада бир жунжиктирувчи титроқ югурди-да, бутун вужуди қизиб келди. Шу баробар ич-ичидан аллақандай таҳликали қиринди ўтиб, хуши учди. Калласига бир маъноли фикр кела қолмасди.

— Кимлар дейсиз? — деди уни англа-англамай. — Анув ўғрибошиларизнинг ўзимасми?

Азлар тоға жавоб ўрнига бикинига бир нуқиб, қулоғига шипшиди.

— Эсингни йиғ. Қанақа ўғрибоши? Одамнинг тилласи-ку! Ўзинг харом тукига арзирмикансан?! Замондан орқада қопсан. — Кейин қўшимчасига юз буриб, тўнгиллаб қўйди.

— От миндим, деб кариллаб юраверибсан-да.

— Нима қилмоқчилар?

— Албатта, қуёв қилиб, тўн ёпмайдилар устингга. Қолаверса, Қурбон ҳожим билан қори домлани чақиртириб қўйибди. Шунгаям шукр қил, ёлғиз ўзи ҳукм чиқарворса, додингни кимга айтардинг?

— Йўғ-е...

— Йўғамас, жуда-да. Нима, сен Исмоилнинг ташрифини ҳазил фаҳмловдингми?

— Шошмай турсин, у илвирс, — деди ичи ёниб бораётганини яширолмай.

Азлар тоға нимадир наша қилиб, (албатта, унинг ҳолига-да!) енг ичидаги ҳиринглаб кулди:

— Ҳали кўп яниб юрасан. Хўб гел қилиб, отига ўнгариб кепти. Устаси фаранг эканини билмасмидинг?

— Нимаси фаранг? — деди Ақмал чўлоқ тушунолмай.

— Аканг қарагайни-да. У кимнинг шогирди экан? — Тоға йигитлардек қикирлаб кулди. — Эплаб келмасинам-чи эди, нақ ўзим борардим. — У шундай дея қоронгида валломатларча елкасига қоқиб қўйди. — Қўрқма жуда, Худонинг ёзганидан ортиқ нима бўларди! Йигит киши гуноҳ қилдими, гуноҳини мардона тан олиб, тавба қилса — эр саналади. Хоҳласанг, қўлингни бўшатиб қўйишим мумкин. Бўшатайми?

Ақмал чўлоқнинг ори келди.

— Мен сиздан буни сўраётганим йўқ, — деди тўрсайиб. — Лекин одамни... одамга ўхшатиб, қўзини очиб қўйинглар-да.

Азлар тоға шунча ҳалим-юмшоқлигига қоидани бузолмасди. Жавобига елкасини силаб қўяқолди:

— Сабр қил. Чақирадиган вақтлари ҳам бўпқолди. Саломхона остонасига етишингдан ечадилар. Уларнинг хузурига бундай опкирмайдилар ҳеч.

Ақмал чўлоқ ўзи не ҳолдаю ғижини келди. Хоннинг ўрдасимиидики, қоидали опкирмасалар. Ўзига эса, ачитиб гапирди:

— Нима, қароргоҳингизни таниб қолади, деб... ечмайсизларми?

Тоға боягидек кифтига қоқиб, курагини силади.

— Бир сенгамас, барчага шундай. Дўст ким, душман ким — ажратиб бўлмайдиган замонда шуям маъкул. Фақат сен ўзингни бундай тутакўрма. Отдан тушсаям эгардан тушмайдиганларнинг ҳукми оғирроқ бўлади. Билиб қўй.

— Ҳукми? — Акмал чўлоқ шунгача ҳам бу ташрифини англаб етмаган эди. Энди хуши учди. — Ҳали сўд этишадими?

Азлар тоға бамайлихотир орқа ўгириб, тамаки ўрай бошладими, нима қила бошлади, жавобига жим қолди. Афтидан, жавобидан ҳам бурун буни чакириб қолишларини кутаётгандек эди. У ёқда Исломил гум бўлганча кетиб боряпти, на тиқ этган товуш, на бир нарсанинг тайёргарлиги эшитилади у ёқдан. Кўз олдида эса, қани милт этган нур кўринса, қаердалигини илғаб бўлса. Шунаقا сириб боғлаб ташлаган экан у номард. Лекин назарида ўзини потсовний<sup>16</sup> нинг ҳовлисида, боғ ортига ўтаверишдаги анув оқ бино рўбарўсида тургандек ҳис этяптики, нега шундай, тушунмасди. Бу ерга бир эмас, бир неча бор кирган. Фақат чиндан ўша жой бўлса дарвозадан кираверишда тепадан:

— Тўхта, қаёққа борасан! Қимиirlасанг, отиласан,—деган товуш келгувчи эди. Сўнг ўша очик — баланд миноранинг темир зинасидан этигининг нагали тақ-тақ этганча милтиқ ушлаган солдат тушиб келар эди. Нимага тушмади? Ё булар уларни ҳам ўз йигитларига алмаштириб ташлаганми? Тушунарсиз.

Шу пайт кимдир тахта зинадан тапир-тупур тушиб кела бошлади. Фақат унинг этиги нағалсиз, ҳам ўзи шошганидан оёқ учida тушиб келарди. Камига йўлакай овоз берди:

— Тоға, қаердасиз? Бошлай қолинг, меҳмонни. Кутишяпти тақсиrlар.

— Мана, ҳозир, тоғанг айлансин. — Ўзи эса бу ёққа ўгирилиб ҳамсоғи Акмал бандига унинг устидан минғирлаган бўлди. — Булар шунаقا: чеккани ҳам қўймайди. — Сўнг увол кетмасин, деб уни туф-туфлаб ўчиришга тутинди-да, тамаки хидини гуркиратиб келиб, тирсагидан етаклади: — Юрақолинг, меҳмон жаноблари, сизни сўроқлаётганмишлар.

Ечса ечвора қолмайдими бу дардисарини!

Унинг билагини билагига мatab ташлаган тизимча энсасини бир қотирса, шу қўллари билан қўзидағи нарсани олиб ташлай олмаётгани баттар аламини қистатар эди.

Чақирса — аввал манави матохини олмайдими қўзидаған, деб тайсаллаётган ҳам эдики, ҳалиги чақирган йигитнинг ўзи келиб, бу тирсагидан тутди.

— Бўла қолинг, илдам-илдам юра қолинглар, — деб шоширди.

Зинага етиб-етмай норозиланиб тўхтади:

— Ия, тоға, боятдан бери нима қилаётувдингиз? Ечиб-нетмабсиз-ку акамни. Тақсиrlарнинг олдига шу ахволда... опкирамизми?

— Мана, ҳозир-да, жиянлари. Жазаси битта тиф-да, — деб энгашдию этиги қўнжидан бир нима олиб, учини билаги ўртасига тўғрилаб эди, тифнинг бир бети билагига тегиб, Акмал демаганлар жунжикиб кетди. Тиф-тиф-да, ток ургандек сескантириб юборганди.

Ва шу тоб у бир силтоваðаёқ тизимчани узиб тушиб, бўшалди-қолди.

— Шуми? — деди Азлар тоға ўзининг чапдастлигидан ўзи фахрланиб. — Энди пешонасидагиними?

Худди бирор пешонасига тиф олиб бораётгандек... Акмал чўлоқ демаганлар тисарилиб кетди.

— Ҳай, ҳай, эсинг жойидами? — Тоға қиқирлаб кулди: — Жон бордир биздаям. Қолаверса, шариатимизда йўқ бу иш. Тиф ўқталиш. Қўрқма.

Шу тоб бир қўлиминан калласи ортидаги боғични туртибми-нетиб юбориб эди, сирилиб

<sup>16</sup> Ёрдамчи хўжалик (*Муаллиф*.)

ётган боғич бўшалса-кетса!

Воҳ! Шу қоронғу кечада улар ҳайбатли бир айвон тагида унга чиқиб бориладиган кенг тахта зина рўба-рўсида туришар, тепада — ҳалиги икки ёни очиқ кенг айвоннинг меҳробсимон токчасида эса ёлғиз шам ёниб турар, унинг сирли нурию токча деворларининг соя-сида айвон шифтию тўсинларию тоқилари унданам сирли кўринар, бу ёқда зинадан чиқавериша ковшандоз, ковшандознинг қибла томонида эса икки тавақали ўймакорим эшик кўзга ташланар, у нимочиққа ўхшарди.

Ақмал гарангсиб қолган эди. Ичида ҳадеб:

— «Ўрда дейди, қайси бойнинг ташқиси... шекилли?», — дерди бояги тасаввуридаги жойга ҳеч ўхшатолмай. Балки кўзи ёруғга ўрганолмай — адашаётгандир? Ундей деса...

— Қадамиззи дадилроқ ташлайверинг, бу зина, — деди ўнг тирсагидан тутган навкар йигит. Ақмал чўлоқ уларни навкар дейишни ҳам, мулозим дейишни ҳам билмасди. Ҳаммаси намат чакмон кийиб, йўғон қайиш камарми, наганми, яна бир балолар тақиб олишибди. Лекин бошларида дўппию устидан шоҳи қийиқ танғиб олганлар. Касби бойўғлидек тунда изғиш-у, пешоналарини шоҳи қийиқ билан танғиганларига ўласизми! Бу орада у қаерга келиб қолишганини фахмлаб олгунча, зина тепасига чиқиб боришиди. Сўнг чапдаги ҳалиги қўш тавақали эшик очилиб, унга йўл беришиди:

— Қани, кира қолсинглар, жаноблари. Келдиз.

Не-не идораларнинг эшигини оёғининг уни билан тепиб кириб юрган одам... шу эски гулчин эшик олдида товсиллаб қолган эди.

Уни нимага бу ерга опкелишиди экан? Опкелганда ҳам оёғини ерга теккизмай... авраб келтиришиди. Демак, бекоргамас. Булар Султонмуроддан ҳам ўтадилар шекилли? Ё унинг ўзи шўттамикан?

Жон ширин экан, юраги дафъатан ўйнаб кетди: гўё юраги ўрнида бир қуш бору у жон куши потирлаб-потирлаб, пориллаб-пориллаб халқумига келар, шунда ҳаво ҳам етмай қола бошлар эди. Калласига эса бир-биридан хунук хаёллар ёпирилиб келмоқда...

«Қайтгани... рост шекилли?.. Аввалги гал Каттабоғдан қувиб солган одам энди омон қолдирамикан?! Ҳаммасиданам анув гапи қулоғига чалинган бўлсами, ўлдим деявер!»

Оёғининг остидан ер қочгандек, кўз олди тиниб кетди. Ҳайтовур, икки ёнида тирсагидан тутган тунқоровуллар бор, бўлмаса, гуппа қулаб, ё жон аччиғида орқасига уриб кетиб... қутуларми эди.

Қутулгани, бу сўрокхонага кирмай қўя қолгани авлорок эди. Лекин... бирон нарса наша қилганда Азлар тоғанинг ўзига ўзи гапиринаидиган одати бор экан:

— Кир, киравер, Султонмурод жонингни олгур, мунча тайсалладинг? Номи-дарагидан шунча титрайсан, ўзини кўрсанг, нима қиласарсансан?! — дегани... хушини учирган эди.

Тоға иршайиб, шеригига тушунтиради:

— Бу кишим шу ҳолига унинг ожизасига ишқибозлик қиптилар. Кўнглиззи кўчасига қўтирижомашшов!..

Ана, холос! Гап бу ёқда экан-ку! Нимага чақиришибди, деб ўтирибди!

Остона ошдилар.

Кенг, қўш дераза, қўш тахмонли, токчалари баланд-баланд тоқили уйнинг тўрида дор, ўртасида эса кучоқ етмас тўсинга осиғлиқ фонар чироқ, чироқнинг чор-атрофида эса кўтариб кўйилган оқ бир нима — пашшахона деса, пашшахона эмас, ўтов деса, ўтовмас, ишқилиб, оқ сурп мато кўзга чалинار, унинг ўртасидан тушиб келган фонар-чироқ таккинасида хонтахтанинг уч ёнини ёлғиз-ёлғиз эгаллаган саллали-салласиз кишилар ўтиришар, чироқ уларнинг сояларини ерга қапиштириб, ўзларини нурга чулғаб ташлаган, бунга сари юз-бошлари нурлидан нурли кўринар эди. Тақсирлар дейишганича бор эди. Саллаларию, мурсакларию, савлат тўкиб ўтиришларидан кирган одамни сир босмай илож йўқ, фақат тўрдаги жун чакмонга

ўралган анув қилтириққина хұмбош одам... (ким экан) кафтдеккина юзларидан ажабтовур, сариқ ипак рангидан ҳам сариқроқ бир нур ёғилади. Унинг олдида бу мўйсафидлар рангпарроқ, оддийроқ, деса бўлар.

Уни кўриб ҳаммалари ялт этиб қарашди.

Кўз-кўзга тушиб, Ақмал чўлоқ бу икки саллалини аниқ-таниқ таниди: дин пешволари-ку. Бири шу одамнинг кетида намоз ўқидимми, гуноҳга ботиб... деб масжидга ҳам чиқмай, кулбасида ёлғиз тоат-ибодат қилиб ётадиган анув мумсик Қурбон ҳожим бўлса, иккинчиси — у илмсиз деб атагувчи имомнинг ўзгинаси эди. Оддий кунда бир-бирини қўролмайдиган икки одам ҳозир рўпарама-рўпара ўтириб, унга ҳазар қилгандек қараб туришар эди.

Фақат униси — жун чакмонлиси ким бўлди? Хум бошими, қошими — аллақаери таниш-у, лекин жуссаси, нега бунчалар кичик, йўқдек? Нима бўлган бу одамга? Юзидан одам сиёхи бору, жуссасидан жуда ғалати... Қолаверса, анув шифтга кўтариб қўйилган нарса нима?..

Азлар тогами, ким, биқинига секин нуқиди.

— Қарз саломингни еб қўйганмисан, нима бало?

У эса кўзи ила бошқа одамни излар, қилғилиқни қилиб, уни авраб отига ўнгариб келган валдирвоснинг ўзи тугул, қораси қўринмасди. Яна қандай топшириқ олиб, даб бўлган?

— Мана, тақсирим, опкелишди... оёғини ерга теккизмай, — Ўнг ёнидаги навкар йигит ўтирганлардан кимгадир мурожаат этиб, зўр бериб тўнининг енгидан тортар ва шивирларди: — Тиз буқ, жонингдан умидинг бўлса...

Ақмал чўлоқ қаерга опкирилгани ва қандай жавоб берарини тўла англа бетмаган эди, довдиради, шу довдирагани кўйи ковшандоз қиррасига тиз бука бошлади. Аммо шу тоб у кутган одам тўрдаги парда ортидан чиқиб келмайин ҳам... токча тагида чакмонга ўралиб, камига қўша-қўша болишу ёстиқларга қўмилганча муштдек бўлиб ўтирган (яримта бўлиб яримта эмас, бола бўлиб бола) одам (балки қариб, бола тортиб қолгандир?) ажаб ғимирилади:

— Кўй, Саъдулла, расмиятчиликни. Бу ер тиз чўкиб, гуноҳлар сўраб олинадиган жой эмас. Бунинг учун чақирган эмасбиз.

Астағириуллоҳ! Овози танишми? Ким бўлса экан? Лекин талаффузими — нимаси, мулоимдан мулоим, худди ҳалим чолларники каби эди. Шуларнинг катта-си — шу эканми? Шу, тўридан гўри яқин одам-а? Унда нега ҳамма қолиб, бу яримта одам бошламасига гап қўшмоқда? У бўлса, Султонмуродними — кимни кутмоқда эди. Балки кейин... кириб келар?

Танчанинг икки ёнини эгаллаган манави оқ салла, кўк дўппили тақводорлар-чи? Нимага ўтиришибди? Киши кўзигами? Кимнинг юзини қилиб, фатво беришларини кошки ҳеч ким билмаса, ғарт оғмачилар — шулар-ку.

Шу маҳал, қироати зўр-у, аммо ўзи бидирлаброқ гапирадиган, гапирганда ҳар ким ҳам тушунавермайдиган араб башара одам — Чўлпон ота масжидининг имоми тунқоровулларга бир нарсалар деб валдиради. Унинг қўлу юз ҳаракатларидан бир нарса уқмаса, сўзидан англаш амри-маҳол эди.

Аммо унга Азлар тоганинг ихлоси зўр экан, лабига қараб туриб нима деяётганини уқиб олди ва:

— Ҳозир-да, тақсир. Бажо қиласиз-да, тақсир, — деб шундай ковшандоз лабига ялангқават кўрпача ёзиб юборди.

Чўқдилар. Қурбон ҳожим фотиха қилди.

— Қани, омин, қадам етди, бало етмасин,— яна кимгадир теккизиб қўшиб қўйди, — ҳеч бандани ўзи адаштирмасин. Аллоҳу акбар.

Юзга фотиха тортдилар ва тепадаги (бояқиши бў-либ бояқиши эмас,) яримта одамдан изн кутиб қарадилар.

Бояги сиру саловат босишлардан ҳийла ўзига келиб қолган Ақмал чўлоқ унинг юзига тикилиб туриб, бу мажрух одамнинг шу қадар хотиржамлигидан ҳайрон қолди. У булар

кирмасдан олдин қай ҳолатда бўлса, ҳозир ҳам ўшандек эди.

— Тақсирлар, биз сизни бу ерга чорлашимиздан мурод, узр, бемаҳалда безовта этдик, бир бандай мўъминанинг шаънига алоқадор гап ўтган. Гапки, уни ўз номи ила атасак, бировнинг пардаи исматдаги аёлига нисбатан шул вақтга қадар кўз кўриб, қулоқ эшишмаган бир тухмат, яъни ул покиза аёлга етишолмаслик орқасида ожизага маломат, маломатки, суюқоёқликада айлов содир бўлган. Ожиза бул гап-сўзларга чидолмай, турган гўшасини тарк этиб, Яккабоғимиздан бош олиб чиқиб кетган. Биз суриштириб бошлаб эдик, поёнига етгунимизга қадар ўзи бундай қилиб кетибди, сизларни шунинг ҳукмига чорлатганимиз. Токи, Аллоҳ номидан, унинг Китоби ила иш кўрарканмиз — шариат сўзи устивор бўлсин, дея сизларни сўратдук. Ана, бир ожизага нисбатан маломат ҷоҳини кавлаб, тухмат оловини ёқсан киши қаршингизда ўтирибди. Биз эса ул ожиза номидан даъвогармиз. Сиз нима ҳукм қилгайсиз — жазоси ўша бўлгай.

Тавба, овози ўша-ўша эдию, яримта бўлиб кўрпачаю чакмонга сингишиб ўтириши ғалати эди. Наҳотки бу ўша — бир вақтларги ўғрибоши бўлса? Акмал чўлоқнинг ақли лол, ўзи карахт эди. Ҳозир ўша жабрдийданинг оғзидан тамомила бошқа сўзлар чиқмоқда, сўксас-нетса, пасткашдан олиб, пасткашга солса, чапаничасига ҳақоратлар ёғдирса, чидаса мумкин эди, аммо мана бу босиқ-хотиржам сўзларига чидаб бўлмас эди. Нима рост — шу рост. Саломхон кеннйоникида пайдо бўлган анави келинчакка иқи тушгани, суйкалиб боргани, жиянининг қаватига тортиб, унга етишмок па-йида юрганлари, кечасилари уйқуси қочиб кетиб, ўша хонадон атрофида гирдикапалак бўлганлари — барча-барчаси рост. Аммо у Султонмуродга тегишли эканини билган бўлса ўлсин агар. Билганида, кеч бўлган эди. Бўйида бўпқопти, деган гап чиқиб кетиб бўлган эди.

Қурбон ҳожи қон талашгандек ўнг бетидаги норини қашлаб, томоқ қирди (у ғайри табиий, қора соқол остидан ажабтовур кўринар эди).

— Кимнинг ожизаси, дедингиз?

Даъвогар дабдурустдан айтольмай, айлантириб айтди:

— Танийсиз, тақсирам. Тепанинг пастида туришади. Ҳакимбек амакининг нокзори қаршисида. Янги қўшнилар.

Ҳожи рўпарасидаги имомга қаради:

— Ким? Сайнаб домламдан ўтгандами?

— Бор-бор, ўтганда янги хонадонлар бор. Худойига борганимиз бор. Нусрат хўжакаларга қарашли, — деди қотма имом қайта қўндоқдек чўккалаб.

— Ўшаларга тегишли келин, — деди ўзини даъвогар санаётган яримта одам — буларнинг валенеъмати.

Қурбон ҳожи — юзини соқол босган (ўзи ҳам нақ кўксига тушар), устига-устак суяги йўғон басавлат одам эмасми, чордана қуриб, ҳурпайиб ўтирас, ўсиб, елкасига тушган соchlаридан ҳам бурун чақчайган укки кўзларидан кўрқулик эди. Акмал чўлоқ тожик домла деб ном чиқарган бу хонанишин одамни айни туш қизифида бир-икки Изза йўлида туйқус учратиб, отиу ўзи бир ҳурканича бор. Узун оқ кўйлагу иштонини халвиратиб, бир девдай одам келаверса, эс-песи чиқиб кетибди. Оти ҳам тисарилиб, кишнаб юбориб эди. Бу эса, унинг бетига қараб ҳам қўймай ўтиб кетаверди. Шу-шу номини эшишса, этига титроқ киради. Келиб-келиб иши шунга тушибди. Яна бундай аҳволда!..

Сочли домла томоқ қирди. Овози ҳам аллақандай гулдираган, қироатлув эди:

— Эл-юрт бунинг кимлигини билади-ку, ҳукм чикора?! — деди у.

— Чикора-чикора, — деб тасдиқлади бидирлаган имом ҳам.

Бир бурда одам хумдай бошини тўлғади:

— Азизлар, азизлар. Уни биз ҳам биламиз. Биз сиздан шариат ҳукмини сўраётимиз. Токи гуноҳига яраша одил жазосини олсин ва биз ҳам эртага тонгла маҳшарда Тангри таоло ҳузурида

зулмкор сувратида туриб қолмайлик. Маймун<sup>17</sup> қиёфасида тирилмайлик. Усиз ҳам гуноҳларимиз кўп.

— Ҳукм, — деди ўша-ўша бесўнақай кафтига йўталиб, томоқ қириб, сочли домла, — шариат ҳукми маълум бу тоифага. Айниқса, бирорнинг пардаи исматдаги қизи ёхуд аёлига тухмат этган кишига саксон дарра урилгай, кам ҳам эмас, кўп ҳам.

— Шундай, шундай. Шариат буюргани шу. Тақсири, адашмадилар, — деб бидирлади имом ва Қуръондан оят ўқиди.

— Демак, бу кишимга ҳам?.. — деди қаддини зўр-базўр кўтариб яримта одам. У бирорнинг ёрдамисиз ўрнидан туролмаса ҳам керак эди. Ҳарқалай, шундай таассурот қолдиради. Аммо унинг ҳукм юритиши, қуввайи ҳофизаси ҳайрон қоларли тиниқ ҳам аниқ эди, тавба.

Сочли домланинг елкаси билан битта соchlari тўл-ғанди:

— Бу шариатнинг ўзгармас ҳукми. Қиёматга довур кетадиган. Аммо у кучга кирмоғи учун даъвогар керак, жабрланувчини эшитмоқ лозим. Усиз ҳукм — ҳукм эмас, — деди у кесиб-кесиб.

Акмал чўлоқقا жон битиб, иқи суйиб, домлага кўз ташлади: ажабки, унинг юзи нурлигина, ўзи бинойидек одам эди. Хаёлидан кечди: бошига қилич келса-да, тўғрисини сўзлагувчи эмиш.

Яримта одамнинг аёлларникidek нозик ҳам оқ қўли хонтахта устида кўринди.

— Ўзизга маълум сабабларга кўра, жабрланувчи Яккабоғдан бош олиб чиқиб кетиб улгурибди. Лекин биз бир марта суриштирган жойимиз бор. Шу боис даъвогарликни зиммамизга олиб турибмиз. Қолаверса, Саломпа борлар. биз у кишини биламиз-ишонамиз ва улар тарафдан даъвогар бўлиб турибмиз.

Елкани қоплаган соч, норози тўлғанди:

— Биз эшитмадук. Эшитмаган одам бир нима демоғи қийин.

— Шундай-шундай. Биз боримизда чакирмоғингиз лозим эди, — деди имом ҳам.

— Бемаҳалда аёл кишини чакириб келтириш — ўнгайсиз. Тушунарсизлар, деб ўйлайман,— деди тўр-даги одам.— Ўзидан сўрасангиз, инкор этолса — этсин.

Шу баробар бирор унинг биқинига нуқиди. Қараса, Азлар тоға. Камига қулоғига шипшири эди:

— Одамни уят-маломатларга қолдирмай гапир. Сени деб... бўлгани ростми шу гаплар?

— Зўрламанг, тоға. Белда белбоғи бўлса, айтади ростини, қистамасангиз ҳам, — деди кутилмагандан буларнинг валенеъмати, ўша шарти кетиб, парти қолган одам. Яна унинг хонтахлит сўроқларига ўласанми!..

— Ўз оғзи билан айтсин, гуноҳини бўйнига олиб,— бидирлади имом бунинг бетига қарашни ҳам ўзига ор билиб. Ана, покдомонлик! Ҳаммалари алағда — у нима деркин деб. Ёлғиз сочли домла ҳурпайиб ўтирибди. Ҳамон ўз фикрида событ. Ҳатто кўз қирини ҳам ташлаб қўймайди. Унга осмондан тушган анув китобнинг айтгани мухим, ўша — қонун. Сўзи сўзига, шарти шартига тўғри келиши керак. Ликилламайди мана бунисига ўхшаб. Ўлдирса ҳам шундай бир сўзлилар ўл-диргани...

Акмал чўлоқни бирдан ваҳм босди. Гуноҳи аниқ, суйкалиб боргани рост. Лекин бунчалик оғир гуноҳга бош суқаётгани тушига ҳам кирмаган бўлса-чи, жазолайверадиларми? Билиб туриб қилган билан, билмай қилганнинг фарқи бордир, ахир? Булар билмаса, Худо бор-ку, билади-ку. Ўзи асрар манави жоҳил, мута-ассиб бандаларидан?

— Нима қилиб қўйганини ўзи билмайди шекил, бу Худо бехабар, — деди имом кўк дўйпинини бошида айлантириб қўйиб ва ҳам билағонлик қилиб.

— Нега билмайди, балони билади бу энағар, — деб сўз қўшди Азлар тоға иршайиб: унинг дўст-душманлигини ажратиб бўлмай қолган эди.

— Билса, аллақачон ер ўпиб, кечирим сўраши керагийди-ку, — деди имом.

<sup>17</sup> Ҳадисга ишора.

Сочли домла имомга ўтли нигоҳини ташлаб, норозилик билдириди:

— Бизга унинг тавбаси нега керак? Тавбани Аллоҳга қиласи. Кечиргувчи ҳам Ўзи, жазо бергувчи ҳам Ўзи. Биз ким бўпмиз?! — деди овози гулдираб.

Акмал чўлоқнинг назарида аллақаёқдан кун чиқиб келаётгандек, ҳозир унга жавоб бергизиб юборишадигандек эди: зўр экан-ку, бу сочли домла деганлари! Қолаверса, нега ҳамма унга ёпишиб қолди? Кеча униси, бугун булар? Агар ҳаммалариadolat тараф бўлсалар нега ундан сўрамаяптилар? Кеча сени ким ҳафа қилди, ғассолни тахтасига тортиб кетди деб? Қозилик шуларга қолган бўлса, нега у нобакорни топиб келтирмайдилар? Мана бу ерда тикка қилмайдилар?

Шу асно баланд келмоқчи бўлди:

— Оламни бузган карнайчию балога қолган сурнайчими? Менга кечагиси ҳам етиб ортади, — деди тўрсайиб, камига қўшди, — сен бояқишини ким ўша алпозга солди, демаяпсизлар-ку. Қози бўлсанглар, баравар одил бўлинглар-да.

— Нима гап, дарвоқе? Нега биз бехабармиз? — деб шерикларига аланглади сочли домла.

Кулишни ҳам, кулмасини ҳам билмай, кечаги воқеани тушунтирган бўлишди.

— Қотириб кетибди-ку, азамат. Ҳеч кимнинг тушига кирмайдиган тарзда. Э, жиян, ўлганларимиз яхши бу кунимиздан, — деб чистонга олиб, ярасига туз сепди Азлар тоға.

— У шоввозниям чақиртирабсизлар-да шу ерга. Тоза бўларди ҳангома! — деб кулди навкар йигит, ўша Саъдулла деганлари.

— Керак бўлса чақиртирамиз ҳам, — деди буларнинг валенеъмати, — аммо бу кишининг фойдаларига бўлмайдими, деб қўрқаман. Қолаверса, шунақа бежо ҳаракатлариззи эвазига олгансиз сазою жазони.

— Мен эътироз билдираман, — деди кутилмаганида Акмал чўлоқ «сомон парчаси»га ёпишиб, — сизким,adolatли қози бўлсангиз, айтинг: киши гуноҳига неча қайта жазоланмоғи мумкин? Шариатда борми шу?

— Йўқ, — деди сочли домла турқини бузмай, — бир жиноят ёлғиз жазони тақозо этади, ортиғи ортиқ.

— Менга ҳам кечагиси бир умрга этади, — деди Акмал чўлоқ. У назаридаadolat тарозусини ўз тарафига оғдиролгандек эди.

Уй ичида бирдан ғовур қўпиди, ким ҳайратини, ким нафратини яшиrolмай қолди. Шу асно валенеъмат аталмиш ҳалиги одам хонтахтага шаппалаб:

— Шошманг, тақсиrlар, — деди ва шу бир оғиз сўзи ила ҳаммани тинчлантира олди. — Бизнинг бу кишига саволимиз бор: марҳамат этиб айтсинлар. Ё бехуда чақирилган, деб ўйлаётirларми?

Акмал чўлоқ ноилож қолди:

— Йўқ.

У яна ажаб бир бамайлихотирлик билан давом этди:

— Демак, ўзингизни оқ-оппоқ деб ҳам билмагайсиз?

— Йўқ.

— Яхши. Энди бизга айтинг-чи, — деди у яна, — ўз қизингиз ё жуфти ҳалолингизни ўша мушфиқанинг ўрнига қўйиб кўрганмисиз ҳеч?

У бўлак жавоб топа олмади:

— Йўқ.

— Унинг отаси ёхуд жуфти ҳалоли ўрнига-чи? — деди у.

Акмал чўлоқнинг боши тағин-да, тушиб кетди.

— Хўп, майли, адашибсиз,— деди у ўша-ўша сокин хотиржамлик ила,— билмай, гуноҳ кўчасига кирибсиз. Лекин шулар учун бир кун келиб сўралишингизни, Бош қозига рўбарў бўлишингизни билмайсизми?

— Кимга?! — деди Ақмал чўлоқ тушунолмай.

Яримта одамнинг юпка лабиу офтоб кўрмаган юзида ачиниш алматлари зохир бўлди:

— Демак... демак, Бош қози мавжудлигидан тамом бехабарсиз?

— У ким, қаерда?

Чўккалаб олган имомнинг ҳам юзлари аллақандай қорайиб кетган, сочли домланинг эса бошлари тушиб кетган эди. Ўртага чўккан совуқ жимликни ўша яримта одамнинг ўзи бузди:

— Тақсиirlар, кечирасизлар, бу жавобдан кейин менинг йиглагисим келадир. Ўзини ҳойнаҳой мусулмон санаб юрган бир одам эрта бириси кун ўларини, шу ўлганча номаи аъмоли беркилиб, қиёматда тириларини, Маҳшаргоҳда эса ҳамма қатори Бош қозига рӯбарӯ бўларини унуган. Барча қилмишлари учун жавоб берадиган кун борлигини ҳеч ким эсига солмаган. Биз қандай қилиб уни ҳукм эта оламиз? Уни Оллоҳнинг ўзига ҳавола этмакдан бўлак қандай чорамиз бор?

— Бор, — деди кутилмаганда овози гулдираб сочли домла, — Оллоҳнинг Китоби ила ҳукм этамиз. Покиза бир мўъминага тухмат қилгани учун саксон дарра урмоқ жоиз. Ана шунда Оллоҳни танийди, — деди у.

— Шариат устиворлиги учун ҳам жоиз, — деб бидирлади имом.

— Исботи-чи? — деб юборди жон аччиғида Ақмал чўлоқ туриб кетгудек бўлиб. Назарида, ҳозироқ опчиқиб, дарра остига ётқизишадигандек эди.

— Юзлаштирилур, — деди имом.

— Топиб келсинлар, ўша даъвогарни, — деб юл-қинди Ақмал чўлоқ. У энди эсини ҳам йўқотаётзган эди.

— Яхши, — деди кутилмаганда тўрдаги ҳалиги чакмонга ўралиб, ёстиқларга кўмилиб ўтирган бедаво кимса, кафтини хонтахтадан тушириб. Тиззасига олдими деса, тиззаси чакмон барлари остида билиниб-билинмас эди. Шунаقا кичкина тортиб кетибди, — Тан олмаса, олмай турсин. Ҳеч ким зўрлаб тан олдирмоқчи эмас. Лекин гуноҳини, ҳукмини билдириб қўймоқдамиз. Тўғри юрса — юрди, бўлмаса, қалтис қадам босган куни оёғини ерга теккизмай бир карра тутиб келтирмоғимиз ва шу кунги ҳукмни ижро этмоғимиз та-йин. Қолаверса, ул ожизанинг ҳасми, пушти паноҳи Султонмурод қайтмоқда деган гаплар бор. Жазони ўзига қолдирамиз.

Ақмал чўлоқнинг бошидан олов чиқиб кетди.

— Султон? Қачон, қаердан? — деб юборди ўзи билмаган холда.

У тиз чўкиб ўтирган жойидан сапчиб кетганмиди, бошқами, вужудини бир ёмон, тўхтатиб бўлмас титроқ босиб келмоқда эди.

Унга ҳеч ким жавоб бермади.

## 6. МОШААЛЛОХ!

— Шошманг, шу ерда тўхтанг, Саида,— дедим саб-рим чидамай. Мен бир нарсаларни англагандек, ўша Адолатпешанию унинг Бонусини танигандек эдим; бу анув кўҳлик жувон — эрининг гуноҳини сўраб келган пошша келин эмасми ахир? Ва шоша-пиша ўрнимдан тура бошладим:

— Ойим ётиб қолмадилармикан?

— Вой, адаси, алламаҳал бўлиб кетди-ку. — деди хотиним

— Шунча воқеалар ўтиб, ойим билмайдиларми! Билишлари керак. Сўраб борган у жувонни ҳам, эрини ҳам! — деб уйдан чиқавердим.

Чиқсан... ойимнинг уйларида чироқлари ёнуқ. Баъзан шунаقا ярим кечаларда туриб кўзойнакни қийшиқроқ тақсанча, отинойиларидан қолган Куръонни ҳижжалаб ўтиргувчи эдилар. Ҳозир ҳам... бориб қарасам, ўша китобга чиппа ёпишиб ўтирибдилар. Мен эсам, эшикни

очаримни ҳам, қайтиб кетаримни ҳам билмасдим. Очай десам, чалғитишдан хижолатдаман, очмай десам, ичим ғурмишлаб ётибди. Наҳот ўша яримта одам ўзи қолиб — бирорларнинг ташвиши билан яшай олса? Бунинг устига Султонмурод акамнинг номидан иш кўраётган бўлса?! Муддаоси нима? Жилла курса, ойим билсалар керак бу тарихларни?

Ногоҳ қайрилатуриб, оёғим остоңадаги жомга тегиб кетди. У эса даранглаб зинага, ундан ҳовлига тушиб, думалаб кетдию бир ерга етганда ўнгланиб, лапанглай-лапанглай тинди. Тингани ҳам бор бўлсин, шовқини етти маҳаллани тутган эди.

Ичкаридан ойимнинг овозлари чиқди:

— Ким, келинпошша?

— Мен, ойи, — деб овоз бериб кириб бордим. — Ётганиз йўқмиди?

— Кел, тинчликми? — деб у киши кўзойнакларини олиб, китоб бетини ёпдилар.

Мен кўрпача устига тиз буқдим.

— Эсингиздами, ойи, Султонмурод қайтиби, фалончини ундаи қипти, пистончини бундай қипти, деган гаплар чиқкан-у, аммо ўзи қорасини ҳам кўрсатмаб эди? — дедим.

Ойим китобни жилдига сола туриб, илкис қарадилар, қўллари жилд ичида қотди:

— Нима, чиндан ўзи эканми?

— Қаёқда! Тамоми бошқа бирор, айтсан ишонмайсиз, — дедим ҳамон ҳайратимни ичимга сифдиrolмай.

— Қўй-е, шунга ишониб ўтирибсанми? Ким юрак ютиб у ишларга бош қўшаркан, — дея ўтирган жойларидан узалиб, жилдни токчага қўйдилар.

— Эсингиздами, бир қўхлик жувон эрининг гуноҳини сўраб келиб эди, эски уйимизда?

— Қачон? — Ойим хотирлай олмай, юзимга тикилдилар.

— Акам шу ердалигида. Баҳриддин ошнасининг қотилларини топиб, жазосини бериб юрган кезлари.

— Парпини айтасанми? Унинг хотинидан бўлак ким кепти?

— Ўша-ўша, отнинг қашқасидай таниш ўғри. Топдиз, ойи.

— Йўғ-е, яримта ҳолига-я? Аканг уни қай ҳолга солиб, Баҳриддиннинг жанозасига олиб борганини кўрмаганмисан?

— Кўрганман, — дедим мен.

— Қайтиб, қандай одам бўпқопти? Астағириуллоҳил азим, қаёқдаги гапни гапирасан? — Ойим кўксиларига туф-туфлаб қўйдилар.

— Шуни айтинг, ҳамма Султонмурод қайтиби, деб ўтиrsa, у экан...

— Сен қайдан била қолдинг? Уйга кириб ўтириб қолган, деб эшитардик-ку уни.

— Яна нима деб эшитар эдингиз, ойи? Қаерда туришарди? — Мен сандалга кўксимни бериб, кистай бошладим. Кейин кириб келган Саида ҳам бу гаплардан эси оғиброқ бир чеккага чўқди.

— Қаерда бўларди, ўша тепанинг ортидаги кўча ичида-да. Ўрикзорга етмасдан эдимикан. Лекин бирор ўшандан бери остона ҳатлаб, кўчага чиққанини кўрган эмас, болам. Ҳатто муштипар онаси қазо қилганда ҳам бел боғлаб туролмаган, ҳоли маълум-ку. Фақат эшикдеразаларига парда тортиғлиқ бир чиллахонага ўхшаган уйда китоб кўриб ўтиради эмуш.

— Қанақа китоб, балки Қуръондир? — дедим тусмолларим тўғри чиқаётганидан ҳовлиқиб.

— Балким. Шайхим қори ака келиб, ибодатга тушириб кетипти, савобга қопти, деган гапни ҳам эшитганмиз. Қийин-қийин — ўша қўхлик хотинига қийин бўлган. Аёл боши билан ўша яримта эрни шунча йил оқ ювиб-оқ тараб келяпти.

— Кейин-чи, ойи, кейин нима бўлган?

— Нима кейин?

— Зилзиладан кейин-да, қаёққа кўчишган?

— Қурбақаободга бўлса керак, — ойим яхши эслай олмай юзларини сийпаб қўйдилар, кейин

хотирлаб қолиб, тушунтиридилар, — Ҳа, дарвоқе, кўчишга қудрати етмай дўмга чиққанакан, эски ошналари эшишиб, участкасини битириб беришганмуш. Кўчганми-кўчмаганми, билолмадим.

— Кўчган бўлса, қаерда бўладио, кўчмаган бўлса қаерда, ойи? — дедим ичим ёришиб келиб. Мен унинг изини топгандек, топаётгандек эдим.

— Билмадим, болам. Ўтириб қолган одам эртасини ўйласа, участкага кетса керак. Дўм ёқиб қолмагандур. Сен яххиси поччадан сўра, билишлари керак. Ҳаммалари ўша томонга кўчишдику.

— Яхши айтдиз, суриштириб кўраман, — дедим-у, бошқа янгиликни — ўша яримта одам Маҳфуз кеннойимни чақиртириб, баъзи нарсаларни суриштирғанию акамнинг аёлини ўз ҳимоясига олмоқчи бўлганларини айтолмай турибман. Ё ўзлари билармиканлар?

Тепамиздаги чироқ ҳамма ётиб бўлган бир кечада яна ҳам ёруғ тортиб, оппоқ нурини аямай сочар, жимжит кечада нур ўлчагичми, нимадир шифиллаб айланар эди. Ташқарида эса, уйқу билмас кўклам шамоли хувиллаб, бўғотларга урилар, ҳовлидаги яланғоч шотутлару гирос тупларини чайқатиб, ўпиб ўтар эди.

— У киши бир сира бизга-да ҳамият қилмоқчи бўлган экан, Маҳфуз кеннойим шу ердалигида, эшигандисиз?

Ойим бош тўлғадилар:

— Хабарим йўқ. Лекин анув балогинага йўлиқкур Ақмал чўлок тирғалиб юрган кезлари шунга ўхшаш бир воқеалар бўлганмидикан?

— Эсланг, ойи, эсланг, ўша қандай воқеа эди? — дедим қистаб.

— Кимдирми, кимлардирми жувоннимаргнинг ўзини Тепамасжиднинг товутхонасига қамаб кетганди. Мен акангни йигитларими, деб ўтирадим. Шунча воқеалар ўтиб бизга миқ этиб кўймаган кеннойинг ўша кезда... шаҳарга тушиб чиқаман, деб йўқ бўлиб қолиб эди-да, болам.

Ойим шу гапларни айтаяптилар-у, мен ичим тошиб ўтирганча гоҳ Сайдага им қоқиб, гоҳ айтавурайми, деб шивирлайман. У бўлса, бир менга, бир ойимларга қараб, елка қисади.

Ахийри ўзлари сезиб қолдилар:

— Ҳа, Мақсадхўжам, нима гап? Нимани айтолмай турибсизлар?

— Рост, айтолмай ўтирибман, — дедим ёрилиб, — суюнчи беринг, ўша келинiz топилди!

— Мошааллоҳ! Қаерда экан? — дедилар ойим бир ерга етиб. — Отасининг юртига ўтиб кетган эканми?

— Йўқ, ойи, шу ерда, қўл узатса етгудек жойда экан! Ишонасизми?

— Қандай? Кимни қора тортиб бориб қолибди?

— Акамнинг ҳов бир ошнаси бўларди, поччаникода турганда топишган, Чаман деган...

— Анавинда сенга хат ташлаб кетганми?

— Ҳа, ўша. Ўшаникига бориб, туриб қолган экан.

— Уни қайдан билибди? Қандай топиб борибди?

— Билмасам, — дедим ҳаммасини айтиб, юракларини ёриб юборгим келмай, — Қолаверса, анув қунги болакай — ширинтой унинг ўғли эди.

— Вой, ўлмасам! — дедилар ойим юзларини кафтлари орасига олиб. — Ўғли дейсанми?

— Ҳа, ойи, уларникида болохонада туришади экан.

— Аканг Султонмурод... биладими шуларни?

— Билмадим, ойи, билмадим, — дедим у хўрликми, нима, менга ҳам юқа бошлаб.

— Ошнаси-чи? — дедилар анчадан кейин ўзларини хийла босиб олиб, — хатида нима дебди экан?

— Акамнинг дарагини топганмиш, шунга жўнаб кетибди экан, — дедим бўшашиброқ.

— Вой, қанча бўлди-ку?! Келмадими ҳалиям?

Мен ерга қарадим: ичимда нимагаям айтдим, деб афсус чекардим:

— Ўша кетганча кетиб боряпти.

— Илоҳим, яхши хабарлар билан келсин бу ёқда Маҳфуз келинувзанинг дараги чиқсан бир кезда. Ило-ой, Ўзинг шуларга ҳам хотиржамлик ато эта қолгин. Туп қўйиб, палак ёзишларига имкон бера қолгин.

У киши дуо қиляптилар-у, мен кафт очганча игнанинг устида ўтирибман. Дуо яхши. Лекин у ёғини сўраб қолсалар-чи, нима дейман?

Ниҳоят, турдик. Улар ҳам мамнун эдилар, биз ҳам.

Яхшиям у киши ўзи қаерда, деб сўраб қолмадилар.

Яхшиям: шошма, жужуғи-чи, жужуғи қаерда, нега сен олиб келган жойда яна олиб кетишиди, демадилар.

Яхшиям Олим ўзи нимага кепти, у қаердан пайдо бўлиб қолди? Акаси Султонмуроднинг қаердалигини мана бу тўзиб қолган оиласини билмайдими, деб қолмадилар.

Яхшиям сен ўзинг қанақа жигарсан, шундай газеталарда ишлаб Тангритоғдек бир юртларга чиқолмасанг, акагинангнинг дарагини ўзинг изламасанг, сени ким айтади Улуғхўжабойлар авлодидан деб, паст-баландни тушунган деб! Ўзингга эн бўлолмайсану бош-қага қандай енг бўласан, деб қолмадилар.

Шундай деганларида, миқ этиб оғиз оча олармидим?

Яхшиям бу гапларни кейинга қолдирдилар.

## 7. ОШИЁНИДАН АЙРИЛГАН ҚУШЛАР

### 1

Ўз уйинг — ўлан тўшагинг. Саҳарга яқин ётиб ҳам бир мизғиб олсанг олам-жаҳон ором топиб, тиниқиб турасан. Саъваларми, сариқ ёхуд қизилбош жимит қушчаларми, бири олиб, бири қўйиб, деразамиз ортидаги кўксултон тепасида (балки ўриқдадир) чив-чивлаб чулдиришар, мен тепамга кўчиб келган қушлар бозоридан уйғониб кетган эдим.

Воҳ, кўклам нафаси бу митти қушчаларнинг барини маст этиб, дараҳтларнинг офтоб инган шохчалари — қир учига ўтказиб улгурибдими! Улар қорин ғамини тамом унутиб, бир-бирларига роз айтишармиди, сайраб-қувнашармиди ёхуд кўкламга етказган Аллоҳга ўз тилларида тасбеҳоту ҳамд айтишармиди, ажратиб бўлмасди. (Балки ҳар иккиси ҳамдир). Олам шунчалар мунаvvар, чаҳ-чаҳларга тўла эдики, дафъатан қай ошёндамиз — эски ҳовлимиздами, янгисидами, англай олмай қолган эдим.

Туриб, азза-базза кўчага боқдим. Янгисида эканмиз. Офтоб кўксултоннинг ярмига қадар тушиб қолганига қарамай ҳали болакайлар уй-уйларидан чиқиб, ғўра қоқишига тушишмаган эди. Тушишсами, бу жимит қушчалар қайга ҳам қочишар экан?! Унгача яйраб олмоқда эдилар. Фақат дарвозамиз тагида йилт янги — қора олхўридан ҳам қорароқ бир машина турибди. Мен унинг орқа ярминигина кўрдим холос. Олам шундай гўзал ва шодумон, руҳим ҳам шундай тиник ва енгил эдики, қанот чиқариб учиб кетсан-да мумкин эди. Ҳатто машина кимники эканини ўйлаб қўйиши хаёлимга келмасди.

Ювиниб-тараниб келиб, салом бергани ойимларнинг олдиларига кирсам, воҳ, ким ўтирибди денг?! Бир вақтлар акамнинг Бўзсуvdаги қароргоҳига осмондан оёғини узатиб тушганлар алам-аччик устида ушлаб кетган кичкина акам — Олим акам ўтирибди!

— Ие, ўзизми? Вой, сизни, — дея бир кўриниб йўқолиб қолган холаваччамни қучоқлаб олдим. — Хабар бермаганиззи қаранг!

Эшикнинг тагидаги йилт янги ғиротни кўриб ҳам(!) пайқамаганимни қаранг!

— Эй, мирзо, сени ҳам тутар кун, топар вақт бор экан-ку! — деб Олим акам ҳам куракларимни силар, қучоғидан қўйиб юбормас эди. Сўzlари бир самимий, ичининг туб-

тубидан отилиб чиқмоқда эди. Тавба, у ҳам самимий бўла олар экан-а! Жигарларнинг қадри энди билинибдими?! Қолаверса, мен унинг қучогида ўзимни жимит болакайдек ҳис этар, йўқ бўлиб кетгандек эдим. У бўлса, ўша қилтириқ Олим акам бўлса, йиллар ўтиб, Султонмурод акамдек норғул тортиб кетган, катта киши нусхи уриб тоғаларимизга ўхшаб қолган, ҳаммадан ҳам бурун ундан бир турлик — энг яқин жигарларнинг ҳиди уфуриб, мен довдираб қолган эдим.

- Нечук-нечук, қаранг, қандай ярашиб туриби.
- Мана, излай-излай, суриштира-суриштира... топиб келдим — деди у ҳам тўлиқиб.
- Шунаقا, зилзилалар «шарофати» билан сочилиб кетдик ҳар ёқларга.

— Тағинам тариқдай сочвормабди, дўмларга чиқарворса, нима қилардингиз? Бизга ўхшаганлар қайси тошқўргоннинг қайси каталагидан топарди?! Бир парча бўлса ҳам ҳовли-жой насиб этибди-ку. Узоққа тушмабсизлар-ку туғилиб ўсган диёрларимиздан.

Ич-ичимдан ҳайратга тушаман: шу Олим акамми, а? Ўша жигаримизми, а? Одам шунчалар ўзгариб кета олар эканми? Ё булар ҳаммаси вақтинча, синашта бўлиб кетгунчами? Ундей десам, ойим ҳам чиппа-чин ишониб, мутаассирланиб ўтириптилар. Рўмолларининг учини дамба-дам мижжаларига босиб, бизга қараб-қараб қўяяптилар. Камига шивирлаб дуолар қиляптилар: Илой, ҳеч кимни бизчалик узилиштирмагин деб.

Ўтиридик. Ойим дуо қилдилар.

— Илоҳим, от айланиб қозигини топгани рост бўлақолсин. Акагинанг ҳам қайтиб, бағирларинг тўлақолсин, ўз диёрларингда оталарингни чирогини ёқиб ўтирадирган кунлар ҳам келақолсин. Қандай одамларнинг фарзанди эдингиз — Оллоҳ Сизларга ҳам бир қўним берақолсин. Ўзи тўзим ато этсин. Омин.

— Оллоҳу акбар, — дея юзларимизга фотиха тортдик. Назаримизда ойимнинг дуоларига ҳамма холалариму тоғаларим қўшилишиб тургандек эдилар. Ўзимни бир енгил ҳис этардим, бир енгил ҳис этардим...

Суҳбатимизга ўз-ўзидан файл кириб, меҳрларимиз ийиб келмоқда эди.

— Ўшандан бери қўнғироғингни кутаман, дарагинг йўқ, мирзо,— деди Олим акам гина қилиб, гинаси са-мимий ҳам беғубор эди.— Ахийри ўзим келавердим.

— Ундан гина йўқ, акаси, ишига тузукроқ жойлашиб олсин, бормай қаёққа боради. Борса-келса, оқибат уланади-да, — деб жонимга оро кирдилар ойим.

— Узр, чиндан алаҳсиб кетибман, хизматчилик, — деб узримни қалаштирдим. Аммо кейинги воқеалардан (кеннойимнинг топилишию Ёдгорни бехавотирроқ жойга олиб кетишлари, Чаман акамнинг омонати, ҳали у ёқка ўтишим зарурлигидан) оғиз очмадим. (Очганимда ҳам нима дердим, унга айтадиган гапларми?!)

Олим акам сипоришилади:

— Ёлғизлик Аллоҳга ярашади, бу дунёда ҳамма бир-бирига суюниб яшайди, дердилар адам раҳматли, энди билингапти, — Олим акамнинг овозида аллақандай маҳзунлик бор эди. (Айтмоқчи, у ўшанда ёлғизман, девди).

Мен чой узатиб, дастурхонга қистадим. Ойим эса ҳеч нарсадан хабарлари йўқ, астойдил гинахонлик қилар эдилар:

— Бир йўла келинни, болаларни опкелавурмабсан-да, танишиб олишарди. Сизлар келардинглар, булар боришарди. Бу дунёning зийнати шу-да.

Олим акамнинг томоғига ўксуққа ўхшаш бир нарса келиб-тиқилиб, чукур тин олди:

— Эй, хола-я! Менинг бу юришим, бу савлатларимга ишонманг, — деди чапаниларча қўл силкиб, — хизматчилик деб юраверибмиз юртма-юрт, буюрган мамлакатига қўчиб. Кўч ҳам нима — иккита жомадону сариқ хотиннинг сариқ-сурук болалари! Ҳаммасини самолётга ўтказиб, чиқкан шаҳрига жўнатворганман, хола. У бефотиха, беникоҳ ортирганларимни. Юрганаканмиз бизам мусулмонмиз деб...

Ойим юзларини ушлаганча, тилларини тишлиб қолдилар, ўртага ҳеч гап сифмайдиган бир

жимлик чўккан эди. Ахийри ўзлари юмшатдилар:

— Вой, холанг айлансин, шундай экан, ҳа, келавурмайсанми? Сигмаган жойингми?

Олим акам хижолатомуз жилмайди:

— Унчалик деб тушунманг, хола. Жудаям кўчада қолганим йўқ. Ишхонам, оғайнилар бир хонали уй тўғрилатиб беришди. Ўшатдаман.

Ойим кўнмадилар:

— Барibir-да. Эркак кишининг ётари бор, турари бор. Қолаверса, сочинга оқ оралаганда салти-свой юришинг яхшими! Ҳалиям бўлса, кел. Қанча уйлар ҳувиллаб ётибди.

— Ҳимматизга раҳмат, холажон. Ҳали ҳамма нарсадан воз кечиб, тарки дунё қилиб кўйганимча йўқ. Ниятларим катта, — деди у гапни ярим ҳазил-ярим чинга буриб.

— Ҳа-а, ана энди эсинг кирибди, — дедилар ойим аяб ўтирумай. — Шариатни нимага чиқарган?! Кўчадан топган-хотун бўлмас, хотун бўлсаям-зотун билмас, деганлар. Тағин сен кимларнинг фарзандисан-а! Вақтида кутулибсан. Ҳай-ҳай, фалокатинг арибди. Ҳалиям кечамас. Топилар ўзингга ярашаси. Оллоҳ рози бўладирган турмуш қайдаю ҳалол-ҳаромни ажратмайдигани қайда! Ўзим бош бўлиб топганим бўлсин.

Олим акам хижолатларга ботиб қизаринди, тўлғонди, ахийри «ҳай-ҳай»лашга тушди.

— Ҳай-ҳай, холажон. Индамасам, тўйни ҳам бошлаб юборасиз шекилли, — деди ҳазилга йўйиб.

Ойим бўш келмадилар:

— Ўзинг пушмондамасмисан, ишқилиб?

— Нимадан, хола?

— Ўша сариф-мошагингни жўнатворганингга-да.

— Ҳе-ҳе! Елкамни чукури кўрсин. Умрнинг эговини...

— Шугинами? — дедилар ойим.

— Ўз динингда бўлмагандан кейин... маҳлиқоси ҳам татимаскан.

— Ҳа-а, ана бу гапинг дода гап бўлди! Қайси қавм-га яқин юрсанг, ўша қавмдан бўлиб кетасан, деб бекорга айтмаганлар. Болларинг-чи, улар ҳам онасига тортганмиди?

Олим акамнинг боши солиниб кетди:

— Секироқ айтасизми?..

Ойим ёмон тўғрисўзлар-да: аяб ўтирасдилар, меҳмон-ку демасдилар:

— Ўзингният кўзинг қаёқдайди, ақлинг қаёқдайди? Шайтон тузоғига илинибам сезмадингми? Ўсасан десалар, қиласерибсан-да буюрганларини? Қошдан қовоқ қайтармай?

Олим акам қорайиб қора-қизил тортиб кетди, ойимнинг бетларига қарай олмасди. У хурпайиб олган, назаримда мана ҳозир портлар, портлаб: «Ўзлариз мени қаерга жойлаб қўйиб эдингиз? Ким қилмоқчи эдинглар?!» деб юборадигандек эди-ю, ёрила қолмасди. Ахийри ҳам... ёрилмади. Ичига ютиб, мардлик қил-ди.

— Нима бўлса-бўлди, бўёғи йитди, хола, — деди бўғиқ овозда.— Кўргулик экан — кўрдик, ками бўлса... чидаймиз.

Қарангки, мен уни... шу туриши, шу гапи учун... яхши кўриб кетдим. Уни шундай деб... айбларини мардона тан ола билади, деб (!)... ҳеч ўйламаган эканман. Шу хурпайиб ўтиришида ҳаммадан кўра кўпроқ Султонмурод акамга ўхшаб кетган эди. Балки мен адашаётгандирман, навбатдаги устамонлиги, хийласи, артистлигидир бу. Лекин менга боягидай туюлиб, ёқиб қола бошлаганди. Балки бу акамни жудаям соғинганимдан, унга ҳеч кимни ўхшата олмай юрганимдандир. Ҳозир унинг анув гапларини (хатида тайинлаганларини!) ҳалига қадар бунга айтмаганимни эслаб, очиғи, бир ғалати тортдим. У омонат гаплар хусусида чинданам оғиз очиш мавриди энди келган, келаётган эди. Аммо Худонинг хоҳлашини қарангки, бунга ҳожат қолмаганини кўриб турадим, кўрганим-сезганим сари енгил тортиб борардим. Илоҳим, ҳожат қолмагани рост бўлсин!

Олим акам эса, ич-ичида ойимнинг ҳукмлариними, нимани қутар, у кишига зимдан қараб-қараб қўяр (чиндан-да, маслаҳат солиб, қора тортиб келадиган яна кими бор?! Кўлдош тоғамларнинг тергашларидан безганми, у кишини унча ҳушламайди, ҳарқалай борганини эшитганим йўқ), жим эди.

Ойим сезгир эдилар, уни алқаб курагини силаб қўйдилар:

— Умрингдан барака топ, тўғри қиласан. Бунақа вақтда сабрдан чиройлиси йўқ. Сабр Оллоҳга ҳам хуш келади. Лекин сен энди маслаҳатга ҳам қулоқ сол. Бундай юртма-юрт юришларингни қўй. Қаватимизга қайт. Уй қилсанг, жой қилсанг, бир мўминага уйлантириб қўйсак, оталарингни чироғини ёқиб ўтиранг қандай яхши!

Олим акам «ҳов, менинг эски дардларимни, яраларимни қўзғаб нима қиласиз, ҳамма сиз ўйлаганча бўлса, қани эди!» дегандек ойимларга қараб қолган эди. Сўнг совуб қолган, қаҳрабодек чойни бир сипқориб, пиёлани кафтида тутганча ўзи сезмаган ҳолда тиззасини эзғилашга тушди.

— Уни демасанг, ана, нариги кўчаларда нечта жой бўш турибди, шаҳарга чиқсанг беришар. Шунча жойларингизни тортиб олган ҳукумат бир парча ер берса берибди, ҳақи кетмас. Бутун олам — ўрисам, чулчутам Тошкандга келиб ётганда, нима, сизларга мумкинамасми? Ҳақсиз деган жойи борми ё?

Рости, ойимлардан қози чиқсами, олам-гулистон бўлиб кетар эди. Олим акамнинг юзига нур югуриб, ўзингиз зўрсиз-да, холажон, дегандай суйиб тикилди.

— Бўлмаса, ҳаракат қил. Нимадан уялиб қисинасан? Улар уялиб қисинсин, ким-ким — Сизларни унутиб қолдирганига. Жой ажратмаганига, — дедилар ойим ҳовурларидан тушмай. — Энди Худодан қўрқмайдиганларнинг замони бўпқоптими? Шошмай турсин, Оллоҳ ҳам кўрсатиб қўяр. Ё Оллоҳга қийин эканми, уларнинг ўрнига бошқасини келтириб қўйиш?!

Олим акам у кишини юмшатишга уриниб узанди, кифтларига қоқиб «холажон»лаган бўлди. Ўзи эса, ойимнинг бу ҳолларидан ич-ичидан завқланиб ора-орада менга ҳимо қилиб қўяр, «қара, қандай холам, ойинг борлар» демоқчи бўлар эди.

— Сиз нима десангиз — шу, холажон, — деб юборди ахийри ийиб кетиб. — Ўзимам одамларга ўхшаб қўним топиб, уруғим деб, аймоғим деб, борди-келдилар қилиб, яшашни соғинганман. Етар, шунча тентираганларим. Шунча топиб-топиб — нима кўрдим? Қолгани ўша кўчадаги мошинми? Сотсам, етиб қолар бир бошпана қилиб оларга?

— Машинангни қўй, — деб уришиб бердилар ойим.— У ҳам бу дунёни зийнати. Сен бир уй тиклайман, ватан тутаман дейсан-у, қариндошлар қараб турарканми! Ҳашар биланам тиклаб беришади. Ана, Усмон тоғанг, бинойи ўтирибдилар. Ўзларига қолса, бир ғишт қўя олармидилар! Ундан кўра, сен кириб, дуоларини олиб чиқ. Кейин ҳамма ишинг ўнгидан келиб, юришиб кетаверади. Дуода гап қўп.

Олим акам у кишининг танбехларини олиб, бош силкиган бўлди, сўнг қўлинни очиб, изн сўраганча қаради:

— Энди дуо қилинг, хола. Мен Мақсадхўжангизни бир етга опкетгани келганман. Буниз вақти зиқ одам, ҳали ишга бораманга тушиб қолади.

— Мана шунақа-да, келмасларингдан кетаманга тушиб қоласанлар, — ойим азза-базза хафа бўлиб, терс қарадилар.— Ҳа, келин битта овқат солсин, тузук-куруқ дастурхон ёзсин...

— Кеча жужур эдим, шошадиган жойим йўқ, — дедим мен манзират учун бўлса-да. Аслида борадиган ерларим қалашиб турибди!

Олим акам қўлинни туширмасди:

— Қайтага яхши. Қайтиб келамиз. Ош дам егунча қайтишга ҳаракат қиламиз, — деб қистади.

— Келасан-а, келмай қолмайсизлар-а?.. — у киши обдан ишонгач, жавоб бериб, дуо қилишга тушдилар. Ундан кўра қаёққа борасанлар деб тергасалар-чи, сўрасалар-чи, менга шу

авлороқ эди. Негаки, мен вақтимни қизғаниб, ичим ҳалак, лекин мезбонлик номим бор — андеша сақлаб, индай олмаётірман. Ҳали қаёқдаги сайру саёхатга ё бўлмаса архивгами, суриштир-суриштиргами, бошламаса эди. Ўзим борадиган ерларим камдай. Қани айтольсалам...

## 2

Хайрлашиб чиқиб, Оврупонинг учқур, аммо бизнинг кўчаларга хайф «Волва»сига ўтирик ҳам, (тавба, улар бу номни биздан кўчирганми ё биз улардан? Ўхшашлигини! Волва-Волга! Эгизак-ку!) кўчамиз болакайларининг кўзини ўйнатиб ғувиллатиб кетдик ҳам Олим акам қаёққа отланганимиз ҳақда оғиз очиб қўймасди. Ичимни тоза пиширмоқчими, туширмоқчими, билиб бўлмайди. Бунинг касби-да, ўзиям шунаقا ичимдагини топ хилидан. Бошқа одам алазамон сир бериб, гуллаб қўярди.

Мен ҳам атай сўрамаяпман. У қани парво қилса, қора қирғийини таърифини келтириш билан овора:

— Ҳў, ўша ёқнинг кафтдек йўлларида бу ўқдик учсин-да. Юз саксондаям қилт этмайди!

— Сув текинга олмагандирсиз, ахир? Бизнинг кўчаларни била туриб? — дедим.

У оғзини бир ажойиб тўлдириб, тилини «тоқил»латди.

— Қаёқда! У ёқда сув текин. Ҳамма қимматчилик бизда. Қолаверса, шундан бошқа нима қопти менга? Ҳаммасини шипириб кетди-ку анув юҳо.

— Нечук бунга индамади, тиши ўтмадими? — дедим кулиб.

Олим акам чекаётган бир ажойиб сигаретини чапаничасига назокат билан (жимжилоги учи или) ойнадан чертиб юборди.

— Қаёқда! Пайқамай қолди олганимни! Орқамдан етиб келарини билса, ямламай ютарди-ку.

— Сизними, машинаними? — дедим ҳазил аралаш.

Акамга бу хуш ёқиб ўтирган ерида иргишлаб қўйди:

— Топдинг, мирзо, нақ иккимизният ютиб ортидан чиқаворарди.

— Тирик юҳо экан-да, унда?

Олим акам қош учирди:

— Ҳа, баракалла. Олим акангга ҳам осон тутма сен. Ана ўшанақа жодугарларининг қўлидан омон чиқиб келиб турибди. Билдинг.

Сўнг... бир ажойиб ўйинқароқлик ила (гўё барча ўша нохушликларни) «Волва» ойнасидан чирт этказиб тупуриб ташлаб, қўшиб қўйди:

— Бу фироту қолган умр — фойдага қолиб туриди-ку.

— Буюрсин, — дедим.

— Раҳмат, — деб миннатдор қараб қўйди у. — Ле-кин ростини айтсан, кўзлари куйиб ортимда ҳиқиллаб юрган кўзирчалар ҳам аллақанча. Билмайдики...

— Сотинг дебми?..

— Ҳа-да, дарди харина дегандай...

— Чиндан кўз қиймайдиган хили экан, — дедим.

— Қиймаганда нима, бир темир-да, — деди мени ҳайрон қолдириб.

— Унда, нега «лойлаб» юбора қолмайсиз?

Олим акам қувлик ила кулиб қўйди:

— Менам анойилардан бўлиб қолмоқчимасман.

— Тушунмадим.

У энди шарақлаб қулди:

— Ҳозирча бозорга соляпман! Кўз-кўз қилиб, таранг қилиб юриппан. Обдан кўзлари куйиб, ўпкалари шишсин, ана ундан кейин... пул топиб, ақл топмаган бир лақмасига ўтказвораман.

— Ие, ҳозир нима девотувдиз? Шундан бошқа нимам бор деб... — Мен ҳалитдан ичим ачиб,

машинанинг момиқдан-момиқ ўриндиқларига, йилт янги (улар чиндан бу оламни эмасдай эди!) анжомларига қараб қўйдим. Ўзиям пошиои машина экан, юрган сари бир лаззат топасиз. Бизнинг шу алмисоқ йўллардаки бир товус, бир эрка кийикдай сузиб боряптими, у ёгини қўяверинг!...

Акам хўрсинди:

— Очиғи, холам хақлар. Дунёга келиб, бир ошиён тикламаган, бошига бир бошпана қуриб, бир ерни ватан тутмаган одам — одамми! Мен ҳов илгариёқ ният қилиб қўйганман, эсон-омон қайтсам, Яккабоғдаги қўргонимиздек бир қўргон солай, жой қилай, деб. Номимиз қолмасаям, нишонимиз қолсин, авлодларимиз қолсин! Қолаверса, отам раҳматли юртга қайтинглар, юртни ватан тутинглар, жигарлардан ажраманглар деб... васият этганлар.

Иккимиз ҳам жим қолдик.

Машина катта тупроқ йўлда ортидан бир олам оқ тўзон қолдириб, ўзи ўша тўзондан қочганча ғизиллаб бораркан, акамни билмайман-у, менинг қўзларим ёшланиб келиб, ичим остин-устун бўлиб кетди. Кўз олдимда эса, ўша ўзим билган, болалиқдан таниш вайронা — холамгиларнинг Яккабоғдаги валонгор қўргонлари — томлари очиқ, деворлари қор-ёмғирларда нураб-емирилиб тугаёзган ўша уйлар турардилар. Бу улар ташлаб кетган ошиён эди...

Очиғи, сабрим етмади.

— Қаёққа боряпмиз, ўзи? — деб юборганимни сезмай қолдим.

Олим акам ўгирилиб қараб, жилмайиб қўйди. Лекин жавобга ошиқмасди. Топ-чи, тополмадингми, шаҳар берасанми, деб ҳазиллашадиган бир алпозда эди.

Мен эсам, ичим қизиб, шаҳар беришга-да, тайёр эдим.

У тушунди:

— Аввал анув — кўчага тушган қайрағочли ёлғиз мозорга, сўнг сутчиникига ўтамиз. Зўр янгиликлар бормиши.

— Қайси, боғларингиз пастидаги ўша қайрағочзоргами? — дедим юрагим бир орзиқиб, — шунча жой туриб... ўша йўлга тушибдими?!.

— Кимдан хафа бўласан, дуди-фифонинг чиқиб? Бало келса хўлу қуруқ баробар ёнгай, бу ер мозор, бу ер бозор деб ўтиргай ҳеч ким. Худонинг хоҳлаши. Қолаверса, дунё кўрсанг — биласан, бу ернинг мозор ўтмаган бирор жойи қоптими? — деди у.

Мен уни тушунгим келмай қизишдим:

— Қандай халқ эдик? Ким бўлиб боряпмиз?! Оталаримиз нон ушоқ тушган ерни ўраб, мозорот этиб, оёқ бостиргаган халқнинг болалари... бугун ким бўлиб ўтирибмиз! Томошабинга ўхшаб?..

Олим акам ўгирилиб, юзимга синчков бокди:

— Тузуксану, — деди, — газетангга ҳам шундай деб ёзавурасанми, ўтказишадими?

— Биламан, ўтказишмайди, — дедим тўнғиллаб, лекин тилимнинг учидагини юта олмадим,

— Индамас экан деб... топтайверадиларми... азиз жойларни?

— Нимасини айтасан, бу ернинг етти қаватигача азиз-ку, тегиниб бўлмас жойлар-ку, — деди у ҳам.

— Улар эса, хор қилиб кавлаб ётиптилар, кимларгадир шаҳар қуриб...

У йўлдан кўзини узмай аллатовур хўрсинди:

— Адам раҳматлининг ҳар гаплари бир ҳикмат экан. Бу ерга келиб, манави алғов-далғов курилишларни кўриб, тушунгандай бўляпман. Авлиё эканлар.

— Шу ҳақдаям... гапириб эдиларми?

— Башорат қилган эканлар, тавба, — деди у ҳамон менга қарамай.

— Нимани? Шу зилзила, бузилиш-қўчишларни-я?

— Ҳа-да. Оллоҳдан қўрқиши керак, қўрқмай қўйганларнинг ўрнига бутунлай бошқа қавмни келтириб қўйиши ҳеч гапмас. Бизнинг ҳам тўзиб кетганимиз бежизмас, ўғлим, дер эдилар,

тавба...

Бўлади-ку шундай маҳал: ўртага ҳеч гап-сўз, юракка эса қил сиғмайдиган кезлар — ҳозир шундай бир ҳолга тушган эдик.

Аллавақт жим қолдик. Бу орада машинамиз кўча ёқасида омон қолган катта бир садақайрағоч (ниманинг касофати урган — у куриб қолган, чангалаҳаҳт каби туарди) тагига келиб, секинлади ўз тўзонида қолиб кетди. Бу оппоқ тўзон худди қиёмат белгисидай бирпасда бизни кулранг сояси билан ўраб, бир мав-хумот оламида қолдирган, ҳатто қуёш юзини тўсиб кўйган эди. Ол-а, йилт янги машинаси ўлди десангиз-чи! Ўн кун ювганда ўз ҳолига келмас. Яна уни сотармиш. Бу йўллардан уч марта ўтсин, кейин кимга сотаркин!..

Тўзон тарқаб, кулранг соя ҳам устимиздан кўтарилди.

Бор экан-ку ёруғ олам!..

— Сен ўтириб тур, мен ҳозир, — деганча Олим акам машинасидан тушиб, қайрағоч тагида баққолсупа қуриб олган одам томонга кета бошлади. Сигарети тугабдими деб ўйлаб, мен тушмай қўя қолдим. Кўриб турибман, у ҳеч нарса олгани йўқ, лекин икки оғизгина бир нарса сўради ёхуд илтимос этди. Чол ҳам кўна қолди. Қайрағоч тагидаги ариқдан ҳатлаб ўти-боқ қайбир янги уйнинг ҳандағи ёқасига бориб чўн-қайишди. Баққол юзига фотиха тортди-да, нимадир ўқий бошлади: билдимки, тиловат қиляпти. Этларим ўз-ўзидан жимирилашиб кела бошладилар! Олим акам ўз қўргонлари ўрнини босиб ўтиб кетолмай... оталари ҳаққига бир калима Куръон тилоат қилдирмоқда эди. Шунчалик эслаганига шукр, инсоф берганига шукр, ёдга олиб қўймайдиганлар қанча-ку...

Кейин чолга қўярда-қўймай қоғозга ўралган бир нарса тутқазиб қайтаркан, у Олим акамни алқаб дуо қилиб қолди. «Эшонпоччамнинг арвоҳлари қўлласин... Сен сийлабсан, Аллоҳ сийласин сени» дегани ярим-ёрти эшитилди.

У эшикни кенг очиб, жойига енгил ўтириди ва машинасига калит солатуриб:

— Танидингми? — деди аллақандай камгап тортиб.

— Шўтми? — дедим мен ҳам юрагим жиғ этиб.

— Шўт, — деди у қўпориб, ҳандақлардан бир четга суриб ташланганча на арралаб олинган, на кесиб жойланган дараҳтлар мозоротига ўқинчла қараб (Қоралари ўрик, кумушранглари баҳайбат ёнғоқ туплари экани шу ерданоқ билиниб турар эди!).

— Эсиз ёнғоқзорлар, — деди кейин, — биз болалигимизда шундоқ эди, экилганига қанча бўлган экан?

Мен бу ёнғоқзор оралаб ўтган анхор ёқаларидан қўзиқорин терганларимни эслаб, ғалати бўлиб кетдим: ҳаммаси кўз ўнгимизда йўқликка кўчиб бормоқда эдилар.

— Қўргонларизниям... суриб ташлаб бўптиларми? — ёдга соладиган ҳеч нарса қолибмадими, демоқчи бўлдим.

У сассиз-несиз бош силкиди, лекин ўзи ўша ёқдан кўз узолмасди (ахир кўз очиб кўрган-таниган ватанининг сувратини киши кўз ўнги — хотирасидан ўчириб ташлаб бўларканми! Бир туман ортида бўлса-да, туравергай-ку ўзига чорлаб!)

— Ҳатто анҳорни ҳам-а? Кўмиб юборишибдими? — дедим мен азза-базза тушишга интилиб.

— Етти авлиёнинг еттита мозоридан биттаси қолмабди-ку, — деди у.

— Шошманг, — дедим мен унинг елкасидан силкилаб, — ўша боғингиз пастидаги ёлғиз мозор, қайрағочли мозор етти авлиёнинг бириники эдими? Унда китоблар-чи, эшон бувамнинг китоблари-чи? Чиқмабдими? Анув гаплар... бекор эканми?

Олим акам менинг соддалигимдан кулди. Машинасига ўт олдириб:

— Мен сени нимага опкетяпман?! Ўша хазинани кўрсатгани-да! Қолаверса, Този тоға чақирганлар, — деди илжайиб.

— Қандай тоға? — дедим тушунолмай.

— Тозиларнинг тозиси, ўзинг билган сутчи, — деди у «Волва»сини жилдириб.

Менинг каллам айланиб, эсим тескари бўлаёзди: қандай тозиларнинг тозисиу қандай сутчи? Кимни айтяпти у? Анқовсираб қолибман.

У хатосини фаҳмлаб, шошиб сипоришилади:

— Ҳе, биз тогани шундай атамиз. Азбаройи суйиб! Хизматларига беш кетиб!.. У кишига етадигани йўқ бизда. Ҳозир пенсага чиқиб, пақир киши панада деганлариdek сутчилик қилиб юрибдилар-да.

— Ўша одам-а? Илҳом сутчи-я? — дедим тасаввур эта олмай.

Олим акам очилиб кулди:

— Сен у одамнинг одамовилигию кигиз шинелига ишонма. Бирорларга тарки дунё қилиб, оқлиқдан топганига яшаб юрган дарвеш бўлиб кўринар. Лекин у асли — зўр одам. Олим одам. Шу миқ этмай ғимирлаб юришида ҳам қилган ишларини кўрсанг эди. Ҳеч кимнинг хаёлига келмаган, ҳатто олимларнинг тушига кирмаган ишни қилиб, бир уй китоб йиғиб қўйибди.

— Китоб? — Китоб менинг жоним-ку, хайратланиб қарадим.

— Ҳа-да. Ҳар бири гавҳарга тонг нодиру ноёб китоблар... Тиллага алишмайдиган хиллари.

— Йўғ-е, китобfuрушлик ҳам қиладилар эканми? — дедим хаёлим қочиб.

— Айтдим-ку, бу одам бутун бир институт олимлари қиладиган ишни адо этиб қўйибди. Шу кўч-кўчларда чиққан эски китобларни сўраб олиб, сотиб олиб, қидириб топиб, бир ерга йиғибди. Тирноқлаб де-гандай... Ишонасанми, бир уй гавҳар йиғиб қўйибди!

Энди менинг ичим фурмишлаб кела бошлади:

— «Кув-қув», «беркит-беркит»да девор ичию тоқилар устига яшировилган, кигизга ўраб кўмиб ташланган китобларни-я? Унда... унда Сизларнинг китоб-ларингиз-чи? — дедим вужудимга тушунуксиз бир титроқ тушиб. Назаримда шунинг дараги билан келгандай кўринарди Олим акам.

— Бўлмаса-чи! Ўшаларам Қанғидан топилган-да. Китоб тўла сандик чиққанини хабар қилишгандаёқ бориб сотиб опти. Сандиқларимизни кўрдим, китоб-ларимизниям. Қилт этмабди. Бир қават намати тўкилиб тушибди-ю, ўзига жин ҳам урмабди.

— Қаердан чиқибди? Ўша ёлғиз мозоротданми?

— Ҳа-да, Оллоҳ шунча йил ўша мозоротда сақлаган экан. Гард юқтирмай.

Шу тоб Султонмурод акамнинг хўв анув хати, менга тайинлаган гапи беихтиёр ёдимга тушиб, ғалати тортиб кетдим: э, воҳ, тоза ғафлат босган экан-ку бизни! Ахир кўмилган китоблар қаердалигини ёзган эди-ку акам. Мен билардим-ку! Уйлар бузилиб, ҳамма кўча бошлагач, ўрнига дўмлар туша бошлагач ҳам нега ғулғулага тушмадим? Тамом унутдим? Нима бўлди менга? Нима чалғитди? Қайси шайтон ёзғирди мени? Омонатлар бир ёқда қолиб, қай ўткинчи ишлар, ҳою ҳаваслар кетида чопиб юрибман? Аслида уни топиш мендан лозим эмасми? Им...

Менга алам қиласарди. Йўқ, уни қаёқдаги бир сутчи чол, ишига пухта чол топгани эмас, қараб туриб, бурнимнинг тагидаги нарсани олдириб юборганим, у хазина бирорларнинг қўлига тушиб кетгани, ўзим масъулиятсиз одам бўлиб чиққаним алам қиласарди.

Тағинам Худо асрабди. Иймонли бир одамнинг қўлига тушибди. Бизнинг иймонимиз шунчалар суст эканми?

— Унданам бурун сен зўр янгиликни эшит. У киши шажара қофозимизни топиб қўйганмиш. Етти пуштимиз битилган нарсани, — деб у қалай, мирзо укам, дегандай қараб қўйди.

— Тоғам айтганларича бораканми, — деб юбордим мен, — йўқолиб битмаган, бирорларга ўтиб кетмаган эканми?

— Яна келсангиз кўрасиз, кўп нарсаларни аниқлаб қўйдим деяяпти. Шунга кетяпмиз, — деди Олим акам мақтаниб. Чиндан у ғурурланса, мақтанса арзирди. Мен уни хушламай юрибман, эски қилмишларини эслаб, неча вақт йўқ бўлиб кетганидан ҳадиксираб... У бўлса, тоза омади чопган чиқиб қолди-ку!

— Сўрадизми, у бизнинг ўша Улуғхўжа бувамиздан қолиб келаётган шажара эканми? Қозилар муҳрлари босилган, хужжат ўрнига ўтадигани эканми? Ёки?.. — дедим ижикилаб.

Олим акам бир нарсадан шодумон бўлган кезлари йўлга қарамай қўядиган, ҳали ёнидаги одамнинг елкасига қўлини ташлаб, ҳали машинасининг ғир-ғир шабада уриб ётган ойнасига ястаниб олиб, гап сотишга тушадиган одати бор экан, ҳозир ҳам шу ҳолга тушиб борар эди.

У тилини бир ажойиб тоқиллатди:

— Йоқ, сўрамадим. Борсагоқ қўрамиз. Балки ўшадир, балки бошқа. Лекин шажара қофозлармиш, бир-бирига уланавериб, ёпиштирилавериб сарғайиб кетган.

— Қайтариб беради эканми? — дедим ичим қуриб.

Олим акамнинг юзига бир нима соя ташлаб, сўникиб қолди. Ўзи чукур тин олиб:

— Ҳе, — деди аллақандай ўксик тарзда, қолаверса, ўз устидан кулгандай. — Кошки биз ўша нарсаларнинг чин қадрини билсак. Бугун қувониб, эртага унутиб юбормасак. Тайнин ошиёни йўқ мендай одамнинг қўлида йўқолиб-нетиб кетганидан ўшанақа фидойилар қўлида бўлгани ҳам тузук. Нима дединг?

— Нега, оборсак ойим еру кўкка ишонмай асраб берар эдилар, — дедим излаганимиз топилганда қўлдан чиқиб бораётганига юрагим ачиб.

— Ҳа, дарвоқе, бу гапинг ҳам тўғри, бораверайлек-чи. Лекин чол осонликча бера қолмас. У шунақа кўхна нарсаларнинг жинниси бўпқопти пенсага чиқиб, — деди у нимагадир хаёли қочинқираб.

Бу орада илгариги файзининг урвоғи ҳам қолмаган Чўлпон ота гузарига етиб борган эдик. Мастуба опанинг дўкони очиқ, тол тагидаги анҳор бўйидаги чойхоналар, бозор жойида, баққолу атторликлар ёпилмаган, фақат ҳеч зоғ кўринмасди. Кимсасизликдан ҳатто соялар мудрарди. Фақат дараҳтлар узра ғувлаб учган асалариларга ташлаб кетилгандек эди бу гузар. На эгасиз бир ит, на адашган бир кимсани учратардик. Расталар остида ёлғиз мусичаларгина (гўл бўлиб!) ризқ излаб юришибди. Ҳатто бир вақтги бозоргоҳга ўрганган гала чумчуқлару сўфитўргайлар ҳам гузарни ташлаб кетган эдилар.

— Ие, — деди Олим акам хуши бирдан жойига келиб, — мен ошнинг харажатини шу ердан оламан деб юрибман, бу ерда гузар ўлиб бўлган-ку.

Эсиз, илгариги гузар деб ўйлаган-да. Чиндан ҳам илгари бу ерда учта чойхона бўлиб, учаласига уч тоифа одамлар йиғилишар эди. Миртўхта амакиникига қариялар кириб, қаймоқхўрлик, нахотшўракхўрлик қилиб, гаплашиб ўтириб кетишса, анҳор бўйидаги чойхонага сатта зиёлилар, шаҳардан чиққан меҳмон-изломлар киришарди. Қодир бойваччанинг чойхонасига эса тамоми ошхўрлар, норинхўрлару хасипхўрлар тўпланиб, эртадан кечгача анув шайтон сувини хуш кўргувчилар аrimасди. Ўша шайтон сувларнинг касофати урдими ё бошқа воқеа содир бўлганми (аниғини ҳеч ким билмайди!) бир кеча шу чойхонада хизмат қилиб юрган югурдак бола девдай одам — чойхоначи Қодир полvonни ухлаб ётган жойида чопиб ташлаб, ўзи гум бўпти. Нима олган, нима қайси бўлган — ҳеч ким билмайди. Жинқарча ўспирин шундай ишга қандай дов этган, қайси юрак билан жазм этган — ақл бовар қилмайди. Лекин эрталаб келишса, полvon чопиқлиқ, болта ҳам ўша ерда ётганмиш. Шу-шу чойхонадан файз кетувди. Энди бу аҳвол...

— Ғизза Новзага ўтиб кела қолайлук? — дедим.

— Юр, ўтсак ўтиб келайлук, икки бирдек одам шўппайиб кириб боормайлук қарияникига, — деди у ҳам.

Кетдик. Энди унинг бир қариянинг кўнглинин оламан деб ошнинг масаллигини излаб юриши, ҳамма ташвишларини (ёлғизлигини ҳам, беватан-беошиён эканини ҳам) унутиб, ўтганларнинг шажарасини излаб қолгани мени ажаблантирмоқда эди: Тавба, тириклар туриб, нечук бу ўтган аждодлари билан қизиқиб қопти? У қофоз унга нимага керакки, вақтини ҳам, йилт янги «Волва»сини ҳам аямай манави ўйдим-чукур йўлларга солиб юрибди? Ундан кўра, ёлғиз

жигаринг — акангни суриштири! Ошналари, товкасидагиларини топ! Кими бор, кими йўқ, жилла курса, мендан сўра! Юзинг куюқ, тилинг боғлиқ бўлса ҳам... Чиндан-да, нега ғиқ этмайди у ҳақда? Сўраб қўймайди?

Менинг эса, қандай гап очарни билмай — ичим тошиб боряпти, гупириб боряпти. Гапнинг мавриди ҳам, қалови ҳам кела қолмайдики, ўзим сўз очсам... Калламда нуқул бир сўз, бир ҳикмат айлангани айланган (қаердан келди билмайман): шажарангни улуғлигидан турурлангунча, уларга нима бўлган — билсанг-чи, ким қолди, ким йитти — суриштиранг-чи, уласанг-чи ришталарингни!

Мен баъзан ўзим ҳайрон қоламан, ёши бир ерга етган қарияларга ўхшаб, (худди Нусрат поччадек!) мушоҳада қила бошлайман. Гўё ичимда оқ-оппоқ, митти бир мўйсафид ўтиргандек, воқеаларга у хукм чиқараётгандек. Хушим жойига келиб, баъзан этларим жимиirlаб кетади: наҳот руҳим шунчалар қари?..

### 3

Этни олдик, ўша темир мезанали тепанинг орқасидаги ёлғиз хонадонга етиб бордик ҳам мен бу ҳақда сўз очолмасдим. Рости, андишадан ҳам бурун номус кучлилик қилмоқда: бу-шундай акангизга хиёнат қилиб, ўзингиз қаёкларда юриб эдингиз, деган билан баробардек туюлар эди. Кошки ўша тарихларни билмасам!

Сутчи жигарларини кўргандек, боши бир ерга етиб (!) азбаройи тўлқинланганидан қаловланиб қолди.

— Эй-й эшон болалар, хуш кепсизлар, хуш кепсизлар, бизнинг кулбай вайронамизга, — деб кучоқ очди, сўнг бизни қўйиб, ойимларни сўрай кетди. — О, у Яккабоғу Каттабоғнинг хонадонлари. Ҳамма ҳар ёқларга кўчиб, Чўлпон отанинг сут бозорлари ўлуб, мен не эски мижозларимни ўқоттум! Ким қаёққа тушти — қаерда ошиён тутти — билмасман! Бизни бозор бирлаштириб турган экан, оқлик ришта бўлиб турган экан! Далалар ўлди, сойлар кўмилдию не-не говмушлар сотилиб, сўйилиб ришталар узилди, оқибат кетди, водариф! Шу сут, шу отлиқ қанча халқни боғлаб туриб эди-я. Ўртага қаердан шу зилзила тушди, қай гуноҳларимизга Оллоҳ у кунларни кўп кўрди, хотиржамликни ўртадан кўтарди? Шунинг ўзи бўлса кошки эди: ўрнимизга кимларни опкелмоқда, қандай қавм келмоқда? Ўз еримизда ўзимиз бегона бўлиб қолмасак эди!

Қария (ёки менинг кўзимга шундай қўринмоқдадир) илгаригидан хийла чўккандай, чўккан сари хушрўй тортиб, нурли бўлиб қолгандек эди. Аммо қани унинг илгариги даврлари — жун чакмону жун қалпоқда, елкада обкаш, обкашнинг икки илги тўла қўша-қўша сут бонкалар, уларни кўрдим демай юрганлари! Йиллар у ҳайбат, у салобатни олиб, ўрнига оқ яктакли хушрўй бир қарияни қолдириб кетгандек эди. Умр шунақа эканми?

У дуои фотиҳадан ҳам бурун тўрдаги қозикда Қуръон жилди билан осиғлиқ турган аллақандай йўл-йўл матога кийдирилган найсимон бир нарсани (сурнай десам, текис теша дастадек, бошқа нарса десам, бир томони пучқоқ) курси устига олиб қўйди-да, биз қистаб қўймагач, ўз ўрнига чўқди. Дуоси ҳам қадам етди, бало етмасин қавлида, қисқа бўлди. Сўнг:

— Яхши, келдингларми? Йўллар очилиб қопти-ми? — деди ҳол-ахвол сўраб.

— Очишибди-очишибди, бу гал тепадан ўтиб яланг-да қолдирдим, ҳеч ким тегмайдиган жойда, — деди Олим акам.

Қария тинчиб, маъқуллаган бўлди.

— Ҳайтовур-ҳайтовур, қандай ўтасизлар, қандай кетасизлар, деб хавотирда эдим. — Сўнг ҳалиги олган нарсасининг сиқма боғичини бўшата бошлади. — Танияпсизми, эшон бола, мана бу мато, мана бу табаррук нарсани?.. Кўзингизга иссиқ қўринмаяптими? — деди Олим акамга кув нигоҳ ташлаб.

Олим акам кўзи чақнаб (шу эканми, дегандек), ичи ҳаприқиб қараб турибди-ю, бир нима дея олмаяпти.

— Эслай... олмадим,— деди ниҳоят хижолат чекиб.

— Балким-балким...— деди қария таскин бериб,— у пайтлари ёш бўлгансиз.

Олим акам ютинди:

— У киши раҳматлини олиб кетишганда... мен ойимларнинг қўлларида эканман. Бу нарсаларни... ўша воқеадан бир кун олдин кўмиб келишган экан.

— Оллоҳ ҳафиз-да, дунё неча айланиб, қанча жойлар текисланиб битди. Ўзи сақлайман деган нарсаси қилт этмай турибди! Ваъдаси ҳақ-да Оллоҳнинг. Қуръон китоблару тафсирларнинг орасига қўйворилган экан, бир чеккаси сал эзилганини демаса... мана, тортинг Мақсадхўжам.

Мен бир бошидан тортиб боряпман, узун уйнинг тахмонига етди ҳам (ўртадаги шалдироқ қофоз ҳар вароги бир-бирига шунақа текис уланган, шунақа нозик сирачланган эдики, санаб адoғига етолмасдим) туганмас, ҳали ярми сутчининг қўлида найга ўхшаб турарди. У қўрдики, бу билан иш битмайди.

— Ё раббим,— дея ўрнидан туриб, Олим акамга буюрди,— энди сиз бу ёққа қараб тортинг, ҳовлига тушаверинг-чи.

Акам эшикни очиб юбориб, ҳовлига тушиб борди ва улкан қуроқ варраклардан қолишмайдиган, лекин бир-бирига туташ, ҳаммаси икки ён бошидан тушган чизиклару гир айланачалар билан, жимжима ёзувлар ила тўлган нарсани оча кетди. Улар орасида бўш ҳалқалар ҳам, тугамаган чизиклар ҳам кўринар, бу нимаси — ақлимиз етмасди биз гумроҳларнинг.

Сутчи эса ковшандоз тепасида ўнг қўли белида, ўзи ярим букчайганча Олим акамга:

— Ҳа, тортинг, эҳтиёт бўлиб тортинг. Куруқшаган нарса бу, йиртилиб-нетмасин, хийла кўтаринг,— деб буюриб турарди.

Ниҳоят шажаранинг боши ҳам чиқди. Унинг аввали акамнинг қўлида, адoғи менда эди. Олим акам ҳовли ўртасида, барра пиёзми, бир нарса сепилган гулхонанинг бир чеккасида мажхул алпозда турибди. Ҳайратининг адoғи йўқ. Мен эсам, икки тахмон ўртасидаги токчага тирагиб, қўлимизда салқи матодек лопиллаб турган нарсага, унинг бир-бирига уланиб кетган ҳалқаларию битикларига қадалганча қолганман. Қараб туриб, ваҳм босиб келяпти: шулар бари — пуштимиздан ўтганлар эканми? Келиб-келиб энди бизга қадалибдими? Биз ҳам шулардек йўқликка қараб кетгувчилар, ўтиб битгувчилармизми?

Шажаранинг адoғидаги бўш қофозни ушлаб турган қўлларимдан бир ғалати жимирлов-титроқ туриб келяпти: шу йўқликка кетиш учун чопиб-улоқиб... елиб-югуриб юрибмизми? Бу дунёга келишмиздан мурод нима эдию нималарга бино қўйиб юрибмиз? Максад шу шажарани тўлдириш — ҳалқани давом эттириш холосми ё ўтганларга тенглашиш, бир қарич-тўрт энлик бўлса-да улардан илгарилаш, бу хаёти дунёга келиб-кетувнинг маъносини англашми? Нега келиб-кетмоқдамиз — шуни англаб етмоқми? Ўзи ўтганларнинг тирноғига арзирмиканмиз? Ногоҳон шу саволдан — титраблар кетдим. Қулоғим ҳам том битган экан, очилиб — атроф-жавониб, дунёнинг турфа овозларидан шангиллаб кетди!

— Ҳой, Максадхўжам — Саломпамнинг ёлғиз тойлари, эсингиз оғмасин. Ваҳм ҳам босмасин, — дерди сутчи қўлини сермаб, мени имлаб. — Бу сизларнинг шажарамас, неча пуштингиз ҳам эмас. Бу ёққа келинг, мен тушунтирай, наматнинг устига ташлаб келаверинг, — дерди у ўзи ковшандоздаги кавшини илиб, остонаядан бир амаллаб, шажара қофозга тегинмай ўтишга чоғланаркан, менга ниманидир илинмоқдайди.

«Тавба, — дейман ўзимдан ўзим хавфисираб, — бу бизнинг шажара қофозимиз бўлмаса, у бизни нимага чақиритирди? Олим акамни нимага ҳовлиқтириди? Нимага келиб ўтирибмиз?»

Мен бориб қариянинг қўлтиғидан олгунимча, ўзи остонаядан ўтиб, зинага тушиб борди.

Кейин акамнинг олдига қараб юрдик. Чол ўзида йўқ даражада очилиб кетган, кафтлари-ла сарғайнинкираган, ширачу моғору қадим китоблар ҳиди ўтириб қолган қоғозни текислаб, уни ўпиб-тавоф қилгудек бир ҳолатда акам томон ошиқаркан, ҳаммадан бурун унинг қўлидаги — бош қоғоздаги нарсани тушунтироқка шошарди. Сандиқдаги улуғ китоблар орасидан чиқсан бу нарса — Эшон почча, у кишининг муридлари ёмон кўзлардан асрар, кигизларга ўраб беркитган нарса — бизнинг шажарамиз бўлмаса, нима экан? Нимага азизлаб яширишди экан? Сўрагим келиб, тилимнинг учиди турибди, лекин чолнинг ҳайбатими, нимаси босиб, ташимга чиқара олмаётиман. Унинг мана шу ўнгдан чапга қараб ўқиладиган, очқичи ҳаммага ҳам насиб этавермайдиган ётиқ ҳарфларни ҳам ўқий олишидан, эскичага катта олим эканидан ҳайиқибми, тортиниб турибман. Унинг олдида мендай мухбир одамнинг ҳам тили тушовланиб қолган эди. Аммо акам мендан олдинроқ ўзига келиб улгурган экан:

— Ажаб гапни айтдиз-ку, тақсир? — деди энди у ҳам қариянинг шунчаки таржимон эмас, катта олим эканини тан ола бошлаб.

— Ажабланманг, бўтам. Бу ундан улуғроқ нарса, — деди чол қош қоқиб. Унинг қошлари ўсиб диккай борганини ва унга-да оқ оралаганини яққол кўрдим.

— Узр, биз ўзимизга тегишли деб... — деди Олим акам у ёғини айта олмай.

— Балки нариги сандиқдан у ҳам чиқиб қолар. Лекин бу... унданам улуғ нарса: силсилаи шариф! — деди чол ўрта бармоғини кўкка аллатовур нуқиб. — Тушундиз?!

Олим акам елка қисиб, бош тўлгади ва хижолатга ботиб деди:

— Биз омилар нима — шариф, нима — улуғ — қайдан билайлик! Сиздан эшитиб турибмиз.

— Эшитиб, кўриб турганиз — шунинг ўзи катта давлат. Билмай ўтаётганлар қанча, ғофил юрганлар қанча. Шукр қилинглар Оллоҳгаки, кўрсатибди, билдирибди. Балки Сизу бизни тўзитиб қўйгани, ўрнимизга тамоми бошқа қавм келиб ватан тутаётгани, ёлғиз мозоротларимиз устидан-да йўллар тушиб, унда-бунда мана бундай хазиналар, ҳикмат китоблари чиқиб қолаётгани бежизмасдир. Ўзига яраша ҳикмати бордир буларнинг ҳам, — деди чол ва хаёли бир ёқларга қочиб бораётганидан ўзи ҳам таъсирланиб, бош тўлғаб қўйди-да, мақсадга кўчди. — Ҳа, дарвоқе, мана бу улуғ ҳалқада ким турганини билармисиз? Албатта, билмагайсиз. Яқинроқ келинглар, — деб у менинг тирсагимдан тутиб, ўзи томон тортиб қўйди. Чиндан силсилаи шариф деб аталмиш нарсанинг бошланиши ажойиб эди: ўртада катта ҳалқа, ундан тўрт ёққа тўрт чизик чиқиб, тўрт ҳалқага бориб туташган, гўё ўртадаги тенгсиз қуёшу чор тарафида тўрт тўлин ой ундан нур олиб тургандек эди. Усиз булар хечдек, у билан тирикдек эди. Ана шу икки чеккадаги ҳалқалардан икки ёнга қараб, чизиқлару ҳалқалар тушиб борган ва беҳисоб ҳалқаларга уланиб кетган эди. Бу нимаси, ёлғиз сутчи билмаса, биз анграйиб турадик. Худди гунг-соқовдек, Оллоҳнинг оми бандаларидек...

— Ҳаммаси мана шу зотдан бошланади. У Оллоҳнинг сўнгги расули ва элчиси, бизнинг пайғамбаримиз Мұхаммад соллаллоҳу алайҳи васалламдурлар. Булар чорёрлари, буниси Ҳазрат Али куёвлари, буниси Абу Бақр қайноталариридир. Бу тарафдагилар у кишидан тарқаган зоти шарифлар, буниси эса Ҳазрат Али каррамаллоҳу важҳаҳу зурёдларидан чиқсан уламои шарифлар, авлиёлардир. Шу боис силсилаи шариф аталгай. Ўша асли саодатдан буён шу улуғ шажарадан ўтган кубро зотлар, валийлар, карамли шарифлар киритилган экан бу силсилага. Не баҳтки, унда мен ўзим қўрган бир зотнинг табаррук номларини ҳам топдим, ўқидим. У киши бу силсиланинг сўнгги ҳалқаларини тўлдириб турибдилар, валлоҳи аълам. У зот Сизнинг падари бузрукворингиз Абдураҳим эшон поччам эрурлар, укам, — деди у овози аллатовур ўзгариб келиб, ҳам кўзлари бир ғалати тусга кириб. Айтидан сутчининг кўзларида ёш ҳалқаланиб борар, қийиқ кўзи ёхуд киприклари қилт этсаёқ у томчига айланиб, дув тўкилгудек эди.

— Ё раббий, — деди акам ўзини тамом унутиб, — шундай эканми?! Бор эканларми?! Қани, қаерида, бир кўрсатинг, устоз. Биз гумроҳлар-да кўриб қўяйлик, билиб қўяйлик, — дея илтижо этишга тушди, ўзи ихтиёrsиз равишда шажара қоғозни-да ўрашга, чолга қўшилиб ўша ҳалқани

топишга ошиқарди.

Чол ҳам мутаассир бир ҳолда:

— Ҳа, ўранг. Ўраганда ҳам эҳтиётлаб ўранг: бунақаси ҳар куни топилавермайди, — деб тайинлар, бизга ўхшаб шошиб қолган эди. — Балки олимларда-да йўқдир бундай тўлифи, барча валийлар териб киритилгани. Ҳа, ха, у киши қуи томонда, сўнгти қоғоз, сўнгти ҳалқаларда битилганлар. Мақсудхўжам, сиз ҳам қарашиб юбора қолинг, эшикками, бир нарсаларга, илашиб-нетмай қўя қолсин. Аяган кўзга чўп тушгандай, шунча асралган нарса йиртилиб-нетмасин.

Нихоят ўраб-ўраб, ўша ҳалқага етдилар. Сутчи (хотираси зўр экан) айтган ҳалқани бир қарашдаёқ таниб, «мана, у кишим» деб ушлаб олди ва қарангки, ҳалқа ичидаги ёзувни бинойи ўқий кетди:

— Абдураҳим хўжа қози Абдураззоқ эшон ўғиллари, минг икки юз етмиш саккиз ҳижрийда таваллуд топмишлар, мударрис, қозикалон, Бешоғоч даҳаси.

Олим акам ҳам, мен ҳам сутчига ялт этиб қарадик. Ном ўша, нисб ўша эди-ю, мавзе ўзгача эди!

— Бешоғоч? — деди акам қаддини шажара қоғоздан кўтариб. — Қанақасига?

— Шунақасига, — деди қария ҳам мийифида сирли кулиб, кейин хужжатнинг қолганини ҳам ўрашни буюриб, хонтахта ёнига — боя ўтириб енгил фотиҳа қилган жойига қараб юрди. — Ўзингга шукр, кўрсатган кунларингга, билдирган ҳикматларингга шукр, — деганча оёкларини ёзиб ўтиргачгина жавобга оғиз жуфтлади:

— Ҳайрон қолувингиз табиий. Сиз асли таги — келиб чиқувингиз Қоратошдан эканини, замоннинг зайди билан Яккабоғга чиқиб қолганингизни қаердан биласиз. Сиз кўз очиб ўша кўрғонни кўргансиз, ўша ерда туғилгансизлар. Фарид эса, бу тарихнинг бир чеккасини эшон поччамни Сибириядан ола келатурганимда, Тангритоғга ўтказиб қўймасимииздан бурунроқ ўзларидан эшитганман. Умрларининг сўнггида санга у кишини кўриш, жилла курса, хизматларини қилиш насиб этган бўлса, айтмабдилар-да? — деди кутилмаганде у акамни сенсирашга тушиб ва унинг тош қотиб турувиданми, нимадан шубҳага бориб.

Чиндан ҳайрон қоларли эди: оёғидан ўт чақнаб, белида куч қайнаган кезлари қай даргоҳларда ишлаб, не мамлакатларни кезиб чиқкан, пайдар-пай топшириқларни кўрдим демаган, керак бўлса, ўлимларга тикка борган, сарҳадлардан не номларда, не қиёфаларда ўтиб юрган одам... қариб пенсага чиққач, тил ўтиргувчиликни ҳам қўйиб бизнинг томонларга келиб қолиши, бирорнинг ташқарисида туриб, сутчилик қилиб юриши, ҳалол пешона тери — оқлиқдан қолгани билан умргузаронлик қилиши, буларга ўхшаб уруғ-аймоқларини излаб қолмаслиги ғалати эди. Мана энди билса, китоб жинниси экан. Сутчиликни ҳам қўйиб, бузилаётган кўрғонлардан (кимнинг томидан, кимнинг уриб юборилган токчаси орасидан) чиқкан қадим китобларни йиғиб юрган экан. Шунаққиб бир уй китоб йиғиб қўйибди. Устига устак йўлга тушган қайрағочли ёлғиз мозордан чиқкан сандиқлар дарагини эшитиб, қурувчиларни енг учиди хурсанд этиб, ҳаммасини ўз уйига ташитиб олибди. Мана энди битталаб саралаб, рўйхатга олиб ўтирибди. Яна унинг орасидан чиқкан мана бундай нарсаларни шарҳлаб ўтириши, эгаларини топиб хабар бериши қизиқ эди. У ким? Олимми, дарвешми ё эсини еган чол? Шунчаки умр ўткааргами бу ишлари ё жиддий? Ҳамма эшон почча кабиларнинг номини аташдан ҳайиқиб юрган маҳалда у нима қилибди? Сибириядан олиб келиб, Тангритоғга ўтказиб қўйганмиш. Қай юрак билан у шу ишни қилдию қайси журъат билан мана бу силсилаи шарифларни топиб, йиғиб юрибди? Жони нечта бу чолнинг — билолмасдим. Олим акамдай одамга қандай ишониб бу гапларни айтмоқда? У ахир сотиб қўйиши ҳам мумкин-ку?..

Ё мен ўлгудек ваҳимачиман, ё лақмаман.

Сутчи чол бизга қараб мийифида кулимсираб ўтирад, Олим акам эса, эси оғиб, силсилаи шарифнинг бояги ҳалқасига тикилиб қолган эди. Мен унинг кўзларида ёш кўрсамгина унинг

софлигига, поклигига, илгариги йўллардан қайтганига ишонмоқчидай унга тикилардим-у, нимагадир ўша ёшни, ҳалқа-ҳалқа ёш босган кўзни кўра олмасдим, тавба.

Бу қўтири дунё, бу серғалва, ҳеч нарсага арзимас ҳаёт уни шунчалар сўқир қилиб қўйган эканми?!. Ё мен, ё у — иккимиздан биримиз адашувда эдик. Чол эса, гўё кекса ҳакам эди.

## 8. ҲОЖИМ НИМАГА ИНТИҚ? ёхуд муаллифга аён тарихлар давоми

Енглари тирсакка қадар шимарилиб, ариқ бўйига чўнқайган Мирзахўжа ҳожимнинг хаёли қирғоқдаги майсалару самбитгулларнинг оқиши-ипилтириқ илдизчаларини ўпиб ўйноқлаган сув ҳам қолиб, тамоми бўлак нарсага қочган эди.

Сувдан ҳам тоғ-тошлардаги муз-қорларнингми, қуюн-изгириналарнингми заҳри келиб тургандек, уфурмоқдадек. Лекин ҳожим буни сезмасди. Қолаверса, қачондан буён офтобда турган жўмраги турна бўйнидан-да узун обдастасини ҳам унуган. Томлару нокзорни ошиб ўтиб, боғ адоғидаги девор сархокига мингашганча қолган ғариб қуёшдан... (ғариб ҳам дейиш маҳол, ниятига-да етганидан ял-ял ёнмоқда балки!) кўз узолмайди. Бунга сари кўзлари ёшланиб-ёшланиб келади, қуёш ҳам чаплашиб, минг бўлакка бўлинниб кетаётир.

Ҳатто осмонда қанот қоқкан қушлар-да кўзлаган манзилларига ета олгайлар: сарҳад оша билгайлар. (Албатта, Оллоҳнинг изни билан). Ҳатто тоғларда сув ичган булутлар-да, пастга эниб водийларга суза билгайлар: сарҳад оша олгайлар. (Албатта, Оллоҳнинг изни билан: шамолга буюрилмаса, шамол ҳайдамаса, қаёққа ҳам бора олгайлар?!)

Ҳатто ўша кўхна қуёш-да ўз низомидан чиқмай сарҳад оша билади, у диёrlарга ета олади. Албатта, Оллоҳнинг изни билан...

«Бизда аср вақти тугаб, шом тушмоқда. Уларда-чи? Чошгоҳдан ўтиб, пешинга етгандир?.. Бир вақтнинг ўзида улар ҳам, биз ҳам кундан вақтнинг ҳисобини олмоқдамиз. Лекин қани дарду ҳасратларимизни айтольсак, билдиrolsак. Биз уларга, улар бизга. У ёқлар тинчроқдир деб қаерданам жўнатдилар уни? Ўзимизнинг мусофирилигимиз етмасми? Қизимизни-да, оталар юритида мусофири қилмасак? Ҳоли нима кечди экан?...»

Қариянинг ичи сидирилиб, ўксиги бўғзига келди. Кўксининг аллақаери ачишар эди.

Ногаҳон кафти обдастанинг илиқ бандига тегиб, ариқ бўйига нима учун чўнқайгани ёдига тушдию ўзида ўзи уялиб хижолатланди: дарвоқе, ношукр-лик нечун? Ҳаммасини Ўзи кўриб-билиб турибди-ку. Ҳаммаси имтиҳон-ку? Бандасининг сабрини синамоқ-ку!

Ҳар галгидек шаҳид халифанинг фарзанди аржумандларига васияти ёдига тушди: «...Таҳоратни чиройлув-чиройлув қилиб, камолига етказинг. зеро, намоз таҳоратда». Шундай кезда нималарга чалғиганидан уялди (Уялганда ҳам ўзининг ҳолини кўриб-билиб турган зотдан уялди). Ва шу хижолатпазлиқдан кутулмоқ қасдида ҳам бисмиллоҳ ила кафтига сув олди. Ўзидан ҳам кўхнароқ (муштдек қоринчасига ярим коса сув кетиб-кетмайдиган, бўйнидан жўмраги узунрок) обдастадан офтоб тафтини эмган жонбахш сув тушиб, вужудига тасвирлаб бўлмас бир ҳузурми, нимадир югурди! Беихтиёр:

— Ўзингга шукр, шу кун, шу соатларга етказганингга, юргизиб-тургизиб, ўзингга бўйин кўйдириб қўйганингга, шуларнинг барчасининг фаҳмига етказиб, керакли амалларинингга андармон этиб қўйганингга шукр, — дея тили дуо-шукронада экан, таҳорат амалларини камолига етказиб адo этишдан ўзи ҳузур ола бошлади.

Чиндан ажойиб. Бунча ҳузур қайдан? Ихтимат ила кафтига олган сувданми ва ё унинг билаги бўйлаб чопқиллашидан? Балки офтоб тафтини эмган ажойиб сув қўкиштоб томирларию тагиданоқ сарғимтил тус ола бошлаган этларини ўпишидан келмоқдадур?

Ростдан ҳам ўша билакларини ўпиб-поклаб келатурган сув... тирсагига етганда яна баҳоли-кудрат жамланиб сўнг ариқдаги ўйноқи сувга сакрамоқда эди. Гўё гуноҳлари ҳам ўша томчилар

янглиф окуб кетмоқда эканлар, у қүшдай енгил тортиб бормоқда эди.

— Ғак! — Ташқи ҳовлидан учиб чиққан ола ҳакка ўртадаги деворга қўнар-қўнмас шувиллаб сархок тўкилдию у ўтакаси ёрилиб, бокқами-қаёққа учиб кета бошлади. Унинг узун қайчи думиу чиройли ола қанотлариданам бурун бўйнидаги тўтиёга мойил қора бархат «ҳалқаси» ажойиб эди. Кечки қуёш нурида гавҳардайнми, аллақандай товланар эди. У шу хуркиб учиб кетувида ҳам нимадандир имдод бериб, сайраб борар эди.

Ҳожимнинг назарида ҳатто шу шақилдоқ олаҳакка ҳам ўзи зағизон аталмиш юртларни эсга солиб, келмоқ бор-у, кетмоқ йўқми, кетганлардан ким хабар олгай, демоқчи бўлар эди. Чиндан унга нимадир бўлмоқда: ё Ёдгормурод неварасининг дарагини эшитгандан бери ўзида йўқ ичикиб бормоқда, ё бўлмаса, бу нимадандир имдод-белги. Ишқилиб, моҳпора-Махфузагинаси соғ-омон бўлсин.

У юз-қўлларини артиб, белбоғини елкасига ташларкан, ўшал юртдан довон ошиб келиб, ҳозирда оёқёзди тариқасида жиндек мизғиб кетган азиз меҳмонларини эслади. Ахир ҳазилми, кимсан неварагинасининг акачаси, бир ҳовлида ўйнаб катта бўлайтурган той бола — Ақбаралини ола келишибди! Бағрига босиб, бошларини силай-силай, бўйларини ҳидлай-ҳидлай эси кетди. Данагидан мағзи ширин дегандек томирининг томирчаси — неварасининг ҳидларини туйгандек бир ерларга етди! Энди ўзини бир ров кўрса, кўриб ўлса, армони йўқ эди. Ахир ўzlари жудо бўлган диёр — ота юртда улардан ҳам бир уруғ пайдо бўпти-ку! Илой, туп қўйиб, палак ёзсин! Ўзларидан кўпайиб, у диёрларда ҳам чироқларини ёкиб ўтиришсин. Илой, то қиёматга қадар шажараларини бардавом этдиришсин. Бир калима-бир калима бўлса-да, Қуръон ўқиб, ор-қаларидан савоб юбориб туришсин.

Ишқилиб Оллоҳ моҳпорасини қўшгани билан қўша қаритсин. Ботур күёвинг ҳам у диёрга йўлларини оча қолсин, мушкулларини осон эта қолсин.

Зағизон бехуда сайраб ўтмаган экан, боғ деворига мингашган кун унинг ортига чўкиб улгармай (унинг бир чеккаси кон талашган кўздек қизариб турар эди, тавба!) ташқи дарвозада бирор чақирди.

— Бой бува? Ҳой, ким бор?

Ҳожимнинг юраги бир орзиқиб тушди. Назарида келгувчи бежиз эшик қоқмаётгандек, бир мужда ила дарвоза тагида тургандек эди. Ё унинг феъли шундай нозук, ё ботин кўзи бор: баъзи нарсалар олдиндан белги бериб қолгай. Мана ҳозир ҳам дарвоза тагида турган одам... ўша ботин кўзига аввало отлик бўлиб, қолаверса, тоғ-тош ошиб келган сафар кишиси бў-либ кўринмоқда эди. Нега — ўзи тушунтириб беролмасди.

— Лаббай-ёв, мана, боратурмизов, — деб ташқарига шошилган эшик оғаси ҳечқанча ўтмай қайтиб, қархисида қўл қовуштириди.

— Дуои-салом экан, ҳожи буво, — элликни қоралаб, ёши бир ерга етганда шу ташқарида уйжой, бола-чақа қилиб, рўшнолик топган бу одам садоқатда тентти йўқ эди. Сидқидиллиқда ҳеч ким унинг олдига тушолмасди.

— Хушвақт бўлгай, кимдан дединг? — Мирзахўжа бойнинг хаёли салом эгасига қочди: ким бўлуви мумкин?

Қай пуштидадир қозоқлар билан туташиб, яна ажрашиб кетган эшик оға икки гапнинг бирида «ҳов-ҳов»лаб, баъзан «ой-бай»лаб қўярди. У сўрашни-да унуганидан азза-базза хижолат чекиб, эгилди. Кепчик юзи чечак тошган каби қизариб-бўзарди ва ростига кўчди:

— Фаромуш этибманғўй...

— Меҳмон-чи? — деди бой ҳушёр тортиб, — Опкирмадингми? Нон-чой қилардинглар, кутлуғ уйдан қуруқ қайтмасди.

— Унамадигўй, тақсир. Шошиб турган эканғўй.

— Эсиз, — деди қариган сари кичкина тортиб, чуваклашиб боратурган бой, бошини сараклатиб, — аввало насиба қўшмаган, лекин Алимат ука, бизнинг эшикка келган одам...

эсингда бўлсин, қуруқ қайтмаслиги керак, барокат кўтаришгай, билдинг.

Алимат икки букилди:

— Хўп бўлғай, ўтағаси.

— Кейин келган одам яхши суриштирилғай: ким, қаёқдан, қай томон борадир.

Алимат бош кўтармай ўша сўзини-да қайтарди:

— Хўп бўлғай, ўтағаси.

— Сизларга унамаса, тушунарли бирорни чақирмак лозим.

— Кечирғайсиз, бой буво. Қайтаришмагай, Сиз айт-ганча бўлғай.

— Хўш, нима экан дединг? — Мирзахўжа ҳожи энди унинг эгилган сари кўксидан қорнига тушиб борган қўлларига қаради, ўша қорнида чирмашган қўлларида бир нарсанинг сўрғичланган учию шокилали ипи кўринарди.

— Мана, ўтағаси.

У оч жигарранг кепак қофозга жойланиб, сўрғичланган мактуб экан. Албатта, шўролар кўлида қолган ота юртдан. Бошқа ёқники бўлса, охонжомасио қопчиқлари зўр бўлгич эди, йилт янги бўлиб, йилтирагич эди. Бу кепак қофозда эди.

Лекин кепак қофозда бўлса-да, ҳожининг кўзларига оловдек кўринди. Қофозидан тортиб, сўрғич устига урилган муҳру бошлама крилл ёзувларига довур... Ҳар куни келавурибдими бундай мактублар?!.. Кимдан экан?

Ялт этиб, шу қиши бошида Аҳмадбек ҳожимнида берилган зиёфат, шу зиёфатда таништиришган қиличдек адлу райхондек хушрўй йигит ёдига тушди. Сафедхонада таржумон экан. Тилининг ширинлиги, муомаласининг гўзаллигини айтинг. Ўзининг кўркамлиги-чи, қиз бола бўлиб туғулувига-да бир баҳя қолгандек. Шу йигит Аҳмадбек ҳожимнинг авлоди бўлиб, баланд доирадаги ҳар турли қабулу кузатувларда қатнашар, баъзи хориж сафарларига-да олиб кетишар экан. Унинг бирорни айтотмайдиган дардидан хабардор Аҳмадбек ҳожим четга чорлаб, қулоғига шипшиб қўйди:

— Шу жиянчамиз яқинда ота юртингизга сафаргами, бир нимага боргай. Бироз тургай ҳам. Агар ўнгай хизматлар бўлса, йўқ демас...

Воҳ! Бу нима? Тонг-саҳарларги нолаи илтижолари натижасими?! Оллоҳ ўзи кушойишкор, кушойишини беришими?! Қани эди, Махфузасининг дарагини билиб берса? Ёлғиз ўзи нима қилди, қай ерларга бордию қайдан паноҳ топди?

Кейин мавридини топиб ўшал суксурдек йигит — таржумон жиянчага Аҳмадбек ҳожим икковлари илтимос этишган, ризолигини олиб, дуолар қилишган эди.

Хайралашар маҳал эса:

— Топсангиз бергайсиз манавини, кам-кўстига яратсин, — деб бир ҳамёнча тутқазди. Бўлагини эса: — мана бу — харажатлар учун. Узоқнинг иши, бусиз бўлмагай. Қайтишингизла маълум этинг. Албатта, ширинкомаси ҳам бўлғай, ўғлим, — деди.

Йигит «қайдам, қайдам»лаб зўрға олувди. Ўшанданмикан? Мирзахўжа ҳожи ширин умидла мактубнинг юзига қараб қўйди.

Хатга қўзи ўтмай (қарангки, у битиклар мактуб юзасига тушиб қолган қора кумурсқалардек ғимирлар-у, жилиб кетолмас эди, тавба) юзига яқинроқ олиб келибгина таниди. У араб имлосида эди. Шунда-да, барибир улаб кетолмади. Жуда майда эди ёзуви.

Шундагина эшик оғаси ариқнинг у бетида ярим эгилиб, изн кутиб турганини кўрди ва:

— Эй Алимат, неча қайта айтаман, қаддингни ғоз тут. Мўмин мўминга ҳеч маҳал юкинмагай, сифинмагай.

— Эшитдим, бой буво. Узр, бой буво, — деб у тисарилганича яна букилиб борар эди.

Мирзахўжа ҳожи унинг содда ҳам самимийлигидан жилмайди ва шу жилмайиб, бир бурда юзига нур ёғилган куйи буюрди:

— Қизинггами, ичкаридагиларгами айт. Мени кўзойнагимни ола чиқсинлар.

— Ҳозир-да, ўтағаси. Ҳозир-да, бой буво, — дея ташқи ҳовли томон йўргалади, сўнг остонаядан ўтмайлаёқ ўшакда укасини ерга қўйиб, ўзлари сакронғич ўйнайтурган қизларини чақирди, — Ой-бай, ҳай Хатчаёв, чопчи бунда! — Кейин буюрди. — Ичкарига югор, Эшонотангни теразаларини олачиқ!

Хол олиб, қизара бошлаган қора гилос тагидаги ёғоч каравотни ҳоли билиб, ўша томон юра бошлаган Мирзахўжа ҳожим Алимат қозоқнинг кейинги гапидан жилмайиб қўйиб, отасининг бетига анграйганча қолган қизалоққа далда берган бўлди:

— Отин бувингга айт, қизим, хат қўрар эканлар де, билиб обберади.

— Билдим-билдим, айнагиз, — деб қизалоқ ичкарига чопқиллади.

Хижолатга ботган Алимат қозоқ эса, бўйинни ичига тортиб елка қисди:

— Мен нима депманғўй?! Кўзни теразаси бўлмай не эканғўй?

Неча муддатдан сўнг Мирзахўжа ҳожим кунградор каравотнинг тўр томонида, неча қават кўрпачалар устида ёлғиз ўзи устозини кутган муллаваччадек хатга тикилган куйи қолган эди.

У биринчи сўзданоқ мутаассирланиб, бўғзига иссиқ бир нарса қадалган, кўнгли бузилиб кетган эди. Пешонасига довур жимирлайтурган бир мутаассирликни зўр-базўр енгиб, кўзлари сўзлар кетидан чопища давом этар эдилар:

*«Ҳурматлув ва иззатлув Мирзахўжаси ҳожи отамизга етуб маълум бўлсунким, камина қандайдир бир ширинкомалар илинжуда эмас, билъакс, Ҳожи тогамизникида берган лафзимиз устидан чиқмоқ қасдида илтимосингизни уddyаламоқ ва у жигарпорангиз Маҳфузга бонуни излаб топмоқ, жисла қурса, дарагини билмоқ учун кў-ўп уриндум. Бу ерга бизнинг диёр Тангритоғедан кўчиб келмиши кишиларнинг маҳаллаларига ўтиб, хабарлар юбориб, кў-ўп тонуқли кишилар орқали ул мусофиргинани излатиб кўрдум. Дараги учун харажатни аямадум. Топилса, ширинкомалар борлигини-да эълон эттум.»*

Ҳожи бува, маъзур тутгайсиз. Сизни жудаям қувонтурадиган хабарлар топилмади. Аввалисига бир умидлу излар топгандай бўлиб эдум. Сарҳаддан ўтолмай қолган куявингизнинг меҳрибондан меҳрибон холалари бор экан. Аввал ўшаларникуга тушиб, ўшатларда турган экан. Сўнг у ердан ҳам бои олиб чиқиб кетганча қайтмабди. Ҳануз изини топишолмайдур.

Лекин улар топишолмаган Маҳфузга келинни (*Сизнинг жигарпорангизми-бошқами, аниқлаганимча йўқ!*) изини мен топгандайман. Шундай отлиқ мусофири келинчак эски шаҳарда турар экан, шифохонага тушиб қолган деган хабарлар топдик ахийри. Аммо бориб суршиширилса, бўлак одам бўлиб чиқду. Бир оёги оқма бўлиб ётган, уни-да кесмакка ҳозирлай турган экан-лар — қўймадилар олдига. Номи ҳам бўлак — Мазлумами, Марғубами экан. Ноумид шайтон. Яна суршиштирмоқдалар. Қайтгунимча бирон хабар топсан, албатта, омонатингизни дуои саломларингизни жигарпорангизга етказгайман, инишааллоҳ. Тополмасам, маъзур кўргайсиз, Ҳожи буважон. Менинг қайтар вақтимга оз қолмоқда.

Жигарпорангизни Аллоҳ ўзи ҳифзу ҳимоясида асрасин ва Сиз ила бу дунядаяк кўриштирмоқни насиб этган бўлсин, илоҳим.

Ассалому алайкум ва раҳматуллоҳи ва барокотуҳ.

Аддои Ёқуббекингиз.

1968 йил, наврӯзи. Тошканди азим».

— Насиб этсин, илоҳум, қиёматга қолдирмасун. — У шивирлаб илтижо қиларкан, киртайган кўзларидан шашқатор ёш думалаб, қувалашганча қай бири мўйлаби тагидан сизиб лаблари орасида йўқолар-да — қолар, қай бирлари чувак юзининг бўртиғидан тўғридан-тўғри оқ соқолига сакраб, ундан нимчаси олдига юмалар, уни нам этиб бормақда эди.

Унинг яраси янгиланган, мана, нечандидир марта ич-ичидан туганмас бир ўксик босиб келиб, ўқрамакка яқин қолган, аммо ўкрай олмас (ахир у ўкраса — бошқалар нима қилади, бўзлайдими?! Бўзламакка йўл очсинми?!), бунга сари юм-юм йиғлар, йиғлайвериб шишиб борар, шишиб боргани сари ўзи кичкина тортиб кетмакда эди.

Чунки у ўзидан ўтганини ўзи биларди. Бу ишда ёлғиз ўзи айбдор эди.

Ха-ха, ўзидан ўтди. Бир ҳафталик келинчакни эрига топшириб қўя қолмай элдан бурун бир ишончлув кишига қўшиб, ота юртга жўнатмакка шошди. Бу нотинч диёрда бир кор-ҳол бўлишидан кўра ўша ёқни авто кўрди, тинчроқ билди. Куюви ўтолмай қолуви тушига кириш тутул, ўйлаб ҳам кўрмаган эди. Ўша ўйламагани олдига келиб турибди. Энди додини кимга айтсин?! Нолай афғонини ким эшитсан? Қаердан ҳам ўша Ботур уларнинг қўргонини қора тортиб келди? Шул ертўлада жон сақлади? Кирмаса, сақламаса, шу қўргиликлар йўқмиди? Не қилинин, Аллоҳнинг хоҳлаши, ёзмиши шу бўлса? Пешонаси шу қадар ўшур эканму?

Ўзинг кечир, эй буюк эгам. Ҳаммасини Ўзинг кўриб-билиб турибсан. Не ҳол рўй берган бўлса, Ўзинг воқифсан. Биз гумроҳлар нени ҳам билгаймиз? Ҳикматинг не — қайдан англаб етайлук! Фақат қизимизга-да яхшилик соғинуб топган гуноҳларимизни мағфират этсанг, бас, кечирсанг, бас. Уни-да шаръий никоҳидаги бандангга етказиб, қовуштиранг, хотиржамликлар ато этсанг, бас. Бизга бундан ортиқ иноятларинг на керак, караминг на керак!

У бирдан бир лаҳза, бир сония ичида вужудида аллақандай тинч-сокинликка монанд хотиржамлик ту-йиб, хушёр тортиб қолди.

— Дарвоқе, Мазлума дедими, Марғуба дедими? У шифохонага тушган мусофиргинани? Бирорнинг заифаси, яқин-юқунларининг йўлини кутиб ётган мушфиқани? Анув меҳмон бола — довон ошиб келган тойчоқ билса керак, таниса керак ахир уни? Касалвандлиги, шифохоналарда ётишиними, нимани гапираётib эди-ку?

Чақиртирмакка сабри чидамай каравотдан тушиб, ташқи ҳовлига, ундан йўлакай овоз бериб меҳмонхонага довур етиб борди:

— Ҳой, той бола, меҳмон болам, қайдасан, менга қара?

— Шу ердаман, бой бува, — деб кемшиктой — Акбарали чопқиллаб тушиб кела бошлади.

— Шошма, эҳтиёт бўл. Қоқилиб-нетиб юрма. Сенга гапим бор, холос.

— Мана, келдим, — деди болакай қучогига ийманиб кириб.

— Айт-чи, бўтам, — деди боланинг куракларини силаб-сийпалаб, — сен билган Ёдгортойнинг аяси... қаерда деб эдинг? Нима билан оғриган, деб эдинг?

Саритой уни бир оғиз гапиданоқ тушунди:

— Анув оқ машинада банинага олиб кетишган эди.

— Нега оқ мошин? У қандай мошина? — деди қария аллақандай ваҳима босиб кела бошлаб.

Қай бир сезгилари у ўша бўлса-чи, моҳпорамиз бўлса-чи, дерди.

— Физиллаган машинами, ўзи касал олиб кетадиган-да, — деди Саритой.

— Чакиришиб эдими? — деди қария уни сал тушуна бошлаб.

— Тоғам чақиртириб эдилар.

— Шунақа оғирмиди касали? Нима бўлган эди? — Қариянинг ўзи титрай бошлаган эди.

Лекин титраган қўллари билан-да боланинг куракларини силашдан тўхтамасди.

Бола бўйинини қисди:

— Билмасам...

Ҳали хориждан келган мужда хат таъсиридан кутулмаган қария тусмоллашга тушган эди:

— Анча бўлиб эдими, кўпдан ётармиди?

— Кўпдан эди, — деди меҳмон бола бирдан унга қўшилиб. — Ёдгор соғиниблар кетганди.

Қариянинг ожиз юрагими — нима, титрамоқча бошлаган эди:

— Оёққинасига-чи, нима бўлиб эди, бўтам?

— Кимни? — деб дурустдан тушунолмади Саритой.

— Ўша опоқингни-да. Ёдгорни аясини? — деди қария калаванинг учини топгандек бўлиб.

Бола кўзини юмиб эслашга уринди ва сакраб-ўйноқлади:

— Тўғри-тўғри, бир яра чиққан экан. Опоқбувим кўзяра деб эдилар. Кейин оқади эканми?

— Субҳаналлоҳ, — деб шивирлади қария кўзларини юмганча, яхшиям меҳмон болани

кучоғидан қўймай тургани, орқасига кетса, нима тутиб қоларди. Сўнг ўзини ўнглаб, ўрнидан турди. Эшик кесакисига орқа қилиб, уни ўзига тортди:

- Оти-чи, оти, нима эди? Эслай биласанми, бўтам?
- Кимни... оти? — англай олмади болакай. — Кимни айтасиз?
- Ўша... Ёдгортойни аясини-да? Марғубамиди, Маҳфузга эдими? — дея олди қария.

Бола чиндан билмасмиди, боягидек елка қисиб, жим қолган, билмаганидан ўзи хижолатга туша бошлаган эди.

Қария тин олиб, нафас ростлади: саволни бу гал бошқачароқ қилди:

— Эсла, болам, уни қандай чорлашур эди? Масалан, ўша опоқбувинг? — дея яна куракларини силай бошлади.

У эслади:

- Ҳа, кунпошшаму, ойпошшам дердилар.
- Яна? Яна-чи, қандай атардилар?
- Яна Марғу келиним — мангукелиниб дердилар. Нима эди, бува?

Эшик кесакисига суюниб турган бува эса бу вақт ҳолсизлана-ҳолсизлана пастлаб бормоқда, бўйи болакайнинг бўйига тенглашиб келмоқда эди.

Сўнггида у эшик кесакисига суюнганча ўтириб қола қолди...

Эртасига Мирзахўжа ҳожи улар билан жўнарини эълон этди.

## 9. СИЛСИЛАДАГИ ОҚ ҲАЛҚА ёхуд доруссалом

Биз шажара қоғозни яна ўзидай этиб, (мен текислаб турар, акам ўзига тортиб — най этиб) ўрар эканмиз, (унинг ғилоғидан чиқиб қолган бир энликкина қисми — офтоб ургандек сарғариб кетган эди) ана шундан менинг ваҳмим келиб, вужудимни тушунуксиз бир мажхул кайфият ўраб келар эди: нима бу — ўтмиш қаърига кетган замон нусхими ё ҳавонинг иши? Ахир нур тушган эмас-ку унга, офтоб урган-да десак? Очиқ қолган қисмигагина етган. Демак, биз истаймизми-йўқми, ҳамма нарса сарғариб, унниқиб, чириб-тўкилиб, емирилиб боравуради. Титилиб, тўкилиб тушаверади. Боқий қоладиган нарса йўқ. Нарса борки, зах тортиб қурийди. Куриб қовжирайди, қовжираб сарғаради, сарғариб юпқалашади, юпқалашиб тўкилади. Ва йўқликка кетади. Худди уйдан чакка ўтганидек, қадрли-қимматли нарсаларга нам тепчиб, зах уриб, моғор босиб, алоҳал чириб тушгани каби, куни битгани каби... Бу оламда боқий нима бор? Ҳатто шажара қоғоздан аллатовур бир ҳид уфурмоқда эди. Худди қипик ҳидига ўхшаш... Булар ҳам замонлар кечиши билан қипикқа, қипиқдан бўлган нарса яна қипикқа айланиб бораётгандек...

Мени ана шунақа мубҳам кайфият босиб келмоқдайди, ундан ўзимни олиб қочолмасдим, ҷалғитолмасдим. Нимага — тушуна олмасдим. Афтидан ё хаёлларимни замон қаърига олиб қочган мана бу шажара қоғоз, ё анави эшиги қия очиқ ҳужрадан уфуриб чиқаётган моғор аралаш эски китоблар ҳиди мени бу ҳолга солмоқдайди. Неча йил тупроқ остида ётган китобларми ва ё унинг эгаларининг тақдирими хаёлимни ўғирлаб, банд этган эдилар.

Сутчи (дарвоқе, у ҳамма кўчиб, гузардан путур кетиб, обкаш елкалашни бас қила бошлаган, энди уни сутчи деб эмас, китоб жинниси деб аташ тўғрироқ эди), ишқилиб чол:

— Мен ҳозир, — деганича ўша ҳеч ерга ишонмайдиган китоблари тахланган ҳужрага кириб кетдию, яна нимани излаб қолди — билмадим, чиқа қолмас эди. Мендан ҳам камгап бўлиб қолган Олим акам эса, ўрайдиганини тезроқ ўрай қолмас, худди шажара қоғоздаги ёзувлардан бир нарса тушунадигандек ора-орадаги бир жойларига тикилиб туриб қолмоқдайди. Хат танийди шекилли деб... зехн солсам, йўқ, нуқул бўш — оқ ҳалқаларини санамоқда.

Дарвоқе, у нимаси? Нега бўш қолдирилган? Сутчидан нега сўрамадик? Сўрасак бўлармиди...

Атай ўрамни бўшатдим, у туби ила тақир наматни ўпид, узала тушди. Акам сезиб юзимга қаради. Менга ҳам шу керак эди:

— Нимасини санаяпсиз? — дедим.

Олим акам (жиян тоғага тортади дегани ҳақ рост экан!) Қўлдош тоғамларга ўхшаб, лабини ёйиб, сассиз кулди. Уни «оббо сен-ей, шуниям назардан қочирмадингми, узоққа борасан сен, узоққа» дегандай ҳам, «ақлинг етмаган нарсага бурнингни тиқмасанг кимни кўнгли қолувди» деб ҳам тушуниш мумкин эди. Аммо тоғам ҳеч майнаомуз кулмасдилар. Бунида ҳам... ўйқдай, ишқилиб тикилиб туриб ҳам сезмадим.

— Қизиқ, — деди у елка қисиб ҳам овозини бир қадар пастлатиб, — булар ҳаммаси ўтган замоннинг ўтиб кетган улуғлари бўлса, ўзи ҳам бундан эллик йил бурун тўлдирилган бўлса, ёнидаги бўш ўринлар нимага экан? Шуниси ғалати.

— Нимани айтасиз, анув очиқ ҳалқаларними? — дедим мен ҳам ютоқиб Ажаб, фикримиз бир ердан чиқаётib эди? Нима, улар — унтиб қолдирилган зотларми ё келажакда чиқадиганлари?.. Шу тоб ҳовлининг этагидами ва ё ундан ҳам наридами (нариси — деворнинг орти анҳор, анҳорнинг ортида чивифига ҳам бирор тегмаган лагер бор эди!) ҳаққуқуш сайраб, унга бошқаси бошқа томондан — Қозоқмозор деб аталувчи қайрағочзордан жавоб қила бошлади. Куппа-кундузи қуюқ дараҳтларнинг қай бир шохидадир (албатта, ин қўйиб, уя курган жойларига яқин бир ерда ўтироволиб) роз айтишлари, бир-бирларини чақириб-чорлашлари ғалати эди. Одатда улар кечалари алламаҳалга довур чорлаб, кечанинг сирига сир кўшгувчи эдилар. Булар эса, вақт ҳисобини адаштириб қўйгандек куппа-кундузи қўшилув-кўпайув оятини тиловат этишар эди. Балки ҳамду санолари, тасбеҳотлари шундайдир. Ҳарқалай ҳозир буларнинг бир-бирларини қўмсаб чақирувлари, чорлаб-зорланишлари, «сен қайда, мен бунда»лашлари, куппа-кундузи қаро тунда адашган жигаргўшалар сингари овоз беришлари менга ёқиб тушмоқда эди.

Аммо, манави диёридан адашган акаларим нега бир-бирларини изламайдилар, чорлаб чақирмайдилар? Шу забонсиз қушларки, бир-бирларисиз туролмай ўз тилларида зори-нола қилганда нега улар жим, дунёни остин-устун қилиб бўлса-да, бир-бирини зор-интизор изламайдилар? Ё бунинг юзи шувит, кечирилмас гуноҳлари бормики?... Балки биз билмайдиган нарсаларни ҳам билар — шунинг учун жимдир?..

— Сен нима деб ўйлайсан?

— Нимани? — дедим дафъатан англаб етмай.

У энди тоғамларга ўхшаб беозор, (нега беозор, мени худди эркалагандек) мийифида кулди:

— Маши бўш қолган жойларни-да?

— Кейин чиқадиган зотларга атаб қолдирилган, дейсизми?

Олим акамнинг кўзлари чақнаб кетди:

— Воҳ, балосан-ку! — деб юборди. — Топдинг-а! Менинг назаримда ҳам шундай! Атай қолдиришганов.

Юрагим дукурлаб кетди, ўзимнинг фикримдан ўзим кўркиб кетган эдим:

— Башорат қилиб-а?

Эсим тескари бўлиб бораётир эди. Чиндан ҳам ундей зотлар отилиб-нетиб, бадаргаю сургун қилиниб бўлган кезда қай бир тупканинг тагидан анқонинг уруфини топса мумкиндир-у, буларни топиш амри маҳол кунда — бу ғалати эди! Ақл бовар қилмас гап оғзимнинг бир четидан чиқиб кетган, энди ўзимнинг ваҳмим келиб, пешонамни совуқ тер босиб бормоқда эди! Уларнинг ўзи қандай тўзиб юрибди-ку, мен башорат қилиб қаёқдаги гапни гапиряпман?.. Балки манави эски туриш-турмуши, бола-чақасидан кечиб, якка-ёлғиз яшаётган, хукуматга ўтказиб қўйган хизматлари ҳам қолиб, обкаш кўтариб, сутчилик қилиб юрган, ўзини ибодатгаю эски китобларга урган кишидан сўраб боқиш керакдир. У киши билар ҳақиқатини?..

— Менам шундайми, деб ўйлайман. Илгаригилар кўп нарса билишган. «Башорат»

китобларини ўқишигандар. Биз нима биламиз, — деди Олим акам тан бериб ва аста бояги ишида давом этиб. Қўлимиздаги қоғоз шилдираб ўралар ва шу баробар димоғимизга моғор аралаш мозий ҳиди уфураётгандек бўлаверарди.

— Ҳарқалай сўраб боқиши керак, — дедим мен бояги билағонлигимдан хижолат чекиб.

— Устозданми? — деди у.

Мен сергак тортдим: бу одам унга қанақасига устоз бўлсин? Ё илгаридан биладимиликан?

Мен бир қарорга келиб улгурмай ҳужрадан сутчининг ўзи чиқиб кела бошлади. Унинг кўлида найча қилиб ўралиб, икки томонидан қисқич қоғоз билан ўраб-чирмалган бир нарса бор эди.

— Узр, сизларни куттириб қўйдим. Қаерга қўйганимни фаромуш этиб, эй изловдим тунов куниям. Турган экан, Бобур ҳазратларининг ортларида, у кишининг «Воқеотномалари»га эш бўлиб, — деди сутчи, у «олтин сопли пичоғи»ни топганидан оғзи қулоғида эди.

Буниси чинакам шажарамиз эканми?! Чиндан менинг ичим тушиб бораркан, Олим акам энтиқди:

— Бу ҳам ўша сандиқданми, устоз?

Сутчи мулоим бош чайқади:

— Йўқ, буни манави мирзом, Мақсадхўжага илиндим. У султонлар кечмишию салтанатлар тарихига қизиқади. Бир кун келиб Қодирийга ўхшаб, бирор китоб-митоб ёзиб қолса, аскотар, деб олиб қўйиб эдим. Шунақа сиёқи ҳам бор бунинг, — деб мени хижолатларга қолдирди: азбаройи икки юзиму қулоқларим лов-лов ёнарди. Лекин бу гап шу тобнинг ўзида бир чеккаси менга мойдек ёқиб турибди. Ростини айтсам, чоли тушмагур топди «касалим»ни. Бошқача айтсам, мендек «гап ўгриси»ни ўғирлик устида тутган эди у. Икки юзим чўғ бўлиб ёниши шундан эди.

— Биз эса, бу ёқда Сиздан бир нарса сўрашга илҳақ бўлиб ўтирибмиз, — деди Олим акам ҳайратланиб.

— Шунақами? Билсам жоним билан, жону жаҳоним ила, — деганича у биз томон юраверди, — шу бурҳон қофозданми? Қозио қуззотлар муҳри босилган нарсадан-а?..

Мен тилим лол, аммо унисиниям, бунисиниям билгим келиб ичим тушиб турибди, лекин қани оғиз оча олсам. Тағинам Олим акам дадил экан:

— Манаши оқ ҳалқаларни айтамиз? Нега бўш қолдирилган? Эгаларини аниқлай олишмаганми ёким?.. — деди тусмоллаб.

— Ҳа-а, буми? — деди қария, сўнг жиддий тортиб қўшди, — Бунда ортиқча нарсанинг ўзи йўқ. Ҳатто кемтиги бор, деб ўйлашга қўрқади одам. Ўшал бўш жойлар-да бехосият эмас. Менинг назаримда қиёматгача чиқадиган авлиё зотлар учун қолдирилган. Ҳатто мана, қаранг, Эшон поччамдан кейин ҳам битта бўш ўрин турибди. Демак, сизларнинг қай бир пуштингиздан яна бир улуғ зот чиққай. У ким бўлади, ёлғиз Аллоҳ билгай.

Қария шажара қофозни сийпаб, кўзига суртгудек бўлиб гапиряптию назаримда у биз билган оддий сутчи эмас, жандага ўхшаш жун чакмонга ўралволган дарвеш ҳам эмас, жуда кўп нарсаларни билгич олим каби ҳайбатими, салобатими ортиб борар, «мана, нега бу одам ҳалимдан ҳалим, нурлидан нурли!» дердим ичимда. Ҳатто шу нарсаларни билди-я! Бу атрофда унга тенг келадирган ким бор?

Бунга сари савол халтам очилай-очилиб кетай деб боряпти. Ўзимни зўрга тийиб турибман.

Ахийри чидай олмай сўрадим:

— Бундай авлиёлар... ҳар юз йилда бир чиққайми?

Қария ажабланганини яширмай мен томон ўғирилди:

— Нимага асосланиб... айтаяпсиз, эшон бола?

Мен ғудраниб қолдим:

— Шундай гаплар юради-ку, ахир.

— Юради-юради, — деди у бош силкиб. — Қолаверса, Аллоҳнинг ваъдаси бор: вақти-вақти билан ўз динини янгулаб, қувватлантириб тургувчи кишилар юбориб турилгай. Ҳар қавмнинг ўз ичидан.

— Пайғамбарларми? — дедим мен ҳайрон қолиб. Негаки...

Қария юмшоқ жилмайди:

— Биласиз экан. Мұхаммад соллаллоҳу алайҳи васалламдан кейин пайғамбар келиши тўхтаган бўлса-да, валийлар силсиласи то қиёматга қадар узулмагай.

— Қандай? — дедим ақлимга сифдиrolмай, — ахир борлари ҳам...

— Ҳа, борлари ҳам отиб битирилди, бадарға этиб йўқотилди, лекин, — деб секин ўз ўрнига бояги фотиха қилган жойига қараб юраверди, — лекин бу асрдагина шундай бўлди, балонинг қаттиғи ўшаларга тушди. Бу ҳам Аллоҳнинг хоҳлаши, имтиҳони. Лекин бу улар қирилиб битди, орқаси кесак дегани эмас. Пошшолик пошшосиз қолмаганидек, бу силсила ҳам бардавом этавергай.

— Қандай? — Мен ҳамон тушуниб етолмасдим.

— Жуда осон, — деди сутчи ўз ўрнига чўкиб.

— Аллоҳ Мұхаммад алайҳиссаломнинг руҳипоклари билан барча умматларини таништирганида кимнинг кўзи ул зотнинг муборак қўқракларига тушган бўлса, олим, уламо, кимнинг кўзи бошларига тушган бўлса, салтанатдор — подшо бўлган, — қария майндан-майин ҳам мулоийим жилмайди, — мана, сизнинг кўзингиз ул зоти шарифнинг ўнг кўл бармоқларига тушганки, котиб-мирзо, қалам эгаси бўлиб турибсиз. Шунга ўхшаб, ҳамма ҳам бир нарсага эга бўлган ўша тақдирул азалда. Авлиёлар сираси ҳам узулмаслиги шундан.

Мен ниҳоятда ҳайратда эдим. Сўрамоқчи бўлган нарсамни чеки-чегараси йўқ, аммо ўзим лолман. Бўлмаса, сўрасам яна сўрагудекман: нега ҳамма муборак бошларию қўқракларига қарамаган? Бетавфиқ ўғри-каззоблар-чи? Уларнинг руҳи қаёққа қараган? Осонгина диндан қайтгувчи муноғиқлар-чи? Қотиллар-чи, жаллодлар-чи? У зотга қарамаганми? Билгим келадики, у ёғи йўқ.

Бу орада акам силсилаи шарифни ўраб, жилдига ҳам жойлаб улгурган, биз ўз-ўзидан илгариги жойимизни эгаллаб, қариянинг оғзига тикилган эдик. Ҳаммадан ҳам мен унинг ҳорғин, бироз қони қочган, аммо таг-тагидан ёқимтой бир нур тепчиб турган бетидан, ўзига ярашиқли майда ажинлар босган қабоқларию қисиқ кўзларидан нигоҳимни уза олмасдим.

— Шунинг учун ҳам ҳар ким пошшо бўлавермас, ҳар куни авлиё туғилавермас, бўтам, — деди у қўлидаги қофозни дераза токчасининг бир четига қўйиб. Демак, ҳали-бери бериш нияти йўқ. Қанча писандаю насиҳатлар билан тутқазса керак қайтаётганимизда. Ҳозироқ бера қолса нима қипти, ичимни туширмай? Аммо меҳмонмиз, ўз иззатимизни билишимиз керак. Мен Олим акам бўлсанки, тилёғламаликлар билан бўлса-да, ичим қуриган нарсани сўраб олсан. Мен унақамасман, тортичоқнинг тортичоғиман. Мендан мухбир чиқиши ҳам даргумон, яна ким билади. Ахир Лавҳул-Махфузда битилгани бўлади эмиш-ку.

Қолаверса, мен Олим акамнинг қозон-товоққа уннагани чиқишини кутиб ётибман. Ёлғиз қолсам, ўзим билардим, сутчи амакидан нималарни сўрашни: Сиз бу акамни қайдан биласиз? Фақат оталари — Эшон бувани танирмидингиз ёким илгаридан салом-алигингиз борми? Нега устоз деяпти? Бир идорада ишлаганмисизлар? У бир қанча йил бедарак кетиб, қанча мамлакатларда «ўйнаб келгани»ни, ҳозир чулчут хотинидан қочиб, сўққабош яшаб юрганинчи, биласизми? Ўзиз-чи, ўзиз? Шунча илмингиз, хизматларингиз билан нега ҳамма қатори юрибсиз? Нега қариганингизда бировнинг ташқисида туриб, сутчилик қиляпсиз? Тарки дунё қилган одамлардек? Ахир иссиғингиз бор, совуғингиз, (иссиқ жон!) ётиб-нетиб қолишингиз бор?

Сўрайверсам — сўрайдиганларим адоксиз. Лекин Олим акамнинг олдида тилим тушовлик — миқ этиб оғиз очолмаяпман. Ундан истиҳола қилганимданмас, йўқ, баъзан унга ишонмай,

шубҳаларга тушиб кетаман: кўзимга илгариги Олим акамдан ҳам қувроқ, ундан ўн чандон ўтадиганроқ бўлиб қўриниб кетади. Нега шунаقا — ўзим тушунолмайман. Яна бир қарасанг биб-бинойи — ҳамманинг устида ўлиб-қутиладиган одам бўлиб қолади. Мана, ҳозир ҳам:

— Айтмоқчи, устоз, ошни харажатини қип келгандик, гўштни ари таламасидан қозонга олов ёқвора қолай-а? Паловхонтўрадан кейин сухбатиззи олармиз, майлими? — деб қолди.

— Ия, ҳали шунақами? Сизларнинг шарофатингиз билан қора қўчкорнинг ёғида бўлган палов ерканмиз-да? Насиб-насиб. Савзи-тахтаю пичоқларни олишворай унда, — деди сутчи ўрнидан туришга унналиб.

— Йўқ-йўқ, сиз уринманг, ўзим топиб оламан. Фақат муҳбир-мирзонгиз оловига қарашиборса, бас, — деди акам бежирим туфлигини кия-кия.

Мен ноилож кўзғола бошлаб эдим, қария билагим устига юмшоқ кафтини кўйиб, «Сиз бошлай туринг, ҳозир чиқади мирзом», деб кутқариб қолди. Бошим осмонда, қайтиб чўқдим. Акам эса, «яхши-яхши»лаб чиқди.

Сутчи ҳали билагимни кўйиб юбормаган, мен эсам у момикдайин нарсанинг хуш тафтидан болакайдай эриб борар эдим. Қария ўзини яна ҳам яқин олиб, билагимни аста-аста силаркан, кўзларимга тикилиб қолган эди. Ниҳоят, акамни узоқлатиб:

— Ўбба, Мақсадхўжа мирзом-еј, шунаққиб Фар-гоналардан кўчиб келиб олдингларми, — деб қолди. — Бир чиройли иш бўпти, ўз ютларизга қайтиб олганиз. Саломпам бардам-бақувватгинамилар? Уйларни битириб, жойлашиб кетдингларми? Қизчаларимиз, келин қалайлар?

Мен жавоб бериб улгурмасдим:

— Тўнгичимизнинг тили чиқиб, кейингиси юриб кетди. Ойим ўшаларминан андармонлар. Ўтирибмиз: бошимизда бошпанамиз бор, қора қозонимиз қайнаб турибди, шукр.

— Баракалла, обкаш кўтариб, сутчилик қилиб, оқлиқни орқасидан ўқитган эдилар. Илоҳим, ўша заҳматларнинг роҳатини ҳам кўрсинлар. Туп кўйиб, палак ёйингу шу мирзоликда қоқилмай-суқилмай Аллоҳнинг розилигини топинг, — деб дуо қила кетди, сўнг ҳеч кутилмагандан:

— Айтмоқчи, сўрайман дейман, сўрай олмайман,— деб қолди, — бунинг акасидан — анув ёқларда қолган қариндошингиз — ким эди, ўшандан дарак борми?

Ҳа-а, мана, нимага олиб қолган экан?! Юрагим дукирлаб:

— Султонмурод акамни... айтасизми? — дедим вужудимга бир титроқ тушиб.

Қария им қоқди:

— У щўттамиш деган гаплар юрибди?

— Юриди, лекин ўзимас. Қуруқ миш-мишларга ўхшайди, — дедим бош чайқаб. Аммо Чаман акам уни излаб кетганича бадар кетиб бораётганини айтиб бў-лармиди!

— Кетганлар келиб бўлди-ку?

— Чегарадан ўтолмаган. Ўтолса, кеннойимни ташлаб қўймасди бундай, — дедим. Ўзим ҳам ҳайронман. Мулоҳазаларим ўқдай-ўқдай эди, қариядан ётсирамай айтиб юбораётган эдим.

Аммо кафтининг устидаги қўк ипакдек томирларини сийпаб, хаёлга берилиб кетган сутчи шошмас, мақсадини оча қолмас, бунга сари менинг гумону тахминларим тошиб борар, унинг дилидагини ўзим суғуриб олгим келаверарди.

— Нимага эди, амаки?

Қария ўзига келиб, ийманибгина қаради:

— Ҳарна қилса, эшон бувани кўриб қолганмиз, сухбатларини олганмиз. Шундай одамнинг болалари тўзиб юрса, ачинади-да, киши.

— Нимасини айтасиз.

— Улар тўзигани тўзиган, булар қўним топа қолса бўларди. Арвоҳларини шод этиб.

— Қўйишармикан шунга?

Сутчи тушуниб, юзимга қараб қўйди:

— Лекин бу дунёда киши ўзини ўтга-чўққа уриб юравериши ҳам яхши эмас. Муросай мадора ҳам лозим.

Мен ток ургандек бир сапчиб тушдим: акам бўлади-ку, шу гапга кўнарканми?! Нусрат поччанинг гапларини олмаган, бу гапни оларканми?!

Бироқ тилим ҳеч айланга қолмасди. Бундай қараса, ҳамма гаплари тўғри. Лекин акам — акам-да! Ҳамма у бўла олсин-чи!

— Мен уни биламан-ку, — дедим.

Қария хотиржам орқасига суюнди. Кўзларимга ўша-ўша насиҳатомуз (худди мен — мен эмас, акамдай! Мени акам ўрнига қўйиб!) мулойим боқди: гўё мен кўнсам, у ҳам кўниб қоладигандек:

— Менам буларга азбаройи яхшилик соғинганимдан айтиётибман. Аввало, ўзи билади, лекин қачон Аллоҳнинг хоҳлаганимас, бандасининг айтгани бўлибди? Унинг китобига суюнмаган одам ҳамиша доғда қолаверган.

— Қандай? — деб юборибман.

— Ҳамма нарса унинг китобида битиғлик, — деди қария маъноли жилмайиб. — Дўпписини олиб қўйиб ўйласин танасига. Дунё — дунё бўлгандан бери қанча фиръавнлар ўтди, Искандару Нуширавонлар кетди. Нега ҳеч ким адолатли давлат қуролмади? Халифаликлар ўтди, Андалусияда Абдурраҳмонлар давр сурди, дорулмамлакат қурдик, деб. Лекин нега ҳеч бири асри саодатга ўхшаб келмади? Борми одил ҳукумат қуриб, даврон сурган бирон кимса, бу жаҳон айвонида? Ўйлаб боқмайдими, дарбадар кезгунча, мамлакатма-мамлакат ошгунча? Ҳижрат узилган-ку. Кўним топса бўларди, ёши ҳам ўттизни қоралаб бораётгандир, ахир?

— Шундай, — дедим мен Сутчининг (сутчи десам, олим экан-ку!) кўзларига қарай олмай.

— Гап шу, мирзом, — деди у бошқа эътирозу гап-сўзларга ўрин қолдирмай. — Аёли шўтта бўлса, дарагиям чиқиб қолар. Бир бош суқмай иложи йўқ. Эшон поччамнинг тегирмонга тушса бутун чиқадиган ўша ўғилларига илинган бир нарсам бор, — деб дераза токчасидаги бояги найча қилиб ўралган қоғозни ола бошлади. — Дараги чиқиши билан мана шуни етказасиз. Бу менинг сўзларимmas. Давлат қурган, қургандаям қотириб қурган одам — Ҳозик тўрамнинг «васи-ят»лари. Хоҳласин, насиҳат деб қабул қилсин, хоҳласин, ўзидан уч-тўрт кўйлак кўп йиртган одамнинг хуроси умури мужоҳид деб билсин. Мана, кўчириб олинг-да, етказарсиз вақти билан.

— Кўчириб олиб? — мен ҳайрону лол қолган эдим. (Бояги гаплари — киши кўзига экан-да! Олим акамнинг олдида айттолмаган экан-да?) Лекин нега ўзини бера қолмаяти — мана шуниси тушунарсиз эди. Журъат этиб-этмай сўрадим: — Ўзи-чи, мумкин эмасми?

Сутчи им қоқди:

— Шуниси маъқул. — Кейин қўшиб қўйди. — Қолаверса, буни ёлғиз ўзизга ишондим. Бирор билмагани маъқул.

— Хўп, хўп. Омонатдек экан.

— Бўймаса, мен турдим, унга қарашиб юбора қолай. Сиз кўчириб бўлиб чиқарсиз. — Сутчи сандалга суюниб турди-да, ковшандозга тушиб, оёғига бир нима ила бошлади, сўнг Ҳизр нусхи урган чоллар каби ма-йин жилмайиб қўйиб, қўлининг орқасини белига ташлаб, энкайганча оstonага қараб юраверди. Мен эсам титраб-қақшаб найчахатни очишга унналардим. Не умидла очсан... қай кўз билан кўрайки (мана, неchanчидир марта!) ўша ўнгдан чапга бошланадиган алиф, лом, мимли хат. Заммаю қасраю фатхаларидан, думалоқ сукунларидан кўзим тиниб кетди. Бу белгиларни таниганим билан мен бояқиш кошки ўша белгиларни ҳаракатлантиrolсам, очқичини тополсам.

Мана, неchanчидир марта ичим сидирилиб, ўзимдан ўтганини ўзим билиб турибман. Ўша нарса ичимдаги неча йиллик армонларни қўзғаб, уни аламгами, алам қоришиқ йифигами

айлантириб, томоғимни ғип бўғганича бўғзимга қадалиб олган эди. На қайтиб кетади, на тошиб, отилиб чиқа олади. Чикса, енгил тортармидим. Тағин мен зиёлиман! Олди мирзо, мақтовли битикчиман! Ҳолим эса бу! Оталаримиз хатини ўқий олмасам! Нечанчиdir марта таржимон излашга мажбур бўлсам. Айтишга-да, уяласан. Ўрнимдан тураримни ҳам, сутчига айтаримни ҳам билмасдим. Шундай нарса қўлга тушганда бундай ўтиришим... аламли, ҳам аянчли эди. Ўзимни ночордан ночор ҳис этиб кетдим. Ва шу тоб... бир нима қитирлаб, деразанинг бир тавақаси очила бошлади Сутчи қўринди:

— Айтмоқчи, мирзом, токчада қоғоз бор, — деган жойда юзимга кўзи тушиб, ҳолу ахволимни бир кўргандаёқ фаҳмлаб қайта бошлади. — Ие, ие, узр-узр, мирзом. Мен қарияни маъзур тутасиз. Хат эски ёзувимизда-ку. Мендан ўтибди. Фаромушхотирлик курсин. Айтиб турсам ҳам бўлади-ку.

У мени бир чеккаси хижолатларга қолдириб, бир чеккаси бошимни осмонга етказиб кириб келдию бояги жойига чўкиб буйира кетди:

— Анави токчада қоғоз ҳам, қалам ҳам бор. Олаверинг, тортинманг. Қўй берсанг, арқони билан бер, деганлар. Савоби тўлиқроқ бўлади, — деб кулди. Ўзи эса найча қилиб ўралган қоғозни қўлига ола бошлаган эди. Уни қаранг, шу муомалалардан кейин бояги аламармон, хижолатпазликлардан ҳеч нима қолмаган, ҳаммаси қўтарилиб битган эди. Мен дикка туриб, айтилган нарсаларни олиб келдим-да, бошладик.

Мана шу Илхом домла айтиб туриб, мен ҳовлиқибу юракларим ҳаприқиб кўчириб олган ўгирима. Асли у кишида қолди. Ўзи эса, Ҳозиқ тўрамнинг қаламларига мансубмиш. Сутчи Масков учун ўгириб бера туриб, ўзи учун шунигини атай, ёмон кўзлардан яшириб, минг андишаю истиҳола ила кўчириб олган экан. Вақти келиб, Султонмурод акамга илинибди. Худонинг хоҳишини қаранг. Гўёки, Ҳозиқ тўрам Масков терговчилари учун эмас, Султонмурод акам учун ёзгандеклар. Ўқинг-а, Сиз ҳам...

«Эй бор Худоё, энди бу сатрларни ёзгувчи гариб қулингни кечиргайсан. Раҳмон ва раҳим сифатинг-ла мендан ўтган айбу гуноҳларни ўчиргайсан. Мажбурлик орқасида неки имонимга зид бир иши қиларга тўғри келган бўлса, ўзинг шоҳиду хабардорсан, ҳаммасини диним учун, уни кафтимда лахча чўғдек тутиб асрароқ учун қилиб эрдим. Сенинг розилигини топдимми-йўқми, ёлгиз ўзингга маълум. Мендан сўраб-иста-ётган нарсаларини чин-рост ҳолида ёзишига мажбурман. Улар Ернинг темир ўқлари бўлмии төглар оралигидаги бу мамлакатда биз қандай инқилоб қилганимизни, шариатга асосланган ва ҳам замонавий мўминлар давлатини қурганимизни, унинг тарихини миридан сиригача ёзиб бермакни қистамоқдалар.

Мен уни дақиқ-дақиқига қадар, бирон нарса қолдирмай, ҳатто бизни янчид ташлаши учун тог ортига келиб тушган ўн минг чоғли ёгий лашкарини қандай енгганимизгача ёзиб бердим. Албатта, нусрат сен томондан эди. Аммо улар буни қайдан ҳам билсинлар, қайдан тушунсинлар! Бўлмаса, бола-бакраси, аёлу заифалари билан токқа қўтаришган ҳалқ ҳар бири биттадан гулхан ёққан тақдирда ҳам агар бир овоздан тақбир айтиб, сендан нусрат истамаса, жонидан кечиб ёгий томон талпинмаса, душман қочармиди! Мужсоҳидлар қалбига нусрат иштиёқини солиб, душман юрагига гулгула юборган ўзингсан-ку, Оллоҳим. Бу қудратни булар қайдан ҳам билсинлар, онглаб етсинлар!

Шундай дейман-у, бу тарихни чинлигича ёзиб бериб, гуноҳим устига гуноҳ сотиб олмаётиманни деган-да ўйларга ҳам бораман. Бир тур шубҳаларга тушиб кетаман. Лекин на қилай: куйган кўксим шуни тилаб<sup>18</sup>-да турган бўлса?!

Яна чин гаплардан келар бўлсам, бу куйган ўтлуг кўксумдаги армонларимни тўқар бўлсам, бу мунглуг кўнглумдан қўзголган қайгуларим қайнар сувдек бўлиб икки қўзимдан оққани турган эсалар-да, энди ҳақ сўзни айтар пайтим келди. Биз орзулардик. Мўминларга саодат

<sup>18</sup> Балки бутун ҳикмати ҳам шундадир? (*Муаллиф*.)

асидагидей бир жамият қурсак, Оллоҳ ризолигини топиб яшасак, ибодатлар этсак деб. Бирорга оғирлигимиз тушинаса дердик. Биз қўшиниларга тегмасак, улар ҳам бизга тегмасалар, уруши-сўқишиларга аралашимасак, зулмни, забот этувларни эсдан чиқарсак, унумтасак дердик. Чиройли амаллар билан, садақотлар қилиб, савоблар топиб ўтсак, ҳаммани сенинг қайтарганингдан қайтиб, буюрганингни адо этиб яшашига рози қилолсак дердик.

Аммо калта ўйлаган эканмиз. (Довон ошмагимда учраган у маҳлуқинг бежиз эмасканми, унинг ҳикматига энди тушуниб етмоқдамизми, эвоҳ!). Ерда жаннат яратмоқчи бўлибмиз. Энди билсак, маозоаллоҳ, бандалигимизни, ниҳояти илми чекланган қулларинг эканимизни унумтибмиз. Бизнинг маглубиятимиз табиийдир<sup>19</sup>. Мўмин банда амирликка етганда ҳам мўминлигича қололмаслигидандир бу. Ўзига кў-ўп бино қўйворишидандир бу.

Курдобадаги Абдураҳмоннинг халифалиги, машҳур Доруссалом таназзули, не-не салтанатларнинг емирилуви ниманинг оқибати? Искандар қаён кетти, Нуширавон нимага эришиди? Маъмун нима бўлдию Нодиршоҳ ниманинг қулига айланди?

Ҳаммаси Оллоҳ қонунини унумтиб қўймоги оқибатидир. Инсон қусурли яратилганини, илми чекланганини унумтиб қўймоги оқибатидур. Оллоҳ яратган ва халифа этиб Ерга туширган кишилари учун у зот тарафидан берилган шариат қайдою илми чекланган кишиларнинг тузган қонуни, курган жамияти қайдо! Ўзига ўхшаб чекланган ва қусурли бўлгай. Ундан ўтиб қайга боргай! Биз Оллоҳнинг шариатига асосланиб, жамият қурамиз, яшаймиз демак-да бўлганларга ҳам менинг жавобим битта: Ахир Сиз ўзингизни кимга менгзамоқдасиз ва ким деб билмоқдасиз? У қонунларни ҳаётга татбиқ этарда адашиб кетсангиз-чи? Адашмасликка кафолатингиз борми? Жамий замонларда ўтган ва келадиган башар ичиде энг маҳбуби ва энг комили Муҳаммад соллаллоҳу алайҳи васаллам бўлсалар, ул зотга тенглик даъвосини ким қила олгай?.. Ҳеч ким!

Демак, Оллоҳнинг қонунидан ташқарида одил жамият қурмоқ мумкин эмасдур. Ҳаммаси қусурли бўлгай. Негаким бутун дунёning олий даражали зўр олимлари, ҳуқуқшунос доно билгичлари йиғилсалар-да, бирор бир мамлакат ҳалқининг ҳожатларини қондиргудек тўжис бир қонуннома ишлаб чиқшига-да ожиздурлар.

Инсонники қусурли, Оллоҳники бекусур бўлиб қолавергай.

Шундан айтаманки, алоҳида бир мамлакатда дорул салтанат қурмоқ мумкин эмасдир, аммо доруссалом яратмоқ мумкин эмас, Оллоҳ бу ихтилофларимизга ўзи қиёматда ажри азим чиқаргай. Кимни жаннатига йўллаб, кимни абадий азобига ташлаб. Ана шу буюк адолатдур. Бандаси бир умр, то қиёматга қадар интилган нарсага у бир оғиз «кун» деган каломи ила эриширгай. Доруссалом — ўшал жаннатдур. Ундан берига овора бўламиз.

Эй бор Худоё, бу сатрларни ёзгувчи қулингни но-умид қўймагайсан.

Расууллоҳ соллаллоҳу алайҳи васаллам: «мендан кейин бир замон келур... чин олим сўзини олмагайлар, улуг одамлардан уялмагайлар, дин сўзига қулоқ осмагайлар. Мана шундог бўлиб, дин-дунё ишларига қаттиқчилек келган кунларда ҳар қанча қийналса ҳам ўз динидан ажрамай юриб ўлган бир мусулмон юз шаҳиднинг савобини топгай. Қиёматгача бир тоифа умматим ҳақ ўйлидан адашмагай», деган сўзлари бор эрди. Эй бор Худоё, шу сатрларни битмакда бўлган ғариб қулингни-да, уни ўқиган, таъсиrlаниб қўзига ёши олган мўъмин бандаларингни-да ҳабибинг Муҳаммад мустафо соллаллоҳу алайҳи васаллам ҳаққи-ҳурматлари Ҳақ ўйлидан тоимаган, ислом динида жон берган ўшал тоифадан қилгайсан. Омин!»

## 10. АМИРНИНГ ОҚ РЎМОЛЧАСИ ёхуд ШОЛ АРАВАЧА ЭГАСИ

<sup>19</sup> Шу ўринда Мақсаднинг хаёлидан бошқа ўй-шубҳалар ҳам кечиб-кечиб қўяр эди: «Тўрам бу тарихни миридан сиригача ёзib бермакни қистаганларга атай шу тарз ёзмадилармикан?» (Муаллиф).

— Энди қаён бурай, фиротни? Буюр, пакана пари, қай тупкага десанг олиб боришга тайёрман, — деди Олим акам Чўлпон ота гузарига чиқиб борарканмиз. У қулинг ўргилсин, ош дамлаб Илҳом сутчидек бир хокисор одамнинг кўнглини олганидан хурсандми ё у киши буларнинг хазинасини топиб, асраб-авайлаб ўтирганиданми — ажратиб бўлмас эди. Ва ё ўзлари ўртасидаги муштараклик, иккалалари ҳам бир соҳанинг одами, иккиси ҳам дунё кўрган, минг чиғириқдан ўтган, энди эса иккиси ҳам сўққабош эканликлариданми, бир оғиз сўз, бир қиё боқиши, бир нигоҳ ташлашдан бир-бирларини тушунишар ва шунданми, бир-бирларига суяниб қолган кишиларга ўхшаб кетар эдилар. Бу уни топганидан, у бунинг йўқлаб келганидан бошлари кўкка етган, ҳеч ерга ишонмас эдилар. Қай ердаги узок тарихларни эслалиб, ёдлашиб тўймас эдилар. Мен эсам, Олим акамнинг бу йўқлови, чолни кўргани борувидан чин муддаосининг тагига ҳали ҳам етолмай ўтирибман. Китоблар орасидан чиққан шажара қофоз — силсилаи шарифнинг топилувими десам, у бу ҳақда қўпам суриштиргани, ижикилаб, чолни жон-ҳолига қўймай бир нималарни сўрай кетгани йўқ. Лекин ўша табаррук қофозда, унинг шажара ҳалқалари аро дадаси — Абдураҳим эшон бувамнинг номларини кўрганда кўзлари ғилт ёшга тўлиб, ўзи бир ғалати бўлиб кетди, мутаассирланганидан қоқ наматга тиз чўкканча (худди кимdir улуғ Куръон оятларидан тиловат бошлаб юборгану у тиз букканча соме қолган каби) узок жим қолди. Ким билсин, қай воқеаю қай даврларга хаёли қочди? Балки эшон бувамнинг васиятлари ёдига тушиб кетгандир...

— Тортинма, қайга десанг қайтиш йўқ, бугун мен сенинг ихтиёргидаман, — деди у қайтариб.

— Чиндан-а? — дедим ичим яна ҳам ёришиб.

— Бўлмаса-чи! Фирт бўшман. Салти-савойман устига устак. Ким мени суриштирсин! — деди у рулга шапатилаб қўйиб. — Фиротни бўлса, мойи етарли. Хоҳла, Кўшилишга суриб кетамиз, хоҳла Аччи қирларига. Фозилтепага десанг — Фозилтепага чиқамиз. Ҳали у омонмишку, — деб қўшиб қўйди у. — Кўриб қолайлик, ота диёрни — Иззаю Бўзсувларимизни, сурилиб-нетиб кетмасидан.

— Қани эди, лекин мен, — дедим истиҳола аралаш.

— Лекини борми, истиҳоласи борми?! Айтавур, мўлжаллаган ерингни. Мен бегона бўлсамки, хижолат тортсанг. Қани, қаёқقا? — деб азза-базза у елкамга қоқиб қўйди. Эндиам айтмай кўр-чи? Тоза хафа бўлади.

Мен эрталабоқ дилимга туккан ниятларим бор эди, ўшандан оғиз очдим.

— Бугун поччанинг томонларига ўтмоқчи, шахарга тушиб, бир ерларга кириб чиқмокчи эдим...

— Қайси почча? Ўзимизнинг мутавалли поччани айтасанми? Шаҳардаги?

— Ҳа, йўқ. Асад акамларникига, бу ёққа?..

У ҳали орқамдан қўлини олмаган эди, ўнг елкамга бир тушириб қолди:

— Менам кимни айтиётирман, пакана пари! Ўша Нусрат поччаникими, ахир?

— Ўша-ўша. Лекин улар аллақачон бу ёққа жой қилиб келишган, — дедим кулиб.

— Бу ёғинг — қаёқ? Шаҳар ҳовли-чи? Ўшоқларам бузилиб битди дегин?

Мен бош чайқадим:

— У ҳовлиларни Муҳаббат кеннойига ташлаб, ўзлари бу ёқдан — Бешқайрағочдан жой қилиб келишган.

— Қурбақаободдан-а?

— Ҳа, ўша, ўзимиз билган — Бўзсувларинг нариги бетидаги жойдан, — дедим эслармикин дегандек юзига тикилиб (Ахир ўзи қаердан йўқолиб эди?! Ўша Бўзсувларинг нариги ёғидаги усти ёпиқ мошинга босиб олиб кетилганча — қаёқка ғойиб бўлиби?!). Устига-устак анув Солининг гапи ёдимда: кимdir қип-ялан-ғоч қилиб чечинтириб, камига қора балчиққа бўяб, толга боғлаб

кетибдимиш. Осмондан тушган саллотлар эса, чечиб...

Қараб турибман: Олим акамнинг юзига бир нима жиндек соя ташлаб, жим қолди. Афтидан ўзининг ҳам ёдига ўшал шом, Аччи томонданми, қай гўрдан қиёмат аломати каби тошиб келган кўкимтирик бир туман, уч қадам нарини ҳам кўриб бўлмас бир ҳол, поччанинг боғлари пастларидаги жойлар... тушиб, ғалати тортиб кетгандек эди.

— Борамиз, бораверамиз, — деди у ўзига келиб, — Ойпошша холамизни, у кишини кўрмаганимга ҳам ҳо-ов, қанча бўлди: бошлари осмонга етади, ахир.

Қани энди у кишини қора қилиб, кимни суриштириб бораётганимни айта олсан!.. Сўз ўз-ўзидан акамга бориб тақалган, шунча вақтдан бери сўрай олмаётган нарсаларимни сўрагим келардик... Акамнинг сўнгги хатидаги гаплардан оғиз очгим бор. Аммо... у бунга имкон ҳам бермас, ўзи бу мавзуга яқин ҳам келмасди. Четлаб қочарди нимагадир...

Ростдан ҳам у Султонмурод акамнинг эски ҳарифи, жазолашга жазолаб қўйиб, кейин узрини айттолмаган кишиси — Парпи бебахтни тирик кўрса, топиб борсак, қай ахволга тушадикан? Унинг кейинги ишларини билса-чи, акамнинг аёли Махфуз кеннойимни деб Акмал ўрисга, унинг анув эркакшода жияни — бир сира кўтар-кўтар қилиниб довруғи чиқкан сохта қаҳрамонга қилган хукмларини эшитса-чи? Ақлига сифдира олармикан: дунё шундай курилганию Оллоҳ кимни ҳидоят этиб, кимни адашувда қолдириб юборишини?

— Оқтепадан айланиб борармиз, ҳойнаҳой? Кўпрук тушмагандур?

— Ўшоқдан-ўшоқдан. Бу ёқдан энди мўлжаллашяпти, — дедим мен. — Осма кўприклар расмдан чиқяпти энди.

— Семон чиқиб, бу ёғи осон бўб қолди-да, — деди у.

— Беш сўмга бир мошин бетон беради. Ҳар ёғочлар — сув текин.

— Шундай бўлмаса, бу қоракўз ўзбек қандай ҳовли-жой қила оларди, ҳарқалай ҳукумат ғамхўрлик қипти. Эски боғлари ўрнигаям.

Менинг эса, ич-ичимдан бир норозилик, унга қўшилиб бир ғашлик босиб келарди: жа олиҳимматлик қилиб юборишибди-да? Берган жойлари — биз йўқотган нарсаларнинг урвоғига тенг келармикан? Тонготарларда Изза чимзорларига тушиб, бир шаббоҳун уриб чиқишимга алишмасдим менга қолса! Қолаверса, тунда тўсатга тушишларимиз, бошқа вақт Бўзсувдан сават қараб юришларимиз-чи, тўйгунча чўмилишларимиз, у тепалардан бери келмасларимиз-чи? Қай бирини энди топа оламиз? Санай берса, адоги борми у йўқотишларимизнинг? Қайси гуноҳимизга Худо уни кўп кўрди десам, тўғрироқ бўларди...

Мен дарди-дунёмни акамга тўқмай қўя қолдим. У Султонмурод акаммидики, тушунса! Нима қилса ҳам шу ҳукуматга бўлишган — ўшаларнинг ёнини олади-да. Аравасига тушган қўшиғини айтмай нима қиласди? Биз эса, аламларимизни баъзан «руҳсат этиладиган» танқидий чиқишлиаримизда овлоламиз. Ундан берига мўмин-қобил бўлиб юришдан ўзга нима чорамиз бор? Давлат бамисли улкан осмон устуни: унга қараб (киши билмас) чирт этказиб туфлаш мумкин, холос. Шунда ҳам бир четга... Ундан нарисига... қия бўлиб кетганингни ўзинг сезмай қоласан.

— Фақат сен йўлни айтиб, буриладиган жойларимизни қўрсатиб тур. Йўқса, адашиб кетамиз. Мен бу кўчаларга энди киришим, — деди Олим акам ахийри оқ уй — ола боргоҳ бўла бошлаган участка — ҳовлилардан, уларнинг кенг-кенг, машина сиғадиган дарбозаларию кўчага қараган пештоқларидан кўз узмай. — Орзу-ҳаваслари ёмонмас-ку, а?

— Ёмон эмас. Ўзбек ҳовли-жой билан тирик-да, дўмга алишармиди танчасини, — дедим кулиб.

— Қараб турасан, эллик йилга бориб дўмам мўдадан қолади. Биззи диёrlарда тупроқ томли пахса уйлардан ўтаверсин. Ёзда салқин — қишида жон роҳати. Мен дунё қўриб келдим-ку, ҳеч бири бизнинг ота уйларга етмайди, — деди у қўл силкиб ва машина ойнасидан чапаниларча чирт этказиб тупуринди.

— Сизнинг гапингиз поччаникidan қолишмайди! — деб қулдим мен. — Ўзимиз нимадан бино бўпмиз — ҳадеб пахсали, сомон сувоқли, тупрок томлардан қочамиз, дейдилар у киши ҳам.

— Зўр айтибдилар. Ўзлари ҳам шундай қурдиларми?

— Бўлмаса-чи.

— Қотирибдилар. Юз йил қилт этмай турди эски уйларига ўхшаб.

— Э, у шаҳардаги уйларми, Бобур замонидан қолган дейдилар-ку.

— Ана, мен нима дедим?! Оталаримиз бир нарсани билгандарки, шундай қурғанлар. Қари билганини пари билмас, деган гап кимдан қопти?

— Менам салга поччанинг олдиларига югураман, тоғам қолиб, — деб юбордиму тилимни тишлидим. Сал қолса сирни очай депман.

— Нимага улар бу ёққа тушиб қолиши? Қаънғлига бораверишса, бўларди-ку? Ҳамма-ҳамма билан, почча тўўпдан ажраганлари қизиқ бўпти.

— Олишга олиб, қуришга қуриб қўйиб, энди афсусланиб юришибди. Қолаверса, битта уларми? Ҳамма тўзиб кетди-ку зилзила туфайли.

— Тағинам Оллоҳ аябди, — деди Олим акам узоқдан келиб.

Мен унга ялт этиб қарадим. У сезди, лекин ўша-ўша йўлдан кўз узмай борарди.

— Нега ундаи деяпсиз?

— Етти кечаю саккиз кундуз бўрон юборса, ёким остин-устун қилиб ташласа бу ерни... ким нима қила оларди? Ҳўв — бир давлардагидек, Самуд, Од қавмлари устига келган балодек?... — деди мени ҳайратда қолдириб.

— Қайси... қандай гуноҳларимиз учун?

— Кейин тушунасан, ан-ча ўтиб, — деди Олим акам ўша-ўша — турқи ҳеч ўзгармай. Ўзи бир тушкун десам тушкун эмас, аллақандай камгап бир ҳолга тушиб. Мен уни ҳеч бу алпоз кўрмаган эдим. Тавба, ҳаёт уни шунчалар ўзгартириб ташлабдими? Кўравериб, у қозондан бу қозонга тушавериб, ким бўлиб қолибди? Ким айтади уни хукуматнинг одами, ишонган тоғи деб?

Бу орада янги тушган трамвайлар айланиб қайта-ётган жой — Бешқайрағоч деб аталмиш мавзега этиб бориб, гузардан ўтдик. Олим акам менга талмовсираб қаради:

— Шўтми? Қаёққа бурай?

— Юраверинг. Битта кўча ўтамиз, кейингисида.

Қайрилишдан ўтиб, Олчазор кўча билан сўритокли дарвоза олдига этиб борсак денг, Ҳизрни истасак бўларкан, эшиқдан ҳассаларини қўлтиқларига қисганча, қўлларини арта-арта, почча чиқиб келаётирлар. Оёқларида ўша-ўша жун маҳси-калиш (почча заҳга йўқлар, салга ушлаб қолади «бой қасаллари»), эгниларида кўк мовут чакмон, бошларида мош дўппи — қаёққадир отланганлар чоғи, мунистан мунис, ҳалимдан ҳалим холам кузатиб чиқяптилар экан. Мени кўриб:

— Ана, айтмовдимми, Санобар. Ўнг кўзим учяпти деб. Қаранг, ким келяпти?! — деб ўша ёқданоқ кучоқларини очиб кела бошладилар. — Вой, холанг айлансан, нечук-нечук, қаёқдан кун чиқиб? Сизларниям кўрадиган қун боракан-ку.

Мен салом бериб, елкамни тутиб бордим.

— Орқангдаги ким, Мақсадхўжа? Кимни бошлаб келяпсан? Қош-кўзидан — ўзимизни уруғдан шекилли? Олимми? Эшонпоччамни кенжаларими, адашмасам? — дедилар почча мен билан ҳали сўрашишга улгурмай.

Олим акам қўшқўллаб тавоф қилгудек тезлаб келди-да, қўлларини олди:

— Мен-мен, почча. Олимман, танидиз-а, тавба.

— Самбитдай эдинг, чинордек тўлишиб, оқ теракдек бўй чўзибсан. Нега танимай, кўзинг айтиб турибди. Одамнинг ҳаммаёғи ўзгарса-да, кўзи ўзгармайди, валлоҳи аълам, — дедилар у

киши. Кейин қўл олишга қониқмай бағриларига тортдилар, — Оҳ-оҳ, бўйларингдан, бўйларингам ўз жигаримиз эканингни айтиб турибди. Бормисан? Акангга ўхшаб сенам соғинтириб, бедарак кетдинг? Келаркансан-ку. Зора қадамларинг қутлуғ келиб, Султонмуродни йўллари ҳам очила қолса, — деб алқай кетдилар.

Бу ёқда холам шошиб қолдилар:

— Вой, айтибам қўймабсан, Максудхўжа. Кимни кўряпман! «Раҳматли опамнинг ёдгоргиналари-ку! Кенжা тойлоққиналари! Ислом тоғасининг ўзгинаси бўпти-ку. Кел, болам, чинордек бўйларингдан ўзим ўргилай. Чироқ ёқувчи бўлиб келганинг рост бўлсин, худой, — деб ялаб-юлқай кетдилар.

Почча ҳассани бир-бир ташлаб, қайта бошладилар.

— Қани, кела қолинглар. Ҳой, келинпошша, ўша анжирни тагига жой қила қолинг, жиянлар кепқопти, бизни йўқлагувчилар кепқопти, — деб шу ерданоқ ичкарига овоз бердилар.

Биз у кишини йўлдан қайтарганимиздан хижолат бўлиб, тайсаллашга, бу аҳддан қайтаришга тушдик:

— Почча, бизнинг иш шошқичмас, майли. Сиз йўлдан қолманг, биз кутатурамиз. — Биз у кишини масжидга чиқаётган фаҳмлаган эдик.

Аммо у киши уришиб бердилар:

— Майлиси нимаси? Фариштаси бор жойга меҳмон келади. Ҳамманикига ҳам келсин-чи! Юр-юр. Андишаларингни йигиштир.

Олим акам ўртага тушди:

— Машинали жой бўлса, оббориб кела қолай.

— Гапни калта қил-да, юравер. Жилла курса, фотиха қилайлик. Арвоҳлар ҳаққига тиловот этиб, савоб йўллайлик. Бориш қочмайди.

У кишига холам қўшилдилар.

— Поччангни энди қайтаролмайсизлар, кираверинг-лар.

Анжир таги деганлари ҳовли бўлиб, шапалоқдек-шапалоқдек барг ёзган анжирлари энди бўй чўзиб келаётган, уйнинг сояси ҳам ўша ерга етиб қолган, пастак ёғоч каравот қўйилган сариштагина жой экан. Уч ёғига калта-калта кўрпачалар ёзилган, ўртада бир қуличгина хонтахта турибди. Бирам саришта, файзлики, бунақасини бошқа бирон ердан топиш амри маҳол. Биз жойлашишимиз ила оқ дастурхон ёзилиб, яп-янги сочиқлар қўйилди. Почча дуога қул очдилар. У киши кўзларини юмиб олиб, ўтганларни хотирлаб, дуо қиляптилару қайдандир аллақандай ифорли ҳид таралиб, менинг ақлу хушимни ўғирлаб боряпти. Йўқ, охорли дастурхон ҳидимас. У боя — ёзилган чоғидаёқ гуркираган эди. Бу бўлакча, бўлади-ку, нимтатир бир муаттар ҳид — ўшанақа эди. Худди чопиб-улоқиб боратуриб, анжир тагидан энгашиб ўтиб кетгандагидака, унинг баргларига урилсангизок ўша ерингиздан неча вақтгача гуркираб келиб турадиган ҳид. Ойим уни жаннат иси дейдилар. Ўзи ҳам жаннатдан тушган дараҳтмиш-да.

Ўртада бир пиёла чой айлануб-айланмай (унгача почча бир дунёнинг нарсасини сўраб ташладилар, сўнг чўзиб), хў-ўш деганча гапнинг индаллосига кўчдилар.

— Хў-ўш, очигини айтсам, мен буларга бир нарсани илиниб турибман, Санобар, — дедилар у киши.

Биз тушуниб-тушунмай бир-биримизга алангладик.

— Гапни жа узоқдан бошлайсиз-да, Санобар. Опкирдизми, энди хап ўтиринг. Келин қозонга уннайп-ти. Буларам ҳар куни кеб юрибдими? Борасиз-да ўша... — дедилар холам қўл силкиб.

Энди биз гап нимадалигини тушуниб қолиб, поччанинг ёнларига кириб, от қўшишдик:

— Биздан ҳеч хижолат чекманг, ўз уйимиздек гап. Обориб қўйиш бўлса, ташлабам келамиз.

Почча унамадилар:

— Йўқ-йўқ, гапимга чучунмандинглар. Мен ўша жойга Сизларнинг ҳам насибангиз қўшилганмикан, деб турибман. Кейин: заб борибмизми, Худо етказибди-да, деб юрасизлар.

— Унда, кетдик, нимага қараб турибмиз? — деди Олим акам қўзгола бошлаб.

— Бошланг, ҳамонки, илинибсиз, — дедим мен қўлимни очиб.

У киши дастурхонга енгил фотиҳа қиларканлар, холам бай-байлаб қолдилар:

— Фақат, борасизлару қайтасизлар. Ўшанақаси жавоб берворсангиз кўрасиз-а, Санобар?

— Ўлибман-да жуда! — дедилар у киши қўзгола-ётиб.

— Қайтамиз-қайтамиз. Қайтмай қаёққа борамиз,— деб ваъда бердик биз.

Почча менга жилмайиб, сирли-сирли қараб қўярдилар-у, қаёққа боряпмиз, нимани илиндилар — айта қолмасдилар. Ё бўлмаса, акамдан яширсалар, менга шипшиб қўймасдилар. У кишининг шунака ичдан пишган қуввиклари бор. Охири хурсанд бўладиган беозор шумлик десаям бўлавуради. Ҳозир бизни ана шундай «авраб» бир ёққа бошлаб кетаётган эдилар. Қаёққа — топиб ол!

Борадиган еrimiz узокдамаскан, трамвай йўлидан ўтиб, иккита кўча нарига бурилдикимийўқми, етибмиз.

Дарвозахонасининг олдига том баравар қилиб, темир ишком ясатган, ишком бағазларию белбоғларини бир хил кумушрангга бўятган (аммо токи ҳали ўтказиб улгурилмаган) оқ уй — ола боргоҳ участка олдида устол-устул, кутиб оловчилар кўринарди. Бола-бақра йўқлигидан тўй эмас, эҳсон шекилли.

— Ана шўтга мукаллифмиз, Худо хоҳласа, — дедилар почча ва (қаердан шамол тегибди?!) кафтлари билан қайтармокчилик тўсиб, чучкириб қўйдилар — «Ярҳакамуллоҳ» — дея тушишга урина бошлаб эдилар, мен ғирот эшигини очиб, қўлтиқларидан олишга шошилдим.

У киши суяклари йўғон, илгариги замоннинг одамларидек басавлат эдилар. Кўк мовут чакмонлари сал мўлроқ тикилганми, у кишини унданам савлатли кўрсатарди.

Мен-ку тирсакларидан тутиб бораяпман, нотаниш жой — Олим акам қовушолмай орқада қола бошлаб эди, почча танбеҳнамо қараб қистадилар:

— Юр, юр, нега имиллайсан? Уялма, сени куёв қилмайдилар. У ёшдан ўтгансан.— Сўнг у ёқдагиларга эшитдирмай тайинладилар. — Мени қора тортиб, кириб боравуринглар, кейин хурсанд бўласизлар.— Икки қадам юриб, яна қўшиб қўйдилар.— Агар мени ичкарига қистаб қолишса, бирон ерга жойлашишни кўзлайверинглар. Бегонасираб юрманглар. Қаерга кеб колганларингизни ҳали биласизлар. Бир ҳайрон қолинг-лар.

Ана, холос. Ҳаммадан кутсам ҳам поччадан кутмовдим, қандай қувлик ё шумликни бошлабдилар экан, ҳеч тагига етолмасдим. Аксига юриб, биронта таниш одам кўринмайди. Тўғрироғи, ҳаммасининг истараси иссиқ, юзи таниш-ку, фалончи, деб айтольмаяпман.

Бу орада улар тавозела «келинг-келинг»лаб қолишиди. Ким салом берди. Ким йўл бошлади. Йўлақдаги хизматчилар гурра қўзғолишиб, ассаломга шошилишиди. Бу ҳаммаси поччанинг хурматларига эди. Мен эса кўпчиликнинг салобати босиб, бирорталарининг юзига тайинли қаролмайман. Олим акам ҳам кўли кўксида, «кайтилмаган жойга — йўнилмаган таёқдек» ҳеч қовушолмай, туртиниб-суртиниб кириб келяпти. Ҳаммага бир салом бериб, тавозе қилаётгандек-у, таниса ўлсин агар.

— Эй-й, келсинлар, мутавалли, келсинлар. Айвонга олинглар, айвонга, — деб қолишиди одам олиб турган ишбошилар.

Бирпасда кимлардир келиб, икки қўлтиқларига кириб, у кишини калишлар расамади билан тўғрилаб-терилган зинапоядан олди ойнаванд пешайвонга олиб кириб кетдилар. Улар кириб боришган сари бу ёқдагилар истиқболларига туриб жой бўшатишар, қўлтиқларидан олган кишилар эса, қўярда-қўймай тўрга — саллалию рангоранг чакмонли қариялар ўтирган жойга етаклашар эди. Бунга сари почча:

— Ҳой, азизлар, ҳой-ҳой-ҳой, бу нима қилганлариз? Ҳаммани безовта этиб? Ҳамма жой — бир жой-да, — деб оёқ тирадилар, хижолат тортардилар. У ёқдагилар ҳам чакририб қўйишмас:

— Опкелинг мутаваллини, жойларини билиб ўтирсинлар, — деб кулишарди.

Сўнг ўтириб, дуо қилиб тинчишди ва тавозула секин-секин сўраша кетиши. Ёғ тушса ялагудек ҳовлидаги сўрилар тагига ҳам жой қилиб юборишган экан, бизни ҳам ўша тўпга қўшиб ўтказиши. Мен-ку ҳали ҳеч кимни таниб улгурганимча йўқ, фақат зинанинг тагидаги антиқа шол аравачадан қўзимни узолмай турибман. Эгасини қаерга жойлаштиришибди, у бўум-бўш эди. Бу орада рўпарамизда ўтирган — бир кўзига оқ тушган, чечак юзли одам кутилмагандা Олим акамни таниб:

— Ия, Осмон, ўзингмисан? Вой тикка ташлар-э, боракансан-ку! — деб қолди.

Буям таниди:

— Истроил, санмисан? Шатда турасизларми? Уни қара-я, — деб иккалалари ўтирган ерларида кафтларини қўшқўллаб чанглаб, кўриша кетдилар. Ўрниларидан туриб қучоқлаша кетишига истиҳола қилиб, бир-бирларининг қўлларини қўйиб юборишмас, пешоналарини пешоналарига тирагудек мункайб олган эдилар.

— Кўришган жойимизни қара-я, — деди чакич юз ҳайратланиб. У ўзича овозини пастлатган-у, лекин шанғиллаб кетаётганидан, яқин-атрофдагилар лаганда уюб-уюб тарқатилаётган пармуда сомсаларни ўзларига олиб, бошқаларга узатишганча, буларга аланглар эдилар.

— Минг йил бўлди-ёв? — деди Олим акам ҳам, унинг ҳайрати бунга ҳам юқсан-қўйган эди.

— Вой, сени-ей, ғирром-ей, — дерди овозини пастлатиб, аллақайси воқеаларга шама қилиб.

— Ўзинг-чи, қаёқка гум бўлиб кетувдинг? Қамалиб-самалиб кетмовмидинг? Узок кетдинг жуда?

Акам эса:

— Кўриб турибсан-ку, бус-бутунман. Ўтирган одамга ўхшайманми? — деб куларди.

Чакич юз (мен уни танимайроқ туриб эдим, эсладим: сутчиларни олиб, Бешоғочга қатнайдиган юқ машина шофёри эди). «Вой, сан-ей, вой, хувариларнинг боши-ей», деб туриб, бошини яна ҳам пастлатганча акамга шивирлаб қолди:

— Сен уларни, анув чопиб хизмат қиб юрганларни танивотсанми? Қўй оғзидан чўп олмаган «покиза»ларни? Яхшилаб қара-я.

Олим акам ким чой ташиб, ким пармуда сомса тарқатиб юрган бир хилда хушбичим мовут чакмонли кишиларга — ёшлари ҳам қирқقا бориб-бормаган йигитларнинг юзларига бир-бир тикиларкан, ажабланганини яширлмади.

— Чинданам «покиза»лар-ку.

— Ҳа, ҳа, Парпи бебаҳтнинг йигитлари. Энди сўфи бўлиб қолишганини кўрсанг. Худди эртаклардагидек, бир думалаб беозор мусичага айланиб қолишибди, қара. Биззи окаям ўшаларда вазир.

— Тушунмадим, — деди акам қўзларини пирпиратиб. — Қанақа вазир?

Менинг эса ичим қуриб, гумириб боряпти: наҳотки, бу ўша бебаҳтнинг иши? Унинг хонадони, дейман. Кўзимни зинанинг тагидаги шоларавачадан узолмайман. Ўзи қаерда экан? Аланглаб тополмайман.

— Ўнг қўл вазир — ишбоши-да, нимасини тушунмайсан, — деди у.

— Ҳов, Истроил, деворниям қулоғи бор-а, нақ товбангга таянибам қутулолмайсан кейин, — деб орқадан кимдир шипшиди.

— Менам кечаги гапдан гапиряпман, бугун демаяпман-ку, — деди чечакюз оёғи остига тупуриниб.

Орқа қатордан яна кимдир гап қўшди:

— Кечаги гап — кечаги. Исломда жоҳилиятдаги гаплар эсланилмайди.

Истроил ака лабини жийириб, кинояли бош ирғади:

— Сеники «маъқул», опқочоғич. — Сўнг тўнғиллаб қўйди, — бир гапдан қолсан, ўламанми!

Унинг бегидирлигига ҳам, чапани-шанғилигига ҳам тараф йўқ эди. Ҳозир бор-йўғи акамни

учратиб қолганидану унга қай товкада ўтирганини тушунтириб қўяётганидан боши осмонда эди, холос.

Бизнинг қатордагиларга ҳам пармуда сомса тортилиб, ҳамма нафси билан овора бўлиб қолди. Чиндан у таъми оғизда қоладиган қилиб, думба-ёғ солиб ёпилган, зира-мурчи тобида эди. Мен уни Марғилонда тайёрлаб, нозик меҳмонларга тортишларини кўрган эдим. Бизда ҳам расм бўпти.

Сўнг қўлма-қўл пешайвондагиларга косада бир нима тортила бошланди. Кейин билсам, косанинг тагида ярим чўмичгина нуқул важудан иборат манпар экан. Умрим бино бўлиб, шунча муҳбирликларда юриб, бунақа шоҳона зиёфатга энди тушишим эди. Жиндек-жиндек, лекин ичидан кўрсанг бу дунёнинг таомимас, асал бўп кетган. Ошпазларнинг ҳам зўрини чакиртиришган экан-да.

Ким буларнинг расамадини тузган, ким бошқариб турибди, ҳеч тагига етолмасдим.

Ниҳоят косалар олинниб, жой-ростонига етказилиб, пешайвондаги деразанинг бир тавақаси очиб қўйилди. Чоллар иссиқлаб, ҳаво етмай қолдими, деб ўйловдим, йўқ, микрофон қиртиллаб ичкаридаги қарияларнинг ғовур-ғувури бизга-да эшитила бошлади.

— Тўрамдан икки оғиз эштайлиг-а, соғиниб қолдик-ку, нимага йиғилганмиз,— деган такаллуф сўзлар бўлиб ўтиб, кимдир юмшоқ йўталиб, бошқаси томоқ кирди.

Атрофдан:

— Жим. Тинглайлуқ, биродарлар, — деган сўзлар юриниб қолди. Одамлар бир-бировларини тартибга чорлар эдилар.

Бир хилда майсаранг мовут чакмон кийган хизматчилар-да кўринмай қолдилар. Афтидан улар ҳам қай бир чеккага ўтиб, бояги неъматлардан татинар эдилар. Ё маърузани тинглагани ўтирдилармикан — билолмадим.

— Мухтарам жамоа! Узок-яқинидан бу қутлуғ хонадон эгасини иззатлаб, қадам ранжида қилган азизлар! Ўзбекнинг нимаси кўп — тўйи-тўйичиғи, меҳмон кутиши кўп. Локин шулар ичида улуғи эҳсондур, савоб умидида дастурхон ёзмокдур. Бу хонадон сultonи ҳам шул умидда бизни чорлабдурлар, олдимизга дастурхон ёзиб, тансуқ-тансуқ неъматлар ҳозирлабдурлар. Ҳидоятга тушиб, унинг шукронасини унутмаган мўминнинг одати шундай: фарзанд кўрса, шукронасига ақиқа қилгай. Янги ҳовлига кўчуб кирса, шукронасига эҳсон дастурхони ёзгай. Муҳими ният, сабаблар топилавергай. Мана бугун ҳам биз эски диёрларию ота ҳовлиларини ташлаб келолмай ўтирган биродаримизнинг ниҳоят янги диёрга розилик беришлари или янги хонадон эшиги очилиши шарафига бу ерга йиғилиб турибмиз.

Мен бу ерга келатуриб ўтмиш замондошларимиз ичида ўтган энг буюкларидан икки инсон билан бўлган икки воқеани хотирладим. Бири пайғамбаримиз соллаллоҳу алайҳи ва саллам билан кечмишдур, яна бири улуғ амиримиз Амир Темур жаноблари билан кечмишдур. Мен шу икки ибратлуғ ҳодисани сизларга илингум келди.

Сўзлагувчи ичкаридайди. Пешайвон ойнаванд бўл-са-да, ромларга бўлинган, ўртасидаги устунлар тўрдагиларни кўришга қўймас, қолаверса, қаёқ тўр, қаёқ паст ажратиб бўлмас, биз сал узокроққа тушиб қолган эдик. Аммо ширин лафзи қай бир ёқлиларникига ўхшаб кетиб қолишидан мен бу кишининг нутқини қачондир эшитгандек бўлаверар эдим. Қулоғимгами, юрагимгами таниш эди, қисқаси.

Шу тоб Олим акам энгашиб, қулоғимга шивирлади:

— Маршал ҳазратлари-ку. Танидингми, пакана пари?

— Ким? — Мен ҳайратланиб, ялт этиб қарадим.

— Тўрам ҳазратлари-да. У ёқда номларини эшитсалароқ тикка турадилар, — деди у бош ирғаб.

— Қаёқда-қаёқда? — дедим дабдурустдан англамай.

— Қаёқда бўларди, — деди у мен томон энгашиб ва шивирлаб, — Оталаримиз қолган,

ўзимиз қанча вақт юрган ёқда-да.

— Тушундим, — дедим ичим, юрагимнинг нозик бир, ингичка ерлари титраб кела бошлаб.

— Ҳой, йигитлар, эшитинглар, — деб бир киши қараб қўйди.

Мен узр дея қўлимни қўксимга босдим. Ўзим эса, ҳайратдаман: воҳ, уни қара-я, почча шуни илинган эканларми, сир тутган эканларми?! Биз томонларда Ҳозик тўрам деб шухрат топган киши давом этар, мен Махфуз кеннойимга туркона дори истаб борганларим ёдимга тушиб кетган эди.

— Расулуллоҳ соллаллоҳи алайҳи вассаллам Маккани фатҳ этиб кириб келишларида тўққиз кишини кўрган ва тутган ерда ўлдиришга буюрган эдилар. Улар илгари Расулуллоҳга энг қаттиқ душман бўлиб чиқкан ва озорлар берган дин душманлари эди. Шуларнинг энг қаттоли Абу Жаҳл эди. У Бадр жангидаги ўлдирилгач, ўғли Икрима ислом қонини ичишга қасам ичган эди. Шунинг учун «уни қаерда кўрсангиз ўлдиринг» деб буйруқ берган эдилар...

Ҳозик тўра чиройли ҳикоя бошлаган эдилар, ҳамма нафас ютмай у кишини тинглар, сўларининг мағзини ҳар ким тушунганича чақиб олмоқда эди. Мен эсам, нимага бу ҳикоятдан тушдилар — англай олмай турибман. Нимага менгзаётилар — тушунгандайман-у, уқиб олишим қийин бўляпти.

— Локин Маккани фатҳ этиб, ҳарамга кириб, Оллоҳнинг уйида икки ракат намоз ўқиб чиққач, у зот ўзгариб қолдилар. Зотан бутун оламларга раҳмат олиб келаётган зот душманларига ҳам илтифот кўрсатадурган бир ҳолга тушган эдилар. Ана шунда у зотнинг олдиларида Икриманинг хотини Умму Ҳаким келиб:

— Ё Расулуллоҳ, сиздан яхшилик сўраб келган бирорта одамни қуруқ қайтармадингиз. Мени ҳам қуруқ қайтармаслигинизга ишониб, эримга омонлик сўраб келдим. Яна қочиб юриб, ўзини ҳалок қилиб қўймасин, ё Расулуллоҳ, — деди.

Анда ул зот:

— Агар уни қайтариб келар бўлсанг, яхшилик қилурмиз, — дедилар. Соллалоҳу алайҳи васаллам.

У кишининг шу сўзларига ишониб, Умму Ҳаким эрини Яманга жўнаётган кемадан қайтариб келди. Абу Қубайс тоғи ўрнидан кўчса кўчарки, Мухаммад сўзидан қайтмас, деб қайтариб келди.

Чиндан ҳам Пайғамбар соллаллоҳу алайҳи васаллам узрини қабул қилиб, ридоларини оёғи остига ёздилар ва:

— Эй бор Худоё, Икриманинг душманчилик билан қилган ишларини, мени ҳақимда айтган сўзларининг гуноҳларини кечиргил, — деб дуо қилдилар. Соллалоҳу алайҳи васаллам. Дархол у шаҳодат айтиб, иймонга мушарраф бўлди.

Ажабки, илгари уруш майдонида Икрима бир саҳобани ўлдириб қўйган, буни кўриб Расулуллоҳ кулган эдилар ва:

— Бу икковининг жаннатда бир ўринда ўлтирганларини кўрдим. Бу ерда эрса, бир-бирларини ўлдирмоқдалар — шундан кулдим, — деб башорат берган эрдилар. Қарангки, Абу Бақр Сиддиқ халифалик замонларида шу башорат юзага чиқди. Ҳазрат Икрима Шом ғазотига чиқиб, шаҳодат топдилар. Розийаллоҳу анҳу.

Худди шунга ўхшашроқ воқеа Амир Темур замонларида ҳам содир бўлмиш экан. Бир куни Озарбайжонда хукмронлик қилаётган Мироншоҳнинг хотини Суюнчбека қайнотаси хузурига эридан шикоят этиб, кўзёш қилиб келадир. Яъниким у киши давлат ва раийят ишларини унутиб, қайфи сафо, базми жамшидларга берилиб кетмиш. Бундан ортиқ даражада ғазабланган соҳибқирон лашкар тортиб сафарга чиқади. Уни эшитган Мироншоҳ надиму улфатлари билан Табризга қочиб яширинади. Лекин амир уларни тутиб келтириб, ўғлини халқ ўртасида эллик дарра урдиради ва йўлдан оздирган тўрт кишини ўлимга маҳкум этади.

Уч айбордor — мавлоно Кўҳистоний, Қутбиддин Коший ва ҳам Абдулмўмин Гўяндийлар ўша

куниёқ Қазвин дарвозасида дорга осиладилар.

Аммо ҳофиз Абдулқодир Марофий Бағдодда қочиб улгуради. Соҳибқирон уни борган еридан тутиб келтиришга буюрадилар ва Бағдодда қўшин кириб боради. Ҳофиз эса у ердан Мисрга қочади. Аммо осмон узоқ, ер қаттиқ, уни ўша Мисрдан-да тутиб келтирадилар. Кўксарой олдидағи майдонга дор тикилиб, хукм ижро этилишга киришилади.

Гуноҳкор ҳофиз ўлими олдида икки ракат намоз ўтаб бўлгач, вакиллар орқали буюк амирдан Қуръон хурмати бир пора Қуръон тиловат этишга рухсат сўрайди. Темур осий банданинг бу тилагига ҳам розилик беради.

Ва меҳрибон ҳамда раҳмли Оллоҳ номи билан Таборак сурасини тўлғониб тиловат эта бошлайди. Ҳо-физ қори эди. Аёнки, ўлими олдида сўнгти бора таборакни ёд ўқимоқда, бундан сўнг унга Оллоҳга мурожату муноҗот этмак насиб қилмас, шундан-да, тўлиб, йиғлаб ўқимакда эди. Гўё сўнгти нафаслари Оллоҳнинг қаломи или қоришиб, учуб кетмагига ишонган куйи ўқир эди. Бунинг-да чеки-чегараси борлигини гўё унугтандай эди. Руҳи ўша қалом оҳангларига кўшилиб эриб, учуб кета қолса яхшироқ эди унга. Бу унинг тавбаси эди.

Аммо ҳар нарсанинг туганчи — тугамоғи бор. Қалом «би маим-маъин»да узулди. Сўнг «субҳона раббика роббил иззати амма ясиғун ва саломун алал мурсалин, валҳамдулиллоҳи роббил аламин» билан тугади. Ҳамма юзига фотиҳа тортди ва табиийки, бутун ёшлиғ қўзлар амирга тикилган эдилар. Соҳибқирон-да эриб битган, унинг-да қўзлари ёшлиғ эди. Кўнглидаги ўтлиғ қаҳрдан эса асар қолмаган — бир улуғ қўл уни сидириб олиб ташлагандек эди.

Ногоҳ у ўрнидан туриб, пастга — қатлгоҳ томон юрди. Ва маҳбус тепасинга келиб, тиз чўкканча ўлтирган ҳофизнинг қўлтиғидан кўтардию бағрига босди. Сўнг титроқ қўлларила ёнидан оқ рўмолча олиб силкиркан, жаллодга кетинг ишорасини берди.

Шундан сўнг бизнинг диёрларда тавбадан сўнг мўминнинг ўтмиш-кечмиш гуноҳлардан тил очмак, юзига солмак — урфдан чиқиб, ҳидоятдан сўзлаш — суннат бўлди. Розийаллоҳу анху...

Бундай қарасам, ҳовли чеккаси билан битта бўлиб, бояги мовут чакмонли хизматчи йигитлар бир сафга тизилишган, худди Ҳозиқ тўрамнинг охирги сўзлари гўё уларга тегишилдай ўзлари ним таъзимда тураг эдилар.

Сўнг кимнингдир ишораси билан улар қўзғолишиб, чойлар янгиланиб, пахта гулли косаларда икки донагинадан (устида жиндек қатифи, мурчи, кўкати билан) манти тортила бошланди. Эҳсон-зиёфат давом этарди. Сўнг тиловат билан ҳамма тура бошлади. Ана шундагина шоларавачанинг эгасини кўрдим. Уни икки йигит тагидан қўл ўтказишиб, тўй боладек ичкаридан кўтариб чиқиб келишар эди. Қарангки, бу ўша — ўзим билган ва вақт ўтиб муштдек бўлиб қолган Парпи эди. У ҳам бошқа йигитлари каби оқ иштон-оқ қўйлакдаю устидан мўъжаз қўқ мовут чакмон кийдирилган, ўсмир боланикидек бир бурда юзидан оқ-сарғиш бир нур, бир оқлик тараалар эди.

Борлик-йўқлик асносида туарканман, қулогим остида бирор ҳайратланиб шивирлади:

— Акамни номидан иш кўриб келаётган шуми экан, пакана пари?

Мен чўчиб ўгирилиб, Олим акамни кўрдим. Ва маъноли қилиб:

— Кўриб турибсиз-ку, — дедим.

## 11. ЖАЗО, РИЖО ВА ҲИДОЯТ

Биз ичкаридагилардан илгарироқ чиқиб, дарвоза тагида қўл қовуштириб тураг эдик. Бундай йиғинларнинг ҳам ўз одобиу ҳикмати бор экан. Қолаверса, ўзбек шу мулоғимати, узоқ-яқиндан келганлар билан кўришиб-омонлашиши, икки оғиз ҳол-аҳвол сўрашиб, бир-бирига самимиятини изхор этиши билан ҳам ўзбек экан. Худди шунаقا пайтда жиянлар тоғаларини тавоғ этиб, сиҳат-саломатликларини сўрайдилар. Амакиваччалар, холаваччалар юз кўришадилар, яқинларини суриштирадилар. Кичиклар ўз хурматларини изхор этсалар, қариялар

дуо қилишади. Шу он, шу дақиқада бутун тириклиқ, дунёнинг зийнати шундан иборатдек кўриниб кетади одамга. Яхшиям ўзбекнинг тўй-ҳашами, ақиқаю эҳсони бор. Дунё ташвишларидан ортмай юрганлар, манави зилзила муносабати билан узоқ-яқинга жой қилиб кўчиб кетганлар, шу баҳона йифиладилар, дийдор кўришадилар, ҳол-аҳвол сўрашадилар. Келолмаган қарияларнинг омонат саломлари, дую тилакларини етказадилар. Чиндан шу халққа мансублигингдан, оқибатни, қариндош-уруғдан хабар олишни унутиб қўймаганингдан (албатта, силаи раҳм қилиб турганга, вақтида келиб, қарияларнинг дуосини олганга нима етсин!) ичингда бир ғуур ту-йиб кетасан. Оллоҳ сени шу тоифадан этганига (анув ота-онасини ташлаб, бегона юртларга тентираб кетавурадиганлар тоифасидан қилмаганига!) шукроналар айтасан.

Ҳаммаси шунаقا пайтда — таниш-билишлар учрашиб, кўз кўзга тушиб, меҳр жилва қилганда билинаркан. Биз ҳозир ана шу ҳолатда ичкаридан чиқаётганларга интиқиб турардик. Акам ҳам, мен ҳам.

Бизга бу йигин-машваратни илинган Нусрат поччанинг ўzlари ҳали кўринмасдилар. Афтидан, у киши айвондаги домла-имомлар билан сўрашиб, бир-бирларини зиёрат қилишаётир, унгача бу ёқдагилар тизилишиб, ичкаридан чиқадиган азизларни кутиб туришар, ҳеч ким жилишни ўйламас эди. Бояги амри-маъруфнинг таърифини тилдан қўймай, ўша сухандон киши — Ҳозик тўрамни иштиёқмандлик ила кутишмоқда эди.

Мен Олим акамга зимдан назар ташлаб-ташлаб қўймоқдаман. Уни ҳали Истроил таксачидан бўлак бирор таниб улгурганича йўқ. (Ахир у шаҳарга милиса ўқишига кириб, уни битираб-битирмас даб бўлиб кетганича, ҳамма ҳар қаёққа кўчиб, қанча сувлар оқиб ўтиб кетди!) Таниб қолишиша — бирпасда шовур-шувур қўпиб, ким Эшон буванинг ҳурматлари, ким Султонмурод акамни иззати ҳаққи келиб кўриша кетар эди-ку. Фақат танимай туришибди. Ўзи эса, ҳар битта таниш чехрага — яккабоғлигу каттабоғликка ютоқиб-интиқиб, бир олам хотиротларга берилиб тикилади-ю, фақат бориб сўрашишга, ўзини танитишга ийманиб турибди. Ёнидаги чапанисифат, япасқи юз Истроил aka эса оғзида носи, ғўлдираганча унга аллакимларни таништириб, алланималарни эсига солмоққа тушган эди. Акам уни англайвермагач, ахийри носини ташлаб, қулогига ёпишиб борди-да, тушунтиromoққа бошлади.

— Кўряпсанми, товкасидагиларни? Мулла бўп олишибди. Сатта том тешаману бўхча ўғирлайманлар. Яна тўн ярашганини қўр, — дерди у.

— Худо инсоф бераман деса шу-да, — деди акам.

— Қатта! — деди Истроил aka қўл силтаб, — ўзларига қолса эртагаёқ ўша кўчага бурилиб кетишиади. Фақат бу қўймай турибди-да.

— Ўша ўзимизнинг Парпи-я? Товка боши-я?

— Хў, сен уни нима деяпсан? Яримталигига ишонма! Ўнта бутунни қочиради. Албатта сўз билан, илми билан. Биз уни ўтириб қолди, десак, ўзини илмга урган экан. Шайхим қори акага ўҳшаган ҳов анувнаقا домлалар билан улфат бўлволиб. Эшитдинг-ку, бугун биттасини. Қалай, ёқдими?

— Ёққанда-чи!

— Булар шунаққиб эгиб олди-да, сатта қашқата-ёқларни, қамоқ ҳам тузатолмасларни. Энди сўзидан чиқсин-чи!..

Ва шу маҳал дарвозахонада «Сиз ўтинг-сиз ўтинг»-лаб домлалар кўриниши. Улар нурли қариб, кичкина тортган ва ҳам сал мункиллаб асо тутган, устига устак ўзига хўб ярашиб ўтиришган майсаранг мовут чакмон кийган киши ортидан эргашиб келар эдилар. Мен у кишини текис бодом қовоқларидану юмшоқ мулойим назарларидан бир қараашдаёқ таниган эдим. Кенно-йимга табиб излаб бориб... кимни кўрибман?! Шу киши эди-да! Фақат унда сал тикроқ, дадилроқ кўриниб эдилар. Қолаверса, Тангритоғдан келган табиб деб таништиришиб эди. Худди шу одам берган бир ўрам туркана дори Маҳфуз кеннойимга малҳам бўлган, ўша билан

оёғи кесилмай қолган эди. Бугун эса мен тамомила бўлак манзаранинг шоҳиди бўлаётган эдим. У кишини катта уламо сифатида кутиб олиб, кузатишмоқда эди. Бу орада улар дарвоза тагига чиқиб қолишган, у кишининг ҳурматларига ҳамма тизилиб қўл қовуштирган эди. Ҳамма у кишини тавоғ этиб қўришиб қолгиси келади-ю, лекин ҳеч ким бориб қўлларини олишга ботина олмасди.

Ва ниҳоят у киши жамоатнинг бу истаги, бу хоҳишини сезиб қолдиларми, ўzlари ўша икки ёнда тизилишганларга таъзим қилиб, гўё салом бериб, алик олиб кела бошладилар-у, сўнгги дақиқада эшик тагига чўлоқаравачаси илиа кузатувчилар қаторидан жой олган ўй эгасини кўриб, ўша томон юрдилар ва бориб ўша мовут чакмонда нур тўкиб ўтирган яримта одам — Парпи бебахтни авайлаб қучиб, юзларини юзларига суйкаб, куракларини силай бошладилар. Ўzlари эса бисотларидаги энг ширин-шакар сўзлар илиа уни алқар, алқаб дуо қилар, чиройли умру чиройли охират тилар эдилар.

Сўнг ўша атрофдаги яқинлар билан қўришарканлар, эргашганлардан кимдир у кишини уринтиргиси келмайми, қўлинин очиб:

— Тақсир ҳазратлари, жамоат ҳақига, янги хонадон соҳиби бўлмиш укамиз ҳақига дуо қилинг, — деб қолди.

Ҳамма шовуллаб қўл очди. У киши ҳам турган ерларида тўхтаб, асоларини билакларига солганча, дуога қўл очдилар.

— Эй, бор Худоё, илоҳа иловандо мўминларга ана шундай сабру жамиил бергин, то тирик эканмиз, ватанларидан бошқа жудо қилмагил, оғир, мاشаққатли синовларингга ташламагил. Доим раҳм-шафқат қилгил, ўз илму раббонийингдан бенасиб этмагил. Кўзғотмагил, тўзғитмагил, сарсон-саргардон этмагил бу умматингни. Ўзингга тоатда, ибодатда қилгил. Чиройли, ўзингга хуш келадурган амалларга мушарраф этгил. Ҳидоятингга бошлабсан, қайтиб ўзингдан бегона қилмагил. Адаштирмагил ҳеч. Шу жамоатда қўл очиб турганларни ўzlари ўзриёдлари ўлардан кейин келадургонларни ҳам ўзингга суюкли умматдан қилгил. Ўзингдан ўзгани демайдиганлардан қилгил. Бу хонадон соҳибини ҳам ҳидоятингга олибсан, чиройлув амалларини бардавом этувига эриштиргил. Ҳасбияллоҳу ва неъмал вакил деган бу бандангни ўзинг қўллаб, унга қатишиб келган ҳар бир инсонни азизу мукаррам этгайсан. Уларни Ўзингнинг адлу адолатингга топширдик, ҳамиша қўлларини баланд этгайсан. «Роббана атина, фид дуня хасана ва фил охирати хасана ва қина аъзабан нар».

Юзга фотиҳа тортилиб, одамлар бир-бирлари билан қайта қўришиб, хайр-хўшга туша бошладилар. Ҳаммадан Истроил aka мутаассирланган, икки гапининг бирида Олим акамнинг елкасига туртиб:

— Уни кўр, зўр-ку. Охунд домладан ўтаркан-ку, а? Бир муфтийча илми бор экан-ку, — деркан, жойида туролмас, ўша ёққа интилиб, у кишини тавоғ этиб қолмоқ пайига тушган эди.

Шу тоб Олим акам у қолиб, мен томонга ўтирилдию ҳайрат аралаш шивирлай бошлади:

— Максад, бу киши ўй қамоғида эмасми? Рухсат берилганми бундай юришларга? Халқ орасига киришларига? — дерди у. Мен анг-танг қолган эдим.

— Қандай ўй қамоғи? Қанақа рухсат? — дедим ўзимга келолмай. — У ёқдан келган табиб-ку.

— У ёғинг — қаёқ? — деди акам.

— Акам кетган ёқдан-да, қаёқдан бўларди!

Олим акам қотиб қолди:

— Акам кетган ёқ?

— Ҳа-да, — дедим уни тушуниб етмай. — Уйларига излаб борганман бир гал, кеннойим ётиб қолганларида. Агар ўша одам бўлса.

— Ким ётиб қолганда?

— Ким бўларди кеннойим, акамнинг ўша ёқли аёли, — дедим энди яшириб ўтирмай.

У ўзига келолмай юзини ишқади. Афтидан, бу хабардан эси тескари бўлаётган эди.

— Акам ҳали ўша ёқда, аёли бу ёқдами?

— Билмайсизми, — дедим мен ичим дукур-дукуррга туша бошлаб. — Шунча ўша ёқларда юриб-а?

У беҳол тортиб, кўзини юмди, ўзига келиб-келмай:

— Кейин, кейин тушунтириб бераман. Мавриди билан, — дедио одамлар орасидан Ҳозик тўрамними, кимни излашга тушди. У аллақандай ҳовлиқиб, излаган кишисини йўқотиб қўйса, қайтиб тополмай қоладигандек аланглар эди. Улар эса бу пайт, ҳар хил духоба гажимлару шокилалар билан ичидан бежалган (қандай асрashiбди, тавба!) эски «Победа»га жойлашиб улгуришган, кузатиб ўша ергача борганлар у киши билан хўшлашар эдилар.

Олим акам азза-базза афсусланиб қолди:

— Кетарканлар, ўзим обориб қўярдим. Эх, афсус, нега илгарироқ отни қамчиламадик? Энди қачон қўрамизу учратамиз?

— Қачон десангиз, оборавераман. Уйларини биламан, — дедим, — агар ўша табиб бўлса.

— Ўша одам! Қанчаларнинг дуосига қолиб, қанчаларнинг тинчини олган! Қандай эркин қўйишибди экан? — дедио жим қолди.

У киши жўнаб кетиб, ҳамма тарқай бошлади. Фақат биз Нусрат поччани кутиб, бир чеккада қаққайиб қолаётган эдик. Буни қўриб, почча ҳам хонадон соҳиблари билан хўшлаша бошладилару кутилмаганда бизга ўғирилиб:

— Ҳой, Мақсадхўжам, қанисизлар, бери келинглар, — деб чақириб қолдилар. — Арвоҳлар шод бўлсин, сўрашиб-танишиб қўйинглар. Ҳарқалай бир жойнинг одамларисиз, бир ариқдан сув ичгансизлар.

Мен ич-ичимдан жон-жон деб турибман-у, лекин шоларавачадаги одамнинг сирими, нимаси босиб, ийманиб-тортиниб бора бошладим. Қолаверса, акам туфайли яримта бўлиб қолган одамни (яна қанча вақтдан сўнг!) яқиндан кўргим, сўрашгим бор (ахир, у илгариги ишларини ташлаб, наинки ўзи, бутун товкасидагилар билан қай йўлга кирибди!) Мен уни аллақачон қидириб топишим, акамнинг омонатини етказишим керак эди. Келиб-келиб мавриди шу кунга тўғри келибди! Шуни эслаганда нақ вужудимга енгил титроқ кира бошлаган эди. Қизиқ, акамнинг номини эшитса, қай ахволга тушади экан — тасаввур эта олмасдим.

— Ассалому алайкум.

— Ва алайкум, келинг, эшон бола.

Биринчи бўлиб мен унинг юмшоқ, қарияларникидан ҳам нозик қўлини олдиму ғалати бўлиб кетдим. Бу қўллар духобадайн майнин, ҳам илиқ, унданми ё соҳибининг энгил-бошиданми, одамнинг жону жаҳонини элитгудек бир ифор таралар эди. Одам динига қайтса, шундай ёқимли бўлиб қолар эканми, тавба?

Мен у ифор хидларини ҳидлаб тўймасдим.

— Танийсиз-а, таксир, бу Саломхоннинг кенжаси. Ўқиб катта йигит бўлди, улуғ даргоҳларда ишляпти, — деб таништира бошладилар почча.

— Нечук танимай, Султонмуроднинг холаваччаси, ўзимизнинг яккабоғлик, — деди у билагимдан ушлаганча қўлларимни силаб. — Ойингиз омонмилар, бардам-бақувватгина ўтирибдиларми? Биздан дуо айтасиз. Бизга қанча яхшиликлар соғинган, яхшиликлар қилган жойлари бор.

Воҳ, ич-ичимдан бир турли ҳислар тошиб келарди, одам шунчалар мулоиймлашуви, ҳалим тортиб кетуви мумкин эканми? Бу ниманинг аломати? Ёлғиз хидоятингними?

Ва шу баробар акамнинг бир пайтдаги омонат хати, ундаги рижолари яна ёдимга тушиб кела бошлаган, уни манави ҳолда бу одамга қандай айтаримни билолмасдим. Ҳаммасиданам укаси — Олим акамнинг олдида не деб айтаримни билмасдим. Қолаверса, бундан кейин бунақа маврид келадими, йўқми? Бу орада почча менинг ҳолимдан бехабар Олим акамни

таништиromoққа бошлаган эдилар:

— Бунисини-чи, бунисини? Аллоҳ чиндан ҳафиз, асрайман деса ўзига тараф йўқ; минг чиғириқлардан ҳам гард юқтирмай осон чиқаради экан. Мана, ниҳоят юртини қора тортиб кепти Султонмуроднинг жигари, Эшон бувамнинг кенжалари, у кишининг чироқларини ёқиб ўтиргани. Олим деганлари шу бўлади, тақсир.

— Вах, вақтнинг кетувини, умрнинг ўтувини кўринг. Шу ўзимизнинг Олимми? Эр етиб, сочига оқ оралаб улгурибди-ку. Уни қаранг-а. Кел, биродар, кел. Муқим қайтганинг рост бўлсин. Омонмисан, дўстимнинг жигаргўшаси? — деб шоларавачада ўтирган одам базўр «кучоқ очди», сўнг қучоғига «олган бўлиб», овози бир тур ўзгарди. — Уни қара-я, сендан кимларнинг иси келмоқда-я. Илой, акагинангнинг ҳам бошини тошдан этган бўлсин ўзи. Шундай кўриштиromoқни насиб этсин.

Нима бало, бу илтижо, бу рижо қалбларимиздаги ёш булоқларининг қалити эдими ва ё бир тилсим сўзларми, кўнглим аллатовур бўшашиб, кўзларимга тирқираб ёш қуилиб келар, шунча ёш қаерда турган экан — ўзимни тута олмасдим.

Енгимни босиб, атрофга қарасам, бу гапдан мутаассир бўлган ҳамма — акам ҳам, ўзи ҳам, почча ҳам бир ҳолатда турибдилар. Почча ўзларини босмоқ бўлиб, дам-бадам ияқ қоқадилар, ўзларини чалғитмоққа уриниб, унинг дуосини такрорлайдилар:

— Илой, ўша кунларга Ўзинг етказ.

Бу орада уй соҳиби ўзини тутиб, ичкарига қистамоққа, бизнинг сухбатимизни олмоқ ҳаракатига тушиб қолган эди:

— Қани, почча, бошланг. Сизларга жавоб йўқ. Бир келиб қолишибди, ичкарига бошланг буларни. Отамлашайлук. Ҳой, Азлар тоға, нега қараб турибсиз? Мехмонларни олиб киринг. Уларга жавоб йўқ.

— Бу ёғи қандоқ бўлди? — деб почча менга қарадилар. — У ёқда холанг кутяпти. Бу ёқда кирмассанг...

— Нега кирмас эканмиз, кирамиз. Қолаверса, бу кишига айтадиган омонатлар бор, акамнинг омонати,— дедим мен мавриди келиб қолганидан фойдаланиб.

— Кимдан дедиз? — уй соҳиби азбаройи ҳайратланганидан шоларавачаси турган еридан жилгудек ғижирламоққа тушган эди. — Султонмуродданми?

— У кишидан бир хат келтиришган эди. Ўшанд... Сизга тегишли гаплар бор экан. Узр, вақтида етказолмагандик.

— Уни қаранг-а, шундай эдими? — Мен ҳеч кутмаганда уй соҳиби бу хабардан боши кўкка етиб, шошиб қолган, «Шундайми, дарагини чиқарган Оллоҳимдан ўргилай-а, кирингиз», деб қистамоққа тушган эди.

Кирдик. Ҳовлидаги жойлардан бирига ўтира қолдик. Почча дуо қилдилар. Чой келди. Шундан кейингина уй соҳиби яна интиқиб менга қарадию:

— Бу қачонги гап, эшон бола? Айтинг, тортинмай айтаверинг, — деб яна қўлларимни силамоққа, боладек ялинмоққа тутинди.

— Яхши гаплар, хурсандчилик гаплар! — дедим мен у кишини тинчлантиришга уриниб. Сўнг:— Баҳриддин акамни танир эдингизми? — дедим ётифи билан.

— Қайси Баҳриддин? Яккабоғлик Баҳриддинни айтасизми? — деди бир ҳушёр тортиб. Кутмаган экан, аллақандай хижолатланди:

— Ҳа, ҳа, Асол холамнинг ўғиллари, — дедим.

— Хўш-хўш? — деди ўзига келиб.

— У киши тирик эканлар. Маккага ўтиб кетишган экан. Марғу кеннойимни унга етказибдилар. Ўша никоҳ қайта тикланибди, — дедим юзларидан кўз узмай. — Сизда гуноҳ йўқ экан. Акам, Султонмурод акам ҳамма ўтган ишлар учун Сиздан узр сўрайди. Кечиролсан-гиз — кечириб қўяр экансиз.

— Субҳоноллоҳ! Шундайми экан?..

Унинг юзи (қўриб турибман!) окаришиб келиб, кутилмаганда илгариғидан ҳам нурланиб кетди, тавба, у сариқ ипак сингари ичдан бир ажойиб нурланиб балқир, шу билан баробар бу юзга хотиржамлик ёйилиб келар эди. У кўзларини кўтариб, менга миннатдор тикилди.

— Оллоҳга шукр, Ўзига ҳамду санолар бўлсин! Оллоҳдан яширмаганимни энди сизларга ҳам очай. Бу нарса кўксимни тегирмон тошдек эзиб ётар эди. Қаранг-а, Худо ўзи кушойиш бериб асраган эканми Баҳриддинни? — дея олди.

— Асраган экан, гуноҳсиз экансиз, — дедим мен. У мени қучиб олиб, тоза йиғлаб берса керак, деб ўйлаб эдим. Аммо у тобора хаёлчанлашиб, шол оёқлари устидаги мовут чакмоннинг бир четини силаб кетган, бош кўтара қолмас эди:

— Шундоқ бўлса-да, у ким экан — биз отиб қўйган, бояқиш? Куёвнавкар, анув етимча бўлиб чиққайми? — деди бизни тамоми ҳайратда қолдириб. Ва кўзларини юмиб, Оллоҳга илтижо этди. — Ўзинг кечиргайсан, Тангрим. Ундан кам бўлмаган гуноҳимиз бор экан. Бир етимнинг гуноҳи, — дедиую жим қолди.

Унинг мижжаларида икки томчи биллурдай ёш қалқиб турар, менинг кўз ўнгимдан эса бир хил кийинган кўк тўнли йигитлар Миржумон кўчасидан кўтариб келаётган тобут ва унинг олдидаги Кўқон арава кетмасди. Кўқон аравада эса хумдек калласини осилтириб мана шу одам ўтирас ва ҳеч қаёққа қараб қўймас эди.

Тобутдаги устихон эса ўшал бояқиш куёвнавкарники эканми?

## 12. УЧИНЧИ БОҒ ёхуд ЭЙ СОКИН ЖОН

### *Муаллифгагина аён тарихлар давомига*

У оstonада тўхтаб, ичкарига овоз берди:

— Онаси-ёв, қайдасиз? Биз отлануб бўлдук, дуо бермагайсизму?

Ичкаридан ҳадеганда жавоб бўлмас, унинг ўрнига ҳам пиқ-пиқ йифи товушига ўхшаш бир ҳиқиллаш эшитилар эди.

Ахийри бўлмади. Мўйсафида кавушини кавшандозга ечиб, махсичан кириб бораркан, энди тўнғичининг номини атаб чақириди:

— Норпошшам, қай ердасиз? Сафарга отланган кишини шундай кузатарларми?

Ўзидан хийла ёш хотиннинг нози шу-да. Қолаверса, олди қизларини узатиб, ўғил уйлаган хотиннинг ёшлиги қолдими? Нимқоронғи уйга кириб олиб, тахмон кўрпаларига юз босганча қолган аёлининг қорасини илғаб, ғалати бўлиб кетди қария.

Ичи сидирилдими ё ачишиб, кўкрагини бир нима тилиб ўтдими, нохушлик сезди. Шунда кутилмаган ҳол юз берди.

Қулоғига яна ўша кечаги нохуш овоз эшитилиб кетиб, бутун вужудини бир титроқ-жимирлов босиб келдию пешонасини муздек тер қоплади. Шу баробар бир бадбўй ҳид — худди бир вақтлар болалигига қари ёнғоқ ғовагига қўл тиққанидагидек ёмон ҳид анқиб кетди. Унга шундай туюлдими, ё ростдан қаёқдандир анқиб кетдими, ажратолмади. Лекин аниқ эслади, у ҳов ўшандагидек — ёнғоқ ғовагига қўлини чўқиб олган укки боласиникидек бадбўй эди. Ўшанда қўлидаги пихиллаб потирлаётган (темирқанотдан ўтиб, ҳали учирма бўлиб улгурмаган) уккичани улоқтириш ўрнига юзини буриб, бир амаллаб ёнғоқдан тушиб олган эди. Кейин катталардан кимдир келиб қолиб:

— Қўлинг акашак бўлиб, ўлинг кевоттими, йўқот, жойига опчиқиб ташла, — деб сўккачгина инига ташлаб тушган, шу-шу қайтиб укки инига йўламай қўйган эди. Шунга ҳам, ҳов ўша —

Муржумондаги воқеага ҳам етмиш йил кечдимикан? Лекин келиб-келиб энди ёдга тушуви, оламнинг манави чеккасига топиб келиб, хунук сайраши қизиқ эди. Бу ниманинг аломати экан?

Тунги уккининг анави тошнокдами ё унинг ортидаги бир ён шохи қурий бошлаган қари қашқар гилосдами ўтириб олиб ҳар замон:

— Ҳуқ, ҳуқ, ҳуқ,— деб қўйиши, орадан етмиш йил кечиб чақириши, сайраши, топиб келиши ғалати эди.

Ўшанда нима бўлиб эди ўзи? Ҳа, дарвоқе, ўшанда ёнгоқ устидан тушаётib, оёги сирпаниб кетди-ю, жон ҳолатда дарахтга ёпишди. Шунда қўлидаги укки боласини ёмонроқ эзив қўйдими, у чағиллаб юбордию боя инидан потирлаб учиб чиқиб кетган уккилар қаердандир пайдо бўлиб, устидан пихиллаб учиб ўтдилар. Кўйиб берса, бошига тепиб, таламоқчи эдилар-ку, талаб улгурмадилар, у ерга сакраб тушиб олган эди. Сўнг ҳалиги катта одамнинг — у сувчимиди, ўйловчимиди (балки Ҳизрдир) — қистови билан уккичани инига ташлаб тушди.

Лекин унинг бадбўй ҳиди қўлидан неча кунгача кетмагани аниқ.

Яхшиям ўша Ҳизрнинг учрагани — етмиш йилгача уни унугиб яшади. Бугун эса... у индамай турганигами, ҳалигача бориб таскин бермаганигами, аёли бирдан ўзини тутолмай ўқраб юбордию ўтрилиб келиб, елкасига осилди:

— Мени десангиз шу сафарингизни қолдиринг, отажониси!

Жаҳлини ютиб ўрганган одам (унингдек ҳалим, ҳокисор киши ҳамма қаҳр, жаҳл, аччиқларини Аллоҳга таслим этдим деб юрган бир пайтда) шайтонга ҳай беролмади.

— Қайдан топдинг бу гапни?! — деди сенсираб. — Кеча қаерда эдинг?!

Ойпошша қаршисида оқ рўмолининг учини кўзларига босганча ҳамон тўлиб турар, унга бир сўз демак ортиқча эди.

Мирзаҳожим калта соқолини тутамлаб, ичига кириб олиб вассваса солишдан тоймаётган касни ҳайдамоққа урунди:

— «Ла илаҳа иллаллоҳ. Астаъфируллоҳи азими ва атувби илайҳи. Билиб-билмай қилган гуноҳларимни ўзинг мағфират эт», — деб калима келтирдию ўзи ичидан ўша бундан етмиш йил илгариги жон ҳолатда чағиллаган уккичани ўйларди: нима бало, ўша нарса қайтиб ўнгланмаган эканми?

Нариги уйдаги осма соат тонгги сокинликни бузиб, бамисоли тунгти укки мисол:

— Ҳуқ-ҳуқ-ҳуқ... — деб чиқиллар эди.

Чол бу овоздан эти жунжикиб, қўлига илимилик бир нарса ёпишган каби уни силтаб ташлади:

— Мендан нима истайсан?!

У бу гапни хотинига айтдими, ё ўша тунги совуқ бойқушгами — ўзи ажратолмади. Кўзига у бойқушдан ҳам хунук кўриниб кетиб, жаҳолат ичидан:

— Ҳа, юртимга кетяпман! Хилхонамга етиб олишимгаям кўймаларинг! — деб бердию, шарт ўтирилиб махсичан чиқиб кета бошлади.

Қайтиб кавушини оёғига илгани кирганда ичкари жимжит, гўё ҳеч ким йўқдек бўлиб, қулоқлари беаёв шанғиллар эди.

Яхши бўлмади. Неча йиллик умр йўлдоши эди. Шунча йил кўнглига қараб келиб, кетар вақтда дилини оғритди. Таҳорати синган эканми, шайтон қайдан илашиб, қандай ёзғирди? Бориб-келиб кучи шу муштипарга, болаларининг онасига етдими? Хотин-бала-чақасини ташлаб, бу диёрларга қочиб ўтганида ким жонига ора кириб эди? Йўқчиликлар захрини биргалашиб ким тортиб эди?

Шунинг отаси берган жиндек сармоя туфайли шакарпазлик билан ўзини ўнглаб олган, сўнг бойиб кетган эмасмиди? Сенинг қадаминг бу уйга қутли келди, нимага эришган бўлсам сен туфайли деб юрмабмиди? Энди ўша ҳисобсиз бойлигиям, бола-чақасиям, ичкари-ташқарили бу ҳовлилар ҳам, кимсан — Мирзаҳожибой — айтувли бой экани ҳам нега кўзига кўринмай қолди?

## Ҳаммаси кўзининг оқу қораси ўша Маҳфузаси туфайлими?

Агар унинг дараги чиқмаса, ёлғиз, аёл бошига тушган кўргиликлари етмагандай оғир дардга чалиниб касалхоналарда ётмаса, ётганини анув болакайдан эшитмаса, Оллоҳнинг паноҳига ташлаб жим юраверган бўлмасми? Балки. Дил яраси янгиланмаса, шайтонга бўй берарми эди?! Бермасди. Ҳаммасидан тўғрироғи шу. Чинроғи шу.

У бу диёрда барча йўқотганларининг ўрнига ўрин бир мўъмин-мусулмон учун лозим бўлган нарсаларнинг ҳаммасига эришди, топди. Суқсурдек бир мўъмина га уйланди, бола-чақа қилди. Бойиб ичкари-ташқарилар ҳовлилар солди. Ҳажга қодир кишилар қатори Аллоҳ уйини зиёрат этди, Пайғамбар йўлларидан юриб, Миноларга борди, Арофатга чиқди, Муздалифада бир кеча ётди. Қиёмат маҳшаргоҳини кўргандек бўлди. Видо тавофини адо этиб, муваққат ватан тутган диёрига ҳожи бўлиб қайтди.

Оталар юртига зора йўл очилса деб, садақалар сочди, закотлар берди. Хўб савоблар топди. Кечалари таҳажжуд намозлари ўқиб, дуоларида сўрарди ота юрти Муржумонни, ундаги Олмазор боғини кўрмоқни. Ғир-ғир шамолларга кўкрагини тутган ўша жаннатдай жойда бирлаҳзагина ўтиromoқни, Изза булоқлари сувидан бир пиёлагина ичмоқни, асал бўйли босволдиларидан бир тилимгина тотмоқни орзуларди. Орзулаганда иchlари оташ бўлиб ёнардики, қўяверасиз. У соғинчмиди, дарду ўқинчмиди, этиб бўлмас қувончмиди, бир оғиз сўзла айтиб, тушунтириб бўлмасди. Кундан кунга, йилдан йилга, умр ўтган сари ловулласа ловуллардики, пасаймасди. Таскин билмасди.

Ахийри шаҳар чеккасидан баланд бир жой топди: қарангки, бу ерда ҳам қир шамоли тинмас — ғир-ғир эсиб ётар, сув олиб чиқолса, ўша биринчи боғидан қолишмайдиган жой қилиш мумкин эди. Ўша кўксидаги армонни босиш учун кўзига на дунё кўринди, на уйқу. Ахийри бу қирга ҳам худди ўша Муржумондагидек бир анҳор сув чиқариб, улкан ҳовузу атрофидағи супаларни ҳалқадек ўраб оққан анҳор қаздирди. Ўртани олмазор боғ этиб, икки ённи ўрикзору ёнғоқзор қилдирди. Ўн йил деганда ўша биринчи боғидан қолишмайдиган жаннат гўша пайдо бўлдики, уни ҳам Мирзахўжа ҳожимнинг Олмазори деб аташди. Ўзи армонбоғ деб атаб, унда чиройли зиёфатлар, илм мажлислари қуарар, Қуръон тиловатлар этиб, бу мўъжизани яратмоқни кўнгилга солган Аллоҳ субҳанаҳу ва таолога беадад ҳамду санолар айтар эди.

Инсон ана шунаққиб йўқ ердан ўзига бир таскин топиб оларкан-у, бир кун келиб, у ҳам эскиб, бу қалб қурғурга эм бўлмай қола бошлар экан. Қадим Ватан соғинчини ҳеч нарса боса олмас экан. У уйғонмасин, уйғониб ўрташга тушмасин экан, атрофда малҳам бўлгулик бир нарса топилмай қолади экан!

Ота юртга жўнатган қизи ила ҳали ўзи кўрмаган, бир қур эркалаб, тиззасига олиб армондан чиқмаган неварасидан муждалар бериб, манави меҳмонлар довон ошиб келишидию, анави тилмоч йигитдан икки энликкина хат ҳам қўшилиб, кўксидаги армон болалади-кетди! Ўшандан бери юраккинаси ҳаприқади-тошади. У жаннатмакон маъвони кўргилари келиб, ичи куйиб ўртаниди, ўртаниб яна куяди. Буларни деб қариганда йўлга чиқмай қўя қолай деса, дунё кўзига тор кўриниб боряпти, торайиб боряпти. У ҳам эшитди кечаси ўша савил қолтур овозни. — Ҳақ, ҳақ... — деса ҳам бир баҳарнав эди, жуфтини чорлаган ҳақкуш демоқ мумкин эди. У эса, совуқдан совуқ қилиб:

— Ҳук, ҳук, ҳук, — этиб ётар эди!

Алҳазар, шунча йил бойкүш кўнмаган ошиёнига у кетар маҳалда, жўнар кечада келадими у? Ҳудди бир нарсадан имдод бергандай, тескари башорат этгандай?!

Турибоқ таҳорат янгила буриб, (исломда ирим йўқ эса-да) «Ҳасбийаллоҳу лаа илаха иллаллоҳу алай-хи таваккалуту...» дуосини етти карра айтиб, Аллоҳ-дан ғам-қулфатлардан нари қилишни сўрадиую қайтиб ётди.

Шунда бойўғли ҳам бу дуонинг кучига дош беролмайин қив-қивлаганча даб бўлиб кетдию боғ тинчиб, у хотиржам тортиб қолиб эди. Мана энди туриб-туриб, сафар олдидан анави

бефаросат ёдига солиб ўтирибди. Қиёматли кампиридан топгани шу бўлса, бу дунёда одам боласига суюнмоқ чикора? Ҳаммасига этак силкиб, ёлғиз Ўзига таваккул этмоқдан ва таваккал жўнамоқдан ўзга нима қолди?

— Хайр, — деди у дераза токчасига кет қўйган жойидан туриб ва ниятини хайрли ишларга йўйиб. — Ўтган гапларга саловот, — деди негадир кампири томон юриб ва маъзурнамо гапларга кўчиб. — Онаси, мен сендан яхшилик кўрсам кўрдимки, ёмонлик кўрмадим. Мен сендан розиман. Сен ҳам мендан рози бўлиб қўй. Билиб-бilmай ёхуд шайтон ёзғириб дилингни ранжитган эсам, кечириб қўй. Тонгла маҳшарга қолиб юрмасин. Нафақаи ахли аёлга тааллуқли бурчларимни-да унугтан жойим бўлса, аввало сен, қолавурса, Аллоҳим кечирсин. Қолган дунём сеники, болаларингники. Расамади ила ишлатсанглар ҳали кўпга етгай. Мен бир умр орзу қилган сафаримга отланган жо-йим, қарши туриб, дилимниям сиёҳ этма, ўзингни ҳам гуноҳга қолдирма. Жон онаси, тушун. Ёзмишда борини кўргаймиз. Агар қайтиб қўришмоқ насиб этмаган бўлса, мендан рози бўлиб қўй. У ёқда тентираб қолган қизим, томиримнинг томири — жужук неварамни бир кўргим бор. Ўз кўзларимла кўриб, хотиржам кетгим бор. Сен ҳам мени тушун. Оталарим, оналарим ўтган юрт, ўзим туғилиб ўсган маъво, таниш-билишлар тушларимдан кетмай қолди. Ҳамма-ҳаммаси чақирияпти, чорляяпти. Ҳозир бормасам, шу мавриди келганда ўтиб олмасам, кейин боролмайман. Ҳолим ҳам, мадорим ҳам етмагай кейин. Мени бир умрли армонга қолдирма. Қўлингни оч, онаси. Дуо қил. Зора сенинг дуоларинг ижобат бўлиб, кўзлаган манзилимга етиб олсам.

У эса, ожиза эмасми, дуо ўрнига ҳам, таскин-тасалли ўрнига ҳам бунинг елкасига осилиб, кифтларини силар, энгил-мурсакларини ўпиб йиғларди, холос. Тилига жўяли бир сўз келмасди.

Ташқарида жўнашга ҳамма нарса тахт — арава қўшилган, йўл тадориги қўрилиб, фойтун аравага неча қават кўрпачалар тўшалган, йўлда ҳожим уриниб қолмасинлар деб, неча духобаю пар ёстиқлар олиб чиқилган эди. Юртдан келган меҳмонлар ҳам аллақачон отларини эгарлаб, абзал-қайишларини тортиб, дуо берилишини кутиб туришибди. «Бувасини кўргани келган» меҳмон бола — кемшиктой эса, фойтун арава атрофида гирдикапалак. Бой ота чиқа қолсаю унинг қаватига жойлаша қолса. У довонга қадар у кишига ҳамроҳ, сўнг отга мингашади. Арава довон тагидан қайтади, у ёғига ҳожим фойтун ортига боғлоғлиқ қари саманда (ҳар қалай босиқ, уринтирмайдиган от) кетадилар. Рўзимуҳаммад фойтунга қўшган от ҳам ёш кўрингани билан фойтунда бир текис юришнинг хўб ҳаддини олган, бўлар-бўлмасга ҳуркиб кетавермайди. Ишқилиб, ҳожимни уринтирмай-нетмай довонга етказиб, сарҳаддан ўтказворишса, бас. У ёғига Худо ҳаллоқ, қолавурса, сарҳад ошиб келган манави меҳмонлар бор, амаллаб етиб олишар.

Ниҳоят қария елкасига бош уриб тинчий олмаётган аёлига:

— Бўлар энди, онаси, йўлга чиқмайтуриб... мени толиқтиргани, — дедиу у азиз бошни ўзидан хиёлгина узоқлаштириб, елкасига сирғалиб тушган оқ рў-молни тўғрилаганча икки кафтила икки чаккасидан тутиб, у юзни ўзига қаратди. — Аллоҳ шоҳид, мен сендан розиман, сен ҳам рози бўл, — деб ажин оралаб улгурган ва сажданинг ранги билан рангинланган пешонасидан ўпдию қайрилди.

Ниҳоят оқ фотиха берилиб, отларнинг жилови бўш қўйилди. Тупроқ қўча от туёқларини ўпиб, алвидо саломини айтишга ва оҳидан чанг ҳавога ўрлаб, тупроқ ҳиди анқишига бошлади. Олдинда у юртдан меҳмон бўлиб келган кишилар йўл бошлаб, орқаларидан фойтун эргашган эди. У от туёғига монанд ҳар чайқалгандага таг юмшатгичими, силкингичиданми, қилт-қилт этган аллалагувчи бир овоз чиқиб борар, ҳожи ота билан болакай шоҳона дилижонга чиқиб қолгандек эдилар.

— Хайр, хуш қолингиз.

— Аллоҳнинг паноҳига. Эсон борингиз.

— Илоҳим, ой бориб, омон қайtingиз! — Уларнинг ортидан шундай дуолар учар, ким юзига фотиха тортиб, ким рўмолининг учини мижжаларига босган эди.

Ҳаводан тупроқ ҳидига қўшилиб, янги тезаклаган от тезагининг ҳиди гуркирар эди. Қир учларидан ранг олиб, думбул бўла бошлаган ва олди ёзни ҳалитдан кутиб олаётган ўрикларнинг қай шоҳидадир (албатта, ғир-ғир шабадаларга жиндек юз очиб, жиндек соясига беркинган) сариқ бошли жимит қушлар — саъвалар фойтун араваю отлардан ҳам хуркмай, гўё бу оламда розу тасбех айтгувчилари ёлғиз биттадек, қолгани ўткинчилик — «чит-чит-чит-ов»лаб сайраб ётар, ҳеч нарсага парво қилмас эдилар. Фақат ора-чира қаердадир — қўргон ортидаги ёнғоқзорда шекилли заргалдоқкуш (ҳар йили ўша азим ёнғоқлардан бирининг энг тепа шоҳига ин қуради) «қиёв-қиёв-тиш-ш»лаб чақириб қўярди.

Фойтунга (қўша-қўша духобаю парёстиқлар орасига) жимитдек бўлиб чўккан чолнинг кўзлари йўлдаю вужуди гўё қулоққа айланган эди. Орқада қолиб бораётган қўргон томондан келаётган ҳар битта овозни (гўё энди қайтиб эшитмаслиги мумкиндек, хотирасида олиб қолмоқчи бўлиб!) ичига ютуб ётипти!

Аллакимнинг боғи ёқалаб ўта бошлашди. Роса кунгай, офтобга кўкрагини тутган жой эканми, ғир-ғир эсан шабадасининг ўзи жаннатнинг исларини олиб келар, бу фарогат маконида қолақол деб жилва қилар эди. Ўзининг Олмазор боғига ўхшаб кетаркан. У ҳам шундай ғир-ғир шабадалар маконида эди. Қадами етган одам борки, кетолмай қоларди. Лекин мана, вакти-соати келиб уни-да, барчасини-да ташлаб кетмоқда. Ота макондан бўлак ҳеч нарса кўзга кўринмай қолди. Буни қандоқ тушумок керагийкан? Умри поёнига етганигами, жудолик қўшиғини айтиш вакти келганигами? Балки, кечасиги овоз — укки сайроби ҳам бежизмасдир?.. Ишқилиб довондан ўтиб олсалар, бас. Қўрқадигани ўша.

Фойтун лўқиллаб, уни аллалар, ҳамиша хуш ёқадиган бу аллалаш узоқ юрилганими, нима учундир ҳозир хуш туюлмаётган, кўксининг алла қаерида ғашлик болалаб, кўкраги торайиб, нафаси сиқиб келаётганга ўхшар эди. Тавба, унга нима бўляпти? Ҳоли шунчалик эканми? Рўзимуҳаммад одамини топиб, Ёлғиздарадан ўтказиб юбориш тадоригини қўриб қўйгани билан у ўғри сўқмоқлардан юриш ўзи бўлмас? Ҳали фойтунни ташлаб, орқадаги отга миниш, ёлғизоёқ сўқмоқлардан жон ҳовучлаб ўтиб бориш керакдур? Унда ҳоли нима кечади? Буларга ортиқча юк бўлмаса кошки эди!

У икки дунёда ҳам дўст бўлмайдиган ғаним қавмларга бўй бермаган имом Шомилнинг сўнгги тақдирини эслади. Ўшандай одам ҳам умрининг сўнггида ҳажни ихтиёр этиб, Оллоҳнинг уйини тавоғ қилган, Пайғамбар масжидларида Аллоҳдан ёлғиз бир нарсани — ҳоки туробини тангри азиз қилган шу жойларда қолдиришни сўраб уч кун ибодат қилган экан. Учинчи куни беҳол тортган қарияни түяга ортаётган чоғларида түя беҳос туриб кетиб, имом унинг устидан қулаб тушади ва қилган дуолари ижобат бўлиб, уни Бақо қабристонига қўядилар. Бундай ўлим топмоқ қандай ҳам хайрли. Лекин манавиндай... бегона юртларда... ўғринча сарҳад ошиб бораётиб... ота диёрга етдим деганда етолмайин кетиш... қанчаларам армонли!

Қариянинг муштдек юраккинаси ҳазон янглиғ титрамоққа бошлади ва ичи сидирилиб келиб, кўзлари жиққа ёшга тўлди. «Ҳасбийаллоҳу лаа илаҳа иллаҳу алайхи таваккалту»ни такрорламоққа бошлади. У бу дуони мана неча йилдирки, ҳар тонг, ҳар оқшом етти қайтадан ўқиб, Яратгандан ғам-кулфату мусибатлардан нари қилишни сўрайди. Уни муборак сафарга борганида Олтинхонтўрамдан эшитган ва шундан бери канда қилмасди. Аллоҳ чиндан иннака антат-таввабур роҳийм, чиндан, иннака антас-самиул алим, чиндан иннака антал азизул ҳакийм. Унинг тавбаю дуоларини қабул этиб, ўз ҳифзу ҳимоясида асраб келди. Мусофир юртларда азизу мукаррам этди. Бу илтижосини-да ижобат этгай, иншааллоҳ. Ота юрт ҳавосидан нафас олмоққа мушарраф қилгай, зора. Жилла қурса, ўшал тупроқдан икки газ ер насиб этмасми, валлоҳи аълам?! Бегона юртларда қолдирмас-ку суйган қулининг ҳокини...

— Шомни ўтаб оласизми, бой ота? Таҳорат янгилаяпмиз.

Қараса, булбуллар чаҳ-чаҳлаб, қумрилар сайраган сойлик бир мазгилда тўхтаб туришибди. Пастда тўпиқдан ошмайдиган сой шарқираб ётибди. Намхуш тоғ ҳавоси кўксига мойдек ёқиб

тушмоқда, қуёш тоғ ортига ўтиб кетгану сойлик ҳамон чароғон эди.

Чақириган Рўзимуҳаммад экан.

— Ё уриниб қоладиган бўлсангиз... яна ўзингизга қаранг,— ўша ерда ўқиб ола қолинг, демоқчи бўлди у.

Ҳолига қараб... ўқисаям бўлади-ю, лекин жамоатнинг савобига нима етсин? Пайғамбаримиз соллаллоҳу алайҳи васаллам бетобликларида ҳам сўнгги кунгача намозга чиқканлар-ку. Намоздан улуғроқ нимамиз бор, шунга ҳам ярамасак?

— Тушаман, майли. Жойни ҳозирлай қолинглар.

Ўтиравериб, оёқнинг ҳам оёқлиги қолмаган экан, Рўзимуҳаммад бир муддат силаб-уқалаб ўзига келтиргандек бўлдию, шунда ҳам фойтундан ёш боладек кўтариб олиб қўйди.

Шарқираб оққан сув бўйига жойнамоз ёзилган экан, вақт киргач, Рўзимуҳаммад такбир айтди, Худойбердининг ҳамсоясидан бўлак ҳаммалари (хатто зиёратга келган Кемшиктой болакай-да) иқтидо қилиб, намозга туришди. Ўзи шарқираб, Яратганга тасбех айтиб ётган сойдан жонбахш бир насим эсар, унинг устига тоғ ҳавоси, шом салқини, яна намоз ҳаловати қўшилиб, шунақа бир енгиллик пайдо бўлган эдики, қария кўпдан бундай ҳаловат туймаган, хузу ичра ибордат этмаган эди. Балки умри давомида ўқиган намозлари ичида энг тўқиси шу деса бўлмас (ахир, банда қусурли, тўқисга йўл бўлсин!) — ҳаловат туйиб, эриб ўқигани мана шу эди. Ёлғиз шу намоз учунгина ҳам умрдан рози кетса арзирди.

Ота юртда ҳам ана шундай намозлар ўқишга мушарраф этгил, ё ҳаллоқи олам деб дуо қилмоқчи эди, тездан тушиб қолган шом қоронғилигига отлар нимадандир ҳуркиб, кишинаб юбордилару уни чалғитдилар, у дуони қисқа қилиб қўя қолди. Балки Худонинг хоҳлагани шудир, шугина бўлгандир. Ахир банда қодир қилганча ўқийди, насиб этганча сўрайди.

Турдилар. Сойдан ошиб бироз юришгач, ўчоғида олов, кулбасида чироғ милтираган аллақандай бир чорбоғга етдилар. У шундай тоғ ёнбағридаги арчазор таккинасида экан, тоғ эса улкан қора қўтосдек қиблани тўсиб ётар, боши, сағрилари, бели осмони ҳафтимга етиб, устида юлдузлар инжудек ялтирас эдилар.

— Шу ерда жиндек тўхтаб, тамадди қилиб оласиз, бой ота. Айтиб қўйилган, — деди Рўзимуҳаммад ва шоҳ тутилган девор томон чақириб бора бошлади. — Имин оғаёв?!

Чорбоғдан бузоқдек ит ҳуриб чиқиб, четан деворга олд оёқларини қўйганча бор овозила вовуллай кетди. Овоз ҳам бор эди, унинг «ховф-ховф»идан отлар-да тисарилмоққа тушган эдилар.

— Арстан, жат!

Итнинг уни ўчиб, оёғини туширди ва ўзи қайрилиб кета бошлади.

Эгаси отлару фойтунни кўргандаёқ меҳмонларни таниди шекилли ўша ёқданоқ елкаси кўтарилиб-тушиб кела бошлади.

— Рўзимуҳаммад қардаш, сизларму? Начук качик-диз?

— Ассалому алайкум. Узр, куттириб қўйдик. Отларимизнинг юриши шу, — деб сипоришилади Рўзимуҳаммад. Аслида отларни нимага қисташмаганини бу ёқдагилар тушуниб туришар, унга айттолмас эди.

— Ва алайкум, туша берингиз. Емак-ичмаклар мунтазир. Кечиквотирмиз. Отларга-да қарасинлар, емласинлар, — деб туриб, четан эшикни очиб чиқди ва отлиқларга қараб норозиланди: — Ий, буйтиб қўпсиз, Рўзимуҳаммад? Шулар ҳамуси довон ошгайларму?

Рўзимуҳаммад яна сипоришилади:

— Сизга қўша кўринмасун, оғай, айтган меҳмонларимизу бой отанинг ўзлари. Булар тоғ ошиб юрган довқур йўлдошларимиз. Сиз бой отани узатиб қўйсангиз бўлди.

— Эшон бувамизга.. етса молумиз, етмаса жонумиз нисор. Қанулар, ҳазратумни тавоф этуб қўялук, ахур, — деб мезбон оқсоқланиб фойтун томон юраберди, — Аллоҳумди Каъбасину тавоф этган ҳазратумни кўрамуз-да екан.

— Шошманг, мен ҳозир, — Рўзимуҳаммад олдинга ўтиб илгарилади ва аввал болани, сўнг бой отани кўтариб олиб, ерга қўйди.

Мезбон болани кўриб, ҳайратланди:

— Ий, жужуклара варму? Буйтиб даван ашарларму, Рўзимуҳаммад?

Рўзимуҳаммад жавоб қилиб улгурмади. Болакай уч қулоч наридаги нарсани зўрға илғаш мумкин бўлган бу кечада елкаси кўтарилиб-тушиб келаётган одамни овозиу юришидан таниган эди, турган еридан иргишлабоқ унга отилди:

— Бу биз-ку, табиб амаки! Анув кунги меҳмонлариз!..

Уч ёнини баҳайбат тоғлар ўраб барча қоронфиликни шу ерга қамагандай, теппасида жиндек юлдузларгина жимиirlаб кўринаётган бу тоғ тагида боланинг овози жаранглаб кетди. Тоғ ҳавоси-да. Унинг овози жомга урилгандай жангиллаб чиқкан эди.

— Ий, сен ким? Қайсу меъмонлар? — деб ҳайратланди чорбоғ эгаси.

— Мен-мен, оёғи чиқкан... бола-чи!

— Ҳа-а, юрабилмий қайтамизлаб ятган саритай, сенму? — Тоғ қоровул болакайни, унинг ҳамроҳларини эслаб бир ерга етди ва энгалиб пешонасидан ўп-ди,— Кетватурсизму энду?

— Қайвотмиз-қайтвотмиз.

Халоскорини топиб олган болакай унинг бағрига сингиб кетгудек бўлиб ёпишаркан, тоғ қоравулининг энгилларидан ўшандагидек бир ажойиб ва аллатовур ислар гуркирар, улар тоғ арчалари ҳидими, унга қўшилиб кетган от сағрисининг терларими, ажратиб бўлмас эди. Отда тоғма-тоғ ошиб юргувчи бир оқсоқ одамдан бундан бўлак яна қандай ҳидлар гуркирасин! Устига устак тоғ гулларидан дорулар қиласиган табиб бўлса.

— Уни қарангиз-а, Ҳожи бувамнинг меъмонлари екансиз-ку, ўзимизга тегисли екансиз-ку, — деб у энди алпанг-талпанг юрганча бой бува томон ошиқди ва борибоқ этакларига ёпишди.  
— Хуш келупсиз, Эшон бува, хизматизга жонтар садақа.

Ўзини тоғ оралигига кўриб, ўрага тушиб қолгандек довдираб ва кунишиб турган бой отанинг ичига бир илинж-илиқлик югургандек бўлди: «Аллоҳга шукр, Рузимуҳаммад ёмон одам топмаган кўринади. Бир чеккаси табиб, қолаверса, иймонлув экан. Ихлосиям чексиз. Оқчага ёлланганлар бундай бўлмагай. Ўзига шукр, ўтиб олишимиз осон кечаркан. Уриниб-нетиб қолмасканбиз».

Жиндек умид ҳам қарияни тетиклантирап, жиндек ноҳушлик эса, уни чоҳдан чоҳга солмоқда, бор ҳолини ҳам суғириб олмоқда эди. Дум берган қовун шу-да. Сафар кишилари шуда. Жон қуши қачон пух этиб учиб чиқиб кетади, инсон ўзи-да билмай қолуви мумкин. Айниқса, у тенгилар. Пайғамбаримиз соллаллоҳу алайҳи васаллам айтганлар-ку, бу ёнимга салом бериб туриб, у ёнимга салом бериб улгураманми-йўқми деб. Лекин унинг Аллоҳ таборак таолодан ёлғиз ўтинчи ота юрт сарҳадига этиб олмоқ — ватан рухсорига етмоқ. Ўшал маъво ҳавосидан эмин-эркин бир қур нафас олса, ҳаловат туйса, қани эди! Бир оёғини у заминга кўйиб, бир оёғини олиб улгурмаса ҳам рози эди! Ўша қадамини қўйиб улгуармикан?..

— Юра қолигиз, эшон поччам, сафар олдидан ярим чўмиш, ярим чўмиш бир нима тамадди этигиз. Бизнинг кулбага-да Ҳизр қадаму етсун. Техим дуо бергайсиз.

— Яхши. Сиз бизни сийлабсиз, Аллоҳ сизни сийласун.

Кирдилар. Ўшал пастак, ёлғиз деразаси боланинг бўйидан ошмаган, эшигидан ҳам энгалиб кириб борилган қора чироқли кулбада ўтириб, заранг товоқда мезбон айтгандек, ярим чўмичдан эт-шўрвага нон тўғраб ичдилар. У чиндан ўша ҳовлидаги тош ўчоққа осилган декчада пишганмиди ё бўлак жойда — таъми оғизда қоладиган, ўзи бу дунёning таоми бўлмаган эди. Эти қай жониворникию суви қай булоқники экан, меҳмонлар дунёга келиб бундай мазали ёвғон ичмаган эдилар. Алқай десалар қайтариб сўраганга ўхшаб кетар, алқамасалар заранг косани ялагулари келаверар эди.

Дастурхонга фотиҳа ўқилиб, бу кулбада ҳам мусулмон дунёсининг ҳар чеккасидагидек, ер-

жой эгалари, ўтган-кетганлар ҳаққи, дуо умидида бўлган арвоҳлар ҳаққи икки калима қуръон тиловат қилинди. Аллоҳ ўз паноҳиу ҳифзу ҳимоясида сақлашини сўраб, турдилар.

Рўзимуҳаммад шу ерга етгунча ҳам келишув ҳақда оғиз очмаган эди, отларга қайта эгар урдираётib ёрилди:

— Бой ота, рози бўлинг. Мен Сизларни шу одамга, у кишини эса Аллоҳга топширдим. Оғам бутун умри шу тоғда кечган. Довоннинг ҳар битта ўру қири, ёл-ғизоёқ сўқмоқлари, ҳатто архар юргич ерлари маълум бу кишига. Қолаверса, довондан биринчи одам олиб ўтишларимас. Сизга ихлосларини эса, кўрдиз. Азонга қадар довонга етиб чиқолсангиз, у ёғи бир қадам — бомдодни ватан тупроғида ўқигайсизлар, — деди у.

— Қани эди, — деди Ака почча.

— Айтганингиз келсин, — деди Худойберди.

— Қандай яхши, — деди болакай шу қоронғи кечада ирғишлаб.

— Раҳмат, Рўзимуҳаммад, — деб қаролини, қароли эмас, гўё фарзандини қучиб, қўзларига ёш олди Мирзаҳожи.

Бироқ ҳеч кимнинг хаёлига иншааллоҳ деган сўз келмасди.

\* \* \*

Улар тўрт отлик олдинма-кетин сел йўли билан бир-бирларига эргашиб, баҳоли қудрат тепага ўрлаб боришар, олдинда тоғ қоровулининг хачир оти, ундан кейин тизгини йўл бошловчининг ўнг тирсагидан бир дақиқа ҳам бўшалмай келаётган энг бақувват тўриқ от — унинг эгарига юмшоқ ёстиқ боғланиб, бой ота ўтказилган, ўзлари белларию корсонларидан ўша оту эгарга чирмаб ташланган ҳолларича эгар қошини маҳкам чанглаб борар, ёнларида отини етаклаганча ҳар эҳтиёт шарт тиззаларидан ушлаб, Худойберди келар, энг орқада Саритойни мингаштириб (ҳар замон кетига шапатилаб қўяди, ухлаб қолма деб) олган ҳамсояси эди.

Пастда ўрик сарғайгани билан бу ерларни ҳали баҳор ўз хукмига олиб улгурмаган, аямажуз шамоллари хувиллаб ётар, қундузи салгина эриб жилдираган қор сувлари қайтадан тийғончиқ музга айланиб, от оёқлари остида гоҳ қирсиллаб синиб, майда-майда бўлиб кетар, гоҳ отни ҳам тийғонтириб, мункитай дер эди.

Совуқ юзни ялаб, бармоқларга сўзак киритиб борар, улар ҳеч нарсани сезмас бир ҳолга келган эдилар. Оғиздан чиқаётган ҳовур-ку ҳеч қанча ўтмай соқол-муртларда оқ қировга айланиб қоляпти. Гўё ҳамманинг соқоли бир кечада оқариб чиққандек. Булар шунчалик, Ҳожи буванинг ҳоли не кечдийкин?..

Чиндан тўн устидан чакмонга ўралиб олган Ҳожиуванинг оёқ-қўлларидан аллақачон муз ўтиб, чивиндек жони танининг қай буржига қочишни билмас, бутун вужуди титраб-қалтиromoққа тушган эди.

Довонга қанча қолган, отлар туёғи остида шифирлаган бу ях-муз, бу қум-тош қачон тугайди, қачонгача бу отлар кучаниб-пишқириб ўрлайди? Юзни кесиб, тескари қилиб юборгудек бу изгирин қачон тўхтаб тинади, қачон бир панарак жойга тушилади? Қачон жонни қўшиб ялаб кетгудек бу совуқ, бу яланглик тугайди, қачон пастлай бошлашади, билиб бўлса, ўлсин агар. Ҳар шамол хувиллаб ўтганда бир ғалати, таниш овоз янграб кетади: улардан ҳуркиб «қив-қив-қив»лаган бир қуш учиб кетадиу яна қаергадир қўниб олиб, чақирмоққа бошлайди: хуқ, хуқ, хуқ... Худди анави кунгидек, ўз қўрғонида эшитганидек. Шу совуқ кечада унга нима бор экан? У-ку юртига, ота тупроғига етиб олиш учун чидаб боряпти, уккига нима зарур? Ёки аслида ҳеч нарса йўғу унга шундай туюлмоқдами? Ҳаёлига шундай ўрнашиб қолиб, таъқиб этиб бораётими? Нега? Шайтонни қувиб солмоқ мумкин — дуо-си бор. Дуосини ўқисангиз орқасидан ел чиқариб қирқ газ нари қочгай. Ғам-мусибатни қайтармоқ мумкин. «Ҳасбияллоҳу»ни ўқигайсиз. Лекин бу бойқушни, изма-из таъқиб этиб келаётган тун қушини

қандай ҳайдамоқ мумкин? Шунга келганды... эшитмаган экан. Эшитган бўлса ҳам... ёдига тушмаяпти ҳеч. Ҳар нарсага етган илми шунга келганды оксамоқда. Бунга сари ич-ичидан бир қалтироқ туриб, сўнг ўша қалтироққа қўшилиб, вужуд-вужудини хунук бир ғашлик кемириб бормоқдаки, ўзи аёзда қолган баргдек, хазон янглиф титрайди. Тўнгиб қолган қўллари эгар қошидами ё тагидаги от ногоҳ мункиб кетсаёқ ўмбалоқ ошиб кетадими, билолмай ҳалак. Назарида нуқул омонат бир нарсага ўхшаб кетяпти. Балки Худойбердининг отини атаб чақирмоқ лозимдир? Нега унинг тиззасидан тутиб келаётган қўл... йўқолиб-йўқолиб қолмоқда?

Гуж-ғаж, ғаж-гуж, чирс-мирс, мирс-чирс — отлар гоҳ қордан, гоҳ муздан бормоқдалар.

Гуп, гуп, гуп — муштдек юраги бўғзига тиқилиб келади негадир.

Хуқ, хуқ, хуқ — сайрашини қўймайди ўша тунги куш. У гоҳ орқада қолиб кетади. Гоҳ бу ёнга, гоҳ у ёнга ўтиб олади. Хуқ, хуқ, хуқ... Мана ҳозир ўнг ёнидан келмоқда бу савил овоз.

Эргашгани-ку майли, лекин олдиларига ўтиб олмаса бўлгани. Сарҳаддан ўтиб, ота тупроққа етиб олгунларича қўйиб берса бўлгани. Кўйиб берармикан?

Нима керак унга? Нимани чақириб қўймаяпти? Кўксида потирлаб, бўғзига тиқилаётган нарсаними? Жон қушини-я?

Аллоҳ арасин. Тонг оқармай, Аллоҳнинг фарзини адо этмай туриб, қадами ота тупроққа тегмай туриб берадими жон... қушини? Етдим деганда йиқиладими? Юорт нафаси келмай туриб, нима бўляпти? Жилла қурса, жилла қурса, тонг ёришсин. Аzon айтилсин. Бомдод вақти кирсин. Сўнгги намозни ўтаб туриб, ота тупроққа ўнг ёни билан йиқилса ҳам майли. «La илаҳа иллаллоҳ»ни айтиб улгириб. Шунгача қўйиб бер, эй қарамли Аллоҳим. Ўзингдан муҳлат сўрайман. Жилла қурса, етиб борай сарҳадга, ўшал муқаддас тупроққа. Унинг бўйларига, насимларига. Жилла қурса, шовурини эшитай у диёрнинг. Туяй бўйларини. Бомдодга қадар кўйиб бер Ўзинг.

Дор тагидагиларга-да икки ракат намоз ўтамоққа рухсат этгайлар. Икки калима Қуръон тиловат қилмоққа изн бергайлар. Ҳатто подшоҳлар ҳам. Сен икки олам моликисан, подшоҳларнинг подшоҳи. Қарами кенг зотсан. Бомдоднинг икки ракат фарзини адо этмоққа, сўнгги бор ўзингга сажда этмоққа изн бер. Мажол бер, мадор бер, муҳлат, куч-қувват бер, эй меҳрибонларнинг меҳрибонроғи. Қувғинди қулингни гуноҳларини афв эт, кўз очиб кўрган юрт тупроғига бош қўймоққа ижозат эт. Жилла қурса, баландроқ ердан насиб эт: ўзимиз етолмаганимиз етолмаган, юрт насимлари мозоримиз узра эсиб турсин, етиб турсин ватан бўйлари...

Кейин Махфузасини чақирибми, бедарак кетган күёвини чақирибми, алаҳлай бошлади:

— Куёвтўра, мен Сизга ишониб эдим. Ботурлар аҳли аёлларини, ватанларини деб яшамасларми?

Ҳолдан тойган Худойберди сергак тортди. Ҳожи отанинг оёқларига ёпишиб-етиб юришга ошиқди.

— Ҳожи ота, оз қолди, сабр этинг, — деб далда бермоққа уринди. — Мен ёнингиздаман, шу ердаман.

Тун қуши энди чап ёнига ўтиб олган, овози олдинроқдан келмоқда эди негадир:

— Хуқ, хуқ, хуқ...

Туёқ овозлари ҳам айқашиб-уйқашиб кетаётир: «чирс-мирс, мирс-чирс, ғаж-ғуж»...

Нималар бўляпти? Кўз олдига кимлар келиб оляпти? Энг яқинлари, жигарлари-ку. Соғиниб ўқотганлари, ўқотиб топмаганлари-ку! Махфузаси-ку!

— Она қизим, опоқ қизим, мени кечириб қўй. Сенга жавр эттим.

Худойберди қўрқиб кетди. Жон ҳолатда бой буванинг оёқларига ёпишиб, тиззаларига шаппалади:

— Ҳожи бува! Бой ота! Сизга не бўлди? Қўрқитманг бундай! Ё тўхтайлукми?

Унинг шовқинига тоғ қоровули от тизгинини тортиб, орқасига ўгирилди:

— Не бўлду?

Бошқа отлар ҳам пишқириб-пишқириб тўхтадилар. Афтидан улар ҳам ҳолдан тойган, бурун устлари оқариб қўринар эди.

— Тақсиримнинг тоблари қочди шекилли, алаҳляяптилар, — У нима қиласиз, дегандек тикилди.

— Аёқ-қўлдарину уқалаб бақунгчу, зора беру қарасалар... Етуб қолдук.

— Қаранглар, уфқлар ҳам ёришиб келяпти. Ўлмаган қулни тонгга етказар, — деди орқадаги ҳамсоялари. Тиззасидаги бола энди унинг кўксига бош қўйиб, донг қотган, уйқу совуқни ҳам енгган эди.

Худойберди отнинг ҳали у томонига, ҳали бу томонига ўтиб, бошсиз чавандоздек ўтирган қарияни (ортидан шундай қўринар, боши олдга тушиб кетган эди) ҳали қўлларини, ҳали оёқларини жон холатда уқалаб қаро терга тушган, уни ўзига келтиролмас эди.

Бир муддат ўтиб қарияга жон битиб, у йўқлик-борлик орасидан бу дунёга қайтгандек, бошини базур кўтарди. Биринчи сўзи:

— «Аллоҳга шуқр, бомдодга ҳам етибмиз», — бўлди. Сўнг атрофига аланглаб кимнидир излади. Топиб сўради:

— Худойберди, аzon чақирдингизми?

Худойберди борлик-йўқлик орасига тушиб каловланди, сўнг ростига кўча қолди:

— Йўқ, бой бува, худо хоҳласа, энди чақирамиз. Пича бор, сахар киришига.

— Шундайми? — деди чол.

— Бу ҳалу ёлғон субҳ, чин субҳ — субҳи содуққа жичча бор. Бироз юра турайлукмиди, — деди тоғ коровул ҳам.

— Ихтиёр Сизда, — деди қария, — лекин йўл деб... бизни намоздан жудо этмагайсиз?

Тоғ коровули умрида биринчи марта ғалати тортиб кетди. Ўзини бу авлиёдек одамнинг олдида ҳақирдан-ҳақир туйиб, қимирлашга-да, йўл бошлишга-да ожиз сезди.

Сўнг узрини билдириб:

— Жиндек юрсак, сарҳаддан ўтиб ўқирдик, — деди.

— Сарҳад?!

Эшон буванинг оғзидан учган сўнгги сўз шу бўлди. Унинг ватан илинжида адо бўлган юраги хушхабарни кўтаролмаган эди. Жон қуши ўша сўз ила қўшилиб, чиқиб кетиб бўлган, боши кўксига шилқ этиб тушган эди.

Бойқуш ҳам чақирмас, отлар ҳам жим эдилар.

Сарҳад томондан ёлгиз аzon товши эшитилар эди.

Ҳожимни шоша-пиша эгардан ечиб олиб, текис бир жойга оёғини қиблага қаратиб ётқиздилар. Ва нима қилмоқ ҳақида маслаҳатга ўтирган жойларида қибла тарафдан аниқ тиловат овози кела бошлади. Ҳаммалари ҳайратда қотиб қолдилар.

Кўринмас қори Фажр сурасини якунлаб ўқир эди:

— Йаа айятуханнафсул мутумайннах! Иружии илаа роббики розийатаммарузиях. Фад хулии фии ибаадии вад хулии жаннатии. Маъноси бундай эди: «Эй қарор ва ором топган жон. Қайтгил Парвардигоринг тарафига рози бўлган ва рози бўлинган ҳолда. Ва доҳил бўл бандаларим ораларига ва доҳил бўл жаннатимга».

Уни фаришталар ўқирмидилар, инсларми — ҳеч ким билолмади.

### 13. ҲОЖИ БУВАДАН ЁДГОР СОВГАЛАР Ҳикоячимизга маълум қиссанинг давомига

Рухим жудаям енгил, қушдай учиб кетсам-да, мумкин эди. Ахир, ҳазилми! Мен одам сиёқидан чиқариб қўйган Парпи бебахтни (яна қай ахволда!) топган, акамнинг омонатини

етказган ва ниҳоят Яккабоғда охирги вақтларда акамнинг номидан иш кўриб юрган сирли кишиларни бугун ўз кўзим ила (мен эҳсон берилган хонадонда мовут чакмон кийиб хизмат этган кишиларни айтмоқдаман) кўрган эдим.

Насибни қаранг. Бу воқеага менгина эмас, Олим акам ҳам шоҳид бўлиб қолган, унинг-да ҳайрати чексиз эди. Почча айтмоқчи, Оллоҳ чиндан ҳам чевар, қудратлув зот. Бўлмаса, ким ишонади Парпи бебахтнинг бир вақтий йигитлари ҳали ҳам унинг хизматида экан деган гапга?! Яна қандай хизматки, эшитган фақат ҳавас қилмоғи мумкин. Хайр-хўшлашиб қайтаяпмиз-ку ҳали-ҳозиргина кўрган-эшитганларимиз кўз олдимииздан кетмас, унинг таассуротидан чиқолмас эдик.

— Вое, бизга шуни илинган эдингизми?! Раҳмат Сизга! — дедим олд ўриндиқда ўтирган поччага.

Ҳамон бурниларинио унга қўшиб соқолларини мамнун-мамнун силаб-сийпаб қўяётган почча хумдек бошларини орқага ташлаб, кўзлари қирила менга қараб қўйиб, жилмайдилар:

— Ҳидоят дегани шу, бўтам. Агар кўр ҳидоят топса, ўн саккиз минг оламни кўра бошлайди. Кар раҳмат топса-чи, жами мавжудотнинг тасбеҳотини тинглай бошлайди. Булар бош-кўзи бутун одамлар-ку.

— Ҳарқалай, ғалати-да, — деди Олим акам йўлдан кўзини узмай ва мени қувватлаб. Сўнг қўшди. — Ҳаммасидан анув одамнинг буларни иззатлаб келгани-чи. Бошқалар оёғининг тагига қўй сўйса бормас.

— Ҳа-а, Ҳозиқ тўрамни айтасанми? Маърузаларига тўймай қолдик-да, тўймай. Бир ерга шошиб турган эканлар. Узларини эшитиб, жавоб бердик тағинам.

— Узлари? — дедим мен ҳайрон қолиб.

Нусрат почча тушунтиридилар:

— Бир мусофиргина шифохонага тушиб қолган экан, шунга жавоб тегадирган экан.

Юрагим шиф этди. Ялт этиб қарадим у кишига:

— Мусофири, мусофиргинами? — деб қайтариб сўрадим.

— Келин экан, шекилли, жужуғи ҳам бормиш. Олиб бормасам бўлмас, дедилар.

Вое! Пешонамдан муздек тер чиқиб кетди. Ана, холос! Ўша бўлса, биз нима деган одам бўлдик?! Икки бирдек қайниси туриб, у киши борсалар — уятку! Наҳот хабарсиз қолдик? Балки биз чиқиб кетгач, орқамиздан қўнғироқ бўлгандир. Топиша олмаётгандир?

Бирпасда не хаёлларга бориб келдим. Лекин ёнимдагиларга чурқ этиб, оғиз очолмасдим.

Балки умасдир, Кеннойим мен қолиб, у кишига айтмаса керак эди? Яна ким билади, дейсиз.

Бу орада машина ғиз этиб, поччаникига этиб борган эдик. Туша бошладик. Мен айттолмайман, почча қисташларини қўймайдилар. Ичимни эса ит таталаб боряпти.

— Шўтга келиб кирмасанг, холанг нима дейди? Хафа бўлади-ку.

Хафа бўлишлари аниқ. Лекин...

— Едик-ичдик. Ўзларини кўрдик, — дедим, қани жавоб бера қолсалар.

Ахийри:

— Ҳой, Санобар, буларинг билан ўзинг гаплаш, — деб ичкари қараб юравердилар. У киши ҳассаларини зардалироқ ташлаб борардилар. Қарасак, чиндан хафа бўляптилар, ноилож эргашдик.

— Йўқ-йўқ, мана, келяпмиз...

— Ҳа, бу бошқа гап. Қутлуғ уйдан бир пиёла чойсиз кетиб бўладими? Қолаверса, биз ҳам ганимат.

Қарасам, тушунтириб бўлмайдиган:

— Ундей бўлса, мен уйга битта қўнғироқ қилиб олай. Ҳарқалай-да, қидириб ётган бўлишмасин, — дедим.

— Яхши-яхши. Ана, деразада турибди, беминнат,— дедилар у киши.

Ўша гапни эшитганимдан бери юрагим ҳаприқади. Назаримда қидириб топишолмаётгандек. Ахийри нумеримизга тушдим, уни аёлим кўтарди.

— Саида, мен...

— Вой, адаси-ей, қаерларда юрасиз-ей.

Худди юрагим сезганидек эди, тавба.

— Тинчликми? Айтсанг-айтақолмайсанми? — дедим ичим ғурмишлаб.

— Ахир кеннойиз чиқишилари керак экан-ку бугун. Сиз бўлсангиз...

— Ким айтди? Қачон айтишди?

— Сизлардан кейиноқ, кетишларингиз билан...

У ёгини эшитиб ўтирмаёқ жавоб қилдим:

— Яхши, биз жўнаяпмиз. Унасалар оббораман, бўлмаса, кутма, — дедиму гўшакни ташлаб қайрилдим.

Улар анжирнинг тагидаги пастак ёғоч супага ўтириб, фотиҳа қилишаётган экан. Бориб мен ҳам қўшилдим.

— Ҳа, тинчликми? — дедилар холам юзларига фотиҳа тортиб бўлибоқ.

— У ёқдан келган келиниз, — дедим мен.

— Қайси? Акангга тегишли анув мусофиргинами? Дараги чиқдими, қаердан чика қолди? — деб бир ерга етиб сўрай кетдилар.

— Шифохонага тушиб қолган экан, бугун чиқади экан, айбга буюрмайсизлар, — дедим мен ўрнимдан қўзғола бошлаб.

— Вой, уми? Ўша мушфиқа келинувза-я? Келавурмайдими бу ёққа? Бошувзага кўтаровзаку.

— Бор, болам. Бора қолинглар. Кўнгли яримтанинг кўнглини олақолинглар. Унаса, олиб келинглар. Акагинангнинг аҳли аёли, — деб поччанинг ўзлари дуо қилиб, тура бошладилар.

Фақат Олим акам ўзига кела олмас эди: ҳозиргина ичкарига қистаб қўймаётган одамлар кеннойимнинг дарагини эшитибоқ, бундек ўзгариб қолишлари чинданам ғалати ва тушунарсиз эди унга.

— Юрақолинг, «Волва»нгиз шу бугун асқотмаса, қачон асқотади? Қолаверса, кеннойим бизни кўриб, акамни кўргандек бўлади, — дедим мен.

Жўнадик. Шундан кейингина Олим акамнинг савол қутиси очилиб кетди. Унгача поччаникida ийманиб турган экан.

Мен ҳамма-ҳаммасини — бизнинг юртга қандай келиб қолганию аввал поччанинг шахар ҳовлиларида, сўнг бизникоида турганидан тортиб, Акмал чўлоқнинг далага чиқасан, деб қилган қийин-қистоқлари, чиққач одам қўйиб ўзига илинтиromoқчи бўлганларигача, унамагач тухмат ўйлига ўтганларигача ва бу тухмат, гап-сўзларга чидоммаган кеннойижоним (мен буни кейин билдим-ку) бир тонг шаҳарга тушиб чиқаман деб кетганча бадар кетганларини, биз ҳеч ердан тополмаганимизни айтиб бердим. Орадан неча йил ўтиб, Фарғоналарда ишлаб келгач, бир ажойиб кунда, ҳеч ҳам кутмаганимда, уни шифохонадан топиб олганимни, ҳозир бир ширин фарзанди борлигини айтдим. Аммо Чаман акам, акамнинг ўша қиёматли дўсти ҳақида эса, оғиз очмадим. Қандай тушунади деб айтмадим. Қолаверса, бу тарих ҳақида Чаман акамнинг омонат гапидан бўлак ниманиям биламан?!

Олим акам ҳийла жим қолди. Шунақа сўникоиб кетганки, назаримда ҳали-вери оғиз очиб бир нима дея-оладиган ҳолда эмасди. Чеккаларига оқ оралаб, ўзи сал тўлишиб, пешонасига бевақт ажинлар туша бошлаган бу холаваччам йўлдан кўзини узмай кетаётган бўлса-да, хаёли аллақаёқларда кезар эди.

Тўзиб кетган хонадонларини ўйляяптими, шу вақтга қадар бир бошпана, бир қурғон қуриб, одамлардек ватан тутолмаганларини, бошларини қовуштирадиган, қайишадиган бир марди худо топилмаганини ўйлаб кетганми, билмайман. У ёғи менга қоронғи. Балки ўз оиласи, тақдирини,

билигиди кучи, томирида шижаат бор пайтда, мўмай-мўмай топиб юрган кезларида керак қилиб, энди рўшнолик кўрармиз деган маҳалида ташлаб кетган сариқсоҳ хотинини, болаларини эслаб кетгандир! Ўзингники — ўзагинг дейдилар, ким бегонадан оқибат топибдики, у топсин. Ачинишга арзимайди-ю, лекин шу ёшда сўққабош қолиб, ҳаммасини қайта бошдан бошлаш ҳам осонмас-да. Қолаверса, суянадиган кими бор? Ёлғиз жигарининг аҳволи бу. Аёлини юртга жўнатган жойда ўзи ўтолмай қолиб кетган. Кимга ҳам суянгай, кимга ҳам дарди-юрагини очгай? Ичга ютишдан бўлак қандай иложи бор?

Аммо ичга ютила-ютила зардобга айланган у аламлар бир кун портламасми? Портлаб адой тамом этмасми у юракни?

Мен унинг мижжаларида нам кўрадигандек... бетига қарай олмасдим. Шунчалик бир ахволдаман. Оғиз очгали, очиб — дардини янгилақ қўйғали қўрқиб турибман.

У оғир хўрсиниб, томоқ қирди:

— Эшигдим, акам бу ёққа ўтолмаслигиниям, ўтиб келган куниёқ олиб бориб, тикиб қўйишилариниям. Лекин ожизаси — аёлида нима гуноҳ? У бояқишининг бошига шундай кунларни солдиларми ҳали? Билиб туриб-а? Шошмай турсин, ўша Акмал чўлоғинг!..

— Боя кўрганиз — мовут чакмонлиларнинг каттаси унга ҳукм чиқариб қўйганмиш, — дедим мен.

Олим акам ялт этиб ўгирилди ва бунга ҳам қониқмай машинасини йўл четига чиқариб тўхтатди:

— Ким?! Ўша Парпи-я?.. Нима деб?

— Шариат бўйича ҳукм қилиб, ижросини акамга қолдирганмиш. Ўзи келиб, ўзи ижро этади деганмиш.

Акам ёқа ушлади.

— Келишини... қаердан эшитиби? Қаердан биларкан? — деди ҳайрати ичига сифмай.

Мен елка қисдим:

— Билмасам. Бир нарсани билса керакки... маълум бўлса керакки...

У оғир-оғир бош тўлғади:

— Қани эди келолса, келолмайди.

Энди менинг ичим тошди:

— Нега? Нега ундей деяпсиз? Акамга нима бўлган?

У бўшашиб қўл силтади, бетимга қарамай бош чайқади.

— Сўрама. Сўрамаям, қўйдирмаям, — деди овози ўзгариб.

Мен ёш боладек елкасига ёпишдим:

— Ростингизни айтинг, Олим ака. Унга нима бўлган? Ўзи бирон нарса биласизми?

— Йигитлари билан қўл етмас музтоғга чиқиб кетган эканмиш. Олти ой деганда уч киши қайтиб тушибди. Бошқа ҳеч қандай маълумот йўқ.

— Ўша уч киши-чи, ким экан?

— Уларни ҳам хорижга — Пешоваргами, қаёққа — ўтказиб юборишган. изини тополмабдилар.

Ичимни бир нарса таталаб, ғурмишлаб ётиби, лекин сўрай олмайман. Чаман акам-чи, у кимни қидириб кетган? Ахир акангни дараги чиқди, деб кетган эди-ку... дея олмайман. Ўзи у ҳақда айтмагунча оғиз очолмаяпман.

Ҳаммани қўйиб акам, Султонмурод акам таслим бўлмаслигини, жони ширин кўриниб тоғдан тушиб келмаслигини билсан-да, бир нарса дея олмай турибман. Шу алпозда Сиздан лозим эмасмиди, жигарингизни кутқариш, унинг учун авф сўраш дегим бор-у, тилим айланмаяпти.

— Нима, у ҳалиям қидирудами? Гуноҳи шунчалик кечирилмасми? — дедим ахийри бўғзимга бир нималар тиқилиб келиб. Афтидан қайноқ йиғи аввал бўғ-зимга тиқилиб, сўнг

кўзларимдан тошиб чиқмоқда эди.

— Гуноҳики, — деди акам афтимга қарай олмай. Ўзи мендан баттарроқ бир ахволда шекилли, — улар одам боласи журъат этмайдиган бир ишга жазм этиб, чегарадан ўтиб келганлар ва Тўрамни ўғирлаб кетишга ҳаракат қилганлар. Тафинам баҳтига бу киши рози бўлмаган, ғишт қолипдан кўчиб бўлди деб...

— Э-ха, — дедим мен тамоми ўзгариб ва акамгиларнинг журъатига беш кетиб. — Режасининг зўрлигини кўринг. Одам боласининг тушига кирмайдиган иш-ку!

— Шуни айтаман-да. Шернинг оғзига қўл тиқиб, барака топиб буларканми?! Тафинам Худо бир асрабди, — деди у. — Давлат билан ўйнашиб бўларканми!..

— Булар-чи? — дедим мен ғашим келиб.

— Нима булар? — деди у англаб-англамай.

— Булар бутун бошли бир лашкарни бошсиз қилиб, у кишини ўғирлаб келишганда... уларни ҳам тушунса бўлар?

Олим акам шу мен билган Саломхоламнинг ўғлими, дегандек бошдан-оёғимга анграйиб қаради, аммо тили на калимага, на гапга келарди.

— Сен билишимча, туппа-тузук идорада ишлайсан. Аммо тилингни бунака қўйиб юбораверма. Бирдамасбирда куйиб қолмагин, тафин, — деди хотиржам тортиб.

Ичим шув этди, юрагим бежо тепарди. Одамига учрабман-ку тоза, деб ўйладим.

У машинасини кўзготиб, йўлга солди. Орага гап сифмай жим бора бошладик. Қаёқдан ҳам гап очдим деб пушмонда эдим. Аммо ўзи анча жим бориб, сўнг насиҳатга тушди:

— Сен мени тўғри тушун. Акам, жигарим учун менинг жоним ачимайдими?! — деди у. — Ачийди, лекин бир менинг қўлимдан нима келади? У ўзини тошқин бир дарёга отган одам. Ундан ё ғолиб, ё мағлуб бўлиб чиқишигина мумкин, холос. Бўлак йўл йўқ. Мен эсам, ёлғизман. Унинг устига бу борада ночор-нотавон бир кимсаман. Жилла курса, дадамизнинг дуоларини олиб қолдим, у кишининг васиятларини адо этиб улгурсам ҳам. Акамга етиш... ундей бўлиш... менга йўл бўлсин!

— Нималар деяпсиз? — Мен азбаройи шу томонга ўгирилиб олган эдим,— Адангизни топиб, у кишининг хизматларини қилиб қолишдан ҳайиқмаган одам — шу гапларни сиз айтаяпсизми? Акангизга келганда шундайми?! — деб юборибман.

У ночордан-ночор, хижолатларга ботиб бетимга қаради:

— Нима десам, сенга қандай тушунтиурсам? Отамиз учун мен нима ҳам қилибман?! Асли у кишининг дуоларига бошқа бирор лойикроқ, билсанг. Ҳов Чўлпон отада биз кўргани борган одам бор-ку — ўша! У отамизга ҳеч ким қилмайдиган бир яхшиликни қилиб қўйган одам. Билмаган бир китоб жинниси, сутчи одам-да дейди. Лекин аслида топадиганини топиб қўйган — охирати гўзал одам. Савоб топаман деган киши ҳамма ерда топса бўларкан. Ўша киши туфайли отамиз умрларининг охирида ўша тоғлар ортидаги мамлакатда жиндек рўшнолик кўриб, тоат-ибодатда ўтиб кетдилар. Тақдир экан, мен бирор хизматларини қилиб қолдим, холос.

— «Бу ёқдагилар билишармиди», — деб сўрагим бор-у, бояги гапдан кейин... тилим қўйиб айланмаяпти. Аммо у қарашимданми, туришимданми сезиб, ўзи деди:

— Минг шукр, билишса-да, билмаганга олишди. Қолаверса, бизда ҳам инсонлар ишлайди, инсонгарчиликни биладиганлар ишлайди. Барчаси садоқат деб виждонию имонини ютиб юборганмас. Уларнинг ҳам томирида темир эмас, қон оқади, укам!

Мен тилимни тишлаб қолган эдим. Аммо дилимдан:

— «Ишқилиб, арқонни узун ташлаб қўйишиган эмасми?» — деган иштибоҳ ўтаверар эди. Ахийри айтдим:

— Йўқ, — деди у қатъий қилиб, — умрини яшаб бўлган бир одам учун унчаликка бормайдилар. Тегсалар ўша янгилигида тегар эдилар. Энди бу эски нарса, — деди у.

— Акангиз учун-чи,— дедим энди ҳар қандай истиҳолаларини йигиштириб қўйиб. — Агар у киши учун жавоб бериш керак бўлиб қолса-чи? Нима қиласиз?

У менга қараб туриб, ноиложликдан десам тўғри бўлмас, алам-аччини ютолган одамдек... кулиб юборди:

— Ўсибсан, Мақсуд, ўсибсан. Сенга гап йўқ. Шу туришингда акамга тортибсан. Илоҳим, умринг ўхшамасин,— деди ва мунгайиб қолди. Мен унга ачиниблар кетдим.

Шу маҳал қаршидан келаётган бир машинанинг ичидан соchlари шамолда патила-патила тўзғиган бир болакайнинг:

— Ая, уну қаранг — додамошина! — деб қичқиргани эшитилди ва шу баробар иккимиз ҳам ғувиллаб ўтиб кетдик. Овоз таниш эди — юрагимни ўртаб ўтдию ялт этиб қарасам, болакай ҳам биздан кўзини узмай жажжи қўллари-ла машинани тапиллатиб — тўхтатинглаб боряпти.

Ўтиб кетган шофёр нима экан деб машинасини четга ола бошлади. Шундагина уни танибман! У ўша таниш эски «Победа» эди. Мен ҳам Олим акамга «тўхтанг-тўхтанг»га тушиб, орқага тислантириб борсак, қай кўз билан кўрайлики, бояги машинадан ирғишлигудек бўлиб Ёдгормурод тушиб келяпти.

— Кичкина ада! Мақсуд амаку! — У чопа келиб, ўзини қучоғимга отди. — Мен сизну қанча куттум — бормадуз-ку?..

Мен аввалига серрайиб қолган эдим, сўнг ғалати бўлиб кетдим. Чиндан хабар ололмадим. Лекин «кичкина адаси» нимаси? Буни қаердан топди? Ким ўргата қолди?

Чўнқайдим. Митти пешонасини, унга осилиб тушган қўнғироқ соchlарини силай бошладим:

— Шунаقا соғиниб кеттингми?

— Жудаям.

— Қайси кўзларинг ила? — дедим фақат ўзимизга хос тилда яна ўша ўзимизнинг сўз ўйинимизни бошлаб. Негадир ҳозир мен шуни истаб қолган, ўзимни шундай чалғитмоқда эдим.

У қиз боланикidek узун-узун киприклини юмиб:

— Ҳар иккаласула. Энду ундей қилмайсуз-а?— деди.

Мен йўқ демоқчидек киприк учирдим. У эса бўйнимга ёпишган қўйи бир ирғишлиди ва шу тоб машинага кўзи тушиб, чалғиди.

— Сизларнуму бу додамашина? — деди ҳайратини ичига сиғдиролмай. — Сизну обюрадиму?

Шу пайт бошқалар ҳам туша бошлаб, мен бош чайқадим.

— Сен таниб ол, бу машина мана бу амақингники,— дедим қулогига шивирлаб.

— Вуй. — У бир ирғишлиб қўйди ва Олим акамга ётсираброқ қаради-ю, лекин саломини унутмади, — Ассалому алайкум.

Олим акам демаганлар олдинги машинадан туша бошлаган икки аёлдан қайбири кеннойимиз эканини билолмай турармиди, алилка довдиради.

— Ва алайкум...

Бунга сари Ёдгормурод жажжи муштchalари билан биқинимга туртар, бир нарсаларни сўрамоқчи бўларди. Энгашиб қулогимни тутдим:

— Нима дейсан?

— Милисада ишлуттиму бу одам? — деб шивирлади у.

Боланинг зеҳнига қотиб қопман!

Лекин ростини айтиб бўлармиди унга:

— Йўқ, сен қўрқма. Ўзимизнинг одам, — дедим ва яна энгашиб қулогига шивирладим. — Ундан кўра, чоп, аянгдан суюнчи ол. Ўшақдан қайтибдилар де.

У биз билан келийимиз ўртасидаги таржумондек бир чиройли юргилади. У шунаقا ширинтой бўлган, гаплашиб тўймасди одам. Ва бориб, аясининг этагига ёпишди. Кеннойим — ўша мен билган Марғу кенно-йимдан зигирча ҳам фарқ қилмайдиган (на бўй-бастда, на чиройда

— Худо қисмаган, аксинча, бир томчи сувдек қилиб яратган) шу кеннойим анча тўлишган, сулув келинлик давридан ўтиб, сулув келинйилар қаторига ўтган эди. Тавбаки, юзларидағи жиндек шифохона нусхини демаса, бирор уни қанча ётиб, дард тортган демасди. Мен Олим акамга секин ҳимо қилдим: кўришмайсизми?

У ҳам бош силкиди: бошлай қол дея ва қўшиб қўйди:

— Олдинда ким, тўрам ўтирибдиларми?

— Ҳа, дарвоке... — Шундагина хижолатдан ўзимни қўярга жой тополмай қолдим. Кеннойимнинг олдига биринчи бўлиб елка тутиб бора бошладим.

— Ассалому алайкум, узр, чиқишингиздан хабарсиз қопмиз.

— Айтишду-айтишду, чиқиб кетган экансиз. Ҳеч қису йўқ, ҳеч қису.

Мен дадилландим:

— Танишиб қўйинг: бу киши Олим акам... Акамнинг укалари. Кўргани бораётувдик...

У келинлардек лов қизарди:

— Вой, шунақаму?.. — Кулогининг юмшоги таккинасидаги ўша нори юзларига дувтарқадими, ё юзи ўша рангга кирдими — билолмай ҳам қолдим. Ахир у келин бўлиб, мулла акасини энди кўрмоқдайди, кўриниш бермоқдайди. Буни кўрмоқ ўзи бир нашъали эди ва ҳам чин ўзбекона эдики, у гўзал удумларимизни эсга солмоқда эди. Одатда бундай пайтда келиннинг келинсаломию уни кўрганнинг кўрманаси лозим бўлгучи эди. Биз эса, катта кўчанинг бир чеккасида на унисини, на бунисини улдалай олмаган шўр пешоналардек бир ғалати алпозда турардик.

Йўқ, биринчи бўлиб кеннойим ўзини тутиб олди ва шу вақтда расм бўлган оқ рўмолини пешонасида сал тушириб, икки учидан тутганча таъзим ила саломга эгилди.

Бундан мутаассир бўлган ва довдираб қолган акам, бир қадам тисарилиб, унга монанд хиёл бош эгди-ю:

— Кўп яшанг, — дея олди.

Бу орада Тўра бува туша бошладилар. Мен югуриб бориб қўлтиқларидан олдим:

— Ассалому алайкум, Ҳозиқ бува. Биз сизни уринтириб қўйибмиз-ку. Билсак, ола келарканмиз, — деб узримни айта бошлаб эдим, у киши таниб:

— Ие, Сизми, хабарчи, болам? Ёдгортойимизнинг акажонисиу, буларнинг ҳомийси. Ва алайкум, ва алайкум. Номизни ҳеч тилидан қўймаса-я. Ичикиб қоладими деб бир ерга еттук.

Мен эсам бу мақтвлардан ўзим бир ерга етиб, ичим эса ғуурларга тўлмоқда эди. Чиндан Оллоҳ қарами кенг зот — акамнинг ёдгорини ана қаерда асраромоқда экан. Ва шу баробар ўз вазифамни унугтаним йўқ: ахир, Олим акамни у кишига танитсан, эшишиб қай аҳволга тушадилар экан? Ахир ким-ким лашкари сафида от сурмоқни ният қилиб сарҳад ошиб борган Ботурининг жигари...

Бу вақт Олим акам у кишининг хузурларида саломга оғиз жуфтлаб, қўлларини олишга ҳозирланганча турар экан, Ҳозиқ тўра:

— Ваалайкум, келинг, — дедилару бу ким дегандек менга қарадилар.

— Холаваччамиз... Ўзингиз билган Султонмурод акамнинг туғишган укалари, — дедим мавриди ўзи келаётганидан мутаассирланиб.

— Ҳай-ҳай, шундайми? Бик яхши-бик яхши, — улар қайтиб кўришдилар ва Олим акамнинг елкасига қоқиб, курагини силаб қўйдилар. — Бизнинг Ботурининг шундай жигари бор экан-ку, шу вақтга қадар билмабмиз? — Сўнг азза-базза кафт очиб, дуо қилдилар. — Эй Тангри таоло насл-насабли, томирида мусулмон қони оқкан бу мужоҳиду мужовид бандаларингни иймонини комил этиб, ҳамиша ўз ҳифзу ҳимоянгда асрарин. Дўстга зор, душманга хор этмагил, илоҳо бир-бирларига муруватли этгил, у дунёю бу дунё жудоликка учратмагил.

Омин дея биз ҳам Оллоҳдан ижобат сўраб, юзларга фотиха тортдик. Ўтган ҳам, кетган ҳам бизга қарап, ҳавасланар эди. Ҳавасланса арзигулик бир палла эди. Унинг яна узокроқ

чўзилишини истаб, бир-биримиз ила сўрашиб-исташардик.

— Қаранг, шунча яқин, танишу жигарлариз бор экан, келин, ёлғизман дейсиз. Аллоҳ ўзи бандасини ёлғиз қолдирмагай ҳеч. Фақат тоатидан бегона қил-масин. Қани, жилдикми? Ҳар ким ўз жойигами?— дедилар Ҳозиқ тўра ва тобора менинг пинжимга кириб бораётган Ёдгормуродни кўриб, кўшиб кўйдилар. — Сенинг ичинг тушмасин, майли, додамошинга чиқақол.

Олдинма-кетин жўнадик. Олд ўриндиқда турволган Ёдгорнинг ҳали менга, ҳали Олим акамга ёпишиб, алланималарни сўраб-суриштиришини, қувончи ичига сифмай кетаётганини кўрсангиз эди.

Тўра буванинг дала ҳовлиларидағи қўзичоқларию унга печак юлиб берганлари борми, Кўктеракка борганлари, бедапояларда тўр судраб, матраб ташлаб, бедана овлаганлари борми, бари-барини айтиб адо қилолмасди. Тоза яйрабди ўзиям, онасини, бизни соғиниб, ичикиб қолмасин деб тоза қўнглига қарабдилар. Мен у кишини китобдан бош қўтартмайдиган олим ҳисоблаб эдим, тоза болажон эканлар. Яна онасини шифохонадан олиб чиқишига етказиб борганларини айтинг. Ёки одам яхши қариса, шунаقا закий, силаи раҳмга ўч бўлиб қолади эканми?

Эски Жўвадан ўтиб, пастликдаги тор Қорасарой кўchasига бурилганимизда Олим акам мен томонга зингил ташлаб, саволчан қаради:

— Қаёққа кетяпмиз, бозор-ўчар қилиб олсак бўларми? Шўппайиб... кириб бормайлик. Ёдгормурод бийрон жовуллади.

— Опоқбувам эрталабоқ олдуриб қўйган эканлар-ку. Қаерга кирувсиз?

Воҳ, бу масалада ҳам ортда қолибмиз-ку! Мехмонлардек кириб борарканмиз-да яна? Эсиз. Ҳамиша эсимиз кеч кириб юради. Биз бир-биримизга қарашибдик. Хижолатдамизки, нарёғи йўқ.

Қумлоққа етиб, Калковуз кўпригидан ўтиб қайрилдик. Олим акам рўпарасидаги митти кўзгудан ажаб-ланиб қаради. У айтаколсанг-чи, қаёққа боряпмиз демоқчи бўларди.

Мен гапни узоқдан бошлаб:

— Эсласангиз, акамнинг Чарли деган бир шаҳарлик ошнаси бўлар эди, — дедим.

Акам ҳайратининг зўридан, оёғини тормозгами, нимага босиб қўйиб, тортиб олди: «Волва» енгил селпиниб, яна оқар сувдек жилди.

— Воҳ, булар ўшаларникидан паноҳ топган эканми? Чаман аканикидан-а?

Унинг ҳайратининг чеки йўқ эди.

— Ҳа-да, — дедим мен, — қиёматли ошналар яна қандай бўлуви керак, сизнингча?!

У киноямни тушунди, аммо жавоб бера оладиган ҳолда эмасди шекилли, миқ этмади. Шу орада яна Калковузни кесиб чиқа бошладик. Олдиндаги Тўра буванинг машиналари Калковуз ёқасидаги кичкина Толзор кўчага бурила бошлади. Ёдгормурод яна ўрнидан туриб олиб, иргишлашга ва ўзининг қандай зўр машинада келаётганини орқамиздан чопган ўртоқларига кўз-кўз қилувга тушди:

— Ур-ре, опоқбувимларни кида келяпмуз.

Мен патила-патила соchlарини силаб тегищдим:

— Қаер яхши? Қаънғлими, опоқбуванларнинг далаларими, бу ерми?

У оқ гурунчдек тишлирини кўрсатиб, жилмайди:

— Ҳамусиям.

Мен бўш келмадим:

— Йўқ, сен биттасини айтгин-да. Ҳаммасидан яхшироғини...

У ўйланиб қолиб, бош тўлғади:

— Йўқ, ҳамусиям яхшу. Кейин соғуниб қолсам, майлуми?

Қўшилишиб кулдик. Бу орада бор бўйича куйиб тушиб, шўппайиб қолган дарахт кўзга ташланиб, ўша бир тавақали, остонасига харсанг тош ётқизилган эшик олдида тўхтадик. Мен

бехос Олим акамга кўзим тушиб, қўрқиб кетдим. У машинасини тўхтатишга тўхтатган-у, лекин туришни ўйламай... ўша куйган дарахтга қадалиб қараб қолган, ранги қув ўчиб борар эди.

— Ҳа, ака? — дедим болани тушириб юборибоқ.

У ўзига келди:

— Яшин тушган шунаقا дарахтни хўв ўша мамлакатдаям бир кўриб эдим. Бу ерда ҳам кўриб... ғалати бўлиб кетдим. Буниям... яшин қилганми? — деди у.

Мен бош чайқадим:

— Йўқ, буни одамлар ёқиб юборишган.

— Ҳа-а, — деди у зўрга ўзига келиб. Нимага менгзади, тушуна олмадим.

Туша бошладик. Бунгача олдинги машинадагилар тушиб бўлишган:

— Қани-қани, той бола, ичкарига хабар қилиб, суюнчига чопинг, бир йўла шунча меҳмонни кўриб, ҳайрон қолишмасин, — деб туришар, бунга сари кеннойим хижолатланиб, ичкарига қистар эдилар:

— Вой, шунчаси борму, юравуринглар, келсангуз кимну деб кепсуз?..

Аммо шу вақт ёлғиз тавақа эшик шитоб очилиб, оstonада икки ҳовлукқан болакай — ичкаридан чиқаётганию кираётгани — тўқиниб кетай деганча ачомлашиб қолдилар.

Оқ ёқали оҳорли қўйлак-шим кийиб, жажжигина йигитча бўлиб олиб, (бу албатта, Тўра буванинг ишлари шекилли!) аясини опчиқишига борган ва олиб келаётган Ёдгор-ку ўзини қўярга жой тополмай ичкарига чопган эди. Аммо машина овозини эшитиб ташқарига юргурган болакайнинг ҳайратию ясан-тусани бундан зўр, бир қарашда уни тўй болами демоқ мумкин эди!

Унинг бошидаги укпарли дўпписию, устидаги зар тўни, ҳатто оёқчаларидаги этикчалари бу диёрники эмас, ҳов бизнинг болалик йилларимиздаги каби роса ихтимат-ла тикилган, пўримдан пўрим, зар тўнининг уқаларию пистонлари ундан-да ялтираб ёнар эдилар.

— Ий, Ёдгор, вой қочқоқ! Бормисан?! — деди униси — тўй бола.

— Ўзуз қочқоқ! Келаркансиз-ку?! — деди буниси — той бола.

Той билан тўй бола ачомлашиб чирмашиб кетишган, укпарли тикроғи бунисини азза-базза кўтариб олиб, чир айлантирас, ерга оёғини қўяр-қўймас, яна қайтадан қучиб, юзларини юзларига суйкар эди. Бу ёқда биз мутаассир:

— Ана, қандай соғунишиб қолишибду!

— Ичикканлари рост бўлсин, топишганлари рост бўлсин.

— Бирпас қўйиб беринглар ўзларига, — деймиз, куламиз. Куламиз-у, кўзларимизда ёш айланиб, бир ғалати тортиб боряпмиз.

Улар эса, биз катталарни, наинки бизни, бутун дунёни унугиб, ялашиб-юлқашади, алланималарни сўрашиб тўйиshmайди. Тойчоғу қўзичоқлардек сакраб-ирғишлишади:

— Росттан қайттузму? — дер эди Ёдгор, ўзи унинг бўйнига осилиб олиб.

— Келдум-келдум, — деб ишонтирмоққа уринарди буниси.

— Бутунлай-а?

— Бутунлай!

— Ур-ре, чопдик, опоқбувимларга. Аямам келуттилар! — деб енгидан тортқилай туриб, бирдан Ёдгор тўхтаб қолди. Унинг бошидаги укпарли дўпписию зар тўнини энди кўраётгандек, бир қадам тисарилиб томоша қилмоққа, енгининг уқаларини ушлаб силамоққа бошлади. Сўнг бошидаги укпардан кўз узолмай:

— Зўр-ку, — деди, у ёғини эса сўрай олмасди, балки хаёлига ҳам келмасдир. Тўй бола ирғишлишади:

— Биласанми, буни қаерда кийдиришди? Ўша ёқда кийдиришди! Сенинг чин буванг, у ёқдаги буванг кийдирдилар. — Сўнг сал бўшашиб, ирғишлишдан тийилиб, Ёдгорнинг билакларини ушлаб силкилади. — Сенга-да опкелаётган эдилар. Бундан-да зўрини. Биласанми, ўzlари кийдирмоқчи эдилар. Аммо... етиб келолмадилар... Довон оғир экан.

Чап курагимнинг тагида бир нима жиз ачишиб, тилиб ўтди.

Мен болани таниб улгурган, гап нима ҳақда бора-ётганини ҳам элас-элас англаётгандек эдим. У, адашмасам, ўша Саритой, Асал опанинг йўқолган асрандиси эди.

Ўғирлаб олиб кетишган бўлса, уни Ёдгормурод деб ўйлашган бўлса, қандай қайтди, ким билан қайтди — калламга сифдиролмасдим. Бу ёқда эса...

Бу ёқда бизни ичкарига қистай-қистай остоная бориб қолган кеннойим негадир бирдан қалқиб-тисарилиб кетди. Ранги қув ўчиб бора бошлаганини кўриб, ўқдай отилдим. У рангида ранг қолмаган, хуши бошидан учиб, қўллари нимагадир талпинганча ҳавода бир таянч топмай, ўзи оғиб бормоқда эди.

Кимдир «Вой, ушланг!», деб қичкириб юборди. Менга қаердан шунча куч кириб кетди, бунча жойни қандай икки ҳатлашда ўтиб, кеннойижонимни тутиб қолдим — ўзим билмайман. Худо асрайман деса шу экан. У боши билагимда-ю, аста қаддини кўтариб оляпман-у, ёшли кўзларини очмай мунглиғдин-мунглиғ шивирлар эди:

— Дадажонум, дадажонум, шунинг учун тушларумдан кетмай қолубму эдиз? Диidor қиёматга қолибму эду?..

Шу куни чип-чип оби ҳаёт элтиб оқиб ётган ўша Калковуз бўйидаги таниш хонадонда келинойимнинг ўз диёрига етиб келолмаган падари бузрукворларига аза очилиб, қўни-қўшни, таниш-билишлар фотиҳага кела бошладилар.

Тўра бува қуёш оғиб, уфққа бош қўйгунга қадар Қуръон тиловат қилиб бериб ўтирдилар.

У киши гоҳ «Ёсин»дан, гоҳ «Таборак»дан ўқиб ўтирган бўлсалар-да, ахийрида савоби улуғ дебми, бошқа сабабданми, «Моида» сурасининг охирги ўн оятини йифлаб-йифлаб ўқидилар<sup>20</sup> ва узоқ дуо қилдилар. Нега, биз бунинг сирини ҳеч тушуниб етмасдик. Тушуниб етишимизга неча қовун пишиғи ва қанча синоатлар бор, буни-да, билмасдик.

Иккинчи китоб битди.

<sup>20</sup> Орадан кўп йиллар кечиб, ҳаж сафари вақтида Сайид Махмуд Тарозий ҳазратлари Қуръони каримни биринчи марта туркийга ўгириб, кенг тафсир этганликлари ва бу китоб Шарқ оламида машҳур ва манзур эканини эшитдим-у, лекин уни кўнга киритолмаган эдим. Ўз диёrimизга қайтгач, бу китобни хожи Исматиллоҳ Абдуллоҳ ўғли ҳатто крилл имлосига ўтирганликларидан хабар топдим ва шунда ўша оятларнинг таржимасини ўқишига мусассар бўлдим. «Эмди ул зотларики, ватанларини ташладилар ва диёrlаридан чиқарилдилар ва менинг йўлимда озорландилар ва урушдилар ва ўлдирилдилар — мен аларнинг гуноҳларини алардан маҳв қилурман ва ўзларини доҳид қилурман шундок жаннатларгаки, остиларидин ариқлар оқиб турур, бу Аллоҳ тарафидан мукофотдир. Аллоҳ қошидадур савобнинг яхшиси», деб башорат берилган эди унда.

Муборак ҳаж сафари ва шу асно маълум бўлган Султонмуроднинг кейинги тақдири билан боғлиқ воқеа ва ҳакикатларни учинчи китобга қолдирдим. Ва уни «Рушди хидоят» деб атадим. «Жудолик диёри»нинг учинчи китобини-да ўқиб, ботур акаларимизнинг ҳижрат диёридаги курашларидан воқиғ бўлмоқ, иншааллоҳ, Сизга-да насиб этсин, азиз ўқувчим! (Муалиф).

## РУШДИ ҲИДОЯТ

### Учинчи китобдан илк боб

ОМОНАТ

Ёхуд

## ТАНГРИТОҒДАН ПАНОҲ ТОПГАН МУЖОҲИДДАН МУЖДАЛАР

Калковуздан — катта сув бўйларида бўладигандек, намхуш ел эсар, булоқ ҳидларига монанд муанбар ҳидлар, сув ўтларининг таниш ислари гуркираб-гуркираб кетар эди. Ана шу елларга қўшилиб, тол сояси шунағанги хуш ёқмоқда эдики, ўрнимдан жилгим келмасди.

Мен, акам, шу кўчалик бир неча қўшнилар фотиҳаҳонликда ҳассакаш бўлиб турибмиз. Улар орасида ўнг бетидаги нозик норию қош-кўзлари ўзига ярашган Чаман акам тенги бир йигит ҳам ўтириби. У Чаман акамнинг қиз ўртоғи, машхур шоир эмиш.

Аллоҳнинг хоҳлашию чеварлигини кўрингки, бир кунда шунча воқеаларнинг шоҳиди бўлиб турибмиз. Бўлмаса, ким ўйлабди, биз бу хонадонга хурсандчилик олиб кела туриб, бундай аламли хабар устидан чиқамиз деб?! Қолаверса, кеннойимнинг тузалиб чиқуви, унинг жужуғи Ёдгортойнинг боши осмонга етиб қайтуви, шунинг устига Акбарнинг осмондан тушгандек кириб келуви — қай хурсандчиликдан кам эди! Тўйхонага айланиб кетса керак бу хонадон девдим. Лекин қаердадир кўз тегиб улгурган экан. Балки, ўша ярим йўлда учрашиб қолиб, кўришиб турганимиздаёқ кўз тегиб, хурсандчилигимиз поёнига етиб қолган, бу хонадонга Саритойнинг қайтув шодлиги билан бирга кеннойимга тегишли шум хабар ҳам етиб улгурган эканми! Чиндан бу хаёт қувонч ва ғамдан, шаккар ва заққумдан, хаёт ва мамотдан иборат, қоришиқ шекилли. Бўлмаса, довон ошганлар шундай кунда етиб келадиларми? Кеннойимнинг азиз падари, уни бир қўрай, неварамни бағримга босиб армондан чиқай деб кела-ётган Мирзаҳожи бува етдим деганда йиқиладими? Ватанларини ташлаб, диёрларидан чиқарилганларнинг ўз диёрларига қайтмоғу етмоқлари шунчалар душвору мушкул эканми? Ёхуд Аллоҳ ўз раҳматига шу тариқа дохил этгай эканми?

Тағинам инсон боши тошдан, ўзи тамоми бардошдан яралган экан.

Остонада той ва тўй болалар кўринишиди. Энди Ёдормурод ҳам Саритойга ўхшаб ясаниб олган, акасидан бир қадам жилмас эди. Ҳожи буванинг ота юртдаги неварасига атаб олволган кўрмана совғаларини аввалига ирим қилиб кийдиришмай туриб эдилар. Кейин Ҳозик бува уришиб бердилар. Исломда ирим йўқ, ниятни чиройлув қилиб кийдираверинглар, бувасидан ёдгор, ўша кишининг ёшларига етиб юрсин, илоҳим, дедилар.

Аёллар Ёдгорни кийинтиришга кийинтириб, ўзлари йиғлаб олишиди: зар тўн ҳам, дўппию этикчалар ҳам — барча-барчаси қуйиб кўйигандек эди, ният холис экан-у, фақат кўриш — ўзларига насиб этмабди. (Махфуз кеннойим эса, ўзига аталган нарсаларни кўриш у ёқда турсун, тутунни ечолмаётган эмиш. Кўрди дегунча ўзини тутолмай йиғига берилади).

Болалар ҳам табаррук деб ясантириб қўйишгани билан боягидан анча сипо тортиб қолишган, ҳеч бир-бирларидан ажралмай ичкари билан элчилик қилиб туришарди. Мана, ҳозир ҳам Ёдгор билан Акбар ўтирган жойимизга келиб, бир нарса демоқчидек ёнимга ёпишиб, елкамга суйкалди.

— Хўш? — дедим мен қулогимни тутиб, Акбар қолиб, Ёдормурод шивирлади:

— Сизну чақиришопту.

— Ичкаридами? — дедим юрагим жиз этиб. — Ким, аянгларми?

— Йўқ, опоқбувум.

— Кўриниб кетаркансиз, — деди Акбар-саритой катталардек.

Тушундим. Ҳалидан бери сўролмаётган нарсамни айтсалар керак. Қолаверса, ўзим ҳам кетолмасдим. Кеннойим тузалиб чиқиб, болалар топилгани билан ҳали бу уйга хотиржамлик инди, ҳамма мурод-мақсадига етди дегани эмасди. Ойтўра бувининг кўнгиллари ҳамон алағдаю, фақат буни бировга сездирмагандай ўша ўз уйларида, оқ пошшонинг давридан қолган оқ рух каравотларида (унинг қуббалари ҳамон ярқирап, асллигидан сира қилт этмаган эди, тавба) ўша-ўша, оқ-оппоқ бўлиб ўтирап эдилар. Ичлари маҳзун-у, ташларидан билинтиргилари, бировга малол келтиргилари йўқ. Менга шундай туюлаяпти. Балки мен у кишининг дардидан жиндек хабардор эканлигимдандир бу.

— Яхши, — дедим той болаларга жавоб бериб, аммо ўзим ичим қуриб ётса-да, ўрнимдан тура олмасдим. Ҳарқалай таъзияли жой, ошиқмаган, ҳовлиқмаган маъқул. Яна сўриток тагида ўтиришган қариялар олдидан ўтиб бориш лозим. Айниқса, Ҳозик тўрамнинг салобатлари босади одамни. Чой янгилаш баҳонасида кириб бордим, алоҳал. Буви интиқ, йўлимга кўз тикиб ўтирган эканлар, каравотларини ғижирлатиб, жиндек қўзғолмоққа, тавозеланмоққа ҳаракат этиб эдилар, хижолатларга ботиб кетдим:

— Уринманг-уринманг. Мен мана шу ерга чўка қолдим. Ўз уйимдек бўлиб қолди-ку, ахир, — деб дераза тагидаги кўрпачага чўккаладим.

Аммо у киши қўймадилар:

— Ўтинг-ўтинг, одам ўз қадрини билмоғи керак. Айниқса, эркак киши, — деб қистай-қистай тўрга сурилтиридилар. Сўнгина дуога кўл очдилар:

— Илоҳо омин, оғир кунда мазлумлару ёлғизларга эш бўлган экансиз, сизни Оллоҳ ўзи кўлласин. Яхшиям Сиз боракансиз. Акагинангизнинг ҳурматидан бизга шунча қайишдиз. Сиз туфайли мана, бағримиз тўлиб қолди. Кеннойингиз тузалиб чиқиб, бағримизга қайтди. Саритойим келди.

Мен баттар хижолатланиб, ер суздим, тиззаларимни уқалаб, хуш ёқаётган мақтовдан ўзимни ҷалғитмоққа уриндим.

— Аввало Оллоҳнинг хоҳлаши.

— Ўзига шукр, ҳазор-минг шукр. Шунчалик раҳм этти. Ишқилиб бу ёғини ҳам, қолган мушкулларимизни ҳам осон этсин. Чаманим қайтиб, сизнинг акагинангизнинг йўллари ҳам очила қолсин, илоҳим.

Ох, қанийди, дейман ич-ичимдан бир ғурур туйиб ва ҳам бир мунглиғ ҳислар уйғониб, кўзларим эса, намланиб кела бошлайди. Юзларига тўйиб-тўйиб термулгим бор-у, (ахир ёлғиз ўғиллари кимнинг ғами билан юриби ўша узоқ юртларда?!) аммо қарай олмаётиман кўзларига.

— Ўша кунларга етказсин, — дедим.

— Илоҳим,— дедилар у киши, — эртаю кеч Ўзидан сураганимиз шу. Аммо бандамиз — иссиқ жон — қачон омонатини олади, билмаймиз. Бу ёқда эса, ундан дарак йўқ. Айтган ҳамма муддату муҳлатлари ўтиб битди.

— Узоқнинг иши, кўпам қайғураверманг, — дедим таскин бериб.

— Шундай-ку, бу ёқда айтган гапию қолдирган омонати бор, болам.

— Омонатки, хатларми?— дедим ичим ғурмишлаб. Чунки аввалги гал бир чеккасини очгандай бўлиб эдилар.

— Шунга ўхшашроқ... Ўғлим бояқиши унга кўрсатолмай Сизга қолдирган нарсалар шекилли.

— Буви маҳзун тортиб, енгларини мижжаларига босдилар ва шу ўтирган куйлари сал қайрилиб ёстиқлари қатидан рўмолчага ўроғлиқ бир нарса олдилар. — Мана, ўша нарса, ўқисангиз биларсиз. Фақат бояқишигинага билдиримай турақолинг. Ўзининг ғами ўзига етарли.

— Бўлмаса-чи, секинроқ айтасизми, — дея олдим мен шошиб. Аммо ўзим, ич-ичимдан бир қалтироқ туриб, аёзда қолган одамдай титраб боряпман: нима бало, акамнинг кеннойимга аталган мактублари эканми, дейман нуқул. Омонатни ҳам қўлим титраб, зўрга олдим. Қандай

туриб, қандай чиқдим, нималар деб у кишига тасалли бердим, ёдимда йўқ. Эс-хушим акамдаю сочми, мушк исими ўтириб қолган қўлимдаги нарсада эди. Уни киссамга солиб-да, Олим акамгаю бошқаларга хотиржам кўринишга уринсам-да, ўзимга келолмасдим. Минг уринмай хаёлим у омонат хатларга қочиб-қочиб кетаверар, бедарақ акамнью манави мусофири кеннойимнинг тақдири кўз олдимга айланиб-айланиб келаверар эди.

Уйга келибоқ, хазина топган одамдек ичкарига кириб олиб, омонатни очсан... чиндан ичим қуриганича!.. Улар — Чаман акамнинг икки оғиз илтимосию Султонмурод акамнинг Махфуз кеннойимга аталган хати бўлиб чиқди.

— Ҳаҳ, — дедим ичим ёниб, — бу омонатнинг эгаси шундай ёнгинасида яшаб туриб, нечук ўзига беролмабди? Аяганми ва ё азбаройи ачинганидан бермай қўя қолганми? Нимага лозим кўрмабди? Ютоқиб ўқий бошладим. Чаман акам ўша бир энликкина хатида ёзарди:

«*Мақсуд, ўзинг кўп фаросатли йигитсан. Бу омонат хатларни аввал бошдаёт ўзингга ташлаб кетавермаганимни тушуниб оларсан. Ҳар нарсанинг давоси вақт. Щу жумладан, айрилиқнинг ҳам. Яна Оллоҳ билади, буларнинг тақдирини рўзи азалда қандай битганини. Лекин барибир, хатни мушфиқа кеннойингга беролмадим. Мавриди эмас, ўз дарди ўзига етади, деб ўйладим. Тузалиб олгунича ярасини янгиламаганимиз маъқул. Агар сафарим чўзилиб кетса, бу нарса ўзингда туратурсинми, деб ўйладим. Балки омадим чопиб, аканг-нинг изини топсан (янги маълумотлар ҳам йўқ эмас) у хатни кўрсатиши керак ҳам бўлмай қолар.*

Оллоҳдан умидим кўп, шояд яхши хабарлар билан қайтсан.

Чаман аканг»

«Айтмоқчи, акангнинг ёлгиз ёдгорига кўз-қулоқ бўлиб тур. Доғда қола кўрма. Уларни сенга, сени Худога топширдим».

Оқ-оппок (ён дафтарми, тақвимми, ишқилиб тўрт томон ҳошиясига ислимий нақш урилган, ҳарқалай хорижники — бизникимас) қофозга таниш имлода битилган хатни ўқимоққа интиқман-у, аммо етишганимда андеша устун келиб, (ҳарқалай бирорга аталган!) журъат этолмай турибман. Бош-кетини ўгириб, ҳар варакнинг бошламасидаги жадвалу ўнгдан чапга битилган бежирим босма ёзуви рақамларни томоша қиляпман-у, тишим ўтса ўлсин агар. Ҳарқалай ҳар бетнинг бошламасига шунаقا жадвалу ёзувлар урилган, бисмиллоси шундай. Лекин буларнинг ҳаммаси ҳам мени хатдан чалгитаётгани йўқ, қайтага ичимни ғурмишлатгандан ғурмишлатяптики, у ёғи йўқ.

Ўртада андиша бўлмаса, аллақачон уни бир чеккадан ютоқиб ўқий кетардим. Аммо ўзимни тутиб, кўзимни юмиб ўтирибман. Ўз-ўзимдан сўрайман:

— Ҳаққим борми бу битикларни ўқимоққа?

— Ижозатсиз бирорнинг хатини ўқимоқ — гуноҳи азим, — дейди ичимда ўтириб олган ва мен тасаввур этиб-этолмаётган митти болакай. Кўзимни юмиб, роса тикилсан — ўзим, факат Ёдгордекми, Саритойдек пайтим! (Жудаям луқмон эканман-ку!)

Унга эътиroz билдиromoқчикеc сўрайман:

— Кеннойим, ўша Махфуз кеннойим акамга аталган битикларини менга ишонганда — ўз акам, Султонмурод акам ишонмайдими? Нима, мен бегонаманми? Бу тарихлардан бехабар бўлсан эканки?..

Митти болакай ўрта бармоғини нуқиб пўписанамо қарайди:

— Ҳа, шум! Ҳа, қув! Ўзингизча, йўл (фатво) қи-дирияпсизми? Кетмайди шумлигинг!

— Бўлмаса, нима қиласай? Ичим қуришиб ўтиравурайми шундай?

— Элчи-Чаман aka нима депти? Ўқиб боқ. Ижозат этса, бошқа гап.

Ютақиб Чаман аканинг хатига ёпишаман ва деганларини қайта бошдан ўқий бошлайман.

Воҳ, яна қанақа рухсат керак?! Чаман акамнинг ўзи ўқиб бўлган экан-ку. Ўқимаса кўрсата кўрма, дермиди?

Иккаласи иккимизгаям бирдай азиз-ку?! Керак бўлса, жонимизни беришга тайёрмиз-ку!

Нега бу тарихнинг миридан-сиригача билмаслигимиз керак?!

Шууримдаги митти болакай энди бош чайқаб-чайқаб кула бошлаганди. Гўё қувсан десам, фаросатинг ҳам бало-ку, демоқчи бўларди. Шундан сўнггина акамнинг битикларини ютақиб ўқимоқка бошладим. У ёзар эди:

«Менинг Каъбам — диёрим томон юзланиб, буваларининг юртида кўхлик келин бўлиб ўтирган жамилам Маҳфузага. Бу мен. Сизнинг чин орқадошу тақдирдошингиз Султонмуродман. Мени қон ва олов жсанг-гоҳидан ортмоқлаб бенажот ва беҳуши бир аҳволда олиб чиқишган кезда Сиз ва сизникадагилар најжот фариштасидек тенамда пайдо бўлиб, қирқ кун дуюи-жсонимни қилиб ўтирган эдингизлар. Энди эса, менинг диёримда ўчмас чироғим бўлиб ўтирибсиз экан. Кўриб кўнглим жойига тушди. Шукрки, етиб борибсиз. Оллоҳнинг ўзи қўллабдики, дадангиз айтган одамлар қолиб, бизнинг ишончлув орқадошлиаримиз — холажонларимникуга бориб тушибсиз. Йиғламанг ҳам, сиқтаманг ҳам. Ўзингизни ёлгиз-нотавон ҳис этманг ҳам. Улар менинг онам ўрнида онажонларимдур. Сизни ҳеч қачон ёлгизлатиб қўймаслар.

Тўғри, Тангритоғда адажонисининг эрка ва ойдин қизи билиб юрган Сиздай оғача хоним, бор-йўги бир хафталик келинтошишага бошқа ерда бошқа ватан тутмоқ, мусофиригинага айланиб қолмоқ осон эмас. Лекин сиз қай юртга келин бўлиб тушганингизни унумтманг. Сиз у диёрга бегона ҳам, мусофири ҳам эмассиз. Ўз ота-буваларингиз юрти у. У юрт, у диёрга етолмаётганлар қанча, тушиларида кўришга зор-интизор ватанжудолар қанча! Шукр қилинг худованди каримга, қолган дуоларингизни ҳам ижобат этсин.

Мен эсам, мен эсам бу олис юртга — Сиз тугилиб, оталарингиз паноҳ топган диёрга шон ўхуд шавкат излаб келмаганман. Ўз элимдан топмаган эркуadolatни шу ердан топарманми деб, жисла қурса, шу тоғлар оралигидан, динимиз душманларининг қўли етмас бир жой — бир диёрда одамга одамдек эмин-эркин, ўз ҳақ-ҳуқуқини таниб, Оллоҳ ризолигини топиб яши имконини бергувчи бир жамият қура олармизми деб келганман. Шу ниятда Ҳозиқ тўрам жанобларининг лашкарларига бу томондан қўшилишига уриниб ётган эдик. Аммо қай бир ҳаракат ва феълимиз Оллоҳга хуши келмадики, ўша қўли калта деб ўйлаган баттот душманларимиз у кишини бир кечада ўгирлаб кетиб, биз кўз тиккан лашкар ҳамда озод Ватан кишиларини етим қилиб кетдилар.

Бир хонадон ўз эгасини йўқотса, оилани отадан жудо этсалар қанча одам алам-армонда қолади-ку, бу ерда ҳалқ, лашкар ўз сарбонини йўқотиб қўйган эди. Улар шунаққиб озодликнинг юрагига ханжар урдилар. Унга қўшиб иймонимизни сугириб олмоқчи бўлдилар.

Ва биз ҳам бир кеча етти отлиқ — етти ботур Оллоҳга таваккул айлаб, довон ошмоқча ва сарҳаддан ўтмоқча жазм этдик. Ниятимиз ёлгиз Оллоҳга ўзимизга аён эди.

Кўзи боғланиб, отга ўнгарилган асиримиз эса ўзи қаерга олиб кетилаётганини билмас, титирчилаш шовқин кўтарай деса, қўл-оёғи чандиб ташланган, оғзида латта эди.

Уни тоз оралигидаги ўрмонлиқча қадар шу алпозда олиб бориб, сўнг булоқ сувидан ичмоқчаю таҳорат олмоқча рухсат этдик. Асири титраб-қақшар, гўё биз ҳукмни ижро этгани келганмиз-ку, дор олдидан унга икки ракат намоз ўтамоқча ижозат этиладигандек. Ўзига келсин деб имконият бердик:

— Ҳозир пешинни ўқигаймиз, Сиз ҳам бизнинг имомга иқтидо қилиб намозга ўтгайсиз. Сизга зулм қилмоқчи эмасмиз, — дедик. Шундагина унинг юзига қон югурди.

Намоздан сўнг тамадди қилиб олиб, яна йўл тадоригини кўра бошладик. Ва шу асно бандимизга ниятни маълум этдик.

— Танланг, — дедим мен шарт қўйиб, — ё биз билан кетиб, шартимизга қўниб, тирик қоласиз, ё алвидо айтиб, лошингиз шу ўрмонда қолгай! Иккисидан бири. Қайбири маъқул?

Асиримиз муқаддам тўрамнинг хос табиблари эди, у жанобга бир томчи сувдек ўхшаб, баъзан у киши бетоб пайтларида қўшишоқ — ўриндошлик вазифасини ўтар, билмаганлар тўрам

деб қулоқ тутаверар эканлар. Бизга худди шуниси керак эди. У ёги сир эди.

— Ўлгунча эсдан чиқмайдиган бир иш қилаильк. Шунга сиз қўниб берсангиз, бас. Бир одамнинг ўрнига бир кеча-кундуз уй қамогида туриб берасиз. Кейин орқамиздан етиб оласиз, — дедик.

Гурури ўзига етгунча экан:

— Миллатим учун, у киши учун лозим бўлса, жоним фидо бўлсин. Ахийригача ҳам туриб бергум. Жиҳод-ку бу! — деди.

Биз десак, биздан ёвқурроқ чиқиб қолди у. Ҳа, Маҳфузам, ҳар иш ниятга боғлиқдир. Бўйбастда, сувратда, шакл-шамойилда Маршал тўрамдан бир туки кам бўлмаган ўша одам ёлгиз шу сўзи ила Оллоҳ розилигини топган, жаннат боғчаларидан ўзига жой ҳозирлаб қўя олган эди. Унга ҳавас қилмоқ мумкин эди. Негаки жиҳодни сидқ ила ният этмоқнинг ўзи — илоҳий жаннатга кирмоқ ҳуқуқини бергай. Рафиқам, биз ҳам ана шундай жиҳодга — тозлар оралигидан сарбонидан айрилиб етим қолган мамлакатни асрароққа, сарбони билан бирга ўғирланган эркиимонини қайтариб олмоққа отланган эдик. Маҳфузам, ҳаётда шундай онлар бўладики, ҳамма нарса — умр, мол-мулк, дунё ҳою ҳаваслари барчаси ўткинчи экани, фоний экани аниқ-равишан кўриниб қолгай. Ёлгиз бир нарсагина яшаига арзирли эканини англаб қолгайсан, билиб қолгайсан, киши. У ҳам бўлса жиҳоддир — Оллоҳ ризолигини топиб яшамоқдир. Шунинг учун ҳам биз аждаҳо комига қўрқмай кириб бормоққа жазм этгандик ва бунда ёлгиз Оллоҳга таваккул қилиб, сарҳад ошиб боргандик.

Тўрттамиз сарҳадда қолиб, тўрттамиз (биз энди саккиз киши эдик, асримиз-да, бизнинг сафимизга қўшилган эди!) манзилга — тўрамнинг зиёратларига — у кишини уй қамогига жойлашишишган жойга қараб бормоқда эдик. Тун-кечалаб отлиқ юриб, тонг-саҳар Қибрайга кириб бордик ва отларимизни шиончлув жойда қолдириб, у ёгига бозорга тушган анжсанлик дехқонлар сиёқида — ҳаммамизнинг қиёфамиз бир хил — қора лас чопону чуқур «анжсан» нусха дўппида ва ҳам белбоғ — чорсида эдик. Яна узоқдан касал кўргани келаётган одамлардек бир олам бозор-ўчар қилиб олганмиз.

Кўймасликлари ҳам мумкин экан. Лекин тўрамнинг анжсанлик хешларига мурувват қилишиди. Ҳарқалай узоқдан келибсизлар деб. Албатта, эшик огаси — қоровул амакининг олдига мозорбосди нарсалар тўкиб ташлангач, у ҳам ийиб кета қолди.

Шундай қилиб, Оллоҳ мушкулларимизни осон этиб, тўрамнинг олдиларига кириб борсак, у жаноб ниятимизни эшитиб, ўз сояи-чехрадошлиарини таниб («ие, ҳозиқ тўрам, мен-ку ноилож қолдим, Сизга нима бор бу диёрда?!» деб) қучоқ очиб кўришидилар-у, аммо таклифга келганда... кўнмадилар.

— Мен ўзим кимманки, асл муршиидликни даъво этсам?! Ҳақиқий ҳазратни кўрмоқчимисиз, юринг, — деб мени ичкари бир бўлмага бошладилар ва бир оқ-оппоқ хона эшигини қия очдилар.

Во ажабки, хонанинг ўртасига жойнамоз ташланган ва ўшал гиламча устида оқ-оппоқ бўлиб, тўрамдан бир туки кам бўлмаган бир одам — ҳазратнинг ўzlари нур тўкиб (тасбех ўғириб) ўтирад эдилар.

— Ана, асл боиши, биз ҳам хос табиб... қўшишоқмиз, сувратмиз, холос,— дедилар.

Ана шундай, ҳабибам! Не ниятда келиб, қуруқ қўл ила қайтмоққа мажсбур қолгандик.

Алоҳал чор-ночор хайрлашиб чиқдик. Йигит кишининг аввало сазаси ўлмасин, сазаси ўлсаям, ўйлаган иши пучга чиқмасин. Ҳолимизни тасвирлашга тилим ожиз. Ҳаммамиз бир оғиздан шунча журъат топиб келганда наҳот бўши қайтамиз, дердик. Ахийри субҳи содиқда отларимизни қолдирган ерда учрашимоққа аҳдлашиб тарқалишидик. Ким тақя-чойхонага вақт ўлдиришига, ким тўйиб ухлаб — куч ишемоққа кетди. Мен эсам, отимнинг бошини аввал Калковуз томон, сўнг она диёр Каттабоғ томон бурдим. Ҳар нарсадан воқиф менинг қиёматли оинам — Чаман (ҳа, ўша мен Сизга қийин кунда қидириб бормоқни лозим кўрган оинам!) Сиз қай гўшида эканингиз хабарини берди. Ва мен ўша сутдек ойдин кечада ойдан тушгандек

хўзурингизга кириб бордим. Буни ўша кеча шунча сўраганингизда ҳам айтмагандим. Энди айтмоқдаман. Негаки, ўша кечаги таширифимдан ҳеч ким воқиғ эмаслигига ва бундан кейин ҳам воқиғ бўлмаслигига ишонтирмоқ эдими, ҳозир ўзим ҳам яхши билмайман. Балки Сизга эркалик қилгим келгандир, ялинтирмоқчи, шу билан ёдингизда кўпроқ қолмоқчи бўлгандирман. Ўшанд... ўзим Сиз биланман-у, ариши аълодаман-ку, ора-чира туриб-туриб ич-ичимдан аламми, бир нарса қайнаб кела бошларди. Бир чеккаси шундан-шу ёққа беҳуда келмаган эканмиз, деб, Сизни топганимдан Оллоҳга шукроналар айтсан, бир чеккаси алам гашлиги ўртарди. Не ниятда келиб, бўши қўл ила қайтажагимиз эсимга тушиб, ўзимни ўзим ёмон кўриблар кета бошлардим. Маҳфуз, мени тушунинг: Биз ёлгиз Оллоҳ розилигини истаб, шу ишга жаҳд этгандик. Шу йўлда қурбон бўлиб кетишга ҳам тайёр эдик. Лекин на қурбон бўлдик, на бир нарсага эришидик! Бундан бошдан-да айрилганимиз авло эди! Негаки, у ҳолда ҳам, бу ҳолда ҳам ниятга еттардик. У ҳолда шаҳид кетиб, бу ҳолда эса, эрку иймонни қайтариб олиб! Ҳозир-чи, нимага эга бўлмоқда эдик?!

Ўша субҳи содиқда — Сиз билан пинҳон хайрлашган чоғда тилим Сиз учун ширин сўзлар маржонини термакда бўлса-да, дилим аламдан сим-сим ачишар ва қон ишилар эди. Биз Тангритоғга қай юз билан боришини билмасдик. Бизнинг ниятимиздан ҳеч ким воқиғ бўлмаса-да, у Оллоҳга аён эди-ку. Жиҳодни тилга олиб, нега унинг учун жонни жабборга бериб бўлса-да, уни поёнига етказмадик?! Мана шугина — Оллоҳ ризолигини топадиган ишни уddalamай қайтаётганимиз юрак-багримизни ўртаб бормоқда эди.

Ой «Ака дийдор қиёматга қолди, мен Маккага ўтиб кетгайман» деб кетганча дараги ҳам, хабари ҳам келмаган Ислом тогамнинг болохоналари устида осмоннинг ёлгиз кўзилик кумуш нуқраларини беармон сочиб ётар, жиндек кечиксам, бозорчилар ҳам уйгониб қолишар, мен эсам, келишилган мазгилимга етиб боролмасдим. Аммо ой нурларига чўмиб ётган Изза сойларию унинг икки ёқ бетларидан, Каттабогнинг бир сирли мудраган олачалпоқ bogлари — нокзору ёнгоқзорларидан, анҳор ёқалаб кетган тупроқ кўчасидан, сизлар қолаётган ҳовлиниг тупроқ томларидан кўз узолмасдим. Кетмасам бўлмасди. Юрагимнинг бир чеккаси узилиб қолаётгандек эди. Яна қачон қайтаман? Умуман, қайтиши насиб этадими-йўқми, ёлгиз Оллоҳ билади.

Мендан бўлак одам бўлса, балки кетишдан ҳам кўра қолишини афзал кўриб қолармиди. Лекин мен... кетмасам бўлмасди! Жиҳод деб сарҳад ошиб келган шерикларим бор, субҳи-садиқда кўришгаймиз деган ваъдамиз бор, сўзим бор эди! Етиб бормаслигим мумкин эмасди! У ёқда эса, Тангритоғда эса, бизга кўз тикканлар қанча эди. Биз ботурларки, тинчимизни кўзлаб ҳар ён тарқаб-тарқаб кетаверсак, эрнинг эрлиги қолгайми? Бизки ўз ҳузури-жонимизни ўйлаб кета боиласак, элнинг ҳоли не кечгай?

Бу ниятимиз Оллоҳга хуши келмаган эса, бошқаси хуши келгай! Мақсад Оллоҳ ризолигини топмоқ экан, нега қайта бошдан ўзига таваккул қилмайлик. Бирон йўл — најсот йўлини ўзи кўрсатар, ахир?!

Етиб борсам, шеригим типирчилаб турибди.

— Қани бошқалар?

— Кетишди, отингни қиста, омад чопди, — дейди.

— Қандай омад?! — дедим бир ўртаниб.

(Маҳфуз, эшиятисизми, бизга омад кулиб боқибди!)

Шеригим отини қистаб, калта жавоб қилди:

— Улар қилган ишни биз қилолмаймизми? Тўрамни ўғирлаб чиқдик. Элчин ботур у кишини олиб, жўёнаб кетди! — дейди.

— Табиб-чи, Тўрамнинг ялакатлари? — дедим ичим шиғ-ғ сидирилиб.

— Қолди, эрта-индин орқамиздан етиб боргай.

Мен пандавақи шу гапга ишониб ўтирибман! Улар мен йўлдалигимдаёқ бошқа режсани

*түзиб қўйшишган экан!*

Тўрамнинг ялакатларини «сен тўрамдан қаеринг кам, ўзинг лашкарга бош бўласан, қолган вилоятларни ҳам озод этамиш, ана шу йўл билан Оллоҳ ризолигини топамиш», деб ишонтириб қўйган эканлар.

Э, воҳки, менга буни жуда кейин, гишт қолипдан кўчгандан сўнггина айтшиди.

Ёлғон — ёлғон-да, қачон ростнинг ўрнига ўтибди!

Соя — соя-да, асл асл-да! Ҳамма ҳам тўрам бўлаверибдими!

Мана бугун ёғийдан зарба еб, тўзиганча тўзиб, етти дўст — етти ботур аранг Музтоққа бош олиб чиқиб кетмоқдамиш. Ялакат «тўрам»-да биз билан...

Маҳфузам, Сиз менинг йўқотиб топганимсиз. Нажот фариштамсиз. Тирик қолсам, Оллоҳнинг ёлғиз Сизга раҳмат-марҳамати туфайлигини омон қолмоғим мумкин бу машаққатли довон — Музтогдан ошиб ўтмакда. Ҳар не бўлганда ҳам саҳарларда ёлғиз Ўзидан сў-рангки, бизни ора йўлда қолдирмасин. Ё голиб этсин, ё шаҳид!.. Биз диёрларидан қувилганлар ё голиб бўлиб, динимизни, шариатимизни бу тозларда лахча чўгдек асраб қолайлик, ё шаҳидлик шаробини тотиб кетгайлук-да, жаноби Ҳақнинг ризолигига эришайлук.

Маҳфузам, ёлғиз ўтинчим, ўғил кўрсангиз ўшал ваъдангизга биноан, исмини — Ёдгормурод қўйгайсиз. Яна бир рижом: ёлғиз қолганда Каломуллоҳнинг бизга аталган ояtlарини (Оли Имрон-195) ўқиб тургайсиз. У сизга юпанч ва мадад бергай, ишишаллоҳ!»

\* \* \*

Мактуб мана шу варакда узилган эди.

Чаман акамнинг топгани ва ҳеч кимга кўрсатмай келаётган нарсаси шугинамиди ёки яна борми — буни билмасдим.

У акамнинг хасмини ёмон қўз-ёмон сўзлардан, тухматчию маломатчиларнинг маломатларидан асраб, Ойтўра бувининг бағрида олиб ўтирганининг ўзи ҳар қанча таҳсинга лойиқдир. Оғир кунда дардига малҳам бўлаётгани камдек яна ошнамнинг дарагини топдим деб излаб кетгани-чи? Биз ҳам юрган эканмиз-да. Жигаримизнинг тақдирига ачинишдан нарига ўтмай! Ахир мендан лозим эмасмиди, ишхонамдан ўша юртларга руҳсатнома олиш, Султонмурод акагинамнинг дарагини излаб кўриш?

Бошига не кўргиликлар тушганда ҳам тош келса кемириб, сув келса симириб, миқ этмайин ҳамон уни кутиб ўтирган кеннойим ҳаққи-хурмати, Ёдгормуродимиз — томиришимизнинг томири ўша той бола учун ҳам мен сафарга отланмоғим керак эмасми?!

Чаман акачалик ҳамиятим, ғурурим йўқми?

Олим акам-чи, у нега жим?

Қачон одам бўламиш?..

Умуман, биз бечораларга хорижга йўл борми? Ёки ҳаж йўли сингари у ҳам беркми?..

Мурод дорам — умидим бор Султонмурод акамдан дарак топмоққа, ўзини кўрмоққа. Оллоҳдан ёлғиз сўраганим шу.

Шояд, барояд ё раб, жавоби берилса...

5 ўқтабир, 2002 йил.